

SC.19.Pl.7.



37  
29 A  
11





Ex Libris Anthony Harding

MAG 173





DE  
**SACRAMENTIS**  
NOVÆ LEGIS  
DISSERTATIONUM THEOLOGICARUM  
LIBRI OCTO  
QUOS

IN UNIVERSITATE VIENNENSI  
AUDITORIBUS SUIS EXPOSUIT  
**NICOLAUS MUSZKA, e. S. J.**  
SS. THEOLOGIÆ DOCTOR, EJUSDEMQUE PROFESSOR  
PUBLICUS, ET IN SACRA FACULTATE CÆSAREO-  
REGIUS EXAMINATOR JURATUS.

TOMULUS ALTER CONTINENS

L. IV. de SS. Eucharistia.

L. V. de Poenitentia.

L. VI. de Extrema Unctione.

L. VII. de Ordine.

L. VIII. de Matrimonio.



VIENNÆ AUSTRIÆ,  
TYPIS JOANNIS THOMÆ TRATTNER, CÆS. REG. AULÆ  
TYPOGR. ET BIBLIOP. 1755.



# LIBER IV.

## *De SS. Eucharistia.*

**I**n SS. hoc Mysterio summa Theologicæ disceptationis capita sunt: ipsa primum Eucharistia secundum se generatim spectata, ratio dein in ea Sacramenti, tum & ratio Sacrificii. Complectemur hæc omnia Dissertationibus quinque. I. erit de Eucharistiæ generatim sumptæ Natura & Institutione. II. de Eucharistiæ, ut ea speciatim Sacramentum est, Natura, Effectibus, & necessitate. III. de Sacramenti Eucharistiæ Ministro & Subiecto. IV. de Eucharistia, ut Sacrificio. V. demum de Cæremoniis ad Eucharistiæ Sacramentum, & Sacrificium pertinentibus. Ante Dissertationes referemus argumenti hujus Canones ex Concil. Tridentino: præcipua item ex aliis Oecumenicis Conciliis Decreta: tum Propositiones damnatas.

### CANONES CONCILII TRIDENTINI.

*Ex Decreto Sessionis XIII. de SS. Eucharistiæ Sacramento.*

**I.** **S**i quis negaverit in sanctissimæ Eucharistiæ Sacramento contineri vere, realiter, & substantialiter, corpus & sanguinem una cum anima, & divinitate Domini nostri JESU Christi, ac proinde totum Christum; sed dixerit tantummodo esse in eo, ut in signo, vel figura, aut virtute; anathema sit.

**II.** Si quis dixerit in Sacrosancto Eucharistiæ Sacramento remanere substantiam panis, & vini, una cum corpore & sanguine Domini nostri JESU Christi; negaveritque mirabilem illam, & singularem conversionem totius substantiæ panis in corpus, & totius substantiæ vini in sanguinem, manentibus duntaxat speciebus panis & vini; quam quidem conversionem, Catholica Ecclesia aptissime Transubstantiationem appellat; anathema sit.

*R. P. Muszka Tomul. II. de Sacram.*

Λ

**III.** Si

III. Si quis negaverit, in Venerabili Sacramento Eucharistiæ sub unaquaque specie, & sub singulis cujusque speciei partibus, separatione facta, totum Christum contineri; anathema sit.

IV. Si quis dixerit, peracta consecratione in admirabili Eucharistiæ Sacramento non esse corpus & sanguinem Domini N. J. Christi, sed tantum in usu, dum sumitur, non autem ante, vel post: & in hostiis, seu particulis consecratis, quæ post Communionem reservantur, vel supersunt, non remanere verum corpus Domini; anathema sit.

V. Si quis dixerit, vel præcipuum fructum sanctissimæ Eucharistiæ esse remissionem peccatorum, vel ex ea non alios effectus provenire; anathema sit.

VI. Si quis dixerit, in sancto Eucharistiæ Sacramento Christum Unigenitum DEI filium non esse, cultu Patriæ, etiam externo, adorandum; atque ideo, nec festiva peculiari celebritate venerandum, neque in processionibus secundum laudabilem, & universalem Ecclesiæ sanctæ ritum, & consuetudinem solenniter circumgestandum, vel non publice, ut adoretur, populo proponendum, & ejus Adoratores esse idololatras; anathema sit.

VII. Si quis dixerit, non licere sacram Eucharistiam in sacrario reservari, sed statim post Consecrationem adstantibus necessario distribuendam, aut non licere, ut illa ad infirmos honorifice deferatur; anathema sit.

VIII. Si quis dixerit, Christum in Eucharistia exhibitum, spiritualiter tantum manducari, & non etiam sacramentaliter, ac realiter; anathema sit.

IX. Si quis negaverit, omnes & singulos Christi fideles utriusque sexus, cum ad annos discretionis pervenerint, teneri singulis



singulis annis; saltem in Paschate, ad communicandum, juxta præceptum sanctæ Matris Ecclesiæ; anathema sit.

X. Si quis dixerit, non licere Sacerdoti celebranti, seipsum communicare; anathema sit.

XI. Si quis dixerit, solam fidem esse sufficientem præparationem ad sumendum sanctissimæ Eucharistiæ Sacramentum; anathema sit. Et, ne tantum Sacramentum indigne, atque ideo in mortem & condemnationem sumatur; statuit, atque declarat ipsa sancta Synodus, illis, quos conscientia peccati mortalis gravat, quantumcumque etiam se contritos existiment, habita copia confessoris, necessario præmittendam esse Confessionem Sacramentalem. Si quis autem contrarium docere, prædicare, vel pertinaciter asserere, seu etiam publice disputando, defendere præsumpserit, eo ipso excommunicatus existat.

*Ex Sessione XXI. de Communionem sub utraque specie,  
& parvulorum.*

I. **S**i quis dixerit, ex DE I præcepto, vel necessitate salutis, omnes & singulos Christi fideles utramque speciem sanctissimi Eucharistiæ Sacramenti sumere debere; anathema sit.

II. Si quis dixerit, sanctam Ecclesiam Catholicam non juris causis, & rationibus adductam fuisse, ut Laicos, atque etiam Clericos non conficientes, sub panis tantummodo specie communicaret, aut in eo errasse, anathema sit.

III. Si quis negaverit, totum, & integrum Christum, omnium gratiarum fontem, & autorem sub una panis specie sumi, quia, ut quidam falso asserunt, non secundum ipsius Christi Institutionem sub utraque specie sumatur; anathema sit.

IV. Si quis dixerit parvulis, antequam ad annos discretionis pervenerint, necessariam esse Eucharistiæ communionem, anathema sit.

*Ex Sessione XXII. de Sacrificio Missæ.*

I. **S**i quis dixerit, in Missa non offerri Deo verum, & proprium Sacrificium, aut quod offerri, non sit aliud, quam nobis Christum ad manducandum dari; anathema sit.

II. Si quis dixerit, illis verbis, *Hoc facite in meam commemorationem*, Christum non instituisse Apostolos Sacerdotes: aut non ordinasse, ut ipsi, alique Sacerdotes offerrent corpus, & sanguinem suum; anathema sit.

III. Si quis dixerit, Missæ Sacrificium tantum esse laudis, & gratiarum actionis, aut nudam commemorationem sacrificii in cruce peracti, non autem propitiatorium: vel soli prodesse fumentis: neque pro vivis & defunctis, pro peccatis, poenis, satisfactionibus, & aliis necessitatibus offerri debere; anathema sit.

IV. Si quis dixerit, blasphemiam irrogari sanctissimo Christi sacrificio in cruce peracto per Missæ sacrificium, aut illi per hoc derogari; anathema sit.

V. Si quis dixerit, imposturam esse Missas celebrare in honorem Sanctorum, & pro illorum intercessione apud Deum obtinenda, sicut Ecclesia intendit; anathema sit.

VI. Si quis dixerit, Canonem Missæ errores continere, ideoque abrogandum esse; anathema sit.

VII. Si quis dixerit, cæremonias, vestes, & externa signa, quibus in Missarum celebratione Ecclesia Catholica utitur, irritabula impietatis esse magis, quam officia pietatis; anathema sit.

VIII. Si quis dixerit, Missas, in quibus solus sacerdos sacramentaliter communicat, illicitas esse, ideoque abrogandas; anathema sit.

IX. Si

IX. Si quis dixerit, Ecclesiæ Romanæ ritum, quo submissa voce pars canonis, & verba consecrationis proferuntur, damnandum esse, aut lingua tantum vulgari, Missam celebrari debere, aut aquam non miscendam esse vino in calice offerendo, eò quod sit contra Christi institutionem; anathema sit.

## D E C R E T A A L I O R U M C O N C I L I O R U M.

*Ex Nicæno I. An. 325. Can. 18.* Pervenit ad sanctum Concilium, quod - - Presbyteris gratiam sacræ Communionis porrigant Diaconi, quod nec regula nec consuetudo tradidit, ut ab his, qui potestatem non habent offerendi, illi, qui offerunt, Christi corpus accipiant.

*Ex Ephesino An. 431. quod ex Cyrilli Alexandrini Epistola ad Nestorium data, hæc verba (ut legitur in ejus par. 1.) recitat, & approbat.* Confitemur incruentum in Ecclesia sacrificium nos celebrare, atque ad mysticas eulogias, seu benedictiones accedere, & sanctificari; utpote participes sacræ carnis, & pretiosi sanguinis Christi. *Ex illis deinde Joan. 6.* Nisi manducaveritis &c. *probat carnem illam esse propriam ac veram Christi carnem.*

*Nicanum II. An. 787. Act. 6. referente Epiphanio Diacono:* Nullus, *inquit*, aliquando - - Apostolorum, aut illustrium Patrum nostrorum incruentum sacrificium nostrum, quod in commemorationem Christi DEI nostri - - efficitur, dixit imaginem corporis ejus. Neque enim acceperunt à Domino sic dicere & confiteri; sed audiant evangelice dicentem eum, *nisi manducaveritis* &c. & non dixit: accipite & comedite imaginem corporis mei.

*Ex Lateranensi IV. An. 1215. Can. 1. relato Cap. firmiter de sum. Trin.* Una est fidelium Ecclesia, - - in qua idem ipse

Sacerdos est sacrificium JESUS Christus: cujus Corpus & sanguis - - sub speciebus panis & vini veraciter continentur, transubstantiatis pane in corpus, & vino in sanguinem potestate divina &c.

*Idem Concilium ibid.* Hoc Sacramentum, *inquit*, nemo potest conficere, nisi sacerdos, qui rite fuerit ordinatus.

*Constantiense An. 1415. sess. 13. contra Joannem Hus ap-  
probans Laicorum sub sola panis specie communionem, ita desti-  
nit:* Cum hujusmodi consuetudo ab Ecclesia & SS. Patribus rationabiliter introducta, & diutissime observata sit, habenda est pro lege, quam non licet reprobare, aut sine Ecclesiæ auctoritate pro libito mutare. *Addit dein non multo post, totum & integrum Christum sub una tantum specie contineri &c.*

*Idem Sess. ead.* Sacrorum Canonum autoritas laudabilis, & approbata consuetudo Ecclesiæ servavit, & servat, quod hujusmodi Sacramentum non debet confici post coenam, neque a fidelibus recipi, non jejunis, nisi in casu infirmitatis, aut alterius necessitatis &c.

*Florentinum An. 1439. in Decreto Eugenii pro Armenis de Eucharistia agens,* Forma hujus Sacramenti, *inquit*, sunt verba Salvatoris, quibus hoc conficit Sacramentum. Sacerdos enim in persona Christi loquens, hoc conficit Sacramentum: nam ipsorum verborum virtute, substantia panis in corpus Christi, & substantia vini in Sanguinem convertuntur.

*Idem in eod. Decret. materiam Eucharistia necessariam assignans, ait,* eam esse panem triticeum, & vinum de vite. *Et infra:* definimus, *inquit*, in azymo, sive fermentato pane triticeo corpus Christi veraciter confici; sacerdotesque in alterutro ipsum Domini corpus conficere debere, unumquemque scilicet, juxta suæ Ecclesiæ Occidentalis, sive Orientalis consuetu-

fuetudinem. *Item*: Armeni se cum uniuerso Orbe Christiano conformant, eorumque sacerdotes in Calicis oblatione paululum aquæ admisceant vino.

## PROPOSITIONES DAMNATÆ.

### *De Sacramento Eucharistiæ.*

*Ab Innocentio XI. Prop. LV.* Præcepto Communionis annuæ satisfit per sacrilegam Domini manducationem.

*LVI.* Frequens Confessio & Communio, etiam in his, qui gentiliter vivunt, est nota prædestinationis.

*Ab Alexandro VIII. Prop. XXIII.* Arcendi sunt à sacra Communione, quibus nondum inest amor Dei purissimus, & omnis mixtionis experts.

### *De Sacrificio Missæ.*

*Ab Alexandro VII. Prop. VIII.* Duplicatum stipendium potest sacerdos pro eadem Missa licite accipere, applicando petenti partem etiam specialissimam fructus ipsimet celebranti correspondentem, idque post Decretum Urbani Octavi.

*IX.* Post Decretum Urbani potest sacerdos, cui Missæ celebrandæ traduntur, per alium satisfacere, collato illi minore stipendio, alia parte stipendii sibi retenta.

*X.* Non est contra iustitiam pro pluribus sacrificiis stipendium accipere, & Sacrificium unum offerre. Neque etiam est contra fidelitatem, etiamsi promittam, promissione etiam iuramento firmata, danti stipendium, quod pro nullo alio offeram.

## DISSERTATIO I.

## DE SS. EUCHARISTIÆ IN GENERE NATURA ET INSTITUTIONE.

## §. I.

*Quid Eucharistiæ nomine veniat ?*

**P**eculiaris ea est Eucharistiæ prærogativa, quod non modo gratiam (quod omnibus Sacramentis commune est) conferat: verum etiam ipsum, omnis gratiæ auctorem Christum contineat; inde, Sacramentum hoc, esse dignitate primum, & reliquis excellentius, dubitari nequit. Ejusdem veritas adeo certa est, ut ne Novatores quidem, tametsi Divinissimorum Mysteriorum hostes acerrimi, e numero Sacramentorum Eucharistiam expungere ausi fuerint. Id vero lugendum! quod hanc ipsam doctrinam multis adeo & gravibus erroribus subinde corruerint, ut in tuenda illa, nomine dumtaxat, non re ipsa cum Orthodoxis consentiant. Errores hos per decursum Libri indicabimus, ac etiam refellemus, opposita simul Ecclesiæ Catholicæ dogmata affirmaturi. Nunc præliminarium instar, referre juverit, primum quidem Figuras, quibus longe ante præsignificatum fuit hoc Mysterium; deinde Nomina ac Elogia, eidem a Patribus attributa; tum definitionem apud Orthodoxos receptam.

## Figuræ &amp; Symbola Eucharistiæ.

1. **I.** Verus Testamentum evolventi occurrent complura, quibus ex mente Patrum voluit Deus figurari Eucharistiam. Hujusmodi sunt: lignum Vitæ in Paradiso plantatum; oblatio panis & vini a Melchisedech facta; panes propositionis, panes item

item primitiarum, & panis subcinericius, in cujus fortitudine Elias ambulavit usque ad montem Dei Horeb: Manna Hebræis in deserto datum. In his certe singulis, si eorum originem & finem, ac effectum attendas, typum Eucharistiæ reperiēs; quæ ipsa est opinio Irenæi, Tertulliani, Hieronymi, Ambrosii, Cyrilli Hieros. &c. Interim

II. Principe inter Eucharistiæ Figuras loco ponendus videtur Agnus Paschalis, ut D. Thom. 3. p. qu. 73. Art. 6. in © notat, ac jam antea, post Hieronymum & Chrysostomum, docuit Augustinus L. 2. contra lit. Petil. C. 37. Nempe in ritu Agni Paschalis cumprimis observanda veniunt: Agnus ipse, qui non modo immolabatur, sed & manducabatur; panis item azymus, cum quo manducandus erat Agnus; hujus dein sanguis, per quem Hebræi a plaga Ægyptiaca liberati sunt. Quæ omnia quidni typum exhibeant Eucharistiæ? cum in ea sub speciebus panis proponatur in cibum Christus, verus Dei Agnus, ita pro nobis occisus, ut sanguinis ejus pretio a dæmonis servitute, quam per peccatum incurreramus, redimeremur.

Prætereo Figuras cæteras; vel ex his autem non obscure colligas excellentiam Sacramenti, ut quod, priusquam constitueretur, totidem velut prænunciis symbolis & argumentis longe jam ante adumbrari ac annunciari Mundo Deus voluerit, quo eum ad tam sublimis Mysterii fidem & reverentiam sensim compararet.

### Varia ejusdem Mysterii Nomina.

I. Commune, tam apud veteres, quam apud nos Sacramenti hujus nomen est *Eucharistia*, a græco videlicet verbo *ευχαριστιν*, quod idem est, ac *gratias agere*; hinc græca vox *ευχαριστια*, latine reddi potest *bona gratia*, vel *gratiarum actio*. Appellationis autem huius causa est, quod Sacramentum hoc gratiarum omnium fontem & auctorem Christum contineat:

R. P. Muszka Tom. II. de Sacr.

B

quod.

quodque in nobis memoriam cumprimis excitet divinorum beneficiorum: nec denique illo quidquam Deo acceptius sit ad gratias pro beneficiis referendas. *Propterea*, inquit Chrysostomus Hom. 25. in Matth. tremenda ac salutaria illa *Mysteria* - *Eucharistia* vocantur, quia multorum beneficiorum sunt recordatio, ipsumque caput divinae erga nos providentiae ostendunt, nosque præparant, ut in omnibus gratias agamus.

- 4 IL Quod vero ad alia ejusdem Sacramenti nomina attinet, plurima, eaque illustria omnia passim occurrunt apud Patres; qui nominibus variis, ceu totidem elogiis, Mysterium hoc exornantes, abunde indicarunt, quo loco illud haberent, quidque de natura ejus ac efficacia sentirent. Hujusmodi nomina sunt: *Sacramentum corporis ac sanguinis Christi*, *Sacramentum Altaris*, *Mensa Domini*, *Panis Cælestis* & *Angelorum*, *Alimonia immortalitatis*, *Æternæ Vitæ cibus* & *portio*, *Amor amorum*, *Sanctum Sanctorum*, *Holocaustum salutis*, *Agapa*, *Eulogia*, *Synaxis*, *Cæna*. Ac horum quidem, & his similium partem magnam nominum significatio clarior est, quam ut minutim explanari debeat; de postremis quatuor proinde duntaxat pauca notabimus. Ac

1mo quidem Sacramentum hoc dicebatur *Agapa*, græce ἀγάπη, seu dilectio propterea, quod præcipuum sit tam Dei in nos dilectionis argumentum, quam mutuae inter fideles charitatis symbolum & vinculum. Istic interim & illud observandum: nomine hoc designata fuisse olim ea etiam Convivia, quæ primis seculis ad fovendam dilectionem fraternam, ac reficiendos pauperes in Ecclesia instruebantur, & cum ipsa celebratione Eucharistiae conjungebantur. Meminit eorum Apostolus 1. Cor. 11. ubi simul quorundam abusus carpit, propter quos subinde abrogata sunt, ut legitur Can. 28. Concilii Laodic.

2do dicebatur *Eulogia* a græco εὐλογία, quod est benedicere, hinc εὐλογία, idem ac benedictio, quo ipso sensu Apost. 1. Cor.



1. Cor. 10. loquitur: *calix benedictionis, cui benedicimus, nonne communicatio sanguinis Christi est?* Ut plurimum attamen veteres nomen hoc usurpabant ad significandas eas Eucharistiæ partes, quæ in signum mutuæ communionis ac charitatis ad absentes Presbyteros per Parochias mitti solebant; cujus moris mentionem facit Innocentius I. Ep. ad Decent. & Concil. Laodic. a quo ritus ille Can. 14. abrogatus est. Quin hoc eodem nomine compellabantur etiam illæ partes panis ex oblatione fidelium superstites, quas sacerdos sub divinis officiis benedicebat, ac subinde ad absentes in signum Communionis mittebat, aut etiam porrigebat præsentibus iis, qui ex causa aliqua Eucharistiæ participes esse non poterant, ut habetur apud Dionysium Areop. in Hier. Eccl. C. 3. item in Concil. Laodic. Can. 49. Morem hunc Græci etiamnum ex parte retinent, panesque hujusmodi non tantum *Eulogias*, sed & *Antidora* vocant propterea, quod dentur loco doni, seu Eucharistiæ, quam ipsam dicunt *τὰ ἅγια δῶρα* hoc est, *sancta dona*.

3tio quod græcis *συναγῆς*, hoc nobis est *Congregatio*, seu *Collectio*; inde Latini Eucharistiam modo *Synaxim*, modo *Collectam* dicimus: cujus nominis ratio inde repetenda est, quod ad Mysterii hujus celebrationem ex veteri instituto fideles in unum convenire soleant, imo & participatione ejus in unum veluti corpus mysticum colligantur, juxta illud Pauli 1. Cor. 10. *unum corpus multi sumus, omnes, qui de uno pane participamus*.

4to denique *Cenæ* nomen ipse Apostolus 1. Cor. 11. Eucharistiæ attribuit, *convenientibus in unum*, inquiens, *jam non est Dominicam Cœnam manducare* &c. quod idem exemplo illius (contra, quam putent cum Maldonato nonnulli) fecerunt Patres, ac nominatim Tertullianus, Gregorius Nyssen. Chrysostomus, Hieronymus, & Augustinus tam C. 2. de Sermone Domini, quam Ep. 24. alias 118. Hanc in rem facit testimonium Catechismi Rom. Part. 2. de Euch. ubi N. 5. ita habet:

B 2

vetus-

*vetustissimi Patres, auctoritatem Apostoli secuti, Cœnæ etiam nomine sacram Eucharistiam vocarunt, quod in illo novissima Cœnæ salutari mysterio a Christo Domino sit instituta; quibus verbis & opinio Maldonati infirmatur, & redditur ratio hujus appellationis. Fateor equidem Novatores hoc nomine abuti, cum ex eo inferunt: Eucharistiam celebrari non posse, nisi in congregatione plurium, eandem etiam a non jejunis licite sumi &c. at error eorum obesse non debet, quò minus Cœnæ nomen ad Eucharistiam designandam Orthodoxi adhibeant. Quod illis abusus, nobis sit usus; neque in hoc Novatores, sed Sacras Literas & Patres sequimur.*

### Definitio Eucharistiæ.

*Eucharistia est Corporis & sanguinis Christi sub speciebus panis & vini Sacramentum, ad spiritualem animarum alimoniam & refecionem a Christo institutum.*

5 **E**ucharistiæ igitur nomine Orthodoxi intelligimus *Sacramentum*, seu rem quamdam sensibus subiectam, quæ habetur *per species panis & vini* sensibiles, neque has quaslibet, sed eas dumtaxat, sub quibus continetur *corpus & sanguis Christi*, quod ipsum est illud grande in Eucharistia mysterium. Idem deinde dicimus *a Christo institutum ad spiritualem alimoniam*; quibus verbis significatur & institutio Sacramento propria, & effectus ex Christi institutione soli Eucharistiæ conveniens, ea videlicet sanctificans gratia, qua in Sacramento hoc spiritualiter reficimur, nutrimur, & roboramur.

Sed nempe hæc uberiorem dabunt deinceps differendi materiam; nunc indicasse sit fatis: definitione hac prorsus ad mentem Ecclesiæ naturam Eucharistiæ exponi, ut patet ex doctrina, quam Concil. Trident. Sess. 13 de Sacram. Euch. tradit. Profitetur autem illud hic Cap. 1. Eucharistiæ Sacramento

mento post panis & vini consecrationem Dominum nostrum JESUM Christum, verum Deum, atque hominem, vere realiter ac substantialiter sub specie illarum rerum sensibilem contineri; & Cap. 3. semper hæc fides, inquit, in Ecclesia Dei fuit, statim post Consecrationem verum Domini nostri corpus, verumque ejus sanguinem sub panis & vini specie una cum ipsius anima & divinitate existere; ac jam antea Cap. 2. dixerat, Christum Sacramentum hoc instituisse, voluisseque illud sumi tanquam spirituale animarum cibum, quo alantur & confortentur viuentes vita illius, qui dixit: qui manducat me, & ipse vivet propter me. Confer cum his relatæ definitionis verba, & ad sensum Tridentini exactam reperies.

## §. II.

*An, & quando Eucharistiam Christus instituerit?*

Eucharistiæ naturam explanare præcipuus est labor, quem Dissertatio hæc spectat; ne quid attamen eorum etiam, quæ ad affirmandam tanti Mysterii existentiam faciunt, desideres, libet ante omnia statuere de ejus Auctore, & ipso institutionis tempore. Est nempe quæstionis, quæ hic fieri potest, caput geminum: primum quidem, num per se ipsum Christus Eucharistiam instituerit? deinde, num istud præstiterit post Agnum Paschalem ex Mosaicæ Legis præscripto Luna 14. Mensis Nisan manducatum? De primo non erit, quod multis disceptemus, omnibus in unam sententiam facile conspirantibus; alterum contra litem continet implexam, ac jam diu inter Eruditos magna contentione agitatam, vel ideo autem accuratius pertractandam Theologo, ut Græcis quibusdam pro fermento suo pertinacius pugnantibus possit occurrere. Argumentum controversiæ ut expeditius fiat, prævie notanda

erunt quædam de Paschate Mosaico: recensendæ item de Agno Paschali a Christo ante mortem manducato DD. opinioniones: Assertionibus dein duabus nostram proferemus sententiam.

### Animadversiones de Paschate Mosaico.

6 I. Paschatis nomine venit solemnitas illa Cærimonia, quam jubente Deo Moyses Exod. 12. præscripsit Hebræis, ut agnum videlicet certo ritu immolarent & manducarent, idque in memoriam noctis illius, qua exterminator Angelus *transiit super domos filiorum Israel in Ægypto, percutiens Ægyptios, & domos Israelitarum liberans*; hinc *Pascha*, seu *Phase*, idem est, ac Solemnitas *transitus*. Hæc eadem porro Paschæ solemnitas conjuncta fuit cum solemnitate *azymorum*; agnus enim paschalis manducandus erat cum pane azymo, quo ejus, utpote insipidi, esu admonerentur Hebræi perpeffarum in Ægypto calamitatum, ac *meminissent diei egressionis sue de Ægypto* Deut. 16. Neque hæc dein Israelitarum posteris arbitraria erant; ab omnibus omnino legem Paschatis & Azymorum observandam fuisse docemur ex S. Literis, Exod. 12. v. 14. ita præcipientem Domino: *habebitis hanc diem in monumentum, & celebrabitis eam solemnem Domino in generationibus vestris cultu sempiterno - - - custodi verbum istud legitimum tibi, & filiis tuis usque in æternum.*

7 II. Ad tempus Paschatis quod attinet, celebrandum erat primo Verni temporis mense, Hebræis *Nisan* dicto, ac nostro partim Martio, partim Aprili respondente, a quo Sacrum annum auspicabantur, ipsius Mensis initium ducentes a Novilunio, ita ut idem iis esset prima Luna, ac primus dies mensis: secunda Luna, secundus dies &c. Hujus igitur Mensis Luna 14. ad vesperam manducandum erat Pascha, seu Agnus Paschalis cum pane azymo; quin & præceptum fuit, ut ab hac

hac vespera per dies septem continuos, seu usque ad vesperam diei 21. ejusdem mensis, omnes vescerentur panibus azymis, nec fermenti quidquam apud eos intra hoc tempus reperiretur. Accipe hæc omnia Scripturæ verbis: *Mensis iste (Nisan) primus erit in mensibus Anni, - - decima die mensis tollat unusquisque agnum - - & servabitis eum usque ad quartam decimam diem mensis hujus; immolabitque eum universa multitudo filiorum Israel ad vesperam, - - & edent carnes nocte illa assas igni & azymos panes &c.* Exod. 12. a V. 2. Et rursum Deuter. 16. *Observa mensem novarum frugum & verni primum temporis, ut facias Phasæ Domino Deo tuo, quoniam in isto mense eduxit te Dominus Deus tuus de Ægypto nocte, - - non comedes in eo panem fermentatum; septem diebus comedes absque fermento afflictionis panem, quoniam in pavore egressus es de Ægypto, - - non apparebit fermentum in omnibus terminis tuis septem diebus &c.*

III. Quamvis Paschatis & Azymorum tempus Luna 14. 8 ad vesperam incœperit, ac dein continuis septem diebus perduraverit, horum attamen solemnis ac festivus dies non erat nisi primus, qui videlicet Lunæ 14. vesperam sequebatur, hoc est Luna 15. ac dein ultimus, seu Luna 21. quo utroque die vetita erant opera servilia. En! iterum scripturæ verba: *septem diebus azyma comedetis, - - Dies prima erit sancta atque solemnis, & dies septima eadem festivitate venerabilis; nihil operis* (intellige servilis juxta Lev. Cap. 23. V. 28.) *facietis in eis, exceptis his, quæ ad vescendum pertinent.* Observandum vero isthic: universim Judæis, quamvis Dei mandato Lev. 23. V. 32. dies festos celebrarent a vespera diei præcedentis ad vesperam alterius, atque ita prima etiam vespera ad Festum pertineret, diem tamen Solemnem illis eum dumtaxat fuisse, qui hanc vesperam proxime sequebatur. Ita nominatim, tametsi in vespera diei 14. Paschatis & Azymorum initium

tium fieret, solum nihilominus dies sequens pro solemnī habebatur, ut legere est Num. 28. V. 16. *menſe primo 14. die menſis Phaſe Domini erit, & 15. die ſolemnitas*; item Levit. 23. V. 6. *quinta decima die menſis hujus ſolemnitas azymorum Domini eſt.*

### Opiniones de Paſchate a Chriſto pridie mortis celebrato.

- 9 I. Eſſi communis ac certa ſit ſententia, pridie mortis Chriſtum legale Paſcha manducaſſe; non deſunt attamen, qui iſtud in dubium revocent, aut etiam negent, e veteribus quidem (ut quidam putant) Hyppolitus Portuenſis, Clemens Alexandrinus, Philoponus, Cedrenus &c. e Recentioribus autem, præter quosdam Græcos, item Antonium de Dominis & Hugonem Grotium, Toinardus, Tourneminus, & cumprimis Lamius Orat. Preſb. in Concordia quatuor Evangg. & ruruſum in Tract. de Paſchate Judæorum. Horum igitur opinionē Chriſtus anno vitæ ſuæ ultimo legale Paſcha non celebravit propterea, quod anno hoc Paſchatis tempus, ſeu Luna 14. inciderit in diem Veneris, qua ipſa ante veſperam mortem oppetiit. Neque obſeſſe ajunt, quod Matth. 26. & Marci 14. Apoſtoli prima die azymorum ex Chriſto quaſierint, ubi vellet ſibi parari Paſcha? quodque Chriſtus cum illis ſero jam facto cœnaſſe legatur; exiſtimant nempe his Scripturæ locis per primam diem azymorum intelligi primam veſperam Lunæ 14. ſeu diei Jovis veſperam, qua fermentum nondum abjeſtum fuit, nec legale Paſcha manducari potuit. Inde juxta laudatos AA. 1mo, Apoſtoli pararunt Paſcha, non hac ipſa prima veſpera Lunæ 14. ſeu die Jovis, ſed altera dumtaxat, ſeu veſpera diei Veneris a Chriſto manducandum, qua tamen deinde, morte præventus, illud non manducavit; 2do Coena illa, quæ Chriſto cum Apoſtoliſ fuit ultima, non erat Paſchalis, verum communis tantum & ordinaria, in qua fermentato adhuc

huc pane uti licuit; ex quo ultro sequitur 3<sup>io</sup>, cum Christus in hac ultima Cœna Apostolis Eucharistiam porrexerit, eam fuisse ab illo, non in azymo, sed fermentato pane consecratam.

II. Opinio altera, quam Nicephorus L. 1. Hist. C. 28. tra-  
dit, & e Græcis Schismaticis tuentur plurimi, admittit quidem  
Christum legale Pascha celebrasse: at non legali tempore.  
Cum enim (ut isti rursus contendunt) anno mortis Christi le-  
gale tempus Paschatis & Azymorum, seu Luna 14. in diem  
Veneris incidit, hocque die cruci se affligendum Christus  
præviderit, legale hoc tempus antevertit, agnumque Pascha-  
lem cum azyn is pridie mortis, hoc est Luna 13. ad vesperam  
diei Jovis manducavit. Addunt vero isthic Patroni hujus  
opinionis: Christum post Pascha ex ritu legis cum pane azymo  
celebratum, cœnæ alteri vulgari accubuisse, atque in hac in  
pane fermentato, quo adhuc tum vefci licebat, Eucharistiam  
instituisse.

III. Recepta demum communiter sententia est, Christum  
eo etiam, quo mortuus est, anno Paschalem agnum manducasse  
legali tempore, vespera videlicet illa, qua jam coepit Pascha &  
usus azymorum, vetitumque erat fermentum. Quæ quidem  
opinio si obtineat, non erit jam dubio locus de Eucharistia,  
tempore hujus Cœnæ ultimæ, in pane azymo a Christo con-  
secrata. At, quod hic rursus partes! quam diversa in tuen-  
do opinionis hujus Systemate Cll. Virorum studia! Rem ut per-  
stringam paucis;

Rupertus Abbas Tuitiensis cum quibusdam putat, eo anno,  
quo Christus mortuus est, die Jovis fuisse Lunam 14. mensis  
Nisan, hacque ipsa die ad vesperam tam Christum, quam Ju-  
dæos Pascha manducasse; Solemnitatem attamen Paschatis &  
Azymorum non fuisse celebratam Luna 15. sequente, seu die  
Veneris: verum dilatatam esse in Sabbatum, hoc est Lunam 16.

R. P. Muszka Tom. II. de Sacra.

C

ut

ut adeo dies Veneris, qua Christus in crucem actus est, non fuerit festiva, sed profana. Opinionis porro hujus fundamentum Rupertus repetit ex quadam Judæorum traditione, qua (ut contendit ille) vetabantur duos continuos dies festos celebrare; quod si igitur Festum Azymorum in diem Veneris incidit, necesse habebant illud differre in Sabbatum, quin tamen Agni Paschalis manducationem differrent. Accedit ex parte ad hanc opinionem & Petrus Burgenfis, eo tamen cum discrimine: quod hoc casu Judæos non Paschatis tantum solemnitatem, sed & Agni Paschalis esum distulisse existimet; ex quo deducit, Christum mortis suæ anno Agnum Paschalem manducasse ex Legis præscripto ad vesperam Lunæ 14. quæ incidit in diem Jovis: Judæos vero, propter memoratam traditionem, non nisi Luna 15. seu die Veneris ad vesperam, ita ut sequens Sabbatum ipsis esset duplici nomine dies sollemnis. Addendus his Cl. Petavius, qui L. 12. de Doctr. Temp. C. 16. contendit, Christum cum paucis quibusdam Judæis Pascha celebrasse die legitima, hoc est Luna 14. quæ erat dies Jovis; plerosque autem alios istud anno mortis Christi præstitisse primum Luna 15. seu feria sexta; idque non ob Majorum traditionem, aut honestam quamvis causam aliam, verum (in quo a Burgenfi differt Petavius) ex supersticioso quodam ritu, quem corrupti Phariseorum mores invexerant.

Diversam ab his isthuc viam ineunt Aloysius Legionensis & Harduinus. Prior quidem in Op. de Agni immolat. docet, Christum cum omnibus Judæis Pascha celebrasse prima vespera Lunæ 14. hoc est die naturali 13. post solis occasum, quo tempore (ut illi videtur) legale Pascha manducandum erat. Contra Harduinus in Op. de ult. Christi Pasch. postquam fundamenti instar præmittit, Judæos, qui Galilæam incolebant, mensem Nisan non numerasse ab eadem die cum Judæis aliis, demum deducit 1mo, Anno mortis Christi, quo media Lunæ con-



conjunctio cum sole incidit in 6. seriam, Galilæos ab hac 6. seria numerasse mensem primum, Judæos vero cæteros a Sab-  
bato; ut adeo eo anno Luna 14. & 15. pro Galilæis fuerit se-  
ria quinta & sexta: pro Judæis autem aliis seria sexta & Sab-  
batum; ex quo Cl. Auctor deducit 2do, Christum, ut qui Ga-  
lilæus erat, ante mortem Pascha celebrasse seria quinta, seu  
Luna 14. Galilæorum: cæteros vero Judæos seria sexta, pari-  
ter nempe Luna 14. ipsis propria: proinde tam Christum,  
quam Judæos legale Paschatis tempus observasse.

Sententia demum, quam cum Vasquezio, Bellarmino,  
Tournelyo, & Simonneto plurimi Doctores sequuntur, tradit:  
Christum, perinde ac cæteros Judæos omnes, anno hoc Agnum  
Paschalem comedisse die Jovis post solis occasum, qui erat Lu-  
næ 14. secunda vespera: diē vero sequente Veneris, seu Luna  
15. fuisse Festum solemne Paschatis & Azymorum, quo Chri-  
stus a Judæis in crucem actus est.

IV. En opinionum in proposita controversia varietatem! 12  
Id vero conatu hoc tam vario spectarunt Viri Clarissimi, ut  
scripturæ loca, ac nominatim Joannem cum reliquis Evangeli-  
stis, a quibus in præsentī argumento dissidere videtur, ratio-  
ne conciliarent multiplici, evincerentque demum, Christum  
pridie mortis legale Pascha manducasse. Fatendum interim  
simul: ad tantam de supremo Christi Paschate opinandi varie-  
tatem plurimum contulisse mirum pugnantia Rabinorum testi-  
monia, & discordes Astronomorum ac Chronologorum de Mor-  
tis Christi Anno, ejusque Noviluniis & pleniluniis calculos:  
quibus omnino judicibus siquis denique stare velit, lis, de qua  
hic agitur, finem habitura est nunquam. Inde, Cl. Honorati a  
S. Maria, contra Lamii opinionem peculiari Dissert. disputantis  
monitum secuti, vario ac incerto Astronomorum & Chronolo-  
gorum tribunali caute nos subducimus: quodque Theologo  
(ni fallor) satis fuerit, controversiam hanc non proferemus ul-

tra, quam ex ea necesse sit præsidium adversum Græcos petere, quo videlicet iis subinde Dissert. II. §. II. ostendi possit, Christum in pane azymo consecrasset; quæ ipsa (ne in incertum feramur) ad scripturæ duntaxat & Traditionis regulam exigere constitutum habemus. In hæc jam intentis, sit

## ASSERTIO I.

*Christus per se ipsum ac immediate Eucharistiam instituit: & quidem post legalem Agnum Paschalem, hoc est juxta ritum legis Mosaicæ, pridie mortis manducatum.*

- 13 Prima Assertionis pars a nemine controvertitur: adeo clara sunt Evangelii testimonia Matth. 26. Marci 14. Lucæ 22. Quid enim illa, ac his similia: *accepit JESUS panem - & ait: accipite & comedite: hoc est corpus meum.* Item: *accipiens calicem - dedit illis dicens: bibite ex hoc omnes; hic est enim sanguis meus &c.* Ac denique: *hoc facite in meam commemorationem.* Quid inquam hæc sunt? nisi ipsa Christi Eucharistiam per se ipsum instituentis verba; neque omnino ullum ex S. Literis locum protuleris, quo Apostolis aut Ecclesiæ concessa legatur potestas Mysterii hujus instituendi. Recole demum, si libet, etiam ea, quibus L. I. de sacr. in Gen. Dissert. II. §. III. probavimus, universim Sacramentorum omnium institutionem ad ipsum immediate Christum esse referendam.
- 14 Secunda Assertionis pars etiam certa est ex S. Literis. Legantur ex Matthæo, Marco, & Luca paulo ante laudata loca; primo die azymorum (inquiunt Evangelistæ) quando Pascha immolabant, dicunt ei (Christo) Discipuli: *quo vis eamus & paremus tibi ut manduces Pascha?* misit deinde duos ad quemdam, cui dicerent: *tempus meum prope est, apud te facio Pascha cum Discipulis meis.* Fecerunt Discipuli sicut constituit illis JESUS, & paraverunt Pascha. Vespere autem sæculo discubuit, &

¶ *duodecim Apostoli cum eo, & ait illis: desiderio desideravi hoc Pascha manducare vobiscum antequam patiar.* His subiiciunt Evangelistæ jam supra recitata institutionis Eucharistiæ verba; ac subinde narrant, eodem vespere post finitam Cœnam Christum fuisse comprehensum: altero autem die, qui erat Parasceve, & dies Festus, cruci affixum.

Hæc jam si attendas, claro utique Evangelistarum testimonio confectum habes: Christum pridie mortis ad vesperam cum Discipulis manducasse Pascha, atque in hac Cœna Eucharistiæ Mysterium constituisse. Quod igitur isthic ad controversiam reliquum est; num Pascha hoc (quæres) legale fuerit? seu illud ipsum, quod ex ritu Legis Mosaicæ Judæis celebrandum erat? Tale autem omnino fuisse, eorundem rursus Evangelistarum verba evincunt. Nempe (ut testantur illi) Christus pridie mortis illud manducavit Pascha, quod primo die azymorum Judæi immolabant, quodque tum necesse erat occidi: illud, de quo, ubi parandum esset, Discipuli ex Christo quæsierunt; de quo nomine Christi interpellarunt Patrem-familias quemdam, apud quem etiam illud paraverunt; de quo ipso denique Christus dixit, desiderio desiderasse se manducare hoc Pascha. Quod jam vero hoc nisi legale Pascha fuerit? sane non aliud primo azymorum die immolabatur: hoc unum noverant Apostoli, uti & ille, ad quem missi sunt parare Pascha.

Utramque demum simul Assertionis partem confirmat 15 Traditionis autoritas. Hanc quippe ipsam doctrinam, post Tertullianum & Origenem, tuiti sunt PP. plurimi, ac nominatim Epiphanius Hær. 70. Cyrillus Hierosol. Catech. 13. Chrysostom. Hom. 31. & 86. in Matth. Augustinus Tract. 10. in Joan. nihil ut dicam de Quartadecimanis omnibus, & aliorum Veterum sensus. Sensus certe in hanc rem Ecclesiæ in comperto est, ut quæ Festo Corporis Domini ita canit: *noctis recolitur Cœna novissima, qua Christus creditur agnum & azyma de-*

*diffe*

*dedisse fratribus, juxta legitima priscis indulta Patribus; & paulo post: post agnum typicum, Corpus Dominicum datum Discipulis. Idem certius constat ex Concilio Trident. quod Sess. 22. Cap. 1. ait: celebrato veteri Pascha, quod in memoriam exitus de Ægypto multitudo filiorum Israel immolabat, novum instituit (Christus) Pascha, se ipsum ab Ecclesia per Sacerdotes sub signis visibilibus immolandum &c. Factum vero istud a Christo pridie mortis eod. Cap. Synodus jam supra declaravit illis verbis: in cæna novissima, qua nocte tradebatur, - - - Corpus & sanguinem suum sub speciebus panis & vini Deo Patri obtulit &c. Ad hæc eadem denique comprobanda multum momenti adferet, quæ sequitur.*

## ASSERTIO II.

*Pascha, in quo Christus pridie mortis Eucharistiam instituit, uno eodemque cum omnibus Judæis tempore celebravit.*

16 **P**ROBATUR I. ex Evangelio. Tria autem ad id ex eo supra cit. testimonia suffecerint: *prima autem die azymorum (inquit Matthæus) accesserunt Discipuli ad JESUM dicentes: ubi vis paremus tibi comedere Pascha? Marcus autem, primo die azymorum, quando Pascha immolabant, dicunt ei Discipuli: quo vis eamus & paremus tibi, ut manduces Pascha? Lucas demum, venit dies azymorum, in qua necesse erat occidi Pascha &c.*

Ex his jam quidni ita invicte arguas: Evangelistarum testimonio Christus Pascha manducavit *primo azymorum die, quando Pascha immolabant* (utique Judæi) cumque *necesse erat occidi Pascha*; eo igitur die, qui a Lege constitutus erat: dicendum ergo, aut Judæos hoc anno diem Paschatis legalem non observasse, aut certe una eademque die cum Christo Pascha celebrasse; at primi fundamentum certum nullum est, ut a

N. 21.

N. 21. patebit: alterum igitur, ceu Evangelio conformius, admitti debet.

Probatur II. ex observantia, quam non modo Christus, sed 17 & Judæi præstabant universim Legi Mosaicæ. Et Christum quidem ejus prorsus observantem fuisse, quis addubitet? quando ipse de se Matth. 5. testatur: *nolite putare, quoniam veni solvere. Legem aut Prophetas; non veni solvere, sed adimplere* &c. id quod jure potiori utique intelligendum de Lege Paschatis, cujus ritus inter legalia fuit celeberrimus. Ac sane, si quid in hanc Legem admisisset Christus, id ei indubie a Judæis exprobrandum erat; cum igitur de hoc coram tribunali nullo sit postulatus, plane censendum est, eum non modo ritum Paschatis legalem, sed & tempus a lege præstitutum observasse. Idem porro in præsentī de Judæis etiam merito censeris: præterquam quod enim universim moris Mosaici fuerint retinentissimi, Pascha ab iis die eadem legali semper fuisse celebratum nominatim docemur Exodi 12. Numer. 9. Josue 5. L. 2. Paralip. C. 30. & 35. L. 1. Esdræ C. 6. Quin idem ab illis etiam Christi ætate præstitum testantur Evangelistæ in locis supra laudatis, ac etiam accurati rerum Judaicarum scriptores, Josephus de Bel. Jud. L. 7. C. 17. & Philo Judæus L. 3. de Vita Moyfi.

Quorsum vero (inquires) ista? eo, ut rursus ita arguam: tam Christus quam Judæi die a lege præscripta Agnum Paschalem manducarunt; hæc igitur cum una dumtaxat per legem designata fuerit, ut patet ex N. 7. uno eodemque die Christus cum Judæis Paschatis officio est defunctus. Illationis hujus robur inconcussum manet, dum Adversarius evincat: aut Christum antevertisse tempus Paschatis, aut Judæos distulisse, quorum quidem neutrum certo argumento confecerit. Etenim (quod ad primum attinet) antevertere tempus Paschatis nupiam in divinis Literis lege concessum reperies; quamvis autem certis ex causis differri aliquando potuit, ut constat ex Num.

Num. 9. V. 10. item ex L. 2. Paral. C. 30. V. 2. & seqq. nunquam tamen nisi in mensem alterum; at Judæis anno mortis Christi nec causa legalis ulla fuit differendi Pascha: nec ullo scripturæ testimonio docemur illud ab iis mense altero celebratum; ergo &c. Sane quod isthic pro dilatione aut anticipatione Paschatis pars adversa adferre solet, leves admodum sunt conjecturæ; rejiciendæ proinde omnino, dum gravioribus affirmantur momentis.

### Respondetur ad Objecta

contra partem 2dam Assertionis I.

18 **P**ugnatur autem ante omnia Patrum ac Scriptorum veterum auctoritate. Nempe (ut refertur in Chronico Petri Alexandrini, quod Signonius *Fastos Siculos*, Du Cange autem *Chronicon Paschale* appellat) Petrus Alexandr. Hypolitus Portuen. Apollinaris Hierapol. & Clemens Alexandrinus negant Christum anno passionis suæ Pascha Judaicum celebrasse: hancque ipsam subinde opinionem amplexus est S. Joannes Damasc. in Op. de panibus azymis; ergo &c:

Resp. I. laudati Chronici auctorem prorsus incertum esse; passim autem certe illud ab Erudiis abudicatur Petro Alexandrino; inde incerta pariter ac dubiæ fidei sunt Veterum illorum testimonia, quæ ex eo proferuntur. Idem esto judicium de cit. Op. Damasceni; falso quippe ei illud attribui, præter alios, luculente demonstravit Cl. Michael Le Quien Operum S. Damasceni editor. Haudque difficulter istud tibi persuaseris, si genuina S. Doctoris Opera consulas, in quibus eum ejusdem plane nobiscum fuisse in præsentī sententiæ reperies. En! ex L. 4. de Fide Orthod. C. 13. verba illius: *itaque Christus in sanctæ ac illustris Sion crenaculo, postquam vetus Pascha cum Discipulis manducasset, testamento veteri expleto, Discipulorum pedes*

*pedes lavit* &c. quibus haud absimilia repetit L. de duabus voluntatibus.

Resp. II. tametsi ultro detur, paucos hos e veteribus ab opinione nostra esse alienos: sat firma attamen persistit illa plurium aliorum Patrum, ipsius quin etiam Universæ Ecclesiæ iudicio N. &c. relato; id quod pro nobis eo facit amplius, quod autoritas, qua nos tuemur, sit certa: incerta ex adverso illa, qua pugnat Adversarius. Verum

Instari potest I. ad opposita Patrum & Ecclesiæ sensa ist-  
hic frustra provocari, nisi ea cum S. Literarum testimonio con-  
sentiant; at ab hoc dissident potius. adducta enim ex Evange-  
listis de Christi Paschate loca, non de legali & Mosaico, sed  
de novo & Eucharistico Paschate, hoc est, de ipsa SS. Eucha-  
ristiæ institutione sunt intelligenda; ergo &c. Min. prop. fun-  
datur in illis Christi verbis: *desiderio desideravi hoc Pascha*  
*manducare vobiscum, antequam patiar*; post quæ cum continuo  
Eucharistiam instituerit Luc. 22. V. 17. utique Paschatis no-  
mine Eucharistiam designasse dicendus est: ad quod conformiter  
& aliis supra citatis Evangelii locis, cum Christus aut  
Apostoli Paschatis mentionem injiciunt, eo nomine novum Pa-  
scha Eucharisticum, non vero vetus Mosaicum intelligendum  
videtur. Quæ quidem si ita se habeant, quis non videt, vim  
Sacro Textui inferre eos, qui ex illo Christum pridie mortis  
Pascha Judaicum manducasse contendunt?

Resp. Nego Min. uti & ejus probationem, quæ tota arbi-  
trarium potius est assertum, quam argumentum. Ajo itaque  
verba illa, *desiderio desideravi* &c. ad Pascha vetus & legale  
omnino pertinere.

Istud vero conficitur imo ex eo, quod sensus horum ver-  
borum colligi debeat ex præcedentibus, quibus immediate con-  
iuncta sunt: nisi forte velis abruptas ac minime cohærentes  
esse Evangelii sententias. Quæ autem apud eundem Lucam  
cit. C. præcedunt, hæc sunt: *venit dies azymorum, in qua ne-*

*- cesse erat occidi Pascha. - euntes parate nobis Pascha, ut manducemus, - ubi est diversorium, ubi Pascha cum Discipulis meis manducem? - euntes invenerunt, sicut dixit illis JESUS, & paraverunt Pascha; atqui hæc aperte significant Pascha Judaicum; igitur & illa, quæ sine interruptione subjiciuntur, & cum facta esset hora, discubuit, - & ait illis: desiderio desideravi hoc Pascha manducare &c.*

Idem conficitur 2do inde, quod Christus dixerit *desiderasse se manducare hoc Pascha*; at ipse utique non manducavit Eucharistiam, hanc quippe Apostolis tantum porrexisse legitur; de Paschate igitur ab Eucharistico diverso isthic locutus est, eo videlicet, quod die azymorum necesse erat occidi, quodque jam paraverant Discipuli, legali proinde & Mosaico.

Demum 3tio, quia falso supponitur post verba *desiderio desideravi &c.* immediate, subsecutam fuisse institutionem Eucharistiæ. An non ergo, inquires, statim consequente V. 17. verbis illis, *accepto calice gratias egit & dixit: accipite & dividite inter vos &c.* institutus est Calix Eucharisticus? equidem hoc V. institutum inficior; neque enim hic ulla memorantur consecrationis verba; & alias (quod minus congruum foret) consecrationem Calicis bis intra paucos versus enarraret Evangelista, nempe V. 17. ac mox iterum V. 20. quo primum nominatur *Calix novi testamenti*, proinde Eucharisticus. Inde Calicem illum, quem V. 17. Christus dedit Discipulis, censeo fuisse vel legalem: vel eum, qui ex more Hebræorum in cœna, præsertim Paschali, a Patrefamilias convivis porrigebatur. Contra hæc nihilominus.

- 20 Instabis II. Pascha, quod Christum manducasse Evangelium meminit, caruit conditionibus, quæ pro Paschate Judaico Legge Mosaica in S. Literis requirebantur: recte igitur ex his infertur, non fuisse illud Mosaicum & legale. Ant. prob. nam ut Pascha esset legale, juxta Exodi C. 12.

Imo



1<sup>mo</sup> decima die mensis primi tollendus erat agnus, & servandus usque ad decimam quartam diem mensis ejusdem, proinde quadriduo jam ante Festum Paschæ præparandus; Apostoli contra non prius, quam *primo azymorum die accesserunt ad JESUM dicentes: ubi vis tibi paremus comedere Pascha?* Matth. 26. V. 17.

2<sup>do</sup> idem agnus hac eadem decima quarta die ad vesperam immolari debuit in Templo, & quidem a Sacerdotibus; immolatio enim hæc fuit verum Sacrificium, in templo proinde Sacerdotum ministerio peragendum: quod ipsum non obscure colligitur ex C. 23. Exodi V. 18. Num. 9. V. 7. Paral. L. 2. C. 30. Deuter. 16. V. 5. & Levit. 17. V. 3. nihil vero horum in ultima Christi cœna observatum legas uspiam.

3<sup>tio</sup> denique, agnum Paschalem jubebantur Judæi comedere stantes, accinctis renibus, baculos in manibus tenentes &c. ipse Convivarum numerus vicenario definiebatur teste Josepho L. 7. de Bel. Jud. C. 17. quæ omnia rursus in Christi Paschate desiderata fuisse, ex silentio Evangelistarum jure arguas. Quid quod ex iis constet, Christum cum Apostolis in hac cœna non stetisse, sed *discubuisse*: numerus etiam Apostolorum, qui convivæ erant, duodecimum non excedebat.

Resp. I. generatim: certum usque adeo non esse, num ritus Paschatis omnes Exod. 12. & Deut. 16. præscripti, semper ac pro omni casu inviolabiliter minutim observandi fuerint. Certe in Paschate, quod L. 2. Paral. C. 30. item L. 4. Reg. C. 23. & L. 1. Esdræ C. 6. celebratum legimus, non meminit Scriptura omnium earum cæremoniarum, quas pro primo Paschate in Ægypto Exod. 12. jussu Dei Moyses præscripserat. Inde, tamen horum in Christi Paschate aliquid desideratum fuerit, non est, cur negemus continuo illud legale ac Judaicum fuisse: modo non defuerit immolatio & esus agni, ac usus

azymorum, quæ erant hujus Paschatis substantialia. Interim, verisimiliter dici posse existimo, Christum in ultimo suo Paschate nihil eorum prætermisisse, quæ ex-ritu Legis Mosaicæ observanda erant. Hinc negato prop. Antecedentis asserto, ad ejus probationem

Resp. II. in particulari, & quidem ad *1mum* : eum ipsum agnum, quem Christus in ultima cœna manducavit, quadriduo ante præparatum fuisse ; non quidem ab ipso Christo : sed ab eo Patresfamilias, ad quem Discipuli missi fuerant, ut apud eum pararent Pascha. Mos nempe Civibus Hierosolymitanis erat pro exteris etiam, ad celebrandum Pascha venturis, tam agnos, quam Cœnaculum, ac reliqua necessaria apparare, hæcque deinde pretio, aut gratuito subministrare : uti istud in aliorum Sacrificiorum victimis, quæ ad populi advenientis opportunitatem vœnales proponebantur, observatum novimus. Ac omnino nisi morem hunc admittas, non satis congrue statues de Paschate ab iis celebrato, qui biduo, vel pridie, aut ipsa die, & in ipso solemnitis procinctu Hierosolymam advenerunt.

Ad *2dum* dico : probabilius esse (quod etiam Philo. L. 3. de Vita Moysis refert) Sacrificium Paschale in hoc a cæteris discrepasse, quod neque a Sacerdotibus, neque in Templo fuerit immolandum. Non a *Sacerdotibus* : nam Exod. 12. dicitur : *immolabit eum (agnum) universa multitudo filiorum Israel* ; populi igitur ipsius hoc officium erat, non Sacerdotibus peculiare. Non item in *Templo* : verba enim, quibus immolationis Paschalis locus præcipitur, hæc sunt Deut. 16. V. 5. *non poteris immolare Pascha in qualibet Urbium tuarum, - sed in loco, quem elegerit Dominus Deus tuus, ut habiteret nomen ejus ibi* ; ubi vides locum hunc opponi cæteris Palæstinæ Urbibus : ut igitur suis legibus constet oppositio, locus, quem electurus erat Dominus, non de Templo, verum de Urbe Hierusalem est intelligendus. Adde, quod ibid. V. 6. & 7.

& 7. hæc legantur præterea: *immolabis Pascha* - - - & *coques, & comedes in loco, quem elegerit Dominus.* Qui autem sit credibile, una vespera, quæ duarum horarum intervallo definiebatur (a tertia scilicet vespertina ad quintam) a tota Hierosolymitanorum multitudine in Templo aut ejus atrio agnos Paschales immolari, coqui, imo & comedi potuisse? Certe Josephus de Bello Jud. L. 7. C. 17. narrat, ætate suæ aliquando uno Paschatis vespere immolata fuisse agnorum ducenta & quinquaginta millia. supra quingentos; cum ergo Hebræi per singulas distinctim familias Pascha immolare & comedere debuerint, numerusque convivarum in una familia denario minor esse non potuerit, necesse erat aliquando Hierosolymis pro Paschate celebrando convenisse ad minus viciis centena hominum millia cum quingentis & sexaginta quinque millibus, quo numero etiam majorem Hierosolymis repertum Josephus loco cit. testatur. Quis jam autem sibi persuaserit, tantam multitudinem in unius Templi ambitu intra unam vesperam Pascha facere potuisse?

Nec obest, L. 2. Paral. C. 30. & L. 1. Esdræ C. 6. legi, Pascha a Sacerdotibus in Templo immolatum; isthic enim nomine hujus Paschatis veniunt holocausta, & aliæ victimæ Paschalis Solemnitatis tempore a Sacerdotibus immolatæ: non vero Pascha proprie dictum, seu agnus Luna 14. ad vesperam immolandus. Consule in hanc rem laudata loca, ac nominatim V. 2. 3. & 15. ex cit. C. Paral. item V. 16. & seqq. cit. C. Esdræ: discrimen certe isthic fit inter agnum Paschalem & victimas Paschales a Sacerdotibus immolatas. Quanquam, etsi hi textus de Paschate proprie dicto intelligendi forent, nihil contra nos faceret: neque enim hic quæritur de eo, quod aliquando præter morem factum est, sed quid ex lege fieri oportuerit.

Quod si interim quis pertinacius contendat, ipsum Pascha legale a Sacerdotibus in Templo immolandum fuisse, istudque

ei demum liberaliter concedas, nihildum erit, quo sibi plaudet Adversarius; hoc enim dato, prorsus congrue dixeris, ab illo Patrefamilias, apud quem Christus parari voluit Pascha, quique Legis Mosaicæ non ignarus fuerit, non alium fuisse in Coenaculo appositum agnum, quam qui jam ante in Templo Sacerdotis ministerio immolatus est. Cujus asserti ratio petitur ex iis, quæ paulo ante in Resp. II. ad *1mum* dicta sunt de more apud Cives Hierosolymitanos recepto.

Ad *3tium* quod attinet: ex solo Evangelistarum silentio non recte arguitur, Christum ritus eos in sua coena Paschali non observasse; novimus quippe non omnia ejus facta minutim esse scripta ipso Joanne attestante in Evang. Cap. 21. V. ult. Nec urget quidquam, quod Christus cum Discipulis in hac Coena *discubuisse* legatur: istud enim non ad coenam legalem, sed ad communem dumtaxat & usualem appellat, cujus utriusque a Christo ex more Judæorum celebratæ meminit S. Chrysostomus Hom. 82. in Matth. Quod vero de numero additur, non satis fideliter recitatum est ex Josepho, ut qui in laud. Cap. Coenæ Paschalis convivarum in unaquaque domo numerum nec vicenari majorem, nec minorem denario esse potuisse assertit: nihil igitur ad legalem numerum Coenæ illi defuit, quam Christus cum duodecim Apostolis manducavit.

### Respondetur ad Objecta

contra Assertion. II.

- 21 **M**omentum, quod isthic Adversariis est præcipuum, petitur ex Joannis Evangelio; ac potum quidem ex illis C. 13. V. 1. & seqq. verbis, *ante diem Festum Paschæ sciens JESUS, quia venit hora ejus, ut transeat ex hoc mundo - - surgit a cæna - - & cepit lavare pedes Discipulorum &c.* ita arguunt: Christus ultimam coenam sumpsit, ac Discipulorum pedes lavit *ante diem Festum Paschæ*; at non ante diem Festum Paschæ, quod

quod ipse agebat in hac coena; igitur ante diem Festum Paschæ, quod erat a Judæis postridie celebrandum: atque ita uno saltem die Christus Pascha antevertit, ut adeo illud cum Judæis uno eodemque tempore celebrare non potuerit.

Resp. argumento huic satisfieri ex iis, quæ supra N. 3. notavimus; conformiter ad quæ non tantum Christus, sed Judæi ipsi agnum Paschalem manducarunt *ante diem Festum Paschæ*, hoc est vespera, non quidem ipsum Pascha, verum Paschatibus & Azymorum solemnitatem præcedente. Responsio hæc quoad rem est eadem cum illa, quam alii dant his verbis: Christus Discipulorum pedes lavit ante Festum Paschæ diem *usua-*lem Conc. *legalem* Neg. id quod etiam de agno Paschali a Judæis manducato dicendum est. Nec difficilis est distinctionis datæ sensus, si modo advertas, apud Judæos quadruplex genus dierum in usu fuisse: nempe *legalis* dies illis erat a vespera ad vesperam, cui apud nos respondet dies Ecclesiasticus; *naturalis* ab ortu solis ad ortum recurrentem; *usualis* a media nocte ad mediam noctem; demum *artificialis* ab ortu solis ad occasum, sic dicta, quod hoc temporis intervallo artifices suis vacare soleant operibus. Urgent nihilominus Adversarii, ac

Instant I. Eo die, quo Christus cruci affixus est, non fuit <sup>22</sup> solemnitas Paschatibus; cum igitur Christus pridie mortis suæ coenam ultimam cum Discipulis fumeret, tum adhuc nullo vero sensu cœpit Pascha legale: quodque hinc consequitur, Judæi Pascha suum non celebrarunt eodem die cum Christo. Ant. prob. nam dies mortis Christi erat Παράσχειν, præparatio videlicet ad Pascha: erat autem *Parasceve Pascha hora quasi sexta*, & dicit (Pilatus) Judæis: ecce Rex vester &c. quod narrat Joannes Evang. C. 19. V. 14. quodque ipsum repetit V. 42. ergo mortis Christi die nondum fuit solemnitas Paschatibus.

Resp. Neg. Ant. Probationem ejus deinde distinctione explico: nempe, dies mortis Christi erat *Parasceve Pascha*, hoc est,

est, dies præparationis ad sequens Sabbatum, qui concurrit cum ipso Feste Paschatis, Conc. erat *Parasceve Pascha*, hoc est, dies præparationis ad ipsum Pascha, Nego: Judæi scilicet seriam sextam vocabant *Parasceven* propterea, quod hoc die præparandi fuerint cibi pro sequente Sabbato, quo universim lege vetabantur vel cibos apparare. Quod vero Evangelista laudatus hanc ipsam seriam nominatim vocet *Parasceven Pascha*, non alia causa est, quam quod ea inciderit in Festum Paschæ: ita Festum e. g. Nativitatis Domini in Sabbatum incidens, non incongrue quis dixerit, *Sabbatum Nativitatis*. Nec arbitraria est hæc Sacri Textus explanatio; fundamentum quippe ejus præbent alii Evangelistæ: Marcus quidem, cum C. 15. V. 42. ait, *erat Parasceve, quod est ante Sabbatum*, & Lucas C. 23. V. 54. *erat Parasceve, & Sabbatum illucescebat*.

- 23 : Instant II. si die mortis Christi fuisset Festum & solemnitas Paschæ, Judæi jam antea, pridie videlicet ejus ad vesperam, juxta legem manducassent Pascha; at non manducarunt; ergo &c. Minoris prop. assertum Adversarii repetunt ex Joannis Evangelio, ubi C. 18. V. 28. hæc leguntur: *adducunt ergo JESUM a Caipha in prætorium; erat autem mane, & ipsi non introierunt in prætorium, ut non contaminarentur, sed ut manducarent Pascha*; Judæi igitur hoc tempore nondum manducaverunt Pascha.

Resp. Neg. Min. Nec evincit quidquam probatio ex Joanne Evang. petita; verba etenim illa, *sed ut manducarent Pascha*, non sunt accipienda pro *Agno Paschali*, cui præcipue nomen Paschatis conveniebat: verum pro reliquis *Paschalibus victimis*. Ad augendam videlicet temporis Paschalis lætitiā & solennitatem azymorum diebus varias victimas Judæi immolare consueverant, idque ex lege, ut constat ex Deut. 16. V. 2. ubi præcipitur: *immolabis Phasc Domino Deo tuo de ovibus & de bobus &c.* & V. 3. juxta vulgatam nostram,

*non comedes in eo panem fermentatum* &c. quod textus hebraicus ita habet: *non comedes cum illo panem fermentatum, septem diebus comedes cum illo in fermentata*. Ubi, *Tō cum illo*, cum nequeat intelligi de agno Paschali ad vesperam Lunæ 14. manducando, ut qui hac eadem vespere totus consumendus erat, nihilque ex eo asservare licuit, ut Exodi 12. V. 10. & Deut. 16. V. 4. legitur; prorsus congrue intelligitur de memoratis aliis victimis, quæ ipsæ Scripturæ Phrasi *Phase*, seu *Pascha* vocantur propterea, quod intra Paschatis tempus immolatæ fuerint. Imolationis porro huiusmodi testimonium habetur tam in Iosepho de Bel. Jud. L. 7. C. 17. quam in 1. Paral. C. 35. V. 8. *Principes Domus Domini* (inquit *hebræi* textus) *dederunt Sacerdotibus ad faciendum Phase pecora commixtum duo millia sexcenta, & boves trecentos*. - Objecti igitur ex Joannis Evangelio loci plane congrua est expositio, quam adferimus; præsertim cum hæc sit ratio optima Joannem conciliandi cum reliquis Evangelistis, quorum testimonio Christus manducavit Pascha prima die azymorum, qua immolabam (Judæi) Pascha, qua ex lege necesse erat occidi illud, ac proinde eodem plane legali die cum Judæis. Vide dicta N. 16. & 17. Attamen

Instari potest III. FERIA sexta, qua Christus in crucem actus est, non fuit Festum Paschæ; objectus igitur ex Joanne locus intelligendus est de AGNO Paschali, ac dicendum, hoc tempore Judæus nondum illum manducasse. Pro affirmata propos. illud facit, quod sequens Sabbatum Joan. 19. V. 31. vocetur *magnus dies Sabbati*; hoc igitur Sabbatum erat Festum & solemnitas Paschæ; non autem præcedens feria sexta; præsertim cum mos fuerit Judæis nunquam duo Festa continua celebrandi, atque ita, quamvis anno mortis Christi Festum Paschæ in hanc seriam incidisset, necessario fuerit in diem alteram transferendum.

Resp. Neg. Ant. ac sane, cum pridie mortis Christi (teste Luca) illud tempus fuerit, quo necesse erat occidi Pascha, at-

R. P. Muszka Tom. II. de Sacra.

E

tenta

tenta lege divina (de qua consule N. 8.) dubitari nequit sequente feria sexta, qua Christus mortuus est, fuisse fest. Paschæ & solemnitatem azymorum. Nec urget quidquam, sequens Sabbatum vocari *magnum diem Sabbati*: compellatio enim hæc idcirco duntaxat ei attributa est, quod in Paschatis hebdomadam inciderit, atque sic duplici nomine fuerit celebris. Quid quod, tametsi prima tantum dies azymorum festa ac sollemnis fuerit, reliqui nihilominus etiam dies omnes *dies sollemnitatis* vocentur L. 2. Paral. C. 30. V. 21. & seqq. Quod autem de more Judæorum additur, prorsus arbitrarie dictum est, nec ullo Scripturæ aut probatorum Auctorum testimonio comprobari potest; quin necesse habebant Judæi aliquando duo continua festa celebrare. Ita posito etiam, anno mortis Christi Festum Paschæ in feriam sextam incidens translatum fuisse in Sabbatum: nunquid attamen azymorum diem septimum, qui erat perinde sollemnis ac primus, necesse erat incidere in sequentis hebdomadæ feriam sextam? hanc vero cum sequens Sabbatum exceperit, fieri non potuit, ut non celebrarentur duo festa continua.

### Corollarium

#### De ipsa Luna, ejusque vespere, & feria Paschatis Christi.

**Q**UOD ad propositum Theologi facit cum primis, Christum videlicet Eucharistiam instruisse in ea coena, in qua legale Pascha eodem legali cum reliquis Judæis tempore manducavit, id hætenus comprobatum est. Si jam porro particulatius quæras de hoc tempore: in quam videlicet Lunam, in quam item Lunæ vesperam, ac demum in quam hebdomadæ diem illud inciderit? etsi in has Eruditorum tricas minutim me immittere nolim, paucis tamen de singulis sensum meum aperiam. Itaque

I. Chri-



I. Christum Luna 14. Mensis Nisan Pascha hoc suum ce- 25  
lebrasse ajo. Ut enim jam ex supra dictis constat, celebravit  
Pascha legale, ex præscripto proinde legis; cum igitur hæc  
pro manducando agno Paschali definita fuerit Luna 14. mensis  
Nisan, quidni legitima consecutione inferas, hoc ipsum tem-  
pus a Christo fuisse observatum. Nec alius omnino de hoc  
fuit unquam veterum sensus; inde Quartadecimani Pascha ce-  
lebrandum esse Luna 14. ea duntaxat causa contendebant,  
quod hac ipsa Luna a Christo fuerit celebratum: quamvis au-  
tem Ecclesia proposito eorum resisteret, causam attamen, quam  
adferebant, in dubium vocavit nunquam.

At, quæ hæc, inquires, fuit Luna 14? An ea, quæ a pri-  
mo Solis & Lunæ congressu: an vero, quæ a prima Lunæ  
phase numerabatur? primum assero; quin etiam existimo,  
semper Judæos mensem auspicatos fuisse a prima Lunæ cum  
sole conjunctione; ac nisi istud facerent, certis ac statis die-  
bus Festa sua celebrare non poterant, cum prima Lunæ appa-  
ritio nec certa sit, nec ubique eodem tempore contingat. Ad-  
de: hujus dupplicis Lunæ distinctionem nusquam memorari in  
Scripturis, aut in Philone, vel Josepho; ut adeo jure dis-  
commentitiam, nec unquam omnino apud Judæos in mensibus  
auspicandis usitatam.

II. Hoc ipsum Pascha Christus manducavit ad secundam 26  
vesperam Lunæ 14æ, non vero ad primam: hoc est, non ea  
vespera, qua incœpit Luna 14. sed qua claudebatur hæc ea-  
dem Luna. Istud dicendi ratio est: quia Christus in Paschate  
celebrando legale tempus observavit, ut jam probavimus; at  
hoc tempus fuit Lunæ 14. secunda vespera, non autem prima,  
ergo &c. Min. propositionis veritas duplici argumento  
conficitur.

1mo, per Lunæ 14. vesperam, qua erat ex lege mandu-  
candus Paschalis Agnus, ea intelligitur vespera, quam proxi-  
me sequebatur dies 15. festiva ac solemnis, ut deducitur ex

C. 12. Exod. a V. 16. & 18. & testatur Josephus L. 3. Antiq. Jud. C. 10. atqui hæc vespera fuit secunda, qua videlicet claudabatur Luna 14. & incipiebat Luna 15. qua ipsa vespera Christum Pascha celebrasse certum est, cum dies alter, qui eam sequebatur, quaque Christus mortuus est, vocetur *solemnis & festus* Matth. 27. & Marc. 15. ergo &c.

ado, azymorum dies erant tantum septem, ita ut initium eorum fieret ad vesperam Lunæ 14. finis autem esset Luna 21. ejusdem mensis ad Vesperam Exod. 12. at si prima azymorum dies, qua immolandus erat agnus, inchoata fuisset a Lunæ 14. prima vespera, non septem, sed octo fuissent numerandi dies; dicendum igitur, non primam, sed secundam Lunæ 14. vesperam fuisse legale illud tempus.

Frustra autem hic certe opposueris primum Judæorum Pascha, quod in flumine Egypto exitu celebrarunt. Quamvis enim eggressus hic eorum nocte acciderit inchoante Luna 15. ac proinde post Lunæ 14. secundam vesperam, non est, cur continuo negetur eos hac ipsa vespera agnum Paschalem manducasse: cur enim utrumque istud componi non potuerit, si nox pro tota sua latitudine sumatur? Mihi quidem videtur, omnia Exodi, Deuter. & Num. loca, quæ isthic obijci solent, facile conciliari, ac congrue explicari posse, si dicatur Lunæ 14. secunda vespera manducasse Judæos Pascha, eosque simul deinde post noctis hujus medium egredi coepisse, ita ut ab initio hunc suum continuarent etiam die sequente, videntibus & mortuos suos sepelientibus Ægyptiis, quod refertur Num. 33. V. 3. Consule, si lubet, pluribus de hoc differentem Tournellium de Sac. Euch. Quæst. 5. Ar. 1. in Object. contra 3. par. Conclusionis.

27 III. denique, Pascha hoc suum ultimum Christus celebravit feria quinta. Novimus quippe ex Evangelistis Christum in Parasceve, hoc est, die Sabbatum præcedente, ac proinde feria sexta mortuum fuisse: Traditione autem habetur, quin

quin etiam ex S. Literis non obscure colligitur, pridie mortis eum Pascha manducasse; igitur feria quinta. Recole dicta N. 14. & 15. Idem aperte docet Ambrosius Ep. 83. ad Epp. Æmilie: *celebravit, inquit, Pascha hebdomade, in qua fuit Luna 14. feria quinta; denique ipsa die Pascha cum Discipulis manducavit; sequenti autem die, hoc est, sexta feria crucifixus est &c.* Eadem sunt fere verba S. Proteri, Successoris Cyrilli Alexandrini, in Ep. ad Leonem Imp. de ratione Paschatis.

Contra assertum hoc pugnare videtur I. illud, quod anno 28 mortis Christi dies Pentecostes (hoc est, dies quinquagesima) incidit in Dominicum, ut post Augustinum decent Patres, opinionique huic favet praxis Ecclesie Pentecosten die Dominico celebrantis; at istud fieri non potuisset, si Christus legale Pascha manducasset feria quinta: hoc enim posito necesse erat Pentecosten incidere in Sabbatum, id quod ita declaratur. Juxta Lev. C. 23. V. 15. & seqq. *numerandi erant ab altero die Sabbati - - quinquaginta dies, & sic offerendum novum Sacrificium Domino &c.* ubi per alterum diem Sabbati intelligendam esse secundam azymorum diem testatur Joseph. L. 3. Ant. Jud. C. 10. quod si igitur anno mortis Christi legale tempus agni Paschalis manducandi fuisset vespera ferie quintæ, altera dies azymorum futura erat ipsum Sabbatum: at ab hoc si quinquaginta dies numeres, necesse est quinquagesimam incidere in Sabbatum, ergo &c.

Pugnant II. tabulæ Astronomicæ & Chronologicæ, in quarum compluribus legas anno mortis Christi Lunam 14. mensis Nisan signari feria sexta, ut videre est apud Cl. Lamium in ejus critico Opere de Concordia quatuor Evangg. de Christi Pasch. & Tract. de Judæor. Paschate: cum igitur in sententia, quam tuemur, Christus Pascha celebraverit Luna 14. non utique celebravit illud feria quinta: aut si denique tum celebravit, legale Paschatis tempus ab eo observatum fuisse frustra contendimus.

Resp. ad I. argumentum hoc niti fundamento prorsus incerto; non est igitur, cur eo asserti nostri, cum Scriptura & Traditione consentientis, veritatem infirmari existimemus. Etenim imo incertum est, num anno mortis Christi Pentecostes in Dominicam inciderit; nihil profecto de hoc in S. Literis, nihil apud veteres Scriptores ante Augustinum reperias: hic ipse autem S. Doctor L. 18. de Civ. Dei, & in Pf. 150. id memorat unum, quod *Spiritus S. quinquagesimo a Resurrectione Christi die descenderit*, quin nominatim hanc diem designet; Sermo autem 154. de Temp. qui isthic opponitur, suspectæ est fidei, ut adeo etiam in postremis Operum S. Augustini editionibus ad Appendicem fuerit reiectus. Incertum est *ado*, quo sensu accipienda sint illa Lev. verba; *ab altero die Sabbati*; admissio enim etiam Josephi cit. testimonio putant quidam illa intelligi oportere hoc sensu: quod Festum Pentecostes Judæis celebrandum fuerit die quinquagesimo, numerando hos dies a secunda azymorum die *exclusive*, non *inclusive*. Istud vero si ita habeat, cum anno mortis Christi secunda azymorum dies fuerit Sabbatum, excluso illo, quinquaginta dies numerandi erant a Dominica, proinde in ea etiam complendi.

Resp. II. Astronomos & Chronologos in hac controversia me nihil morari: discordes adeo & invicem pugnantes sunt, ut certi nihil ex eorum Tabulis de Christi Paschate erui possit. Quid ita vero? non igitur, inquires, sibi constant Astronomica & Chronologica principia? constant equidem, ac omnino inconcussæ sunt Scientiarum harum illationes demonstrativæ; si modo certa ac constans sit positio, cui illæ superstruuntur: id quod in præsentī argumento desideratur. Etenim ut ex principiis Astronomiæ & Chronologiæ certo possit confici, anno mortis Christi Lunam 14. mensis primi in seriam sextam incidisse, hancque ipsam fuisse diem Paschatis celebrandi, oporteret tenere annum, quo Christus in crucem actus est: constare præ-

præterea deberet, num Judæi menses suos auspiciati fuerint a primo solis & Lunæ congressu, an vero a prima Lunæ phase; at utrumque istud apud Eruditos incertum est, mirum variantibus etiamnum eorum sententiis: quin nec spes est, annum mortis Christi certo determinari posse; igitur Astronomicæ & Chronologicæ regulæ statuere nequeunt de feria, in quam annomortis Christi Luna 14. mensis Nisan incidit.

Atque hinc est sapiens illud præstantissimi Chronologi Cl. Petavii monitum L. 12. de Doctr. Temp. C. 12. *desinant, inquit, Chronologi in anno & die passionis eruendo, Mathematicorum calculis, noviluniorum pleniluniorumque minuiis ac scrupulosis ratiociniis, sibi ac lectoribus suis negotium facere &c.* Cui plane consentiens fuit opinio Joan. Keppleri celeberrimi Astronomi, quem in suis Ecclogiis Chronicis contra Reusnerium & Calvisium ita scribentem legas: *in prima controversia de Paschate hæret uterque in Astronomia, velut mus in pice. Mirum fatum! ipse Astronomus ceteros Astronomos abstrahe ab Astronomia in actione hujus causæ &c.* Et infra: *valde igitur decepti sunt nostri Astronomi his ultimis 150. annis, qui ex sua perfecta Astronomia plenilunia ad Christi tempora, ex pleniluniis Festa Judæorum, ex his & Concorso feriæ annum passionis ausi sunt determinare &c.*

### §. III.

*An in Eucharistia sit vere ac realiter  
presens Corpus Christi?*

CUM de Eucharistia agitur, princeps controversia est: num hoc Mysterio contineatur verum ac reale Christi Corpus? id quod definire cumprimis omnino necessarium est ad explanandam Eucharistiæ naturam. Et Catholicos quidem sub speciebus panis & vini Eucharisticis realem Christi Corporis, ejusque

que animæ & Divinitatis præsentiam profiteri, certum est vel ex Conc. Tridentini Sess. 13. de Sacr. Euch. C. 1. & 3. ac Canonibus in hac Sess. latis; Sectariorum ex adverso complures inficiantur illam, alij etiam in causæ suæ patrocinium calumnia, qua hoc Ecclesiæ dogma novitatis insimulant. Nobis id jam nunc erit negotii, ut contra eos Catholicæ doctrinæ veritatem SS. Literarum & Traditionis præsidio propugnemus. Ante Assertionem autem dabimus compendio notitiam de origine & progressu Hæresum isthuc pertinentium; ac etiam de memorata calumnia, ejusque vanitate; quod utrumque ad illustrandam præsentem controversiam haud parum conferet.

Narratur Origo & Progressus hæresis,  
realem Christi in Eucharistia præsentiam  
negantis.

- 29 I. **O**Riginem Hæresis, de qua isthic agitur, ad Seculi VIII. initium referendam censeo cum Bellarmino. Quamvis enim ipso statim Ecclesiæ Sæc. I. (teste S. Ignat. M. in Ep. ad Smyrn.) Simoniani, Menandriani, hisque similes alii subinde fuerint, qui in Eucharistia esse Christi Corpus non agnoscerent: hi attamen omnes ex consequenti duntaxat istud contende-  
bant, propterea videlicet, quod ipsum Eucharistiæ Sacramentum, aut etiam Incarnationis mysterium negarent, uti hoc nominatim de sui temporis Hæreticis in laud. Ep. insinuat S. Ignatius; hæcque eadem causa est, cur apud Irenæum, Tertullianum, Epiphanium, & alios veterum hæresum Scriptores peculiaris hujus erroris nulla fiat mentio.

Primi itaque, qui, admissio Verbi Incarnati mysterio & Altaris Sacramento, ferale hoc classicum cecinerunt, fuere Iconomachi, in conciliabulo Constantinopolitano sub initium Seculi VIII. collecto, asserentes: *unicam esse imaginem Christi ab ipso*

ipso Christo institutam, nimirum panem & vinum in Eucharistia, quæ representant Christi Corpus & sanguinem; ut istud refertur in Conc. Nicæni II. Act. 6. Inde ab eo tempore Scriptores Græci, ut Damascenus L. 4. C. 14. Theophylactus in C. 26. Matth. & alii sæpe monent, Eucharistiam non esse figuram & imaginem Corporis Christi, sed ipsum ejus Corpus. Atque hæc in Oriente;

II. In Occidente autem erroris ejusdem Sec. IX. initium 30 fecit Joannes Scotus, Parisinus Doctor, etiam *Erigena* aliis *Herigena* dictus ab Hybernia, ex qua ortum duxit, quæque tum *Eri* vel *Herin* hybernico idiomate dicebatur, ac Scotiæ nomine veniebat. E Latinis nempe primus in suo de Eucharistia Libro docere ausus, *Sacramentum Altaris non esse verum Corpus & Sanguinem Domini, sed tantum memoriam veri Corporis & Sanguinis ejus*, ut refert coævus Hincmarus L. de Prædest. C. 31. ubi una errorem hunc impugnat, quod ipsum continuo præstitit Adrevaldus Floriacensis ex Ord. S. Ben. disputans peculiari Opere *contra ineptias Joannis Scoti*.

Sed nec Nicolaus I. tum Pontifex errorem in Occidente recens natum otiosus spectavit; nihil profecto non egisse eum de comprimenda Joannis Scoti licentia aperte docet Epistola, ad Carolum Calvum Galliæ Regem data, in qua, *Dilectioni vestræ, inquit, vehementer rogantes mandamus, quatenus Apostolatui nostro prædictum Joannem representari faciatis, aut certe Parisiis in Studio, cujus olim Capital fuisse perhibetur, morari non sinatis; ne cum tritico Sacri eloquii grana lolii & zizania miscere dignoscatur &c.* Quin Galliæ toti exosam fuisse Joannis doctrinam vel inde colligas, quod coactus sit demum se recipere in Britanniam, ubi & vitam clausit An. 884. Liber ejus de Euch. damnatus est deinde in Conciliis Vercellensi & Parisiensi circa An. 1050. item Romano An. 1059.

III. Quantuscumque interim hic Orthodoxorum conatus 31 fuerit, caveri non potuit, ne sparsum a Joanne venenum portaret. R. P. Muszka Tom. II. de Sacr. F 10

ro serperet. Ex ejus Libro primus hausit illud subinde Sec. XI. Berengarius patria Turonensis, & Ecclesiæ Andegavensis Archidiaconus, in professione fidei a se edita palam docens, *Eucharistiam non esse vere & substantialiter Corpus & Sanguinem Domini, sed sola voce sic appellari pro eo, quod tanquam umbra & figura significativa sit Corporis & sanguinis Domini.* Verum Novatori huic certatim se opposuerunt, DD. Catholici, ac nominatim Adelmannus Brixienfis, & Hugo Lingonienfis Episcopi, Lantfrancus Beccensis Coenobii Prior, postea Archiep. Cantuariensis, Durandus Abbas Troarnensis, alique complures, quorum Opera videre est in Bibl. PP. Tom. 18. edit. Lugd. In eundem anathema pronuntiatus est a Leone IX. in Romana & Vercellensi Synodis An. 1050. ac rursus post quadriennium a Leonis Successore Victore II. in Concil. Florentino, & ab ejus Legato Hildebrando in Turonensi; ubi etiam errorem revocavit, ut testatur cœvus Guitmandus L. 3. contra Bereng.

At versatilis nimium fuit Berengarii indoles. Haud multo post ad damnatum dogma rediit, a Nicolao II. Pont. idcirco Romam evocatus; cumque isthic in Concilio 1113. Episcoporum a Lantfranco convinceretur, iterum ejurat hæresim, exustis etiam manu sua tam suis, quam Joannis Scoti Libris. Non diu attamen sibi constitit: tertium recinit pristinam cantillenam, rursus idcirco damnatus a Gregorio VII. in Synodis Rhotomagensi & Pistaviensi An. 1075. & duabus Romanis An. 1078. & 1079. in quibus postremis fidem iterum profitetur; at quam rursus sefellit, dum denique post Burgalensem Synodum An. 1080. celebratam serio respisceret, octo deinde reliquis vitæ annis in gremio Ecclesiæ & vera poenitentia ductis. De obitu ejus MS. Codex S. Martini Turon. ita habet: *Obiit M. Berengarius Grammaticus fidelis & vere Catholicus, An. Dom. MLXXXVIII.*



IV. Extinctum erat cum Berengario incendium cum ecce! 32  
 pestilentes flammæ Sec. XIV. resuscitat Wickleffus, præter  
 errores alios, Berengarii etiam de Eucharistia hæresim profes-  
 sus L. 4. Trial. c. 2. & seqq. quo malo subinde totam late Bohe-  
 miam fuisse correptam scribit Æneas Sylvius L. de Orig. Bo-  
 hem. cap. 35. dum denique pestis eadem latissime proferre-  
 tur Sec. XVI. auctoribus Luthero & Calvino.

Quamvis enim Lutherus Berengarii de Eucharistia errorem  
 aperte nunquam docuerit, ejus tamen semina jecit pluribus lo-  
 cis in suis LL. quos notat Bellarm. L. 1. de Euch. c. 1. Certe  
 in Ep. ad Argentinenes significat propensum se fuisse in Be-  
 rengarii Sententiam; quo minus tamen profiteretur illam, pro-  
 hiberi se clavis scripturæ verbis. Inde facta occasio Lutheri  
 Discipulis, novandi perinde ac ille cupidus, ut speciosis Scri-  
 pturæ interpretationibus excogitatis veritati Evangelicæ velum  
 adducere, ac jam supra Magistrum suum sapere auderent. Ta-  
 les erant Andreas Carolstadius & Ulricus Zwinglius, ille ex  
 Archidiacono Wittembergenfi, hic ex Tigurino Parocho apo-  
 statæ, facti subinde duces eorum Antilutheranorum, qui ho-  
 die negant realem Christi in Eucharistia præsentiam, ac pro-  
 pterea dicuntur *Sacramentarii*, divisi & ipsi in plures Sectas,  
 videlicet *Significativorum*, *Tropistarum*, *Energicorum*, *Meta-  
 morphistarum* &c.

Errorem eundem in suam sectam invexit Ioan. Calvinus,  
 ac deinde, post Zwinglium Anno 1531. in acie cæsum, omni-  
 um maxime Sacramentariorum partes sustentavit. Ut enim  
 nonnunquam in explicanda Eucharistia totus recedere videatur  
 a Zwinglio, idque Lutheranorum gratia, quos sibi demereri  
 studebat: re ipsa attamen in sacramento Altaris Christum, non  
 nisi per fidem, aut virtutem ab eo in Coelis existente diffusam,  
 præsentem admisit, uti istud ex ejus Instit. L. 4. c. 17. osten-  
 dit Bellarm. loco supra cit. quodque ipsum etiam hodierni Cal-

viniani profitentur. Atque hæc nos de Sectariis; jam & eorum de nostro dogmate sensa audienda sunt.

### Refertur & refellitur calumnia.

*de mutata apud Catholicos circa Christi in Eucharistia præsentiam doctrina.*

33 **I.** Pervulgata est Novatorum calumnia: doctrinam de reali Christi præsentia in Eucharistia veteri Ecclesiæ ignotam fuisse, neque nisi serius investam illam. Et Blondellus quidem istud factum existimat Sec. VII. per Anastasium Sinaitam, aut certe Sec. VIII. per Epiphanium Diaconum in Conc. Nicæno II. Act. 6. Amplius illo ausus M. Claudius, natione Gallus apud Carentonenses olim Calvinianus Minister, ejusdem doctrinæ initium repetit a Paschasio Radberto Corbejensi Abbate Sec. IX. quasi nempe primus hic in L. suo de Corp. & Sangu. Domini dogma hoc procuderit, quod subinde plurimorum animos occupavit. Atque hoc illud est, quod, duce Claudio, hodie etiam Novatores crebro declamitant.

34 **II.** Verum, quid istud est, nisi commentum, & putida calumnia? si Paschasius, in laud. L. verum Christi Corpus in Eucharistia asserens, novum quid protulit, qui factum? ut in re fidei præcipua inductam ab eo mutationem tranquillo vultu spectaret Ecclesia. Nuppiam certe legas eum aut a Pontificibus, aut a Concillis impetiturum: cum ex adverso oppositum docens Berengarius acerrime fuerit exagitatus, ut supra vidimus.

Ad ætatis ejus ignorantiam, & corruptos mores forte provocabunt sectarii? Ab his equidem calumniæ suæ patrocinium cumprimis peruat: at labem hanc toti ævi illius Ecclesiæ aspergere, nova est Calumnia. Adeant Scriptores Ecclesiasticos, & reperient intra tempus illud, quod a Paschasio ad Berenga-

rengarium fluxit, floruisse in Ecclesia a vitæ sanctimonia & insigni eruditione plurimos: quales erant, Stephanus VIII. Leo VII. Agapetus II. Leo IX. PP. Anastasius Bibl. Ado Vien. Luitprandus. Udalricus *gemma Sacerdotum* dictus, Fulbertus Carnotensis, Romualdus Camaldulensium Pater &c. Apud eosdem Scriptores reperient insignia vigilantiae Episcoporum monimenta: ac nominatim frequentia Concilia, leges, ac statuta ad fidei & disciplinae Ecclesiasticae conservationem; quae omnia legere est apud Labbeum in Collect. Concil. Tom. 9.

III. At (urgent Novatores) quamvis Pontifices & Concilia nihil in Paschasium decreverint: non deerant attamen DD. 35 Catholicis, qui continuo ei adversarentur, ut: Ioannes Scotus, Rabanus Maurus ex Abbate Fuldenfi Archiepiscopus Moguntinus, Bertramus (quibusdam *Ratramus*) Abbas Orbacensis, ac dein Seculo X. Herigerus Abbas Lobienfis. Sit ita vero istud: an paucis his (nec enim plures proferri possunt) reclamantibus, totam continuo Ecclesiam Paschasio reclamasse dici potest? Ceterum neque istud integre ita se habet, ut volunt Novatores.

Ioannem Scotum quidem fateor impugnasse realem Christi in Eucharistia praesentiam, quam Paschasius in L. suo asseruerat: verum quis fuerit de Scoti, & ejus sectatoris Berengarii doctrina Ecclesiae sensus, jam supra commemoravimus.

Quod autem ad tres alios attinet, tametsi quibusdam locis in LL. contra Paschasium Scriptis, ambigua sint eorum verba, praesertim Bertrami: attentis tamen omnibus, non quoad substantiam realis praesentiae, verum quoad ejus duntaxat modum Paschasio adversatos fuisse, multo verisimilius est. Nimirum Paschasius, laudato per se Ambrosio, docebat: in Eucharistia realiter praesens esse illud ipsum Christi Corpus, quod de Virgine natum est; illi contra, quamvis & ipsi realem Corporis Christi praesentiam admitterent, quibusdam tamen SS. Hieronymi & Augustini dictis subnixi, Corpus in Sacramento praesens non idem prorsus cum eo, quod

ex V. Maria natum est, dicendum putarunt; quia, etsi quoad substantiam idem sit, quoad speciem tamen sensibilem, & existendi modaliter se habet. Eruitur vero istud ex ipsis eorum Scriptis, de quibus consuli potest Natalis Alex. in Hist. Eccl. Sec. IX. & X. nobis enim singula minutim excutere non vacat. Vel illud interim in rem nostram non levi est argumento, quod Berengarius pro se tuendo Ioannem Scotum duntaxat laudaverit: nusquam autem legatur ad Rabani, Bertrami, aut Herigeri auctoritatem provocasse; id quod attamen pronissimum erat, si hi cum eo & Ioanne ejusdem in omnibus de Eucharistia fuissent Sententiæ. Denique objectæ calumniæ vanitatem satis superque evincunt illa, quæ infra a N. 41. pro reali Corporis Christi præsentia ex primævis Patribus, Conciliis item, & perpetua Græcæ & Latinæ consensione commemorabimus.

### Propugnatur Ecclesiæ Catholicæ doctrina.

- 36 **C**harissime autem hæc exponitur in Concil. Trident. sess. 13. Cap. 1. ubi (sunt verba Concilii) *docet Sancta Synodus, & aperte, ac simpliciter proficitur in almo Sanctæ Eucharistiæ Sacramento, post panis & vini consecrationem, D. N. IESUM Christum verum Deum atque hominem vere, realiter, ac substantialiter sub specie illarum rerum sensibilibus contineri.* Sunt vero isthuc observandæ nominatim tres concilii particulæ. Dicitur nempe Christus contineri *vere*: non igitur solum in signo & figura, ut ejusdem sess. Can. 1. explicatur; *realiter* item: quo excludatur figmentum Zwinglii & Calvinianorum, volentium Christum adesse solum *per fidem*; demum *substantialiter*: hoc est, quoad ipsam substantiam, & non tantum *per virtutem* (quod iterum Calviniani somniant) a Christo in Coelis existente ad nos diffusam: propter quem errorem cit. Can. 1. *To substantialiter* opponitur *virtuti*. Conformiter jam ad hæc statuitur, & defenditur.

ASSER-

## ASSERTIO.

*In Eucharistia est vere, realiter, ac substantialiter præsens Corpus & Sanguis Christi.*

**D**ogma hoc contra Novatores copiosissime omnium propugnat Bellarminus, duobus integris Libris primis de Sacram. Euch. Scripturæ & omnis ævi Patrum testimonia proferens; nos horum præcipua, in Synopsis redacta, complectemur duobus argumentis: ex S. Literis altero, altero ex constanti Ecclesiæ doctrina desumpto.

## Argumentum I. ex S. Literis.

**C**erta est Assertio, si Christus 1<sup>mo</sup> promisit se daturum veram suam carnem in cibum, & verum suum sanguinem in potum: ac 2<sup>do</sup> re ipsa etiam dedit Apostolis, cum Sacramentum Eucharistiæ instituit; at utrumque istud certum est; certa igitur & Assertio. De Maj. propositionis veritate dubitari nequit, tum quod præter Eucharistiam nihil designari aliud possit, in quo promissum hoc Christus impleverit: tum etiam, quod in ultima coena Eucharistiam instituens, eamque Apostolis porrigens, idem & deinceps ab illis, eorumque in Sacerdotio successoribus fieri voluerit in sui commemorationem Luc. 22. Quod igitur est reliquum, Min. propositionis, & quidem quoad partem utramque, probationem requirunt Novatores. Ita autem

**Probatur I. pars ex illis Ioan. 6. V. 52. Christi verbis: 38**  
*Panis, quem ego dabo, caro mea est pro mundi vita; quam promissionem Iudæis in dubium revocantibus, ac dicentibus, quomodo potest hic nobis carnem suam dare ad manducandum? id unum V. 54. & seqq. respondit Iesus: amen amen dico vobis, nisi manducaveritis Carnem Filii hominis, & biberitis ejus Sanguinem, non habebitis vitam in vobis. - Caro mea vere est cibus,*

*bus, & Sanguis meus vere est potus. Qui manducat meam carnem, & bibit meum Sanguinem, in me manet, & ego in illo.*

Ex his jam ita arguo 1<sup>mo</sup>. Iudæis litigantibus, ac existimantibus, Christum locutum esse de vera sua carne manducanda, hanc eis cogitationem Christus non exemit, imo in illa eos confirmavit. 2<sup>do</sup>. promisit in cibum se daturum illam carnem, quam erat daturus pro mundi vita; id quod clarius exprimit textus græcus: ὁ ἀέρος δι, ὅς ἐστιν ἡμῶν, ἢ σὰρκίς μου ἵνα ἡ ἐγὼ δώσω ὑμῖν τῆς τῆς κοίτης ζωῆς. *Panis, quem ego dabo, caro mea est, quam ego dabo pro mundi vita;* Sicut igitur Christus pro mundi vita dedit veram ac realem suam carnem, & non ejus duntaxat figuram: ita eandem se promisit daturum in cibum ad manducandum. 3<sup>io</sup>. Voces illas *Carnis & Sanguinis* non est ulla necessitas sumendi in sensu metaphorico: sumendæ ergo sunt vero ac proprio sensu, quo utique veram ac realem Christi carnem, verumque ejus Sanguinem significant; hocque ipso sensu acceptas esse a veteribus Patribus & Conciliis ex infra dicendis patebit. Hæc jam vero omnia evincunt, Christum promississe se daturum veram suam carnem in cibum, & verum sanguinem in potum: quod promissum etiam re ipsa implevit, cum in Eucharistia dedit Corpus suum, sub specie panis manducandum, & sanguinem bibendum sub specie vini, de quo mox agendum erit. Itaque

- 39 Probatur etiam II. pars Min. ejusdem, & quidem ex iis verbis, quibus Christus Eucharistiam instituisse legitur. *Accipit panem* (inquit Matth. Cap. 26. V. 26.) *& benedixit, ac fregit, deditque discipulis suis, & ait: accipite & comedite, hoc est Corpus meum.* (apud Lucam c. 22. additur: *quod pro vobis datur; & 1. Cor. 11. quod pro vobis tradetur*) Pergit dein Matth. V. 27. & 28. *Et accipiens calicem gratias egit, & dedit illis dicens: bibite ex hoc omnes: hic est enim sanguis meus novi testamenti, qui pro multis effundetur in remissionem peccatorum.* His non absimilia legantur Marci 14. a V. 22.

Ex

Ex quibus ultro fluit sequens argumentum: Si verba hæc in sensu literali & proprio accipiantur, indubium est, Christum in ultima Cœna Apostolis sub speciebus panis & vini verum suum Corpus, & verum Sanguinem dedisse: ut qui & facere istud poterat, & loquens fallere non poterat; atqui verba illa sensu proprio accipienda sunt; ergo &c. Min. contra Novatores probatur *1mo*, nam juxta regulam S. Literas interpretandi receptam, & ab Augustino L. 3. de Doctr. Christ. C. 10. traditam, verba Scripturæ accipi debent in sensu proprio, nisi obftet Scriptura contraria, Traditio, aut ratio evidens: nihil autem horum obflare docebimus in Resp. ad Objecta. *2do*, quia hæc verba in sensu proprio constanter accepit veritatis Magistra Ecclesia, ut N. sequi dicemus. *3to*, quia ipse Christus eo tempore, quo Eucharistiam in cœna ultima constituit, clare & aperte se loqui professus est Ioan. 16. V. 25. *venit hora*, inquit, *cum jam non in proverbiiis loquar vobis*; profecto autem clare locutus non fuisset, si verba illa alio, quam literali & proprio, sensu accipienda forent. Denique *4to* sensum hunc evincit comminatio Apostoli 1. Cor. 11. *quicumque manducaverit panem hunc, vel biberit calicem Domini indigne, reus erit Corporis & Sanguinis Domini. -- qui enim manducat & bibit indigne, judicium sibi manducat & bibit, non dijudicans Corpus Domini.* Igitur Eucharistiam indigne fumens reus est, non figuræ Corporis & Sanguinis Christi, sed ipsius veri ac realis Corporis & Sanguinis; quia videlicet indigne recipit Corpus & Sanguinem, non vero solum eorum figuram: nisi velis dicere, etiam Iudæos, indigne fumentes manna aut Agnum Paschalem, reos fuisse perinde Corporis & Sanguinis Domini, cum & illa duo fuerint figuræ Christi.

## Argumentum II. ex constanti Ecclesiæ doctrina.

**I**ndubitatum est vel Sectariis, dogma illud esse verum & a 40 Deo revelatum, quod constanter credidit Ecclesia, etiam  
*R. P. Maszka Tom. II. de Sacr.* **G** *primæ.*

primæva; at dogma de reali Christi præsentia in Eucharistia semper credidit, & docuit Ecclesia, eaque etiam primæva; primis videlicet quatuor seculis, quibus eam incorruptam fuisse fatentur Novatores; dogma igitur hoc verum est, & a Deo revelatum. Contra prop. Min. hic rursus reclamant Novatores; verum & illam utique cogentur sateri certam, si hæc ipsa sit Patrum, & Conciliorum omnis ævi doctrina, constansque præterea in eam Græcorum & Latinorum consensus: uti re ipsa fuisse comprobabimus. Et quidem

- 41 Probatur I. quoad Patres, referendo eorum sensa. Ita Seculo I. Ignatius M. Ep. ad Smyrn. apud Theodoretum Dial. 3. inter Hæreticos sui temporis recenset eos, qui *Eucharistiam & oblationes non admittunt, quod non constentur Eucharistiam esse carnem Servatoris N. I. C. quæ pro peccatis nostris passa est, quam Pater sua benignitate suscitavit.* Sec. II. Iustinus M. Apol. 2. sub finem Eucharistiam vocat *alimoniam*, quam incarnati illius Iesu carnem & sanguinem esse docui sumus. Et Irenæus L. 4. C. 34. Valentinianos carnis resurrectionem negantes sic arguit: *quomodo dicunt carnem in corruptionem devenire, & non percipere vitam, quæ a Corpore Domini & Sanguine alitur?* Sec. III. Tertullian. L. de Resur. Car. C. 8: *caro Corpore & Sanguine Christi vescitur, ut & anima de Deo saginetur.* Item Origenes Hom. 5. in diversa loca Evangelii, quando, inquit, *vita pane & poculo frueris, manducas & bibis Corpus & Sanguinem Domini; tunc Dominus sub testum tuum ingreditur; & tu ergo imitare Centurionem, & dicito: Domine non sum dignus &c.* Eandem veritatem tradit Cyprianus Serm. de lapsis. Sec. IV. Cyrillus Hierosol. Catech. Mystagogica 4. relata institutione Eucharistiæ & Christi verbis, sic pergit: *cum igitur Christus ipsa sic affirmet: hoc est Corpus meum, quis audeat dubitare? ac eodem dicente: hic est Sanguis meus, quis dicat non esse illius Sanguinem? Aquam mutavit in vinum - sola voluntate; & non erit dignus, cui credamus, quod vi-*  
nam



*rum in Sanguinem transmutasset? quare cum omni certitudine Corpus & Sanguinem Christi sumamus &c. Ambrosius L. 4. de Sacram. C. 4. ubi accesserit consecratio, de pane fit caro Christi, - - Si tanta vis in sermone Domini IESU, ut inciperent esse, quæ non erant: quanto magis operatorius est, ut quæ erant, in aliud commutentur? - - non erat Corpus Christi ante consecrationem, sed post consecrationem dico tibi, quod iam Corpus est Christi. Ipse dixit, & factum est &c. Idem docent Chrysostom. Hom. 51. in Matth. & 60. ad popul. Antioch. item Athanasius apud Theodoret. Dial. 3. Hilarius L. 8. de Trinit. & alii cum Basilio & Gregor. Naz. Pro Sec. V. sunt Leo M. Serm. 6. de Ieiunio. Hieronymus in C. 1. Ep. ad Tit. Cyrillus Alexandr. in Explicat. 12. Anathematismorum contra Nestor. Pro omnibus audiatur Augustinus in Ps. 13. Conc. 1. ferebatur Christus in manibus suis, quando commendans ipsum Corpus suum ait: hoc est Corpus meum; ferebat enim illud Corpus in manibus suis &c. Videatur & L. 2. contra Adversarium legis C. 9.*

Pro Seculis reliquis Patres apud Bellarm. L. 2. de Euchar. reperies; sed nec eos recensere necessum est, quando Novatores potissimum ad hæc prima Ecclesiæ Secula provocant. Profecto autem si laud. Patrum sensa animo veritatis studioso attendantur, satendum est, eos in Eucharistia verum ac reale Christi Corpus & Sanguinem agnovisse. Nullius certe illi figuræ, signi, imaginis, aut nudæ memoriæ Corporis Christi mentionem isthic injiciunt: quin apertis plane ac simplicibus verbis ipsum Christi Corpus esse asserunt, pro eo pugnant &c. ut adeo mirum sit, etiam perspicaciores Novatorum quosdam a Claudio in fraudem induci potuisse, quasi vero doctrina hæc primum a Paschasio Sec. IX. in Ecclesiam Catholicam injecta fuerit.

Probatur II. quoad Concilia, quæ (ne eadem repetamus) 42 videantur pro fronte hujus libri. Leges in iis omnibus, jam

inde a Conc. Nicæno I. in Eucharistia asseri Corpus Christi sine ulla distinctione, limitatione, aut mentione figuræ; quin quædam aperte profitentur, carnem illam esse veram ac propriam Christi carnem; docent ipsam panis in Corpus & vini in Sanguinem transubstantiationem; aliqua etiam ex proposito pugnant contra eos, qui Eucharistiam assererebant esse figuram duntaxat & imaginem Corporis Christi. Consulantur ibid. relata Concilia, Ephesinum, Nicænum II. Lateranense IV. Constantiense, Florentinum, & Tridentinum; quibus addenda & illa, in quibus Joannis Scoti & Berengarii errorem damnatum N. 30. & 31. indicavimus.

- 43 Probatur III. quoad Græcorum & Latinorum consensionem. Est autem illius triplex, invictissimum argumentum; 1<sup>mo</sup> Græcorum ac Latinorum Patrum jam cit. sensa consentientia. 2<sup>do</sup>, quod nec Latini Græcis, nec Græci Latinis, cum inter eos tentata aut etiam inita fuit unio, de reali Christi præsentia errorem unquam objecerint; neque de hoc ulla ab iis excitata est controversia, ne quidem a Photio Schismatis auctore; quin constat Latinos coram Græcis, hosque coram illis Missas celebrasse, omnibus Sacra Eucharistiæ Mysteria adorantibus. Ita Joannes Papa I. rogatus a Patriarcha Epiphanio, ipso Paschatis die Constantinopoli Missam peregit An. 525. in qua eadem Ecclesia Agapetus An. 536. ac dein Vigilius PP. Sacris operati sunt: nihil ut dicam de Eugenio IV. Florentiæ Sacrificante coram Græcis & Latinis, simul Eucharistiam adorantibus. 3<sup>io</sup>, quod cum Lutherani & Calviniani circa Annum 1570, & 1574. Græcos in suorum, ac nominatim de Eucharistia, dogmatum communionem vocare voluerint, ab illis omnino rejecti sint: Cyrillus etiam Lucar, Patriarcha Constantinopolitanus, cum Calvinianis dogmatizans, & (præter alia) *non credens panem & vinum transmutari in Corpus & Sanguinem Christi*, condemnatus sit in pluribus Græcorum Synodis; ac denique, quod cum Coreffio, Meletio Syrgo, & Nestario
- com-

complures alii Græcorum acerrimis Scriptis infectati sint eos, qui Græcam Ecclesiam Lutheranorum aut Calvinianorum erroribus accessisse calumniati sunt.

Consule de hoc argumento Auth. Per. Fidei, Tomis quatuor integris ex proposito differentem de perpetua Græcorum & Latinorum circa Mysterium Eucharistiæ concordia: quod ipsum etiam Tomo quinto sparsim egregie demonstrat. Consulenda item Gennadii, Meletii, Nestarii & aliorum Græcorum de Eucharistia Scripta, quæ Eusebius Renaudotius edidit, & observationibus criticis illustravit. Haud inutile etiam fuerit in memoriam revocasse ea, quæ nos ipsi de Græcorum & Latinorum in materia Sacramentorum consensione superioribus Libris sparsim insinuavimus, præsertim L. I. N. 8 & 51. item L. III. N. 5.

### Respondetur Sacramentariorum Objectionibus.

**M**omenta, quibus Sacramentarii realem Christi in Eucharistia præsentiam impugnant, aut impugnare possunt, prolixè refert ac etiam refellit Bellarm. primis tribus LL. de Euch. & quidem L. I. ea, quæ ex S. Literis, II. quæ ex Patribus, III. quæ ex ratione petuntur. Idem in præsentì & nobis erit ordo: quamvis autem in hoc cum Sæctariis congressu potissimum laud. Bellarmini ductum sequi constitutum habeamus: nostra nihilominus etiam quandoque ac aliorum Doctorum profereamus sententia, ea videlicet, quæ ad illustrandum & confirmandum Ecclesiæ dogma peculiaris aliquid lucis & momenti collatura censuerimus.

### Objecta ex SS. Literis.

Obijciunt I. Christum illis Joan. 6. verbis, *panis, quem ego dabo &c.* locutum fuisse duntaxat de manducatione spiritali, quæ fit per fidem; locus igitur hic nihil confert ad probandam

bandam realem Christi præsentiam in Eucharistia. Ant. prob. ex eod. C. 6. ubi Christus V. 27. ad Judæos: *operamini non cibum, qui perit, sed qui permanet in vitam æternam*; quærentibus autem illis, *quid faciemus, ut operemur opera Dei?* respondit: *hoc est opus Dei, ut credatis in eum, quem misit ille*; ac rursus petentibus, *da nobis panem hunc*, dixit: *ego sum panis vitæ*; *qui venit ad me, non esuriet*, & *qui credit in me non sitiet unquam*; quæ omnia de pane ac cibo in sensu improprio & figurate sumpto, deque sola spiritali per fidem manducatione Christi intelligenda esse nemo controvertit; ergo & verba priora.

Resp. N. Ant. Illationem pariter probationis negandam esse certum fit ex contextu cit. Capituli, cujus tres partes ab invicem secernere oportet. Primum quippe illic a V. 5. usque ad 14. Christus agit de pane materiali per prodigium multiplicato; dein a V. 27. ad 51. de se ipso, ut pane spiritali per fidem manducando, seu credenda sua divinitate & incarnatione; ac demum a V. 51. de Eucharistia verbis illis, *Panis quem ego dabo, caro mea est &c.* In hac porro parte tertia loqui Christum de vero suo corpore, ejusque reali manducatione, ita arguo. Christus promittit se daturum quidpiam novi in futuro manducandum, quod nondum manducaverunt Israelitæ, *non sicut manducaverunt manna Patres vestri, & mortui sunt*, - *si quis manducaverit ex hoc pane, vivet in æternum*, & *panis, quem ego dabo, caro mea est pro mundi vitæ*, V. 49. & 52. atqui Israelitæ jam antea manducaverant figuram Christi, nempe manna, panes propositionis &c. item, manducatio Christi per fidem non erat primum futura: sic enim jam Christum manducaverant omnes justi, cum nemo unquam justificari potuerit sine aliqua fide in Christum; promissio igitur illa non spectabat figuram duntaxat Christi Corporis, aut ejus per fidem manducationem: sed verum ejus Corpus, veramque ejus in sensu proprio manducationem. Adde SS. PP. idem sen-

sentientes, ut est Basilius L. I. de Bapt. C. 3. Hieronymus Ep. ad Hebidiā, Augustinus in Joan. Tract. 26. & 27. Denique huc faciunt ea, quæ supra N. 38. notavimus.

Instant I. Christus promissi cibi, ejusque manducationis effectum significans eod. C. V. 55. ait: *qui manducat meam carnem, & bibit meum sanguinem, habet vitam æternam.* - & V. 57. *in me manet, & ego in illo*; at vita æterna non datur nisi spiritualiter, seu per fidem Christum manducantibus: mansio item illa Christi in nobis, & nostrum in illo, est solum spiritualis, nempe per gratiam; ergo tota illa cibi & manducationis promissio figurate solum, & non in sensu proprio est intelligenda.

Resp. ad prop. Min. ac primum quidem quoad *1<sup>am</sup>* ejus partem: vita æterna non datur nisi spiritualiter manducantibus in sensu positivo Conc. sensu exclusivo N. Nempe, ut Christi Corporis manducatio operetur in nobis vitam æternam, necesse est eam conjungi cum fide in Christum, nec sufficit esse mere materialem & realem: inde juxta Apost. I. Cor. 11. multi Corpus Christi manducantes judicium sibi manducant; at hæc manducatio spiritualis non excludit realem. Quod vero *2<sup>am</sup>* part. attinet, dico: mansionem illam non solum esse spiritualem, per gratiam videlicet, sed etiam corporalem, ita ut perdurantibus Eucharisticis speciebus realiter sit nobis præsens Christus, nosque illi; inde S. Cyrillus Alex. L. 10. in Joan. sumptione Eucharistiæ fieri nos Christi *concorporales* asserit.

Instant II. Discipulis, ad verba illa de *pane, carne*, horumque *manducatione* scandalizatis & murmurantibus, eod. C. V. 64. Christus dixit: *Spiritus est, qui vivificat, caro autem non prodest quidquam; verba, quæ ego locutus sum vobis, spiritus & vita sunt*; quibus dictis Christus significavit, verba illa priora non esse ad literam & carnaliter accipienda, sed figurate & spiritualiter; ergo adhuc &c.

Resp.

Resp. cum Maldonato in cit. locum, Christum verbis illis, *caro non prodest* &c. non loqui de carne sua, sed de carnalibus hominibus, qui videlicet de divinis mysteriis secundum carnem & sensum judicant, quasi diceret: Spiritus Dei est, qui excitat, & dat fidem ac intelligentiam divinatorum mysteriorum, de quibus sunt verba, quæ locutus sum vobis; hinc, quia vos adhuc carnales estis, ea non creditis, nec intelligitis. Expositionem porro hanc Maldonatus firmat autoritate Patrum, Tertulliani, Origenis, Cyrilli Hieros. ac præsertim Chrysostomi Hom. 46. in Ioan. dicentis: *quomodo igitur ait, caro non prodest quidquam? non de sua carne dicit, - sed de his, qui carnaliter accipiunt, quæ dicuntur.* Nimirum (quod notat August. Tract. 27. in Ioan.) Capharnaitæ & quidam Discipulorum, audita Christi promissione, existimabant eum loqui de carnis suæ comestione vulgari, quasi vero promitteret manducandam illam modo carnis proprio, sub propria specie, & per partium divisionem; quo igitur errorem hunc dedoceret illos Christus, cit. V. 64. verbis innuit, dicta sua priora non ad carnis sensum, sed ad Spiritus iudicium exigenda esse; neque de vulgari illa, sed supernaturali & sacramentali, quæ sub specie aliena futura erat, manducatione intelligenda. Audi ipsum Augustinum in supra laud. Tract. O Domine, inquit, *quomodo caro non prodest quidquam, cum tu dixeris, nisi manducaveritis carnem meam, non habebitis vitam in vobis? an vita non prodest quidquam? non prodest: sed quomodo illi intellexerunt; carnem quippe intellexerunt, quomodo in cadavere dilaniatur, aut in macello venditur, non quomodo Spiritu vegetatur* &c.

- 47 Objiciunt II. Verba institutionis Eucharistiæ, *hoc est Corpus meum*, item *hic est Sanguis meus* &c. Sumenda sunt figurate: nam  $\tau\acute{\iota}$  sum crebro in scripturis usurpatur pro *significo*, ut in illo Exod. 12. *est enim Phase, seu transitus Domini*; item cum Ioan. 13 Christus de se dixit, *ego sum vitis vera*;

ra; verba igitur institutionis nihil conferunt ad probandam realem Christi Corporis in Eucharistia praesentiam.

Argumentum hoc est Zwinglii, qui in Ep. ad Romanum fatetur, quod tamen jam antea pluribus annis crediderit Eucharistiam esse tantum imaginem Corporis Christi, ignorasse se tamen *verba ista, hoc est Corpus meum, exponi debere per ista, hoc significat Corpus meum*; ac omnino expositionem hanc primum didicit ex Epistola Hunnii. Institit vero illi deinde pertinaciter adeo, ut pro ea in Senatu Tigurino biduo disputaverit; ut ipse scribit. L. de subsidio Eucharistiae; ubi & illud addit, disputanti sibi Scribam quemdam ita restitisse, ut non haberet, quo verbis suis fidem facere posset: *sed tandem* (quod ipse notat) *nocte sequenti dormienti sibi adstuisse nescio quem (ater an albus fuerit, nihil memini) qui moneret, eum locum Exod. 12. arriperet, est enim Phase, id est, transitus Domini; ubi verbum est, pro significat accipitur.* En! Zwinglii de Eucharistia doctrinam in somnio fundatam, ejusque subnixam auctoritate, de quo illi perinde est, ater an albus fuerit.

Resp. N. Assertum. Nec probat quidquam adjecta ratio: ut plurimum enim in Scriptura *et sum* in proprio ac literalis sensu usurpatur; ac si quando pro *significo* sumitur, acceptio haec impropria colligi debet ex contextu, vel subiecta materia, aut ex ratione evidente: nihil autem horum cogit verba institutionis hoc sensu accipi. Atque hinc est discrimen ad textus in probatione relatos. Cum enim in cit. Exodi loco explicetur *Phase*, ac ex usu loquendi *et id est* explicationem indicet, verba illa congrue hoc sensu exponuntur: *agnus significat transitum Domini.* Sunt interim, qui hoc etiam loco *et est* proprio sensu accipiendum putent, subintellecta voce *viclima*; idque propterea, quod propositio illa Cap. eod. V. 26. & 27. ita explicetur: *cum dixerint vobis filii vestri, quae est ista religio? dicetis eis: viclima transitus Domini est.* In altero loco, quo se Christus dixit *vitem*, verba haec accipienda esse figurate, de-

R. P. Myszka Tom. II. de Sacra. H

clarat

clarat contextus & sermonis circumstantiæ, ut patebit cit. locum expendenti. Quid quod in hac propositione, *ego sum vitis* (idem est de similibus aliis, quæ in Scriptura occurrunt) aperta sit repugnantia termini prædicati cum altero subiecto; nequeunt igitur hæc conjungi per verbum *sum* in sensu proprio acceptum. Nulla ex adverso est repugnantia in his, *hoc est Corpus meum, hic est Sanguis meus*, ut quæ in sensu orthodoxo ita exponenda sunt: *hæc res; quæ sub his panis & vini speciebus continetur, est Corpus meum, & Sanguis meus*. Urde eadem propositiones quanvis sint identicæ quoad rem enuntiatam, non tamen etiam quoad modum enuntiandi.

- 48 Instant I. Christus juxta Matth. accepit panem, benedixit, fregit, & dedit discipulis, dicens: *hoc est Corpus meum*; atqui panis, quem accepit & benedixit, erat verus panis: ergo etiam verum panem dedit: id igitur quod dedit, non erat ipsum Christi Corpus, sed tantum figura illius; atque sic verba hæc, *hoc est Corpus meum*, figurate duntaxat sunt intelligenda.

Item I. Cor. II. verba Calicis consecratoria hæc leguntur: *hic Calix novum testamentum est in meo Sanguine*, quæ locutio est figurata; *Calix* enim sumitur per metonymiam pro re in eo contenta: res præterea hæc ipsa dicitur *testamentum*, cum sit tantum signum testamenti; ergo institutionis verba in sensu improprio accipienda sunt, ita ut significant panem & vinum esse figuras Corporis & Sanguinis Christi: unde rursus patet in illis *est* sumendum esse pro *significat*.

Resp. ad 1<sup>um</sup>, C. Maj. Dist. Min. panis ille erat verus panis, hic ipse tamen per consecrationis verba transiit in substantiam Corporis Domini, Conc. secus N. Nempe ad eorum, quæ Evangelista recitat, veritatem sufficit, ut id. quod Christus dedit discipulis, fuerit panis ante consecrationem: per hanc ipsam autem factum sit Corpus Christi.

Ad



Ad 2dum C. Ant. N. illationem, ut ea sit a Novatoribus; neque enim propterea, quod una aut altera propositionis vox figurate sumatur, omnes etiam reliquæ voces in sensu alieno accipiendæ sunt. Cæterum figura, quæ in voce *Calix* occurrit, aliouin nota est cuique; eam insuper Matthæus & Marcus clare explicant, cum formam consecrationis referunt his verbis, *hic est Sanguis meus &c.* Idem est de figura in voce *testamentum* contenta; nam & illam dilucide exponunt laud. Evangelistæ per verba: *hic est Sanguis meus novi testamenti, qui pro vobis effundetur &c.* Interim *testamentum* nihil vetat in sensu proprio accipere; cum Sanguis Christi sit revera instrumentum legitimum, quo in Lege nova digne suscipientibus applicatur jus ad gratiam & gloriam.

Instant II. Si verba consecrationis sensu proprio accipienda sint, -sequitur, Christum in Eucharistia etiamnum esse nobiscum in terris; id vero sustineri nequit, cum ipse Christus Matth. 26. dixerit, *pauperes semper habetis vobiscum, me autem non semper habebitis*; & Ioan. 14. *relinquo mundum, & vado ad Patrem.* Item, Eucharistiæ consecrationem & ministratiorem Christus fieri voluit in sui memoriam juxta illud ad Apostolos Luc. 22. *hoc facite in mei commemorationem*; commemoratio autem fit de absentibus, non præsentibus. Pluribus igitur locis in Evangelio Christus declaravit, se non esse in Eucharistia præsentem vere ac realiter, sed tantum improprie, hoc est, in figura & imagine.

Resp. ad 1um, utrumque textum intelligendum esse de præsentia Christi in specie propria visibilis; id vero non impedit, quo minus nobiscum maneat in Sacramento sub specie aliena, præsertim cum ipse Matth. ult. dicat: *ecce ego vobiscum sum omnibus diebus usque ad consummationem seculi.*

Ad 2dum responsionem suggerit Apostolus, verba cit. Christi 1. Cor. 11. ita explicans: *quotiescumque manducabitis*

*tis panem hunc, & calicem bibetis, mortem Domini annuntiabitis; voluit igitur Christus in Eucharistia commemorationem fieri suæ passionis, quæ est præterita. Cæterum in hoc Sacramento recte sit memoria ipsius Christi, ut qui a nobis absens est sub specie propria, tamen præsens sit sub specie aliena.*

### Objecta ex Patribus.

50 **O**bjiciunt I. Patres quosdam verba illa, *nisi manducaveritis carnem filii hominis &c.* non accipere in sensu proprio de manducatione reali Corporis Christi; ita Clemens Alex: exponit illa de verbo Dei, Basilus de mystico adventu Christi, Hieronymus de Scripturis &c. ad mentem igitur Patrum ex illis & similibus Christi verbis non recte infertur realis præsentia Christi in Eucharistia.

Resp. expositio hæc mystica Patrum non excludit sensum literalem: idem enim Scripturæ locus sæpe utrumque sensum habet, imo mysticus supponit literalem. Fuit vero id Patribus prorsus familiare, ut eundem textum nunc in literali, alias in mystico & figurato sensu exponerent; ita ex objectis Patribus cit. Christi verba de reali ejus Corporis manducatione exponunt Basilus L. I. de Bapt. C. 3. & Hieron. Ep. ad Hebræos. Verum

51 **U**rgent I. auctoritate Augustini, quasi vero is verba illa Christi in sensu exclusivo de sola manducatione spiritali per fidem intelligi velit. Quæ autem in hanc rem ex Augustino proferunt, sunt hæc. Tract. 25. in Joan. ait: *quid paras dentes & ventrem? crede & manducasti.* Et Tract. 26. *credere in eum, hoc est manducare panem vivum.* Item L. 3. de Doctr. Christ. C. 16. *si præceptiva locutio - - flagitium aut facinus videtur jubere, - - figurata est; Nisi manducaveritis carnem Filii hominis, & biberitis ejus sanguinem, non habebitis vitam in vobis: facinus vel flagitium videtur jubere; figura ergo est,*  
præ-

*præcipiens passioni esse communicandum, & suaviter in memoria recondendum, quod caro ejus pro nobis crucifixa sit.*

Resp. frustra Novatores apud Augustinum malæ suæ causæ querere patrocinium. Fatemur equidem in duobus primis textibus illum verba Christi non literaliter, sed mystice explicare; at propterea literalem eorum sensum non excludit, cum aliis locis realem & Sacramentalem Corporis Christi manducationem aperte doceat, ac nominatim per decursum in Laud. Traët. 26. Clarissime id ipsum tradit Traët. 27. cum ait: *hoc ergo totum ad hoc nobis valeat, ut carnem Christi & sanguinem non edamus tantum in Sacramento, quod & multi mali; sed usque ad spiritus participationem manducemus, & bibamus.* Atque istud notandum est pro explicandis iis etiam Patribus, qui d'cunt impios non manducare Corpus Christi in Eucharistia; conformiter nempe ad mentem Augustini a malis Corpus Christi manducatur quidem Sacramentaliter & realiter: at non spiritualiter, seu ad participationem spiritus, & resurrectionem spirituales, quæ habetur per gratiam.

De tertio Augustini textu id habe: verba illa, *nisi manducaveritis &c.* ait non esse accipienda ad literam in sensu Capharnaitarum, de quo vide N. 46: sic enim accepta jubere videntur flagitium, dilanationem videlicet, & divisionem Corporis Christi. Eorundem interim verborum sensum literalem supponit, imo & aperte docet alibi de reali manducatione, ea nimirum, quæ sine flagitio sit, dum Christi Corpus sub aliena specie Sacramentaliter manducatur. Audi de hoc S. Doctorem L. contra adversarium Leg. & Proph. C. 9. ubi, *Jesum Christum, inquit, carnem suam nobis manducandam - - dantem, fideli corde & ore suscipimus; quamvis horribilius videatur humanam carnem manducare, quam perimere &c.* Cum autem in cit. L. de Doctr. Christ. dicit, verba illa Christi intelligenda de communicatione passionis ejus, id solum vult: sumendam

esse Christi carnem sacramentaliter in memoriam passionis & mortis Domini, quod ipsum monet Apost. 1. Cor. 11.

- 52 Urgent II. sensus literalis eorum verborum omnino excludendus est ex mente Origenis Hom. 7. in Lev. *si enim, inquit ille, secundum literam sequaris hoc, quod dictum est, nisi manducaveritis &c. occidit hæc litera.*

Resp. ex mente Origenis verba illa non esse accipienda tantum ad literam, hoc est, sine ulla adjunctione mysterii, sicut accepta sunt a Capharnaitis, seu, quod idem est; quamvis intelligi debeant literaliter quoad substantiam manducationis: non tamen etiam quoad manducationis modum vulgarem ac ordinarium.

- 53 Objiunt II. Veterum Patrum complures Eucharistiam vocant imaginem, figuram, signum Corporis Christi; ergo veteris Ecclesiæ saltem universæ non fuit idem, qui nunc, sensus de reali præsentia Christi in Eucharistiæ Sacramento. Præcipuos tres e Patribus, ad quos Novatores provocare solent, nominabimus.

Tertullian. L. 1. contra Marcionem dicit, Christum Corpus suum representasse in pane; & L. 4. Corpus suum, inquit, panem fecit, hoc est Corpus meum dicendo, id est, figura Corporis mei. Chrysostomus Hom. 11. Oper. imperf. in Matth. in vasis sanctificatis non est verum Corpus Christi, sed mysterium Corporis ejus continetur. Augustinus L. contra Adimantium C. 12. non dubitavit Christus dicere, hoc est Corpus meum, cum daret signum Corporis sui. Denique in Enar. Ps. 98. non hoc Corpus, quod videris, manducaturiestis, - - Sacramentum aliquod vobis commendavi, spiritualiter intellectum vivificabit vos &c. Quæ ex Patribus aliis adserunt, fere cum his coincidunt.

Resp. I. generatim: Patrum aliquos nonnunquam obscure, figurate & mystice loqui, seu quod mysterium hoc voluerint occultum esse infidelibus; seu quod sciverint a fidelibus eo tempore, quo nondum enata fuit Sacramentarium hæresis,

sis, in sano sensu se intelligendos. Inde ut de iis censeripotest, attendendus est contextus sermonis, combinanda item alia loca, ac denique dicta eorum exponenda conformiter ad textum sacrum. Neque autem mirum videri debet, Eucharistiam nominibus memoratis compellari: tametsi enim illa sit vere ac realiter Corpus & Sanguis Christi, simul tamen est signum, figura & imago repræsentans eadem, prout videlicet Corpus & Sanguis Christi, sunt immolata in cruce. Item Corpus Christi sub aliena specie latens in Sacramento est figura ejusdem ut sub specie propria existentis, ac sub hac nati, passi, & mortui in cruce. Hoc certe sensu Christus, in specie hortulani olim apparens, fuit figura sui ipsius. Atque his in genere notatis,

Resp. II. in particulari. Tertulliani textus primus hunc sensum facit: Christus *in pane* apparente, seu sub speciebus panis, Corpus suum *repræsentavit*, hoc est, præsens exhibuit. Hoc eodem certe sensu L. 4. contra Marcion. C. 22. dixit, in monte Thabor Deum Patrem Filium suum *repræsentasse*: ubi indubie Christus vere ac realiter præsens fuit. In altero autem cit. textu *figuram* vocat in sensu supra expposito in Resp. I.

Locus ex Chrysostomo citatus ad rem præsentem non facit: neque enim illic agitur de Eucharistia, sed de vasis templi Salomonis, quæ Balthasar profanavit. Quid quod textus idem suspectæ sit fidei, cum in multis exemplaribus Operis imperf. non reperiatur: imo Opus hoc ipsum communi hodiernorum Criticorum judicio non est Chrysostomi, sed cujusdam alterius Auctoris, præsertim cum in eo legantur quædam doctrinæ illius contraria, & aperte hæretica. Idem esto judicium de Commentario in Ps 22. & Epist. ad Cæsarium, quæ sub nomine Chrysostomi isthic contra nos a Novatoribus citantur; utrumque enim hoc Opus non esse genuinum illius sætum probat Bellarminus. De Epist. ad Cæsarium nominatim, quæ

quæ maxime oggeritur, jure dubitari potest; nam nec veteres ejus meminerunt; impugnatur præterea in illa ex proposito Nestorii hæresis, quæ vivente Chrysostomo sparsa nondum fuit. Vide Natalem Alex. in Hist. Eccl. Sec. XI. & XII. Diff. 12.

Ad Augustinum denique dico: cum in L. contra Adimant. Eucharistiam vocat *signum*, non intelligit signum nudum & vacuum, sed plenum re significata. Ut enim jam supra innuimus, res eadem potest esse signum comparate ad se ipsam sub diversa ratione. Atque sic Eucharistia est signum Christi, quia species panis & vini significant Christum, quem per modum cibi & potus continent; quin Christus ipse sub his speciebus contentus est signum & figura sui ipsius, ut olim passi & mortui. Verbis autem in Ps. 98. cit. id voluit unum, quod non sit manducandum Christi Corpus in propria specie, visibile, ac mortale, quale fuit ante passionem: verum in specie aliena, invisibile, ac impassibile. Ita porro exponendi hæc verba fundamentum præbent cum alia Augustini loca, quibus aperte asserit verum Christi Corpus in Eucharistia manducari: tum etiam quod in laud. Enarrat. inducat Christum respondentem iis, quibus (ut S. Doctor refert) *durum visum, quod ait: nisi quis manducaverit carnem &c. acceperunt illud stulte, & carnaliter cogitaverunt, & putaverunt, quod præcisurus esset particulas quasdam de Corpore suo, & daturus illis &c.*

### Objecta ex ratione.

- 54 **O**bjicitur I. ab impossibili. Etenim 1<sup>mo</sup> idem Corpus non potest esse in pluribus locis; ex dogmate autem præfenti sequitur Corpus Christi non tantum in Cælo esse, sed in terra etiam, & quidem in tot numerosis consecratis hostiis. 2<sup>do</sup> In Eucharistia Christi Corpus caret proprietatibus Corporis: nequit enim videri, palpari, non est quantum &c. ergo nequit esse verum ac reale Corpus.

Resp.

Resp. ad *1mum*, idem corpus non posse simul in pluribus locis esse spectato ordine naturæ Conc. nec quidem divinitus, Deo videlicet virtute summa præter & supra naturæ ordinem operante N. uti istud ex Philosophia isthic suppono. Ex qua etiam facile resolves contradictionem, quæ ad speciem sequi videtur ex hoc prodigioso existendi modo. Neque enim vera est contradictio, nisi eadem sit de eodem sub eadem ratione; Corpus autem Christi in variis locis existens, tametsi unum idemque sit, non habet attamen eundem præsentiae localis modum: hinc ratione hujus diversæ quoad locum existentiae sine ulla contradictione enuntiari de illo potest, quod manducetur in terra, non in cælo: existat in cælo, desinat in terra existere &c.

Resp. ad *2dum*, Corpori Christi in Eucharistia nihil veri Corporis, modo attamen supernaturali existentis, proprietatum deesse: ita videtur, palpatur &c. at hæc omnia ei conveniunt sub aliena duntaxat specie. Idem habet quantitatem, seu extensionem suam, & quidem sub qualibet minima sensibili particula speciei Eucharisticæ; de quo vide infra N. 59.

Objicitur II. ab inconvenienti. Nempe *1mo*, Eucharistia 55 manducatur, eamque manducans nutritur; *2do* eadem concluditur pixide, conculcatur nonnunquam, a muribus corroditur, corrumpitur, generantur ex ea vermes &c. quæ omnia sine inconvenienti de Christi Corpore dici nequeunt. *3tio* maxime inconveniens & absurdum est, quod arguunt ex ratiocinio Stercoranistarum ducto ex illis apud Matth. C. 15. verbis: *omne quod in os intrat, in ventrem vadit, & in secessum emititur.*

Resp. ad *1mum* & *2dum*, ipsum omnino Christi Corpus (sub speciebus attamen alienis) manducari, pixide concludi, conculcari etiam nonnunquam; at quid absurdi in his ex parte ipsius Christi? qui jam ante, sine ullo utique suo inconvenienti, pro nobis ligari funibus, alapis & flagellis cædi, infami etiam crucis patibulo affigi sustinuit. Quod autem ad reliqua attinet, ut est nutritio per Eucharistiam, ejusdem corrosio,

corruptio, vermium ex ea generatio &c. hæc omnia non ad ipsum Christi Corpus, sed ad species duntaxat Eucharisticas referenda sunt. Summa videlicet virtute sua hujusmodi effectus præstat ipse Christus; hoc ipso enim, quod in Eucharistia panem in Corpus, & vinum in Sanguinem suum converti voluerit remanentibus panis & vini speciebus, statuit simul omnes illas affectiones, quas panis & vinum alias causat, tam in sensibus nostris, quam in vicinis corporibus per se ipsum efficere: nec impedire causas naturales, quo minus ita agant, quasi sub memoratis speciebus suum Corpus non esset præsens. Vermes proinde non ex illo, sed ut alias ex ovulis per insecta depositis generantur; ad præsentiam specierum Eucharisticarum ipse Christus actione prodigiosa corpus nostrum nutrit, vires naturales roborat &c. vel certe corruptis speciebus Eucharisticis, recedente Christi Corpore, prior panis substantia restituitur, per quam fiat nutritio &c. Cur enim divinæ potentiae, quæ ex nihilo creavit omnia, desit modus ad præsentiam hujus Mysterii eos effectus producendi, quos ipsa panis ac vini substantia produceret? quanquam fatendum sit, qua ratione istud re ipsa fiat, mysterium esse, quod ignoramus.

Resp. ad 3<sup>ium</sup>; cum graveolentibus his arguatoribus pudet ac tædet tricari pluribus; ad reprimendos eos notasse suffecerit, corruptis in stomacho speciebus Eucharisticis definere pariter præsentiam Christi Corporis. Cæterum argumentum hoc perperam dicitur a Stercoranistis mutuatum, de quibus, an unquam extiterint? jure dubites cum Cl. Bertio Theol. L. 33. C. 11, melius dixeris enatum ex putida Sectæ Sacramentariæ sentina.

- 56 Pro coronide de hujusmodi Sectariorum ratiociniis monitum velim Theologiæ studiosum. Cum de SS. fidei Mysteriis agitur, non argutatione & intelligentia humana opus est, sed fideli intellectus obsequio. *Respuit captiosas & inuiles Philosophiæ quæstiones fides constans, neque humanarum ineptiarum fallaciis succumbens, spoliū se præbet veritas falsitati, ut monet*



net Hilarius L. I. de Trinit. Nimirum (verba sunt Apostoli 2. Cor. 10. ) *arma militiæ nostræ non carnalia sunt, sed potentia Deo ad destructionem munitionum, consilia destruentes, & omnem altitudinem extollentem se adversus scientiam Dei, & in captivitatem redigentes omnem intellectum in obsequium Christi.*

Credunt Novatores SS. Trinitatis Mysterium, quia revelatum est divinitus: tamen illud & naturæ ordinem, & vim humanæ intelligentiæ excedat. In rebus ipsis naturalibus plura sunt, quorum naturam & existendi modum nemo unus assequitur; impudentis attamen foret eorum existentiam negare, quæ existere constanti sensuum testimonio experimur. Igitur fateamur licet ultro, vim humani ingenii superare rationem illam, qua se nobis Christus in Eucharistia præsentem sistit: nec penitus nos expedire difficultates, quas humana objicit Philosophia; non tamen idcirco neganda est diviniissimi Mysterii veritas, sed consistenda potius nostra infirmitas, & divinæ potentiae prædicanda magnitudo. Ut enim credatur illud, satis est esse a Deo revelatum. Nempe cum August. Ep. ad Volusian. *dandum Deo, aliquid eum posse, quod fateamur nos investigare non posse;* quando, ut Christus ipse ait Matth. 19. *etsi apud homines hoc impossibile est, apud Deum omnia possibilia sunt.*

Universim itaque argumenta hujusmodi ex mero ratiocinio humano petita, ceu in mysteriis fidei prorsus sutilia, rejicienda sunt; ea autem oggerentibus illud Augustini, contra Platonicos pro carnis resurrectione L. 22. de Civ. Dei C. 11. disputantis, reponendum: *Ecce! quibus argumentis omnipotentiae Dei humana contradixit infirmitas, quam possidet vanitas,*

### Corollarium

**H**actenus id satagemus, ut veram ac realem Corporis & sanguinis Christi in Eucharistia præsentiam contra Sacramen-

tarios evinceremus; nunc quæ ad ejusdem dogmatis notitiam & plenioram explanationem præterea faciunt, his tribus capitibus complectemur.

- 57 I. Quamvis vi verborum consecrationis in Eucharistia solum Christi Corpus sub specie panis, & solus Sanguis sub specie vini ponatur: per concomitantiam attamen totus omnino Christus, Corpus videlicet simul & Sanguis Christi una cum anima & divinitate, sub unaquaque specie, ac etiam sub quavis specierum parte sensibili continetur; id quod definitum est in Concil. Trid. Sess. 13. Can. 1. & 3. Pluribus vero id ipsum ibid. Cap. 3. exponitur his verbis. *Semper hæc fides in Ecclesia Dei fuit, statim post consecrationem, verum Domini nostri Corpus, verumque ejus Sanguinem sub panis & vini specie, una cum ipsius anima & Divinitate existere; sed Corpus quidem sub specie panis & Sanguinem sub vini specie ex vi verborum; ipsum autem Corpus sub specie vini, Sanguinem sub specie panis, animamque sub utraque vi naturalis illius connexionis & concomitantia, qua partes Christi Domini, qui jam ex mortuis resurrexit, non amplius moriturus, inter se copulantur; Divinitatem porro propter admirabilem illam ejus cum corpore & anima hypostaticam unionem. Qua propter verissimum est tantumdem sub alterutra specie, atque sub utraque contineri: totus enim & integer Christus sub panis specie, & sub quavis ipsius speciei parte, totus item sub vini specie, & sub ejus partibus existit.*

- 58 II. Num etiam ante divisionem specierum sub quavis earum parte sensibili totus Christus contineatur, id quidem clare definitum est nondum; rite attamen deducitur ex priore dogmate. Etenim Christus in Eucharistia fit præsens vi verborum consecrationis; atqui hæc verba non proferuntur denuo, dum dividuntur partes hostiæ consecratæ; cum igitur juxta laud. Session. Trident. Can. 3. ac etiam Cap. 3. post divisionem sub quavis specierum particula sensibili totus Christus sit præsens,

fens, dicendum omnino, eum etiam ante divisionem ita præsentem fuisse. Potest autem præsentia hæc ad eum fere modum explicari, quo quidam existimant animam in corpore humano toto totam existere, & totam simul in qualibet ejus parte. Certius in hanc rem exemplum est ab existentia Dei, qui tamen totus existat in hoc universo, totus nihilominus etiam est in quavis minima universi portione. Inde ex hac doctrina non sequitur, eum, qui integram sumpsit consecratam hostiam, pluries in ea multiplicatum eundem Christum sumpsisse.

III. Modus demum, quo totum Christi Corpus in minima etiam specierum particula sensibili existit, mysterium est, nobis usque huc omnino incognitum. Qui istud investigare adnisi sunt, in varias abierunt sententias. Ego censeo de hoc non esse magnopere laborandum Theologo, quando id neque ab ullo Patrum est explicatum, neque ab ullo Concilio discussum, minus definitum. Si quid tamen dicendum foret, ceu verisimilius assererem: in quavis hujusmodi particula sensibili Corpus Christi existere cum sua extensione, simulque salvo ordine, situ, & figura partium. Hac certe ratione commode salvatur & explicatur, quomodo totus Christus sit in tota consecrata hostia, & totus pariter sub qualibet ejus parte; evitatur etiam partium Corporis Christi confusio: nec quidquam repugnans asseritur, cum corpus animale in minima etiam extensione partium suarum ordinem retinere possit, ut certum est in minutissimis iis animalculis, quæ exilitate sua omnem oculi aciem effugiunt. At istud opinio duntaxat est, non assertum.

## §. IV.

*Per quam actionem Corpus Christi præsens fiat  
in Eucharistia?*

**A**sserta reali præsentia Corporis Christi in Eucharistia, ultro quæritur: quæ illa sit actio, per quam Christus redditus

tur præsens in SS. hoc Myfterio? an videlicet illic existat in & cum pane? an potius tota panis & vini substantia in Corpus & Sanguinem Christi transmutetur per actionem, quæ *transubstantiatio* dicitur? Varii sunt de hoc Sectariorum errores; imo DD. etiam Orthodoxi, tametsi unum idemque transubstantiationis dogma propugnent, in exponendo tamen illo non consentiunt.

### Sectariorum Errores.

- 60 I. **B**erengario (ut supra meminimus) de reali Christi præsentia opinionem suam variante, eandem ex discipulis ejus etiam nonnulli variarunt, ac demum Christi Corpus vere ac realiter in Eucharistia præsens professi sunt. Verum (ut est inconstans, & novitatis cupida Hæreticorum indoles) sanam hanc doctrinam errore novo mox corruperunt, scissi & ipsi ab invicem in duas partes. Quidam enim eorum (teste Guitmundo L. 1. de verit. Corp. Christi) docebant, Christum in Eucharistia præsentem fisci per *impanationem* (dicti propterea *Impanatores*) hoc est, per unionem hypostaticam Christi cum pane & vino; ut adeo, sicut propter unionem Verbi divini cum humanitate recte dicimus, *hic homo est Deus*: ita pariter de pane Eucharistico liceat dicere, *hic panis est Christus*. Alii contra (ut scribit laud. Guitmundus) rejecta hac unione hypostatica, satis habebant asserere: utramque panis & Corporis Christi substantiam in Eucharistia conjungi, *Consubstantiatores* vocati idcirco. Quis porro festas has primus excitavit, nondum certo exploratum est; Bellarminus L. 3. de Euch. C. 11. Impanatorum auctorem facit Rupertum Abbatem Tuitiensem, at reclamat Gerberon in sua Apologia; verisimilius videtur, utriusque erroris semina jecisse inconstantem Berengarium. Illud certum, jam sub initium Seculi XII. tam Impanatores quam Consubstantiatores grassatos fuisse; ex  
Impa-

Impanatorum præterea Schola originem duxisse *Ubiquistas* Sectarios, existimantes Corpus Christi perinde *ubique* esse ac ipsum Verbum, idque propter unionem hujus cum illo.

II. Ad nostram quod attinet ætatem, nullos jam hodie 61 (quod sciam) Impanatores reperias; Consubstantiatorum ex adverso errorem etiamnum pervicaciter propugnant Lutherani, ut adeo contra eos potissimum isthic nobis agendum sit. Admissa nempe illi vera ac reali præsentia Christi, negant fieri transmutationem substantiæ panis & vini in substantiam Corporis & Sanguinis Christi; verum utramque hanc substantiam simul in Eucharistia remanere contendunt. Neque dubium esse potest, errorem hunc illos hausisse a Magistro suo Luthero. Quamvis enim is, pro more suo, in doctrina hac sibi non constaret; ac jam transubstantiationem negaret: alias concederet; nunc pro arbitrio cujusque eam negandi vel profitendi facultatem permetteret; certum attamen est, ab eo fuisse excitatam L. de Capt. Bab. Consubstantiatorum doctrinam. Quin eidem illum denique adhæsisse argumento est Ep. ad Henricum VIII. Angliæ Regem An. 1522. data, in qua hæc scribit: *nunc transubstantiare volo sententiam meam, & dico: antea posui nihil referre, sive sic, sive sic sentias de transubstantiatione; nunc autem decerno, impium & blasphemum esse, si quis dicat, panem transubstantiari.*

### Doctrina Catholica, & in exponenda illa variæ DD. opiniones.

I. C Onstans jam inde a principio Ecclesiæ Catholicæ sensus 62 fuit, in Eucharistia panem & vinum converti in Corpus & Sanguinem Christi; vocis interim *transubstantiatio* (quæ in re idem significat) communis usus primum inductus est in Concilio Lateranensi IV. sub Innocentio III. Sec. XIII. celebrato, quod

con-

conversionem hanc definiens, *Corpus & Sanguinem Christi*, ait, *sub speciebus panis & vini veraciter contineri, transubstantiatis pane in Corpus & vino in Sanguinem Christi*. Ab eo tempore *transubstantiationis* nomen passim usurpatum est ab omnibus, etiam Scholasticis; verum (ut est Scholarum genius) cum de actionis hujus natura explananda, plus quam necesse erat, quidam essent solliciti, variæ inter DD. enatæ sunt opiniones. Et quidem

Joannes Parisiensis e D. Dominici familia Sec. XIV. transubstantiationem a Conc. Lateranensi assertam ita explicandam censuit, ut diceret, panem eatenus Corpus Christi effici, quatenus vi consecrationis hypostatice assumeretur a Verbo, non quidem immediate, ne diceretur, *Deus est panis*: sed mediante Corpore. Hanc interim suam opinionem Ecclesiæ judicio submitit Joannes; inde, cum ei de consilio Epp. & DD. quorundam a Wilhelmo Ep. Paris. silentium subinde imponeretur, omnino conticuit.

Eodem Seculo Durandus Ep. Anicien. in 4. dist. 11. qu. 3. docuit, solam panis formam, non etiam materiam transire in Corpus Christi, *salvo tamen* (quod addit) *meliori judicio*. Etate contra D. Thomæ quibusdam visum, remanente panis forma, solam ejus materiam transmutari, ut S. Doct. refert 3. p. qu. 75. Ar. 6.

Demum Sec. XV. varias scholasticorum hujus argumenti opiniones commemorans Cardinalis de Alliaco, in 4. dist. 6. Ar. 11. hæc scribit: *licet Catholici concordaverint in hoc, quod Corpus Christi sit in Sacramento, circa modum ponendi fuerunt diversæ sententiæ. Prima, quod substantia panis sit Corpus Christi. Secunda, quod non remanet substantia panis, sed reducitur in materiam per se stantem, vel aliam formam recipientem, - - & Corpus Christi coexistit accidentibus panis. - - Tertia fuit, quod remaneret substantia panis. Quarta & communior est, quod substantia panis non remanet, sed simpliciter definit*

*definit esse.* Addit dein, hanc postremam se amplecti, quod & conformior sit Ecclesiæ definitioni, & SS. Doctorum sensis.

II. Controversiis his locus jam nullus est, postquam Concil. Tridentinum vocis *transubstantiatio* acceptionem Sess. 13. Cap. 4. his verbis exposuit: *sancta hæc Synodus declarat, per consecrationem panis & vini conversionem fieri totius substantiæ panis in substantiam Corporis Christi, & totius substantiæ vini in substantiam Sanguinis ejus; quæ conversio convenienter & proprie a S. Catholica Ecclesia transubstantiatio est appellata;* quod idem dein Can. 2. ejusdem Sess. sub anathemate defini- vit, *mirabilem & singularem vocans conversionem illam.* Ist- hic porro transubstantiatio dicitur 1mo, *conversio*: ad exclu- dendam videlicet unionem panis cum personalitate Christi, seu Verbo; aut cum ejus Corpore. Neque enim *Unio* dici potest *conversio*; hinc SS. PP. unionem naturæ humanæ cum Verbo contra Nestorium ita propugnarunt, ut contra Eutycheten ne- garent conversionem naturæ humanæ in personam divinam. Dicitur 2do, *totius substantiæ panis*: quo distinguatur transub- stantiatio ab aliis mutationibus substantialibus, in quibus rema- net saltem pars substantialis, scilicet materia; hinc cit. Can. vocatur *mirabilis & singularis conversio*, ut significetur, eam non modo supra naturam, sed etiam sine exemplo esse. Unde colligas, sententiam Durandi N. priore relatum merito vocari hæreticam a Bellarm. de Euch. L. 3. C. 13.

III. Aperta igitur hac Conc. Tridentini expositione & de- finitione finis impositus est litibus memoratis: at non perinde de transubstantiationis actione quæstionibus, quas jam ætate sua excitatas meminit Mag. Sent. L. 4. dist. 11. Disputatur nempe etiam ab hodiernis Theologis: quænam sit illa transubstan- tiationis actio? Thomistæ opinantur esse reproductionem Cor- poris Christi; Scotistæ constituunt illam in actione adductiva, qua videlicet Corpus Christi in Cælo existens, sine productione nova, fiat præsens sub speciebus Eucharisticis; alii volunt

transubstantiationem, præterquam quod sit actio productiva aut adductiva, esse simul unitivam Corporis Christi cum speciebus panis & vini: non ita quidem, ut eas Corpus Dominicum tanquam subiectum sustentet, sed ut ad eas, tanquam contentum substantiale, cum quadam habitudine referatur. Omitto illa, quæ de ipso hujus actionis termino controvertuntur: an nempe sit Corpus Christi? an modus aliquis ab eo distinctus, hicque intrinsecus, an extrinsecus? &c.

De quibus tot, ac tam anxiiis curis si (quod est) fateri oporteat: eo spectare illas jure dixeris, ut ex litibus serantur lites finem habituræ nunquam. Si quid dicendum est amplius; controversiis hujusmodi, ajo, sacrosancta Mysteria (nullo Religionis commodo, & præter rerum ordinem) ad Philosophiæ crismam exigi, ac fidei causam tribunali profano submitti. Certe Vasquez 3. p. qu. 75. disp. 181. C. 1. non dubitat asserere, quæstionibus his *recentiores Scholasticos, quo magis abiis se extricare conati sunt, eo majoribus difficultatibus se implicasse. Ex quo etiam* (ut prosequitur ille) *effectum est, ut mysterium fidei nostræ non modo difficilius ad explicandum, sed etiam adversariorum nostrorum argutiis & cavillationibus magis expositum fuerit.* Inde factum, ut, cum in Concilio Tridentino e Doctoribus quidam philosophicas hujusmodi lites agitare cœpissent, silentium eis a Patribus imponeretur: ipsa vero Synodus non aliud expendendum & definiendum susceperet, quam quod erat fidei contra Novatores, ut legere est in Hist. Conc. Trid. apud Pallav. Nullum proinde rei theologicæ detrimentum se facturum existimet Theologiæ Studiosus, si de transubstantiationis Eucharisticæ mysterio acturus, præteritis id genus tricis, id unum satagat: ut illud ex Scriptura & Patrum sensis propugnet, nec in eo explanando limites, Ecclesiæ definitis oraculo descriptos, transgrediatur; id quod & nobis est propositum.

ASSER-



## ASSERTIO.

*In Eucharistia Corpus & Sanguis Christi existit per transubstantiationem; seu ita, ut non remaneat panis & vini substantia, sed tota (speciebus duntaxat panis & vini remanentibus) convertatur in Corpus & Sanguinem Christi.*

**P**robatur I. ex S. Literis, ac nominatim illis Christi Matth. 65  
26. verbis, *hoc est Corpus meum, hic est Sanguis meus*, quibus non solam Corporis & Sanguinis Christi figuram aut virtutem: sed ipsum omnino ejus Corpus & Sanguinem demonstrari §. priore contra Sacramentarios & Calvinistas probavimus, ac nobiscum fatentur Lutherani, quos isthic impugnamus. Hinc vero contra eos ita arguo: nisi substantia panis & vini convertatur in Corpus & Sanguinem Christi, laud. verborum sensus erit: *hic panis est Corpus meum, hoc vinum est Sanguis meus*; sicut igitur falsum est, panem esse Corpus Christi, & vinum ejus Sanguinem, ita & Christi verba erunt falsa: at hoc dicere blasphemum est; satendum ergo, in Eucharistia non remanere panis & vini substantiam, sed totam converti in Corpus & Sanguinem Christi. Illatio tota, ut vides, est legitima; nec Assertum primum negari potest, nam pronomina *hic & hoc* ex usu vocum recepto demonstrant substantiam sensibiliter præsentem: cum ergo per Novatores remaneat panis & vini substantia, eaque sit sub speciebus propriis sensibiliter præsens, illam necesse est demonstrari, atque adeo Christi verborum hunc esse sensum, *hic panis est Corpus &c.* In nostra ex adverso sententia, pane & vino in Corpus & Sanguinem Christi transubstantiatis, ac remanentibus nihilominus panis & vini speciebus, verba consecrationis hunc sensum faciunt: *hæc res, quæ continetur sub his speciebus, est Corpus meum & Sanguis meus*; quo sensu verba Christi vera sunt in doctrina Catholica. Quibus isthic Lutherani utantur effugiis patebit ex Objectis N. 67. ubi argumentum hoc pluribus urgebimus.

Contra Impanatores illud facit: quod unio hypostatica secum seruat communicationem idiomatum, ut constat in unione humanitatis ad Verbum; sicut igitur propter hanc recte dicitur: *hic homo est Deus, Deus est homo, Deus est natus, crucifixus &c.* ita pariter propter unionem hypostaticam Christi cum pane dici posset: *panis est Deus, Deus est panis, Deus est in fornace pistus, panis est pro nobis crucifixus &c.* quæ nemo sanæ mentis asseruerit, minus autem legere est apud Patres.

- 66 Probatur II. contra Impanatores simul & Consubstantiatores ex perpetua Ecclesiæ Traditione, qua docemur: in Eucharistia non remanere panem & vinum, sed ea converti in Corpus & Sanguinem Christi. Hujus autem Traditionis testimonium sunt,

I. Græcorum & Latinorum consensus, de qua, præter Auth. perp. Fid. in Tomis 4. de Eucharistia, consule Homilias Græcorum Patriarcharum a Renaudotio editas, supra N. 43. a nobis laudatas. Huc faciunt vetustissimæ Liturgiæ ab eod. Renaudotio duobus Tomis vulgatæ, in quibus, perinde ac in hodierno Latinorum & Græcorum Canone, Sacerdos orat, *ut Corpus Christi & Sanguis fiat.* Certe in prima, quam ibid. refert, Liturgia S. Basilii Oratio oblationis sub medium hæc habet: *ostende faciem tuam super hunc panem & super hunc Calicem, - - transfer (commuta) eos, ita ut panis hic fiat Corpus tuum sanctum: & hoc mistum in hoc calice, Sanguis tuus &c.* Et in altera S. Gregorii Liturgia: *Tu Domine voce tua sola commuta hæc, quæ sunt proposita, - - & hunc quidem panem facias Corpus tuum &c.* Idem legere est in reliquis Liturgiis ibidem relatis, quas insigni Commentario & Notis illustratas apud eundem Renaudotium reperi s.

II. Ejusdem Traditionis testes sunt Patres, & Concilia. Ex Conciliis quidem Lateranense IV. Florentinum, & Tridentinum, quorum verba pro fronte hujus Libri recitantur; his addendæ Synodi contra Berengarium celebratæ, præsertim  
Roma-

Romana sub Gregorio VII. in qua Berengarius pœnitens profiteri debuit se credere, *panem & vinum - - in veram & propriam ac vivificatricem Carnem & Sanguinem JESU Christi substantialiter converti &c.* Ex Patribus eos nominasse sufficiat, qui aperte dicunt panem & vinum converti, transmutari, fieri Corpus & Sanguinem Christi. Ita Tertull. L. 4. contra Marcion. C. 4. *acceptum, inquit, panem - Corpus illum suum fecit, hoc est Corpus meum, dicendo.* Gregor. Nyss. Orat. Catech. 37. *recte nunc quoque Dei verbo Sanctificatum panem in Dei Verbi Corpus credo transmutari.* Cyrill. Hieros. Catech. Mystag. 4. post recitata consecratoria Christi verba, *aquam, inquit, aliquando mutavit in vinum, & non erit dignus, cui credamus, quod vinum in Sanguinem transmutavit? - - quare cum omni certitudine sumamus Corpus & Sanguinem Christi; nam sub specie panis datur tibi Corpus, & sub specie vini datur Sanguis.* Ambrosius L. 4. de Sacram. ubi *acceſſerit consecratio, de pane fit Caro Christi &c.* Chrysostom. Hom. 83. in Matth. *qui hæc dona sanctificat & transmutat, ipse est Christus.* His adde Justinum, Irenæum, Gaudentium, Augustinum, & alios ordine Seculorum copiose relatos a Bellarmino L. 3. de Euchar. C. 20.

### Seſtariorum Argutiæ refelluntur.

**P**rimum, unde tam Impanatores quam Conſubſtantiatores pro tuendo errore ſuo arguantur, ſunt S. Literæ. Ajunt nimirum 67

I. Euchariftia vocatur panis I. Cor. II. *quotiescunque manducabitis panem hunc, - - mortem Domini annunciabitis. - - quicumque manducaverit panem hunc - - indigne, reus erit &c.* Idem legitur ibid. ſupra Cap. 10. & Luc. 24. remanet ergo ſubſtantia panis in hoc Myſterio.

II. Ex verbis Chriſti, *hoc eſt Corpus meum*, non recte inſertur tranſubſtantiatio: tametiſi enim idem de ſe dixerit

Joan. 6. *ego sum panis*; ac etiam licet de Christo dici possit, *hic est Deus*, non sequitur attamen, Christum fuisse transmutatum in panem, aut naturam humanam in Christo esse conversam in Divinitatem; igitur nec ex verbis illis, *hoc est Corpus meum*, arguendum est, panem transubstantiari in Corpus Christi.

III. De ferro ignito cum veritate asserimus, *hic est ignis*: & de lagena vino repleta, *hoc est vinum*, quin ulla fiat in ferro aut lagena substantiæ mutatio; ergo & Christi verba, *hoc est Corpus meum*, vera erunt sine conversione panis in Corpus, modo hoc videlicet adsit in pane aut cum pane: uti ignis præsens est in ferro, aut vinum in lagena.

IV. In his verbis, *hoc est Corpus meum*, pronomen *hoc* non potest demonstrare Corpus Christi: nam dum Sacerdos *hoc* enunciat, nondum est præsens Christi Corpus; demonstratur ergo panis, atque ita ejus substantia remanet in Eucharistia.

V. Ipsi DD. quidam Orthodoxi fatentur, dogma transubstantiationis certo probari non posse ex Scriptura sola. Ita sensit Durandus, Paludanus, Ochamus, Gabr. Biel, Scotus &c. Quin etiam Bellarminus de Euch. L. 3. C. 23. postquam rexit Scotum dixisse, *non extare locum ullum Scripturæ tam expressum, ut sine Ecclesiæ declaratione evidenter cogat transubstantiationem admittere*, mox de suo adjicit: *atque id omnino non est improbabile*. Ergo Scripturæ saltem testimonio non evincitur, panem in Corpus Christi transubstantiari.

Resp. ad I. His & aliis Scripturæ locis Eucharistiam compellari panem in sensu improprio; id autem vel inde colligas, quod Joan. 6. Christus dicat, *panis, quem ego dabo, caro mea est &c.* sicut igitur Caro Christi non est panis in sensu proprio, sic nec Eucharistia sensu proprio panis dicitur. Nec desunt plures tituli compellationis hujus metaphoricæ. Etenim Eucharistia imo habet apparentiam panis; in  
Scriptu-

Scriptura autem non raro rei alicui nomen inditur ab externa specie; ut Gen. 18. & Act. 1. Angeli vocantur Viri, quia sub humana specie apparuerunt. 2do est cibus animam reficiens; habet igitur analogiam quamdam cum pane, cum & hic corpus reficiat. Quilibet præterea cibus in Scriptura aliquando compellatur panis: ut nominatim manna Israelitarum, de quo, *panem Angelorum manducavit homo*, Ps. 77. legitur. Idem manna vocatur *panis de cælo*, Joan. 6. 3tio Eucharistia fit per conversionem panis in Corpus Christi; rursus autem non infrequens Scripturæ phrasis est, rem conversam vocare nomine rei illius, ex qua facta est conversio: ita Exod. 7. colubri ex virgis facti etiam post conversionem dicuntur virgæ, *devoravit virga Aaron virgas eorum*. Ex eo proinde, quod Eucharistia vocetur panis, non sequitur in ea remanere panis substantiam.

Resp. ad II. Nego Assertum; nec probationes ejus evincunt quidquam. Dixit equidem Christus se esse *panem*, at adjecit *panem vitam, vivum*; quæ voces additæ satis indicant, nomen *panis* isthic in sensu metaphorico sumendum, pro ipso videlicet Christo per fidem manducando, ut cit. Capituli contextus docet. Vera igitur sunt verba illa, *ego sum panis vita*, quin necesse fuerit Christum in panem mutari. Propositio autem de Christo altera, nempe *hic est Deus*, vel *hic homo est Deus*, est omnino vera sine conversione humanitatis in divinitatem; at veritatem hanc efficit unio hypostatica, vi cujus in Christo natura humana & divina subsistit in una eademque Persona Verbi; hinc propositionis illius sensus est: *hoc suppositum habens humanitatem, est suppositum habens divinitatem*; seu, quod idem est: *Persona terminans hanc naturam humanam, est Persona terminans etiam naturam Divinam*. Nil autem simile adferri potest pro veritate hujus propositionis, *hoc est Corpus meum*; ut igitur vera sit, panem mutari in Corpus Christi, fatendum est.

Resp.

Resp. ad III. Secundum acceptionem vocum usitatam nonnunquam continens sumitur pro contento, ac etiam pars (præsertim si ea sit sensibilis) pro toto; cum ergo ignis contineatur in ferro ignito, sitque etiam ejus pars sensibilis: cum item lagena sit vas ex hominum instituto destinatum ad liquorem continendum, sufficiens ratio est dicendi, objectas propositiones duas esse veras sine ulla substantiali conversione. Ex adverso Corpus Christi non est utique pars panis: nec panis institutus est ad continendum Corpus Christi; non perinde igitur vera erunt Christi verba, *hoc est Corpus meum*, nisi panis transeat in substantiam Corporis Christi.

Resp. ad IV. Demonstrationem per pronomen *hoc* etiam varie explicant Doctores. S. Thomas cum plurimis Theologis censet, per *hoc* demonstrari vage substantiam sub specie panis, ita ut ultima ad Corpus Christi significandum determinatio fiat tum primum, dum vox *meum* enunciatur. S. Bonaventura cum quibusdam putat demonstrari substantiam panis, huncque sensum verba consecrationis habere; *hic panis convertitur in Corpus Christi*. Vasquezii cum Maldonato & aliis nonnullis opinio est, ipsum Christi Corpus demonstrari; quia licet illud tunc adhuc præsens non sit, fit tamen præsens vi pronominis *hoc* sumpti simul cum reliquis verbis. In re tam obscura, quid potissimum dicendum sit, definire est arduum; quidquid horum interim dixeris, transubstantiationis dogmati conforme erit: nec Sectarius arguere poterit in Eucharistia remanere substantiam panis.

Quod si attamen denique meam requiras sententiam: Vasquezii opinio (ut ego quidem expono illam) videtur præ aliis probanda. Ajo itaque per pronomen *hoc* demonstrari Christi Corpus, quod tam per vocem *hoc*, quam per reliqua consecratoria verba nunc efficitur; ita videlicet, ut propositio, *hoc est Corpus meum*, æquivalenter hunc sensum faciat: *hoc, quod nunc per hæc consecrationis verba efficitur, est Corpus meum*;

meum, aut si mavis, quod in re idem est: *Corpus meum est hoc, quod per hæc verba efficitur*. Cum ergo id, quod per hæc verba efficitur, sit Corpus Christi, illud utique, & non substantia aliqua vague duntaxat sumpta, per pronomen *hoc* demonstratur. Nec mirere, hunc esse verborum consecrationis æquivalentem sensum: cum enim verba hæc sint *præctica*, hoc est, Corporis Christi *effectiva*, non supponunt illud, sed re ipsa efficiunt; prorsus igitur congrue sensus hic æquivalens illis attribuitur.

Resp. ad V. Tametsi detur, ex sola Scriptura non evinci transubstantiationis dogma, evincitur attamen ex illa cum Traditione & Ecclesiæ sensu conjuncta: id quod ad rem nostram satis est; cum credendorum regula non sit sola Scriptura, sed Traditio etiam & Ecclesia. Cæterum Scholasticorum Orthodoxorum nemo est, aut erat, qui non doceret dogma hoc recte probari ex Scripturis: quamvis existimarent quidam cum Scoto, non contineri in illis evidentem ejus probationem, quæ videlicet evidentia sua *Sine Ecclesiæ declaratione evidenter cogat transubstantiationem a Unitate*. Atque hoc solum sensu Bellarm. dicit *id non esse improbabile*; ubi attamen mox subjungit, in præsentis argumento *Scripturam sibi videri tam claram, ut possit cogere hominem non protervum*; hinc ex mente Bellarmini, quod Sectarii non cogantur, eorum est *protervia*, non Scripturæ obscuritas.

Alterum, quo se tuentur Novatores, est auctoritas quorundam Patrum, & Comitorum Augustanorum. Itaque;

I. Ex Patribus objicitur Chrysostomus Ep. ad Cæsarium ita scribens: *antequam sanctificetur panis, panem nominamus; divina autem illum sanctificante gratia, mediante Sacerdote, liberatus est quidem ab appellatione panis, dignus autem habitus Domini Corporis appellatione; etiamsi natura panis in ipso permansit &c.* Item Gelasius I. Papa L. de duab. Natur. in Eucharistia, ait, *esse non desinit substantia vel natura panis &c.*

R. P. Miszka Tom. II, de Sac.

L

vin

vini. Similia sunt Theodoreti Dial. 2. verba illa: *neque enim symbola mystica post sanctificationem discedunt a sua natura; manent enim in priore substantia, & figura, & forma, & videri tangique possunt, sicut prius.*

II. Provocant ad Rescriptum Comitorum, quæ sub Carolo V. Anno 1535. celebrata sunt. Nimirum (ut Lutherani quidem volunt) Confessionis Augustanæ in hoc Conventu exhibitæ Articulus X. hic erat: *De Cæna Domini docent, quod cum pane & vino vere exhibeantur Corpus & Sanguis Christi vescentibus in Cæna Domini;* ad hunc autem Articulum ita rescriptum est: *Decimus Articulus in verbis nihil offendit.*

Ex utroque hoc inferunt: tam PP. veteres, saltem aliquos, quam Principes Catholicos Sec. XVI. cum Imperat. Carolo agnovisse, in Eucharistia remanere substantiam panis.

Resp. ad I. loca ex Patribus citata esse fidei incertæ; ut adeo certum ex illis argumentum duci nequeat. De Chrysostomi Ep. ad Cæsarium jam supra §. priore N. 53. in Resp. II. Eruditorum crismis adnotavimus. Liber autem de duab. Nat. videtur esse opus Gelasii Cyziceni Scriptoris græci, non Gelasii Papæ. Equidem etiam Papa Gelasius scripsit de duabus in Christo naturis; at Opus hoc grande volumen esse, & in quinque Libros partitum, testatur Gennadius & Anastasius Bibliothecarius, quod non convenit cit. Libro, ut qui paucis paginis absolvitur. Stylus præterea ejus est prorsus similis Cyzicenæ elocutioni: nullum in eo e Latinis Patribus, sed Græcos tantum laudari reperies &c. Consule Bellarminum de Script. Eccl. in Gelasio Papa. Demum Dial. cit. etsi Theodoreti sit genuinus sætus, verba attamen ex eo relata vitio interpretis male reddita esse censet Card. Perronius; unde partem eorum postremam apud Auth. Instit. Theologicarum, jussu Joan. Claudii Ep. Piætav. editarum, Tom. 4. latine sic reddit: *remanent enim in prioris substantia & figura & forma &c.* quod est orthodoxum.

Ut



Ut ut interim sit de horum fide; imo quamvis recitata in Object. verba laud. Patribus ultro attribuas, nihil dum erit, quo eorum auctoritate plaudant Novatores. Certum quippe est, apud veteres *naturæ*, *substantiæ*, & *formæ* nomina sæpe usurpari pro significandis externis & sensibilibus rei alicujus affectionibus. Ita Tertull. L. de anima C. 13. distinguit inter substantiam & naturam; ipsumque e. g. lapidem vocat substantiam, ejus vero duritiem lapidis naturam. Conformiter ad quod exponendi sunt laud. Patres; cum enim ajunt in Eucharistia remanere panis substantiam, naturam, vel formam, id significare volunt unum: quod sensibiles panis affectiones ita perseverent; ut si sensuum duntaxat judicio standum foret, panem & vinum adesse prudenter judicari posset. Fundamentum porro ita exponendi hos Patres petitur tam ex contextu, quam ex subjecta materia, ut patebit laud. loca inspicienti. Illud certum est, Chrysostomum illic agere contra Appollinaristas, Gelasium vero & Theodoretum contra Eutychianos; cum igitur hi assererent, vi unionis hypostaticæ naturam humanam in Christo omnes suas proprietates amisisse, Patres ab Eucharisticis speciebus contra eos sic arguebant; quamvis in Eucharistia panis convertatur in Corpus Christi, nihilominus etiam per vos remanent proprietates & species panis; potiori igitur jure natura humana in Christo retinuit suas proprietates, ut quæ unita est tantum Verbo, non autem conversa in Divinam naturam. Vide de his pluribus differentem Tournelyum de Euch. Quæst. 3. Art. 3.

Resp. ad II. A Comitibus quidem ita omnino rescriptum est ad Articulum X. at hic in Confessione Carolo Imp. oblata aliis conceptus erat verbis, his nempe: *De Cæna Domini docent, quod Corpus & Sanguis Christi vere adsint, & distribuantur vescientibus in Cæna Domini*; ubi nulla sit mentio panis. Testem hujus (ne Catholicos Scriptores citem) habemus Georgium Cælesinum Lutheranum, in Hist. Comitiorum Augustan.

Anno 1530. Idem autem Articulus, prout nobis objicitur, primum Confessione An. 1540. a Lutheranis mutatæ insertus est; neque is sub hac verborum forma unquam Catholicorum abstulit suffragium. Sciendum nempe est, Confessionem, quæ sub nomine Augustanæ venit, sæpe ac multum a Lutheranis esse variatam, vixque aliquas earum, quas hodie venditant cum suo Originali consentire: ut videre est apud Chytræum Professor. Lutheran. in L. de Confessione August. depravata An. 1599. edito. Certè Forerius noster testatur, præ manibus se habuisse viginti diversas editiones Confessionis August. latini sermonis; has attamen variasse omnes, neque ullam earum cum Originali concordem fuisse. Plura de hoc te docebit Pichler in Theol. suæ Polemicæ Append. de August. Confess. Art. 10. Mihi, tantam in rebus fidei Lutheranorum instabilitatem consideranti, satis sit cum Athanasio de Syn. Arim. quærere: *quæ denique fides, apud quos nulla vel verba vel scripta robur habent, sed omnia pro tempore mutantur?* prolepto hæc non est nota Ecclesie super Petram ædificatæ.

69 Quod reliquum est Objectionum, ad tria capita commodè reducitur.

I. Nomen *transubstantiationis* est recens inventum, nec in Ecclesia auditum ante Concilium Lateran. IV. An. 1215. sub Innocentio III. celebratum; rejiciendum proinde ceu novitium, cum juxta Apostolum 1. ad Timoth. 6. vitandæ sint vocum novitates.

II. Non constat, qualis actio sit *transubstantiatio*: inde illa sententiarum apud DD. varietas, de qua N. 64. dictum; qui igitur certum dogma dici potest, quod in actione incerta fundatur?

III. In Eucharistia remanere panis & vini accidentia, figuram videlicet, colorem, saporem &c. sensuum testimonio certum est; at accidentia esse nequeunt sine proprio suo subjecto; remanet igitur etiam panis & vinum.

Resp.

Resp. ad I. vocis novitatem non obesse fidei; recte enim nova vocabula usurpari ad novos errores propulsandos evincunt voces *ἁγισμός* & *θεοικονία*, quarum primam contra Arianos Synodus Nicæna, alteram contra Nestorianos Ephesina opposuit. Quo autem sensu accipiendum sit Apostoli monitum, jam alias L. I. de Sacram. in Gen. N. 80. suo finem diximus. Res interim mira! novitatem vocali nobis objici: quæ autem *impanationis* & *consusstantiationis* nominum antiquitas? ubi ea in S. Literis, aut apud quem Patrum legunt Sæclarii? en in alienis oculis festucam! Cæterum *transusstantiationis* vocabulum jam ante Concil. Lateranense a quibusdam usurpatum legitur, ut Stephano Fduensi Ep. Petro Blefensi, Gaufrido & aliis, qui omnes Sec. XII. floruerunt, ut videre est apud Tournelyum. Quantum porro ad rem per vocabulum hoc significatam, reperitur illud in vocibus æquivalentibus apud vetustissimos Patres, sub nomine videlicet *conversionis*, *transmutationis*, imò apud Theophylactum in C. 14. Matth. etiam *transelementationis*; ut autem Hilarius L. de Synodis ait, *inane est calumniam verbi pertimescere, ubi res ipsa, cujus verbum est, non habeat difficultatem.*

Resp. ad II. Actionis hujus quoad nos incertitudine, & de ea opinionum varietate non infringi robur dogmatis præsentis; ut firmum nempe illud sit ac certum, satis est esse a Deo revelatum. Recole in simili sparsim dicta L. I. de Sacram. in Gen. & hoc L. N. 56. ac nominatim de hujus actionis ratione N. 64. satis sit Theologo cum Conc. Tridentino dicere, *transubstantiationem esse actionem mirabilis & singularis conversionis panis & vini in Corpus & Sanguinem Christi*; quod ultra sollicitius inquiritur, supervacaneum est. Inde Mag. sent. L. 4. dist. 11. de transubstantiationis actione sensum suum non dubitavit aperire his verbis: *si quis modum, quo id fieri possit, quaerit, breviter respondeo: Mysterium fidei credi salubriter potest, investigari salubriter non potest.*

Importune nihilominus urgenti cuipiam, ceu verisimilius, dic cum S. Thoma: actionem transubstantiationis esse *reproductionem* Corporis Christi, idque propterea quod id conformius sit sensui Patrum, quorum plures asserunt in Eucharistia Corpus Christi *fieri, produci &c.* passim autem *converti, transmutari &c.* quæ magis actioni *productivæ*, quam *adductivæ* conveniunt. Actionis porro hujus terminus a quo, est substantia panis & vini, quæ vi consecrationis verborum destruitur; *terminus formalis ad quem*, ipsum Corpus & Sanguis Christi, quæ eorundem verborum virtute efficiuntur ita, ut præsentia fiant sub speciebus panis & vini; *causa autem efficiens physica* Deus; *moralis* demum & *instrumentalis* ipse Sacerdos & verba consecratoria. Quibus attentis haud difficile est explicare, quomodo nihilominus in Eucharistia idem sit Corpus Christi, quod ex Virgine natum est: nam in hac sententia Eucharisticum Christi Corpus fit ex pane tantum ut *termino a quo*, non autem ut *materia componente*.

Resp. ad III. Conc. Maj. & Dist. Min. accidentia sine proprio suo subiecto remanere nequeunt lege naturali & ordinaria, Conc. lege extraordinaria & supernaturali, N. Min. & Consequ. constat autem in Mysterio hoc omnia agi a Deo præter consuetas naturæ leges. Quamvis vero hic definire nolim, quid nominatim sint accidentia physica? quæ quæstio est juris philosophici; illud tamen insinuo: si de natura accidentium cum RR. Philosophis sentias, facilius erit intellectu, quomodo in Eucharistia sine panis & vini substantia remaneant ejus species. Ita autem istud in hoc Systemate explicat Cl. Maignan ex Ord. Min. insignis Theologus & Philosophus: ait videlicet Christum actione sua affectiones externas panis (idem est de vino) supplere ita, ut in sensus nostros perinde fiant impressiones, ac fierent ad præsentiam panis; unde omnino necesse est consequi, ut appareat adesse substantia ejus, quamvis reipsa absit.

Neque

Neque est, quod submetuas hanc accidentium expositionem adversari Conc. Constantiensi: istud enim (teste Cardin. Petro Alliacensi, qui Concilio interfuit) hanc Wicleffi prop. *accidentia panis & vini non manent sine subiecto*, Sess. 8. damnans, non aliud definire voluit, quam quod in Eucharistia sint accidentia panis & vini sine suo proprio subiecto, pane nempe & vino; quod autem ad ipsam accidentium naturam attinget, id omnino in quæstionem non vocavit, verum Philosophis disceptandum reliquit.

Idem esto iudicium de Tridentino, cui pariter non erat curæ Philosophorum opiniones, sed hæreticorum duntaxat errores propulsare. Nec aliud in Decretis ejus aut Canonibus definitum reperias, quam, destructa panis & vini substantia, species eorum remanere; cum igitur vocabulum *species* ex communi acceptione rei apparentiam significet: cumque apparentia panis & vini per memoratas impressiones sufficienter habeatur, salva utique, quam Tridentini Decretis debemus, observantia sentire licebit, species Eucharisticas esse impressiones illas a Christo in sensus nostros factas, & non (quæ nescio) entia absoluta, quæ pani ac vino accident.

Demum ex hac Recentiorum philosophandi ratione non sequitur, impressionibus his Christum nobis illudere, aut deceptionis occasionem præbere: præmonemur quippe divini verbi oraculo de Mysterio; ut adeo nihil isthic sensuum testimonio sit deferendum, ac si quis deferat, uni sibi errorem imputet. Inde Chrysostomus (aut quisquis alius Auctor est) in Ep. ad Cæsarium: *verba ejus, inquit, fallere non possunt, sensus vero noster deceptu facillimus est; quoniam ergo ille dixit: hoc est Corpus meum, nulla teneamur ambiguitate, sed credamus, & oculis intellectualibus id adspiciamus.*

DIS.

## DISSERTATIO II.

### DE EUCHARISTIÆ, UT EA NOMI- NATIM SACRAMENTUM EST, NATURA, EFFECTIBUS, ET NECESSITATE.

#### §. I.

*An Eucharistia sit verum novæ Legis Sacramentum?  
& num in re permanente consistat?*

**S**i e veteribus Menandrianos, Simonianos, & paucos quosdam alios cum Socinianis Recentioribus Sectariis excipiam, reliqui facile nobiscum consentiunt, Eucharistiam esse verum Legis novæ Sacramentum. At hoc ipsum num sit permanens: an potius, ut Sacramenta cætera, transiens duntaxat, nec nisi in actuali usu consistens? nos inter & Novatores hodie etiam gravis disceptatio est, ut jam nunc statum ejus exponemus.

#### Novatores inter & Orthodoxos Controversia.

**I.** **L**utherani & Calviniani Eucharistiæ Sacramenti naturam, non in re permanente, sed in transeunte tantum actione constituunt. Putatur autem doctrinæ hujus auctor fuisse Bucerus; cum enim Lutherani Corpus Christi realiter esse in Eucharistia præfens assererent, contra Zvingliani negarent, quo eos invicem conciliaret, persuasit Luthero: Corpus Christi esse quidem in ipsa manducatione, non item extra illam. Quamvis autem dein hanc sententiam tam Lutherani quam Zvingliani amplecterentur, ac conformiter ad illam in solo usu

Sacra-

Sacramentum Eucharistiæ reponerent : scindi tamen invicem non desierunt, illis præsentiam Christi realem, his vero spiritualement & sacramentalem in manducatione profitentibus.

II. Neque hic dissidium stitit. E Zvinglianis Joan. Calvinus & Petrus Martyr ita sententiæ suæ inhærebant, ut negarent panem & vinum manere Sacramentum, si ad ægros deferantur; e Lutheranis vero Kemnitius contendebat in tota Coenæ Domini actione Sacramentum perdurare, hoc est: dum panis benedicitur, frangitur, distribuitur, ac etiam dum ex ipsa Coena ad ægrum vel absentem desertur eum in finem, ut manducetur. Quin (teste Claudio Sanctes Repet. 4. de Euch.) quidam existimabant, toto etiam triduo propter ægrotos asservari posse Eucharistiam, ita ut hoc temporis spatio (non tamen ultra illud) Sacramentum permaneat. Consule de his Bellarminum L. 4. de Sacr. Euch. C. 1. ubi hos Sectariorum errores, citatis Auctorum locis, recitat: ac dein sequentibus quatuor Capitibus copiose impugnât.

III. Ex adverso una est Catholicorum omnium sententia: Eucharistiam esse Sacramentum permanens, neque illud præcise in actione transeunte consistere. Quia interim ad Eucharistiam, præter Corpus & Sanguinem Christi, etiam verba consecrationis, species item consecratæ, ac ipsa denique sumptio aliqua ratione pertinent, disceptatur a nonnullis: quæ horum nominatim in Eucharistia perfectam Sacramenti rationem constituent? Opiniones de hoc varias recenset, ac etiam ad mentem Auctorum explicat Vasquez in 3. p. D. Thomæ qu. 33. Art. 1. Di. p. 157. Cap. 2. & 3. Non est autem, quod sibi blandiantur Novatores, quasi horum Doctorum aliqui suarum forent partium; quamvis enim eorum quidam Sacramenti hujus rationem ex parte, aut etiam integre in transeunte consecrationis forma vel sumptione constituent: admittunt nihilominus (quod illi contra negant) continuo ac

R. P. Mufzka Tom. II. de Sacr.

M

verba

verba consecrationis prolata sunt, vere & realiter præsens esse sub panis & vini speciebus Corpus Christi, illudque sub iis constanter perdurare, quamvis nulla sequatur sumptio. Supposito itaque toto fidei dogmate, opiniones hæ spectant quæstionem mere scholasticam, eamque metaphysicam magis quam theologicam; quod ipsum in causa est, cur ab ea pertractanda abstineamus, prolaturi duntaxat sententiam de Eucharistiæ Sacramenti veritate, ejusque natura contra Novatores.

### ASSERTIO.

*Eucharistia est verum novæ Legis Sacramentum; idemque consistit in re permanente, & non in actione solum transeunte in sensu Novatorum.*

73 **P**robatur pars I. Ut enim aliquid sit verum novæ Legis Sacramentum, satis est esse *signum sensibile a Christo institutum ad significandam & causandam gratiam*; quid vero horum in Eucharistia desideres? Species panis & vini sunt *signum sensibile*; has ipsas autem, prout sub illis Corpus Christi continetur, a Christo esse institutas constat ex Diss. I. §. II. Eædem deinde species sic acceptæ ex institutione Christi in fumentibus efficiunt *gratiam* juxta illud Joan. 6. *qui manducat meam carnem, & bibit meum sanguinem, in me manet, & ego in illo.* Hanc ipsam porro gratiam vel ideo, quod causent, etiam *significant*, cum universam causâ sit effectus sui signum: nihil ut dicam de significatione ea, quam habent a refectione corporali, ad quam Eucharistiæ materia, panis nempe & vinum, ex se ordinantur.

Pluribus hanc Assertionis partem affirmare supervacuum fuerit, quando ne Sectarii nostri quidem de ea litem excitant; nobis vero præterea illam fide certam esse constat ex clara definitione Conc. Tridentini Sess. 7. Can. 1. ac etiam perpe-



perpetua Ecclesiæ Traditione, cujus testes sunt omnis ævi Patres per decursum L. hujus laudandi, & ipsa Græcæ & Latinæ Ecclesiæ in hoc fidei dogma consensio.

Illud hic observandum: tametsi Eucharistia diversis con- 74  
stet symbolis, ac materia specie diversa, pane videlicet & vino, quia tamen hæc omnia ad unam significationem practi-  
cam ordinantur, unumque & eundem sacramentalem effe-  
ctum causant, Eucharistia est unum duntaxat specie Sacra-  
mentum, ut docet S. Th. hic qu. 73. Ar. 2. in O. ubi id  
ipsum a convivio & refectione corporali arguit. Idem ni-  
hilominus Eucharistiæ Sacramentum dici potest numero mul-  
tiplicari, cum videlicet plures numero sunt species Sacra-  
mentales; quamvis oppositum existimet Suarez in 3. par. qu.  
75. Disp. 39. Sect. 4.

Probatur pars II. Assertionis ex Christi Eucharistiam con- 75  
ficientis verbis, *hoc est Corpus meum, hic est sanguis meus*:  
quæ verba Christus prius protulit, quam discipulis fumen-  
dam daret Eucharistiam; cum igitur Christi verba statim, ac  
prolata sunt, fuerint vera & efficacia, ante ipsam utique man-  
ducandi & bibendi actionem aderat jam sub speciebus panis  
& vini Corpus & Sanguis Christi, ac proinde extra usum da-  
batur verum Eucharistiæ Sacramentum. Ex hoc vero ultro con-  
sequitur: Sacramentum hoc haberi sine transeunte sumptionis  
actione, consistere proinde in re aliqua permanente, panis vide-  
licet & vini speciebus Corpus & Sanguinem Christi continentibus.

Hæc eadem doctrina firmatur Traditione, quam satis 76  
declarat vetus Ecclesiæ praxis in longius etiam tempus asser-  
vandi Eucharistiam; id quod jam apud primævos Christianos  
pluribus ex causis factum docent Veterum monumenta.

Ita imo asservabatur olim Eucharistia, cum in signum  
pacis & charitatis ad absentes mitteretur, ut constat ex Ire-  
næi Ep. ad Victorem Papam, ex Metaphrasæ in Actis Lu-  
ciani Mart. ac ipso etiam Justino M. qui in Apol. 2. de Dia-  
conis agens, *distribuant, inquit, panem, vinum & aquam, & ad*  
M 2 *absen-*

*absentes perferunt ; porro hoc alimentum appellatur Eucharistia.* Certissimum autem in hanc rem testimonium est ex Concilio Laodiceno sub Sylvestro Sec. IV. celebrato, in quo per Can. 14. mos hic ex parte saltem abrogatus est.

Asservabatur 2do Eucharistia in privatis domibus, ut pro opportunitate sumeretur in periculis, morbo, ac cumprimis persecutionum tempore, quo Synaxes publicas celebrare vetitum erat fidelibus, uti istud memorat Basilii Ep. 289. ad Cæsaream Patriciam. Morem eundem docemur ex Hieronymi Epist. ad Painmachium, Gregorii Naz. Orat. 111. & Ambrosii Orat. funebri de obitu fratris sui Satyri; quin etiam ex Tertulliani L. 2. ad Uxorem C. 5. & Cypriani Tract. de lapsis, ubi de muliere in persecutione lapsa scribit, quod *cum arcam suam, in qua sanctum Domini fuerat, manibus indignis tentasset aperire, igne inde surgente deterrita sit.*

Demum 3tio asservabatur Eucharistia in Ecclesiæ Sacratio, ut inde ad infirmos deferretur. Atque hic mos hodie etiam obtinet apud Latinos perinde ac Græcos, cum eo attamen discrimine: quod Græci præterea feria quinta majoris hebdomadæ consecrant Eucharistiam per anni totius decursum pro infirmis servituram, ut refert Goarius in Notis ad Eucholog. & Arcudius L. 3. C. 55. Ne autem praxim hanc novitiam esse putent Novatores, legant Concilii Nicæni I. Canonem 13. in quo de infirmorum Communione ita statuitur: *de his, qui ad exitum veniunt, etiam nunc lex antiqua servabitur, ut si quis egrediatur e corpore, ultimo & maxime necessario viatico minime privetur &c.* jam igitur Sec. IV. & quidem juxta antiquam legem asservabatur Eucharistia, quæ in promptu esset pro casu periculi mortis. Cujus ipsius testem habemus Eusebium Cæsariensem, ut qui ex Dionysio Alex. Sec. III. Patre, in Hist. sua Eccl. L. 6. C. 33. narrat Serapionem ad extrema deductum misisse noctu puerum ad Presbyterum pro Eucharistia; Presbyterum autem, cum ipse ob ægritudinem venire non posset, dedisse eidem puero *parum Eucharistia:*  
quod

quod infusum iussit seni præberi; id quod postquam a puero est præstitum, Serapion jam lætior spiritum reddidit. Ex his vero ultro consequitur, eam semper fuisse veteris Ecclesiæ fidem, ut crederet, non modo sub actuali consecratione aut sumptione, verum etiam extra omnem huiusmodi actionem trans-euntem haberi veram Eucharistiam, ac proinde eam esse Sacramentum permanens. Neque jam dubitare licet istud fidei esse dogma, postquam præsertim a Concil. Trid. Sess. 13. Can. 4. contra Novatores aperte definitum est.

Quod si porro quæras: in quibus nominatim, ceu par- 77  
tibus Sacramenti naturam constituentibus, Eucharistia consti-  
tat? tametsi istud statuere ad fidei doctrinam parum conse-  
rat, censeo nihilominus verisimiliorem esse eorum senten-  
tiam, qui cum Cajetano & Vasquezio existimant Sacramen-  
tum Eucharistiæ consistere in speciebus simul & Corpore ac  
Sanguine Christi: his etenim præcise habitis tota Sacramen-  
ti ratio habetur, nempe *signum sensibile a Christo institutum ad  
significandam & causandam gratiam*. Pertinent interim ad Eu-  
charistiam etiã consecrationis verba & sumptio: verba qui-  
dem, ut efficiatur Sacramentum; sumptio autem, quo per  
hanc illud applicetur ad percipiendum Sacramentalem  
effectum.

### Solvuntur Objectiones

contra Assertionis Partem alteram.

**O**bjicitur I. Christus verba illa, *hoc est Corpus meum*, non 78  
protulit ante manducationem, sed inter manducan-  
dum, ut colligitur ex Matth. C. 26. ubi V. 26. dicitur: ac-  
cepit *JESUS* panem, & benedixit, ac fregit, deditque discipulis  
suis & ait: accipite & comedite, *hoc est Corpus meum*. Idem  
est de Calice, ut patet ex sequ. V. 27. & 28. ergo ex his  
verbis non recte ducitur argumentum pro Assertionem, quin  
potius contra illam licebit arguere.

Resp. hanc Objectionem formari ab ipso Bellarm. L. 4. de Euch. C. 2. ubi simul ad eam dat Responsum, quod & nos sequimur. Nempe (ut ille ait) isthic spectandus non est verborum ordo, ut quem constat ab Evangelistis non raro mutari ita, ut quod prius factum est, narretur posterius, & ex adverso. Ita Marci 14. legas: *accepto Calice gratias agens, dedit eis, & biberunt ex illo omnes, & ait illis, hic est Sanguis meus &c.* Ubi cum verba *hic est Sanguis meus &c.* referantur post sumptionem, spectato præcise verborum ordine dicendum foret, Sanguinem Christi non fuisse præsentem nisi post ejus usum, quod nec Novatores admiserint. Quo igitur ex verbis Christi colligamus, quid ab eo prius aut posterius sit factum, attendenda est potius verborum significatio. Hac vero attenta recte arguitur, consecrationis verba prius fuisse prolata, quam discipulis porrigeretur Eucharistia: verba quippe hæc continent rationem motivam comedendi & bibendi, unde Matth. 26. additur particula causam indicans, *hic est enim Sanguis &c.* rei autem ordo utique postulabat, ut Christus motum sumendi ipsi sumptioni præmitteret, quo videlicet ad eam invitarentur, ac jam prævie scirent, quid sumpturi essent. Pluribus hæc explicat, & confirmat Bellarminus loco cit.

- 79 Instari potest nihilominus: nequit dari Sacramentum nisi cum ejus institutio servatur; at hæc extra sumptionem non habetur, cum Christus Eucharistiam instituens dixerit, *accipite & comedite*; extra sumptionem igitur non datur Eucharistiæ Sacramentum.

Resp. Dist. Maj. nisi cum ejus institutio servatur quoad illa, quæ Christus essentialia esse voluit C. quoad alia etiam, & omnes institutionis circumstantias N. Similiter & Min. distinguenda: extra sumptionem non habetur Christi institutio, quoad omnes institutionis circumstantias C. quoad essentialia N. una cum illatione. Complura nimirum sunt, quæ Christus occasione instituti hujus Mysterii egit & locutus est, ut est

est coenæ vulgaris manducatio, lotio pedum, discipulorum admonitio &c. nemo attamen dixerit, sine his consistere non posse Eucharistiam. Unde nominatim verbis illis, *accipite & comedite*, exprimitur quidem mandatum de sumptione, quæ præcipuus Eucharistiæ est finis: eadem attamen non continent vim formæ ad perficiendum Sacramentum necessariae, nec significatum eorum, seu sumptio, est de essentia Sacramenti.

Objicitur II. Vetus Ecclesia non asservabat Eucharisti- 80  
am, proinde nec credidit in ea Christi Corpus permanenter existere; perperam igitur mos hic pro Assertionem laudatur. Pro Antec. prop. facit auctoritas Clementis Romani, qui Ep. 2. ad Corinth. statuit, ut si quæ ex hostiis consecratis post communionem populi supersint, *in crastinum non reserventur, sed cum timore ac tremore Clericorum diligentia consumantur*.

Resp: N. Ant. Nec urgent ex Clementis Ep. laudata verba. Etenim, tametsi Clementis Ep. 1. ad Cor. (in quatenus non leguntur hæc verba) genuinus sit ejus foetus: hæc nihilominus altera ab Eruditis quibusdam refertur inter supposita, aut saltem dubia Clementis Scripta. Ipse certe S. Hieronymus in Catal. Scriptorum Eccl. de illa ait: *fertur & secunda ejus nomine* (ad Corinthios) *Epistola, quæ a veteribus reprobatur*. Idem est sensus Photii Codice 113. ubi, post relatum Clementis ad Corinth. Epistolam primam subjicit: *at quæ secunda dicitur ad eosdem, ut spuria rejicitur*.

Cæterum, quamvis cum Pagio & Natali Alex. admittatur etiam hæc altera esse genuina Clementis Epistola, nihil ex ea adversum nos argui potest. In hac ipsa quippe supponitur Eucharistiæ asservatio, cum ibid. moneantur Diaconi & Subdiaconi, ut *reliquias fragmentorum Corporis Dominici custodiant, ne qua putredo in sacrario inveniat* &c. Inde ex supra objectis verbis id docemur unum, demptis particulis in usum  
- iust-

infirmorum reservatis, reliquas, quæ supererant, a Clericis consumendas fuisse. Verum

- 81 Instabis I. nihil omnino apud veteres ex Eucharistia asservatum fuisse: nam Nicephorus L. 17. Hist. Eccl. C. 25. scribit, in Ecclesia Constantinop. reliquias Eucharistiæ a pueris innocentibus absumi solitas; & Hesichius L. 2. in Levit. C. 8. refert, morem fuisse eas comburendi; ac demum Humbertus Cardinalis in L. contra Nicetam reprehendit Græcos, quod Eucharistiam asservent.

Resp. N. Assertum. Quod autem Nicephorus & Hesichius referunt, intelligendum est (ut supra) de particulis a communione populi relidis præter illas, quæ pro infirmis sunt sepositæ. Hæc ipsa vero reliquiarum manducatio aut combustio fiebat solum feria quarta vel sexta, quibus scilicet renovabatur Sacramentum in pixide; quod etiam statutum est a Concil. Matisconensi II. Can. 6. Anni 585. Humberti reprehensio demum eos solum spectabat Græcos, qui Quadragesimæ tempore Missam celebrabant ex Eucharistia priore Sabbatho vel Dominico die consecrata. Asservatam interim etiam primis Ecclesiæ temporibus Eucharistiam docemur (præter alios) ex Optato Milev. & Amphilochio. Seculi IV. Scriptoribus. Ille L. 2. narrat, a Donatistis in Catholicorum templum irruentibus Eucharistiam inaudito scelere projectam esse canibus. Alter vero in vita S. Basilii refert, ab eo columban auream in altari suspensam, & in illa Corpus Dominicum fuisse repositum. De Columnis hujusmodi ac Turriculis, quæ Sacrorum instar veteribus erant, consuli possunt Stephanus Durantus L. 1. de Rit. Eccl. Rosveidus in Not. ad Paulini Epist. 12. Harduinus Embolo 2. de Sacr. Alt. & Martenius L. 1. de antiq. Eccl. Rit.

- 82 Instabis nihilominus II. saltem non in alium, quam manducationis finem asservata est primitus Eucharistia; ergo adhuc &c.

Resp.

Resp. illationem contra nos haud recte institui, tametsi admitteretur Assertum, ut rem expendenti patet. Distinctione interim & illud explico: in manducationis finem aservabatur, ceu finem præcipuum C. tanquam finem unicum & solum N. constat quippe Veterum quosdam & aliud aservatione hac spectasse. Ita Amphilochius in Vita Basilii narrat, Sanctum hunc in prima sua Missa Eucharistiam divisisse trisariam ita, ut unam partem ipse absumeret, alteram secum sepeliendam curaret, tertiam in columba aurea super Altare suspensam adorationi proponeret. Plura in hanc rem exempla occurrunt apud Patres; quo etiam pertinet Pyrrhi Monothelitæ condemnatio per Theodorum Papam Eucharistico Christi Sanguine scripta, de qua vide Baronium ad An. 648.

### Confectarium.

**EX** doctrina nunc stabilita ultro consequitur: sanctum ac 83  
laudabilem esse eum Ecclesiæ Catholicæ morem, quo Eucharistiam publicæ venerationi palam in altari exponimus, aut in solemni supplicatione fidelibus adorandam proponimus. Ordinantur nempe hæc omnia ad cultum Christi, etiam extra summptionem, in Eucharistia præsentis.

Nec est, quod cum Calvino & Kemnitio Novatores morem hunc aut novitatis aut *artolatriæ* insimulent. Vel columbæ & turriculæ veterum satis docent, haud esse rem novam adorationi Eucharistiam exponere. Quamvis autem Supplicationes Theophoricæ eo ritu, quo nunc fiunt, primis Ecclesiæ Seculis in usu non fuerint: neque nisi Sec. XIII. cœperint auctore Urbano IV. qui eas aut instituit, aut illarum occasionem dedit, ut censet BENEDICTUS XIV. hodiernus S. P. de Festo Corp. Chr. Num. 536. certum nihilominus est ex jam dictis, primos etiam Christianos Eucharistiam cum veneratione circumgestasse, seu cum eam ad absentes in communionis symbolum mitterent, seu ad infirmos deferrent.

*R. P. Muszka Tom. II. de Sacr.*

N

Sed

Sed & *artolatriam* nobis perperam oggerunt; quando in Mysterio hoc nulla amplius est panis substantia, verum sub speciebus ejus solum Christi Corpus, cui uni cultum latriæ impendimus.

At (urget Kemnitius) cur non saltem sub utraque specie circumfertur Eucharistia? futilis hæc quæstio est, cum constet sub una panis specie totum esse Christum, ejusque sub hac specie opportunior sit circumgestatio. Ita & veteres novimus sub panis tantum specie (ut plurimum saltem) ad infirmos, vel alios absentes Eucharistiam detulisse.

## §. II.

### *Quæ sit Sacramenti Eucharistiæ materia?*

**A**D Eucharistiæ, ut ea Sacramentum est, naturam penitus explanandam necesse est, de materia etiam ejus & forma statuere: cum univerlim Sacramenta juxta Concil. Florentinum his perficiantur. Ac de forma quidem sequi. §. nobis erit sermo; hic de sola materia agendum habemus.

Illud vero ante omnia observandum est, a Theologis considerari Eucharistiæ Sacramentum tam ut jam confectum est, seu (ut Scholæ loquuntur) ut est *in facto esse*: quam ut conficitur, sive ut est *in fieri*. Primo modo sumptum juxta Scholasticorum opinionem pro materia habet Corpus & Sanguinem Christi, ita ut Eucharistiæ species sint instar formæ illa determinantis ad significandam sacramentalem gratiam; vel (ut alii volunt) Corpus & Sanguis Christi simul cum speciebus sunt per modum materiæ, ipsa autem sacramentalis significatio per modum formæ. Atque hæc mere Scholastica sunt, nec ad fidei dogma pertinent; hinc cuique de illis, ut libet, sentire licet. Quod si vero alter Sacramenti status (videlicet *in fieri*) consideretur, Catholicis fide certum est, consecrationis verba esse formam, de qua sequi. §. agendum erit: materiam

autem



autem panem & vinum, ex quibus videlicet vi formæ consecratorię Eucharistia conficitur, unde & *materia remota* dicuntur. Ac de hac nobis duntaxat isthic erit disceptatio, cum circa illam complures erraverint, nec eadem semper fuerit ipsius Ecclesię disciplina; quocirca etiam de his duobus præcipua notabimus prævie; dein peculiaribus Assertionibus statuemus de materia, primum quidem illa, quæ ad Corpus Christi Eucharisticum pertinet: tum de altera, ex qua nimirum Sanguis Christi in Sacramento conficitur.

### Errores de materia Eucharistię.

I. Circa primam Eucharisticę materię partem, nempe panem, ipso jam Sec. II. notatur error ac flagitium veterum Gnosticorum, ut qui loco panis (teste Epiph. Hær. 26.) ex infante contuso conficiebant massam, eamque variis aromatis conditam sumebant ad *perfectum Pascha*, ut aiebant, manducandum. Eodem Seculo Ophitas (sic dicti sunt a serpente, quem in speluncâ enutriebant, & pro Christo colebant) refert August. L. de Hær. N. 37. pro Eucharistia non alio pane usos, quam quem hic serpens allamberet: quo facto panis consecrationem fieri somniabant.

Pro Sec. III. Cataphryges & Artotyritę: pro IV. autem Catharistę nominandi sunt. Et Artotyritę quidem exemplo oblationum, quæ a primis hominibus de terrę & ovium fructibus factę sunt, in libis ex pane & caseo factis consecrabant: Cataphryges vero in pane confecto ex farina, quam infantis sanguine minutis punctationibus expresso subigebant. De utrisque scribit August. cit. L. Num. 26. & 27. Catharistę demum (teste eod. August.) Eucharistiam ex pane consperso semine humano conficiebant; Sectarios hos quidam Gnosticos vocant ex Epiph. Hær. 26.

Ut omittam denique alios, Sec. XI. Michael Cærularius Patriarcha Constantinop. & Leo Achridenus Metropolita

(uterque post Photium græci Schismatis auctor) in solo fermentato pane Eucharistiam posse confici docebant, anathema idcirco dicentes Latinis in azymo consecrantibus, quos per contemptum *Azymitas* vocabant, ut legere est apud Baronium, Tillemontium, Natalem Alex. & alios in Hist. Ecc. Seculi XI. Errorem porro hunc hodie etiam retinent græci schismatis Sectatores. Contra Armeni quidam pertinaciter adeo pugnabant pro azymo, ut in hoc solo valide confici Eucharistiam assererent, quod notat Blatell, in Synop. Theol. de Euch. N. 308.

85 II. Errorum quoad Calicis Eucharistici materiam initium factum est Seculo I. per Ebionitas, excluso vino, in pura aqua sanguinem consecrantes: quod idem factum est Sec. II. a Tertianis & Severianis; Sec. III. a Manichæis, vinum a malo principio esse conditum opinantibus; ac demum Sec. V. sobrietatis prætextu ab Hydroparastatis, seu Aquariis: de quibus omnibus mentio fit apud Epiphân. Hær. 30. 46. 47. & Augustin. L. de Hær. Num. 64.

In oppositum contra errorem lapsi sunt Armeni, cum videlicet pro consecratione Calicis vino puro, absque ulla admixtione aquæ, uterentur; reprehensi idcirco a Synodo Trulana An. 692. & ab Eugenio IV. in Decr. Unioni cautum, ut Armeni se cum universo orbe Christiano conforment, eorumque Sacerdotes in Calicis oblatione paululum aquæ admisceant vino. Causam porro erroris hujus Nicephorus Hist. L. 18. C. 53. inde repetit, quod Armeni timuerint, ne aquæ cum vino mixtione viderentur significare duarum in Christo naturarum unionem, quam illi negabant. Hanc eandem aquæ cum vino mixtionem, ceu inventum meræ humanum & institutioni Christi contrarium rejecisse Lutherum constat ex ejus Ep. ad Henricum Angl. Reg. data An. 1522. & ex Missa Vittembergenfibus ab eo præscripta An. sequente. Calvinum præterea hunc miscendi morem vocasse hæreticum, sacrilegum, & blasphemum, testis est Petrus Richerus Calvinista, ut refert Nicol.

Nicol. Villaganonius L. 1. contra Calvinianos Articulos C. 73. Hodierni interim Lutherani & Calviniani mitius de hoc sentiunt, id videlicet asserentes unum: aquæ mixtionem esse liberam & indifferentem, quæ proinde nec præcipienda, nec prohibenda sit; quod ipsum docent de usu panis azymi & fermentati. Vide Kemnitium in Exam. Concilii Trid. P. 2. Sess. 22. Cap. 7. & Can. 9.

Præter hos denique isthic memorandi veniunt illi, qui vini loco lac consecrabant, propterea a Conc. Carthaginensi III. An. 397. damnati; item illi, quos Conc. Bracarense IV. An. 675. celebratum Cap. 2. meminit uvas integras pro materia Sanguinis adhibuisse: quem ipsum abusum apud Daniæ etiam Sacerdotes, ob vini penuriam uvis siccis, aut vini fæcibus aqua immerfis uti solitos, Sec. XII. irrepsisse constat ex Epist. Alexandri III. ad Upsalen. Archiep. & ejus Suffraganeos data.

Ex his jam omnibus soli schismatici Græci & Armeni, Lutherani item & Calviniani nobis impugnandi erunt; asserto enim contra hos Ecclesiæ dogmate, errorum reliquorum falsitas ac infania ultro patefcit: ut adeo peculiari refutatione opus non habeant. Opiniones interim hæ tot ac tam impiæ argumento sint: nihil tam flagitiosum esse & sacrilegum, ad quod viam non sternat hæresis.

### Varia Ecclesiæ Disciplina circa materiam Eucharistiæ.

I. **P**rimis Ecclesiæ Seculis mos erat; sub ea Missæ parte, 86 quam *Offertorium* dicimus, a fidelibus offerri panem & vinum in conficiendæ Eucharistiæ usum, ut constat ex S. Cypriano L. de Opere & Eleemos., diviti sœminæ cuidam ita exprobrante: *dives es, & Dominicum celebrare te credis, quæ in Dominicum sine Sacrificio venis; quæ partem de Sacrificio, quod pauper obtulit, sumis &c.* Quin morem hunc subinde Ecclesia-

stica lege stabilitum fuisse novimus ex Conc. Matifconensi II. An. 588. quod Can. 4. decrevit, *ut omnibus Dominicis diebus Altaris oblatio ab omnibus viris & mulieribus offeratur, tam panis quam vini &c.* Quod jam vero nominatim ad panis oblationem attinet, ex Ord. Rom. docemur, majoris etiam molis panes, eosque integros, & in figuram orbicularem, cruce ac nomine Jesu signatam, formatos super Altare fuisse oblatos: ex quibus tantum consecrabatur, quantum pro Sacerdotis, præsentium fidelium, & infirmorum communione sufficiebat; reliquum cedebat pro Eulogiis & in usum Clericorum.

Deficiente interim subinde communicantium fidelium numero & portio panum dimintui cœpit; & sancitum est, ut consecrandi panes ab ipsis Clericis pararentur, ut colligitur ex Humberti Cardin. Responsione ad Michael. Cæularium. Postquam demum desiit oblationum & quotidianæ populi communionis consuetudo, ea, quæ nunc in usu est, panis consecrandi moles & forma inducta est, id quod in Occidente factum jam ante Sec. XI. & XII. colligitur ex laud. Humberto, & Honorio Augustodunensi in Gemma animæ L. I.

De Orientalibus ex Allatio id addendum: panem consecrandum apud Græcos jam a veteri ut plurimum non rotundæ, sed in quatuor ramos ad modum crucis extensæ figuræ esse, eique imprimi literas IC. XC. N. K. lege, *Ἰησοῦς Χριστὸς νικᾷ*, hoc est, *JESUS Christus vincit*: aut cruces & puncta 12. Apostolos, & 72. Discipulos significantia. Reliquos Orientales peculiariter quædam alia habere notat id. Allatius, & colligitur ex Decr. Congreg. de propag. Fide An. 1633. pro Jacobitis dato.

- 87 II. Atque hæc certa; illud vero controversum: num panes hi, ex quibus in primæva Ecclesia conficiebatur Eucharistiæ Mysterium, azymi an fermentati fuerint? Sirmondus noster in Disquisit. de Azymo contendit, Latinos primis octo Seculis fermentato fuisse usos: azyma vero ab iis recepta non prius,

prius, quam ab An. circiter 886. ad An. 1053. intra illud videlicet tempus, quod fluxit a schismate Photii ad turbas Cœcularii. Contra Cl. Mabillonius ex Ord. S. Bened. in Dissert. de Pane Euchar. existimat, in Ecclesia Latina semper fuisse azymorum usum, nec receptum unquam fermentatum panem. Medium inter utrumque tenet Emin. Card. Bona Ord. Cisterciensis Rer. Liturg. L. I. C. 23. ubi docet, Græcos semper in fermentato consecrassse: Latinos autem primis Seculis promiscue in azymo & fermentato, nec azymorum usum lege universali ante Sec. X. apud eos introductum fuisse. Ac hæc sunt in præsentī celebriores sententiæ, quarum singulæ suos habent Patronos. Momenta interim earum non sunt convincentia: estque omnino arduum, in re, quæ ab obscuris & incertis Veterum testimoniis pendet, certi aliquid velle statuere; inde mihi quidem satisfuerit conjecturam, quæ verisimilior videtur, adferre. Itaque

III. Probabile esse censeo, tam Græcos quam Latinos 88 primitus pro conficienda Eucharistia promiscue adhibuisse panem azymum & fermentatum. Pro hac opinione illud facit 1<sup>mo</sup>: quia haud improbabiler dicitur, Apostolorum ætate Christianos ex Judaismo conversos aliqua Legalia, ac nominatim dies Azymorum, observasse: quamvis enim ad id non obligarentur, nec tamen vetabantur; cum igitur ex Act. 2. & 20. constet Apostolos passim cum fidelibus convenisse in domibus *ad frangendum panem*, hoc est celebrandam Eucharistiam, verisimile est eos diebus Azymorum in azymo, extra hos vero in fermentato consecrassse, prout videlicet pro circumstantia temporis hic aut ille panis in domo usitatus fuit. Pro eadem opinione facit 2<sup>do</sup>: quod utriusque veteris Ecclesiæ PP. & CC. aquam nominatim vino esse miscendam velint: panem autem requirentes, nusquam declarent, num azymus, an fermentatus esse debeat, tametsi existimaverint, Christum in ultima cœna azymum consecrassse, ut ipse Photius Cod. 116. agnoscit; ex quo quidem silentio jure conjicias, in veteri Eccle-

Ecclesia promiscuum fuisse panis azymi & fermentati usum. Nec valet dicere, panis nomine absolute prolato satis eos indicasse fermentatum: etenim opinione Patrum panis a Christo in ultima cœna consecratus fuit azymus, hunc tamen Evangelistæ perinde panis nomine, nulla restrictione adjecta, indignant.

Accedit & illud, quod nominatim probabile sit primis Seculis (aliquando saltem) Orientales in Azymo, Occidentales autem in fermentato Eucharistiam consecrassent. Pro Orientalibus argumento sunt Armeni & Maronitæ, hodie etiam in azymo consecrantes, quem morem in suis Ecclesiis antiquissimum esse ajunt; de quibus consuli potest Antoine in Theol. Mor. Append. ad Euchar. §. 1. Quid quod vix dubitari possit, Quartadecimanos in Asia primis Ecclesiæ Seculis pane azymo usos fuisse pro Eucharistia; cum enim in Paschate celebrando religiose adeo observaverint tempus, quo Christus Pascha ultimum manducavit; haud levis est conjectura, panem etiam azymum vel ideo adhibuisse illos, quod Christus eo tempore in azymo Eucharistiam consecraverit. Pro Occidentalium autem pane fermentato illud pugnat, quod Melchisedes, Syriacus, & Innocentius I. Papæ, (hic sub initium Seculi V. duo autem priores Sec. IV. floruerunt) in Decretis suis Eucharistiam appellent *fermentum*, ut contendit Sirmondus in Disquis. de Azymo C. 5. quamquam non diffitear, ab Eruditis multis *fermentum* illud alio sensu accipi, de quo vide Cl. Honoratum a S. Maria in Animadv. Crit. Tom. 2. Dissert. 4. Ar. 3.

- 89 IV. At quæri ultro potest: quonam igitur tempore pro Occidentalibus panis azymi, pro Orientalibus autem fermentati usus universalis primum inductus est? id vero rursus incertum ajo: conjectare attamen licet, Seculo IX. Latinæ & Græcæ Ecclesiæ disciplinam quoad hoc nondum fuisse diversam. Etenim Photius in sua contra Occidentales Encyclica An. 869. (juxta Baronium) data non arguit Latinam Eccle-
- siam

siam de azymo; credibile autem non est, præteritum fuisse hoc accusationis caput, si jam tum apud Latinos tantum azymus, apud Græcos tantum fermentatus universim in usu fuisset.

In Occidente interim jam Sec. VIII. usum azymi prævaluisse colligitur ex Alcuino, qui Ep. 69. ad Lugdunenses de Eucharistiæ materia agens, *panis*, inquit, *qui in Christi Corpus consecratur, absque fermento ullius alterius infectionis debet esse mundissimus* &c. Quod ipsum potiori jure dicendum pro Seculo IX. præsertim propter testimonium Rabani Mauri Archiep. Mogunt. L. I. de Instit. Cler. C. 3. Ita autem sensim mos hic invaluit in toto Occidente, ut demum Sec. XI. universalis esset, nec amplius Latinis fermentato uti liceret; inde Cardin. Humbertus, hujus Seculi Scriptor, in Respons. contra Nicetam Pectoratum, *Romana & Occidentalis Ecclesia*, inquit, *a ministris Sacri Altaris in Secretario confectum offert azymum, quod ex grano frumenti, & limpida aqua per ignem fuerit præparatum*. Quod vero ad Orientales attinet, tametsi Sec. XI. Græci duce Cæulario azyma Latinorum acerrime impugnaverint, nondum tamen hoc Seculo in toto Oriente universim receptum est fermentum, quod vel ex ipso memorato Cæulario discimus, & quidem ex ejus Ep. ad Petrum Antioch. Patriarcham data, in qua de Alexandrino & Hierosolymitano Patriarchis ita scribit: *ad aures nostras pervenit, - - quod prædicti duo Patriarchæ non solum alios azymis vestientes recipiunt, sed etiam ipsi aliquando in azymis sacrum conficiunt Sacrificium*.

Atque hæc in re incerta conjecturæ sufficiant. Qui plura de argumento hoc volet, consulat supra laudatos Sirmondum, Mabillonium, Bonam, Honoratum a S. Maria, item Alexandrum Nat. in Panoplia adversus Hæreses Seculi XI. & XII. Dissert. I. Art. 3.

V. Ut de materia demum Calicis etiam insinuemus quid-  
piam, constans ac invariata fuit a primis Seculis ad nostram

usque ætatem Ecclesiæ utriusque consuetudo, vino pauxillum aquæ admiscendi, uti istud ex N. 104. patebit. Aqua porro sola benedicitur, non vinum; hoc enim significat Christum, cui benedictione opus non est: aqua vero populum, qui benedictione indiget, ut notat Durandus.

Tametsi autem hæc communia sint toti Ecclesiæ, peculiare nihilominus præterea quidpiam habent Græci. Ut enim ex eorum Liturgiis, & Arcudio L. 3. Concordiæ C. 39. constat, in calicem bis infundunt aquam; primum quidem ante Missam, cum Sacerdos lanceola panem transfigit dicens, *unus militum lancea latus ejus aperuit, statimque exivit sanguis & aqua*, Diacono interea aquam infundente in Calicem: peracta dein consecratione, ante ipsam sumptionem, Calici affundunt aquam ferventem, quam Sacerdos benedicens dicit, *Benedictus fervor Sanctorum jugiter nunc & semper & in secula seculorum Amen*: Diacono, qui affundit, respondente, *fervor fidei plenus Spiritu Sanctorum Amen*. Causam, cur præter frigidam etiam ferventem aquam misceant, Balsamon in Respons. ad quæsitam Marci Patr. Alex. hanc reddit, *ut scilicet Sanguis & aqua, quæ fluxerunt a Sancto latere Domini & Dei Salv. N. J. C. vivifica esse constet, veluti ex vivifico deificato corpore vivifica*.

Neque omnino damnari potest hæc mixtio, ut quæ antiqua est, & a SS. Patribus commendata: præscribitur enim in Liturgiis Basilii & Chrysostomi, laudantque eam Gregor. Nyss. Orat. Catech. C. 37. Damascenus L. 4. C. 14. & alii Patres. Eadem approbata est a BENEDICTO XIV. S. P. in Constit. *Et si Pastoralis*, in qua §. 6. Num. 2. Græco-Italica permittitur, facta jam consecratione, antequam Sacerdos communicet, juxta ritum in Liturgia præscriptum, aquam ferventem, seu tepidam in Sacrum Calicem infundere. Quamvis autem istud Græcis permissum sit, errant tamen Photiniani, cum Latinos & alios Orientales, qui ritum hunc omittunt, erroris accusant. Præterquam quod enim ritus iste particulari duntaxat Eccle-



Ecclesiæ præscriptus sit, non negamus nos præterea, nec improbamus id, quod Græci mixtione illa significatum volunt, ut Photiniani perperam arbitrantur.

His jam de præsentis argumenti Erroribus, ac etiam Ecclesiæ Disciplina præmissis, Catholicum dogma de Eucharistiæ materia explicandum & propugnandum est.

## De Materia Corporis Christi in Eucharistia.

### ASSERTIO.

*Pro Corpore Christi in Eucharistia conficiendo necessaria materia est panis triticeus; ad valorem autem Sacramenti perinde est, seu sit azymus, seu fermentatus; ex præcepto tamen Ecclesiæ a Latinis azymus, a Græcis fermentatus adhiberi debet.*

**A**sertionis pars I. certa est, si Christus Sacramentum hoc instituens pro materia panem triticeum adhibuit, ac deinceps etiam illum in conficienda Eucharistia adhiberi voluit; atqui utrumque extra controversiam est, ergo &c. Et Min. quidem propositionis membrum primum patet ex jam sæpe laud. Evangelistis, qui referunt Christum Discipulis cenantibus accepisse panem, huncque verbis illis, *hoc est Corpus meum*, consecrasset; ut autem ait Catech. Roman. *cum panis absolute dicitur, panem ex tritico intelligi satis constat*, hic quippe (quod Platellius notat) est Simpliciter panis, panesque alii solum in ejus defectu adhibentur. Alterum ejusdem propos. membrum etiam certum est ex Luca, qui C. 22. V. 19. Christum post panis consecrationem refert dixisse: *hoc facite in meam commemorationem*; voluit igitur etiam deinceps, saltem quoad substantiam, idem fieri, ac proinde pro consecranda Eucharistia panem triticeum adhiberi.

- 92 Ac ne hæc arbitrarie dicta quisquam existimet, addat momentum constans sensus & praxis Ecclesiæ, pro Eucharistia conficienda semper pane triticeo utentis, non alia utique causa, quam quod Christus ita voluerit. Sensus porro hujus & praxis testes sunt Patres & Concilia. Ita Cyprianus Ep. 68. ad Cæcilium, figuram Eucharistiæ, quæ erat oblatio per Melchisedech facta, *perficiens & adimplens Dominus*, inquit, *panem & calicem mixtum vino obtulit &c.* Et Damascenus L. 4. Orth. Fid. C. 12. *Panis & vinum - - in Christi Corpus & Sanguinem vertuntur.* Ex Conciliis vero, Carthaginense III. An. 397. Can. 24. statuit, *ut in Sacramentis Corporis & Sanguinis Domini nihil amplius offeratur, quam ipse Dominus tradidit, hoc est, panis & vinum.* Panem vero hunc nominatim debere esse triticeum, apertius docemur ex Concilio Chalcedonensi An. 451. in quo Act. 3. Ischirion Diacon. Alexandr. contra Dioscorum questus est, *eius avaritia factum esse, ut Missæ Sacrificium in Lybia non offerretur defectu tritici, quod cum rarum esset, a Dioscoro maximo pretio vendebatur.* Certius idem est ex Concil. Florent. in Decr. pro Arm. ubi dicitur: *tertium est Eucharistiæ Sacramentum, cujus materia est panis triticeus, & vinum de vite.* Apertissime denique istud tradunt Rubricæ Missal. Rom. Tit. de defectibus, cum monent *non confici Sacramentum, si panis non sit triticeus.*
- 93 Id isthic addendum est unum: panem hunc ipsum confici debere ex farina triticea, aqua naturali diluta, & igne cocta. Hic quippe solum est panis usualis & simpliciter dictus, quo communiter utuntur homines, ut sit veluti comes aliorum ciborum: talemque Christus consecravat in Cæna, quæ cum ordinaria fuerit, non alium utique in ea appositum fuisse colligitur; nec Patres & Concilia alium absoluto panis nomine designarunt.
- 94 Pro II. parte Assertionis utor argumento S. Anselmi Sec. XI. Archiep. Cantuariensis, qui in L. de ferment. & azy-

mo ad Walerannum ita scribit. *Et azymum & fermentatum panem sacrificans sacrificat. Et cum legitur de Domino, quando Corpus suum de pane fecit, quia accepit panem & benedixit, non additur azymum vel fermentatum. Certum tamen est, quia azymum benedixit; forsitan non quia res, quæ fiebat, hoc exigebat, sed quoniam Cæna, in qua factum est, exigebat. Et cum alibi se & carnem suam panem vocavit, - non ait azymum vel fermentatum, quia uterque pariter panis est; non enim differunt substantialiter. Vis argumenti hujus eo reducitur: Christus Joan. 6. Eucharistiam promittens verbis illis, panis, quem ego dabo, caro mea est, nulla azymi aut fermentati distinctione facta, se & carnem suam vocat panem; cum igitur uterque perinde sit panis, spectata institutione Christi perinde in utroque potest valide confici Sacramentum. Et fermentatum quidem nemo negat esse panem simpliciter dictum ac usualem; de azymo autem idem constat ex Scriptura: tametsi enim non sit perinde in usu quotidiano ut fermentatus, apud Judæos saltem in usu erat diebus azymorum: & L. 1. Reg. C. 21. panes propositionis azymi simpliciter dicuntur panes, iisque vescabantur Sacerdotes: ipse demum panis, quem Luc. 24. Christus in Emmaus coram duobus discipulis fregit, vocatur absolute panis, qui indubie erat azymus, cum tunc essent dies azymorum.*

Huc facit & sensus Ecclesiæ, quam primis Seculis pro- 95  
miscue usam fuisse azymo & fermentato supra N. 88. probavimus; nec omnino a Latinis impugnata sunt unquam Græcorum ~~azyma~~, ut constat ex Leonis IX. Ep. ad Cæularium; nec Græci ante schisma Cæularii negarunt valorem consecrationis in ~~fermento~~, quod pluribus probat & urget Arcudius. Inde in Definitione Fidei, cui in Concilio Florent. prid. Non. Julii An. 1439. subscripserunt Græci, Decr. 2. statutum est his verbis: *Definimus insuper in azymo sive in fermentato pane triticeo Corpus Christi veraciter confici; Sacer-*  
O 3 *dotes.*

notesque in alerutro ipsum Domini Corpus conficere debere, unumquemque scilicet juxta suæ Ecclesiæ sive Occidentalis sive Orientalis consuetudinem. Idem totidem verbis repetitur in ejusdem Concilii Decr. pro Arm. eod. An. decimo Kal. Dec. edito propter quosdam Armenos, in solo azymo valide consecrari asserentes.

- 96 Ad III. partem Assertionis quod attinet, indubitam reddunt verba ex Concilio Florentino paulo ante recitata, quibus hoc præceptum aperte continetur; ad quod ipsum accedit verus Ecclesiæ consuetudo, quæ vim obtinet legis. Hinc Cap. *Literas*, de celebrat. Sacerdos latinus privari iubetur officio & beneficio, quod in fermentato pane & calice ligneo consecraverit. Cum proinde Ecclesiæ certum ritum in re gravi (ut est præsens) præcipienti sub gravi culpa parere teneamur, extra dubium est, ritum hunc quoque sine peccato negligi non posse, saltem regulariter. Vide in simili dicta L. I. de Sacr. in Gen. Diff. VI. §. III.

### Objectiones Sectariorum.

- 97 **C**ontra *iam* partem Assertionis opponunt I. Fideles olim sub Missa super altare offerebant præter panem & vinum etiam caseum, fabas, mel, lac &c. hæc igitur etiam censebant esse materiam Eucharistiæ.

II. Cum Christus pro Ecclesia per Orbem totum diffusa Eucharistiam instituerit, videtur non esse ~~credibile~~, solum triticeum panem ab eo requisitum: cum regiones complures triticum non ferant.

Resp. ad I. quæ, præter panem & ~~vinum~~, olim offerebantur alia, cedebant in usum Cleri, & Templi apparatus: non autem pro materia Eucharistiæ. Quia tamen Sec. IV. reperti sunt e fidelibus simpliciores ~~quidam~~, qui pro pane caseum vel fabas, pro vino autem lac, hisque similia consecranda

cranda offerrent, errorem eorum Concil. Carthaginense III. An. 397. speciatim Cap. 24. damnavit. Et Can. 3. ex iis, qui Apostolici dicuntur, statuitur poena depositionis pro eo, qui præter panem & vinum quidpiam aliud pro Eucharistia consecrare attentaverit.

Resp. ad II. nullius regionis sterilitatem adeo pertinacem esse, ut non aliquo loco, aut in vicinia saltem, modicam eam, quæ pro conficienda Eucharistia sufficit, tritici quantitatem ferat, præsertim si peritia Agrariæ & colonorum peculiaris industria accedat. Quod si interim soli pertinacia neque istud promittat, facile supplebit commercii beneficium.

Contra 2dum partem Assertionis opponitur I. Pro Eucharistiae materia necessarius est panis proprietatis; at hic solum fermentatus est: cum panis dicatur græce *ἄζαρος*, sive elevatus, propterea quod a fermento atollatur; ergo non valet perinde azymus & fermentatus. 98

H. Panis azymus non est in usu quotidiano; non est igitur panis usualis, & simpliciter dictus, ac proinde nec sufficiens hujus Sacramenti materia. Quid quod

III. Christus instituens Eucharistiam in fermentato consecraverit; hunc igitur solum esse voluit Eucharistiae materiam: quod ipsum olim agnovit Ecclesia, cum Latini (juxta Sirmondum) primis octo Seculis, Græci autem (ut vult Card. Bona) semper in fermentato consecraverint.

IV. Demum corruptus panis nequit haberi pro Eucharistiae materia: fermentatum autem corruptum esse indicat Apost. 1. Cor. 5. dicens, *modicum fermentum totam massam corrumpit*; qui igitur esse potest Sacramenti materia?

Resp. ad I. quod erat Cærularii argumentum, C. Maj. N. Min. Neque ratio huic addita probat quidquam, ut olim Humbertus in Dial. contra Cærul. recte urgebat ita scribens: *illud, quod azymum negantes panem esse per ethymologiam hujus nominis, quod est ἄζαρος, conamini nos vincere, sciatis omnino vanum*

vanum & puerile ; quia & a linguarum peritis diversis ethymologia dantur ex uno nomine , secundum hominum placitum magis , quam secundum naturam rerum . Ac in præsentī quidem ita se rem habere , patet ex Sacro textu tam græco quam latino , cum Exod. 29. Jud. 6. Luc. 24. & aliis locis azymus perinde ac fermentatus compelletur uno nomine *aeros*, sive panis . Quid quod Matthæus in Evangelio suo hebraice scripto panem a Christo consecratum vocet *lehem* , qua voce alibi etiam azymus designatur .

Resp. ad II. D. Ant. azymus non est perinde in usu ac fermentatus C. penitus non est, neque erat ullo tempore in usu saltem apud aliquos N. una cum Illat. At de hoc jam dictum supra N. 94.

Resp. ad III. quod Græci Schismatici pro fundamento sui erroris habent, N. Ant. falsoque istud asseri satis patet ex sententia de ultimo Christi Paschate Dissert. I. §. II. a nobis propugnata. Sed neque ex hac inferant Armeni Schismatici, quasi vero Christus solum in azymo consecrari Eucharistiam voluerit, cum ipse in azymo eam consecraverit : illationem quippe huiusmodi haud legitime institui docemur ex iis, quæ hoc ipso §. N. 94. & 95. pro hac Assertionis parte attulimus. Quod demum in Object. additur de Ecclesiæ sensu, id certum non esse, nec omnino sustineri posse, declarant dicta a N. 87. usque ad N. 90.

Resp. ad IV. hoc loco Apostolum id velle unum, quod per fermentum farinæ massa alteretur ; hoc sensu autem corrupta, seu alterata, non reddit utique panem in sensu vulgari corruptum, proinde nec insufficientem pro Eucharistiæ materia.

- 99 Contra 3tiam part. Assertionis opponitur I. Non magis differt panis azymus a fermentato ac vinum album a rubro ; sicut igitur vinum pro Eucharistiæ materia sine discrimine adhiberi potest, sic & panis.

II. Lege

II. Lege adstringi ad usum azymi pro Eucharistia est, communicare cum judæis, ut qui azymorum lege tenebantur; Imo

III. Utentes azymo videntur communicare cum Eutyche, unam duntaxat in Christo naturam admittente: nam Armeni ad hanc in Christo naturæ unitatem significandam azymi usum sunt amplexi. Atque hinc est fortasse,

IV. quod Concil. Constantinopol. II. Can. 11. prohibuerit, *ne Clerici aut laici comedant azyma Judæorum*; mos igitur Latinæ Ecclesiæ quoad usum azymi panis vitiosus est, & expresso Oecumenici Concilii præcepto adversatur.

Resp. ad I. Ut ut sit de differentia intrinseca: certe extrinseca non est eadem, propter Ecclesiæ præceptum videlicet, quo jubemur inter panem azymum & fermentatum discrimen facere, non item album inter ac rubrum vinum.

Resp. ad II. verbis S. Anselmi L. supra laud. ad Valerannum. Ita autem ille: *Quod Græci ajunt, nos judaizare: non est verum; quia non sacrificamus de azymo, ut Legem veterem servemus, sed ut - - Dominum, qui hoc non judaizando fecit, imitemur.* Pergit deinde: *non judaizamus, si figuram tenemus in azymo; quoniam non significamus Christum sine fermento peccati venturum, tanquam Judæi: sed monstramus eum talem venisse, sicut Christiani; & per hoc monemur tales nosmetipsos exhibere &c.* juxta illud videlicet Ap. 1. Cor. 5. *epulemur, non in fermento veteri, neque in fermento malitiæ & nequitiae, sed in azymis sinceritatis & veritatis.* Ex quibus uti colligitur mystica azymi apud nos significatio: ita pariter certum fit, e us usu nos non judaizare, sed judaismi figuras implere. Hac ipsa causa sine judaismi nota in Baptismo aquam adhibemus, tametsi illa etiam Judæi fuerint usi in suis purificationibus.

Resp. ad III. immunes nos esse a communionem cum Eutyche satis declarat azymi apud nos significatio paulo ante

relata; quidquid demum sit de Armenis in sua significatione errantibus: quanquam Demetrius Cyzicenus in Tract. de hæc. Jacobit. ea duntaxat causa Armenos uti azymo testetur, quia quem Christus panem discipulis tribuit, azymus erat.

Resp. ad IV. inter genuinos hujus Concilii Canones nullum esse de prohibitionē azymorum: certe Can. II. solum continet anathema in eos, qui non anathematizant Arium, Eunomium &c. Inde plurimorum judicio objectus Can. II. est ex Trullanis, seu illis, quos Græci quidam Constantino- poli in *Trulla* (hoc est, Palatii Secretario) furtive congregati procuderunt, quique a Sergio P. reprobati sunt, nec unquam ab Ecclesia recepti. Hoc ipso interim Can. non aliud prohibetur, quam ne fideles ritu Judæorum azymorum solemnias observent.

### Corollarium.

**E**X propugnato nunc generatim Catholico dogmate multa in particulari ad usum & praxim deducunt Theologi Morales, quorum nos referemus præcipua, principii instar pro reliquis servitura. Itaque

- 400 I. Cum necessaria Eucharistiæ materia sit panis triticeus, certum est invalide consecrari in pane ex hordeo, avena, castaneis, fabis & similibus confecto, cum hæc non sint triticum: quamvis id genus pane quidam utantur. Contra, cum prudens dubium est de grano, an sit de genere tritici, ut de siligine & spelta multi dubitant, materia pariter est dubia; non licet proinde illa (saltem extra necessitatis casum) uti pro conficiendo Eucharistiæ Sacramento. Idem censendum est de pane triticeo, si alterius naturæ grano permisceatur: nisi forte mixtio hæc sit modica, ita ut panis æstimatione morali habeatur pro triticeo; quanquam in praxi omnino curandum sit, ut panis sit ex puro tritico.

### II. Ex



II. Ex eo pariter, quod requiratur panis usualis, hoc est,<sup>101</sup> ex farina triticea per aquam naturalem subacta confectus, dubitari nequit, insufficientem materiam esse eum, qui fit ex farina lacte, butyro, melle, oleo, aqua rosacea, vel aliis liquoribus ab aqua naturali differentibus diluta: neque enim hujusmodi liba usualis panis nomine veniunt; nisi forte de liquoribus his modica portio admixta foret, quanquam neque tunc ejusmodi materiæ usus esset licitus. Inde Nestorianis & Jacobitis peculiari Decreto Congr. de Prop. Fide An. 1633. vetitum est, ne panem consecrandum vel in superficie ungerent oleo. Potiori autem jure pro invalida materia haberi debet massa cruda; vel etiam srixæ, aut ad solem durata &c. uti & panis ex amylo (aliis amygdum) seu albo illo liquore, qui ex granis triticeis aqua maceratis exprimitur.

III. Demum vi præcepti, quo Latini tantum in azymo,<sup>102</sup> Græci autem tantum in fermentato consecrare jubentur, videtur mihi verisimilius non posse eos ab hoc ritu recedere ulla causa: proinde non titulo peregrinationis aut incolatus, nec si destituantur templo sui ritus &c. nisi peculiare accedat sedis Pontificiæ indultum. Ad istud vero contra multos DD. cum Verricello & Antoine sentiendum inducor Pii V. Constit. quæ incipit, *Romani Pontificis*, An. 1566. edita, & BENEDICTI XIV. Constit. *Esti Pastoralis*, jam alias memorata. Ex his certe Verricellus concludit, non licere Sacerdoti Latino uti fermentato in Ecclesia Græca, nec Græco in Ecclesia Latina azymo, etsi populus diu deberet sacrificio privari, aut æger absque viatico decedere; quia communis utilitas privatorum commodis præferenda est, ad communem autem utilitatem pertinet servari præscriptos Ecclesiæ ritus: nec præceptum Viatici aut Missæ audiendæ obligat, nisi cum ritus Ecclesiæ observari possit. Consule Laud. Antoine in Theol. Mor. Par. 2. Tract. de Euch. in Append. §. I.

## De Materia Calicis Eucharistici.

## ASSERTIO.

*Solum de vite vinum est materia Calicis; huic nihilominus  
ex præcepto Ecclesiæ modica aqua misceri  
debet.*

103 **P**ars I. fundatur in Scriptura & Traditione. Etenim Christus vinum de vite consecravit, ut docent verba post panis & vini consecrationem ab eo prolata Matth. 26. *non bibam amodo de hoc genimine vitis* &c. quod vero id ipsum etiam deinceps fieri voluerit, testatur Apost. 1. Cor. 11. ubi Calicis institutionem, prout eam accepit a Domino, his refert verbis V. 25. *similiter & calicem (accepit) postquam canavit, dicens: hic Calix novum testamentum est in meo sanguine; hoc facite: quotiescumque bibetis, in meam commemorationem.* Ex his forma argumentum, ut supra de pane N. 91.

Traditio pariter in hanc rem certa est tum ex usu constanti Ecclesiæ: tum ex Patribus & Conciliis. Cyprianum, Damascenum, Concil. Carthaginense III. & Florentinum vide N. 92. His adde Concil. Lateranense IV. Can. 1. & Trident. Sess. 13. Cap. 3. & 4. ac etiam Can. 2. Ex Patribus autem Chrysostomum, qui Hom. 83. in C. 26. Matth. Aquarios impugnans, super illa Christi verba, *non bibam amodo* &c. ita commentatur, *de genimine vitis, quæ certe vinum, non aquam produxit; ac deinde, etiam post resurrectionem eum vino usum referens, pro causa addit, ut ostenderet, quia & quando hoc Mysterium tradidit, vinum tradidit* &c. Juxta PP. igitur & Concilia vinum est materia Calicis: nomine autem vini simpliciter dicti intelligitur vinum de vite.

104 **P**ars II. de mixtione aquæ ex præcepto Ecclesiæ constat ex Tridentino, quod Sess. 22. Cap. 7. ita habet: *Monet S. Synodus, præceptum esse ab Ecclesia Sacerdotibus, ut aquam vino*  
*in.*

*in calice offerendo miscerent; tum quod Christum Dominum ita fecisse credatur; tum quia e latere ejus aqua simul cum Sanguine exierit, quod Sacramentum hac mixtione recolitur, & cum aquæ in Apocal. B. Joannis populi dicantur, ipsius populi fidelis cum Capite Christo unio representatur. Idem dein ibid. Can. 9. dicenti, aquam non esse miscendam vino in calice offerendo, eo quod sit contra institutionem Christi, dicit anathema.*

Ex his autem patet non modo præceptum Ecclesiæ, sed & causa, ac significatio mystica hujus mixtionis. Neque novi isthic quidquam Tridentinum profert; hæc omnia veterem esse Ecclesiæ doctrinam testimonio sunt PP. & CC. Nempe, ut nihil dicam de veteri Judæorum more, secundum quem calicem paschalem aqua temperabant, ut constat ex Misna jod Benedictione 7. & Rabbi Majmonide; istud certe nominatim de Christo Eucharistiam instituente testantur Patres. Ita (præter Basilium & Chrysostomum in suis Liturgiis, item Justinum M. Apol. 2. & Damascen. L. 4. de Fide Orthod. C. 4. ac alios) Ireneus L. 4. C. 57. de Christo, accipiens, inquit, panem suum Corpus esse confitebatur, & temperamentum calicis suum Sanguinem confirmavit. Clarius id ipsum refert Cyprianus Ep. 63. *invenimus calicem mixtum fuisse, quem Dominus obtulit; mixtum autem hoc fuisse, ac etiam esse debere ex vino & aqua docet Ep. 63. ad Cæcilium infra N. 107. citanda. Mixtionem eandem fieri oportere decrevit Sec. IV. Concil. Carthaginense III. Can. 24. Sec. VI. Aurelianense IV. Can. 4. Sec. IX. Triburiense Can. 19. Armenos vero ritum hunc rejicientes Sec. 7. a Synodo Trullana fuisse reprehensos, quin Sec. XV. eundem illis a Concilio Florentino præceptum, jam supra N. 85. adnotavimus. Huc denique facit perpetuus Ecclesiæ usus, cujus cum initium ostendi nequeat, juxta regulam Augustini ad Traditionem Apostolicam est referendus.*

105 Atque hæc ad doctrinam in 2da Assertionis parte propositam comprobendam sufficiunt ; pro uberiore nihilominus ejus explanatione duo observanda sunt præterea. Nempe

Dictum est 1mo, mixtionem hanc aquæ esse ex *præcepto Ecclesiæ* ; neque enim eam ad necessitatem Sacramenti requirimus, ut adeo etiam sine illa solum vinum valide (tametsi non licite) consecratur. Ac omnino necessitas hæc nullo sufficienti fundamento adstrui potest, ut patebit ex Resp. ad Object. N. 107. Inde Missale Rom. in Rubr. Tit. de defect. monet : *si celebrans - - advertat non fuisse appositam aquam - - post consecrationem Calicis, nullo modo apponatur, quia non est de necessitate Sacramenti.* Idem docet Catech. Concilii Trid. §. de Materia Calicis.

Dictum est 2do, misceri debere *aquam modicam* ; quod ipsum nunc cit. loco monet laud. Catech. ac jam antea præceperat Eugenius IV. in Decr. pro Arm. ipsoque usu Ecclesiæ docemur. Ratio præterea est : nam vinum esse materiam hujus Sacramenti necessariam constat ; quod si autem multa aqua permisceatur, amittit rationem vini, intellige usualis, quod ~~Ad~~elicet hoc nomine venit prudenti hominum estimatione. Inde Honorius III. Sec. XIII. Pontifex in Ep. ad quemdam Sueciæ Archiep. *perniciosum abusum* vocat, *quod in majori quantitate de aqua ponatur in Sacrificio : cum secundum rationabilem Ecclesiæ consuetudinem plus in ipso sit de vino, quam de aqua ponendum.* At, quæ hæc, inquires, quantitas esse debeat ? Concil. Triburiense An. 895. Can. 19. de hoc ita habet : *dux sint partes vini, quia major est majestas Sanguinis Christi, quam fragilitas populi, tertia aquæ, per quam intelligitur infirmitas humanæ naturæ.* Nunc communis est Theologorum sententia : vel guttam aquæ sensibilem sufficere ; nec plus de ea affundi posse quam tertia pars vini conficeret, ne forte major excessus aquæ vinum ita corrumpat, ut illud vini  
usua-

usualis naturam amittat. Vide Bonac. de Euch. Par. 4. N. 4. Lugo, Laymon, & passim alios.

### Resolvuntur Objectiones.

**C**ONTRA 1<sup>am</sup> par. Assertionis pugnare videtur: quod aqua, 106 seu demum ea sit fontana, seu fluvialis, aut pluvia, sit sufficiens Baptismi materia; cur non igitur etiam vinum, seu illud de vite, seu ex fruticum aliorum fructibus sit expressum, sufficientem dicamus Eucharistiæ materiam?

Resp. illat. non esse legitimam: quævis enim id genus aqua perinde vere ac proprie est naturalis & elementaris aqua, qua Christus Baptismum perfici voluit; solum contra vinum de vite proprie tale ac usuale esse vinum, reliquos autem liquores per analogiam duntaxat & improprie hoc nomine compellari, nemo ambigit. Inde pars hæc Assertionis certa est non modo DD. Orthodoxis, sed & Schismaticis & Novatoribus. At

Altera ejusd. Assertionis pars multiplici nomine in contro- 107 versiam vocatur. Opponitur nempe

I. Ad ipsum valorem & substantiam Calicis Eucharistici necessaria est mixtio aquæ; repeti igitur illa nequit a præcepto Ecclesiæ. Ant. prob. nam Cyprianus Ep. ad Cæcil. sic autem, inquit, *in sanctificando calice Domini offerri aqua sola non potest, quomodo nec vinum solum potest; nam si vinum tantum quis offerat, Sanguis Christi incipit esse sine nobis: si vero aqua sit sola, plebs incipit esse sine Christo.* Et Concil. Wormaciense Can. 4. statuens mixtionem, hanc reddit causam: *non enim potest calix Domini esse aqua sola, aut vinum solum, nisi utrumque sibi misceatur.*

II. Christus mixtionis hujus non modo exemplum dedit, sed eandem etiam præcepit; ergo ritus miscendi aquam vino non est ex præcepto tantum Ecclesiæ, verum ex institutione Christi & mandato divino. Ant. prob. tam ex illis Christi ver-  
bis,

his, *hoc facite, quotiescunque bibetis* &c. quæ Calicis mixti consecrationi subjecit; tam ex Patribus & Conciliis. Certe Justinus M. Apol. 2. exposito mixtionis ritu, continuo subiicit - *nam Apostoli in Commentariis a se scriptis, quæ Evangelia vocantur, ita tradiderunt præcipisse sibi JESUM.* Cyprianus etiam in paulo ante laud. Ep. de eodem ritu ait, *quod Christus fecit, & quod faciendum esse mandavit.* Concilia demum Carthaginense III. & Aurelianense IV. ritum hunc vocant *Domini traditionem.* Quod quidem si ita se habeat, non leve momentum accedit Objectioni primo loco positæ: quando universim ad valorem & Substantiam Sacramenti pertinent, quæ in ejus administratione ex Christi institutione & præcepto observanda sunt.

Resp. ad I. N. Ant. Nec probat quidquam, quod ex Cypriano recitatur: nam is juxta S. Thom. hic qu. 74. Ar. 7. ad 2. loquitur solum de necessitate convenientiæ & præcepti; juxta alios autem de necessitate mysticæ & perfectæ significationis, quam habet Calix Eucharisticus, ut ex verbis ejus colligitur. Ita autem exponendum suadet illud, quod ibid. subiicit inquit, *cum vino solo posse mediante consecratione fieri Christi Sanguinem, non cum aqua sola.* Sunt interim, qui Cyprianum in contraria fuisse sententia existiment, ut notat Antoine; unde hi recedere se ab eo libere profitentur propter oppositum Ecclesiæ universalis sensum, qui constat ex doctrina Concilii Tridentini, Catechismi item & Missalis Romani. Conformiter ad hæc etiam Concil. Wormaciense exponendum.

Resp. ad II. Christum ipsum vino miscuisse aquam non diffitemur; at exemplum ejus ex se rationem præcepti non habet: secus pari jure dici posset, ex præcepto Christi consecrandam esse Eucharistiam vespere, in cœna Paschatis legalis, conjugendam cum lotionem pedum &c. cum horum perinde exemplum dederit. Inde quod in eodem Asserto aperte additur

ditur de Christi præcepto, si illud pro præcepto proprie tali sumatur, omnino negandum est. Scripturæ autem & Patrum ac Conciliorum verba, quibus urgetur objectio, eo solum sensu accipienda sunt, quod Christus præceperit Eucharistiam celebrari secundum ea, quæ ad ejus substantiam pertinent, uti est consecratio in pane & vino. Nec arbitrarie istud dici putes: etenim inprimis Evangelia nusquam vel mentionem injiciunt mixtionis aquæ, minus autem præcepti, quod ad illam pertineat; quomodo igitur S. Justinus de hoc nominatim ritu intelligendus est, cum Christi præceptum ab Apostolis in scripto Evangelio traditum memorat? Deinde, tam laudati PP. quam CC. cit. locis agunt de Eucharistiæ in pane & vino consecratione, ceu præcipuo sermonis sui argumento; isthuc proinde eos duntaxat appellare, cum Christi præceptum memorant, existimandum est: tametsi eodem loco, quasi per occasionem, etiam mixtionis hujus ritum enarrent & commendent. Denique non incongrue dixeris: ex mente cit. Patrum & Conciliorum ritum hunc esse a Christo *traditum* & *præceptum* hoc sensu, quod ejus factum causa sufficiens fuerit, ut Ecclesia mixtionem aquæ præciperet; quo quidem sensu non nisi improprie dici potest eam a Christo esse præceptam. Hanc porro aut similem aliam Patrum & Conciliorum expositionem suadet auctoritas Tridentini, quod Sess. 22. Cap. 7. diserte ait, *præceptum esse ab Ecclesia Sacerdotibus, ut aquam vino miscerent*, idque tum propter exemplum Christi, tum propter significationem mysticam, nulla omnino præcepti divini facta mentione.

Quod præterea contra eandem Assertionis partem alte-  
ram objicitur, eo spectat, ut ostendatur, in Calice Eucharistico penitus miscendam non esse vino aquam. Etenim (ut urgeri potest) si aqua misceatur, quid tandem illa fiet post consecrationem? an naturam retinet suam? an & ipsa perinde ac vinum immediate transubstantiatur in Sanguinem Christi?

R. P. Muszka Tom. II. de Sac.

Q

aut

aut potius jam ante per sui mixtionem transit in substantiam vini, ac deinde in Sanguinem? at hæc prorsus incerta sunt, ut vel pugnantibus Doctorum opiniones manifestum faciunt: quin, si Patrum & Ecclesiæ sensum attendas, nihil horum sustineri potest; satius igitur fuerit in puro vino sine ulla admixtione aquæ consecrare.

Resp. Ritum mixtionis hujus sanctum ac laudabilem esse, quin etiam observandum ab omnibus, satis docet præceptum Ecclesiæ certum, causa item a Tridentino adducta. Neque ita, ut vult Adversarius, incertum est, quod quæritur de aqua: imo, in Calice Eucharistico cum vino simul & aquam converti in Sanguinem, non posse dubitari ajo. Numquid enim Christus de toto illo mixto, quod habebat in calice, dixit; *hic est Sanguis meus*? Numquid non eadem fuit omnis ævi Patrum sententia? Consule Justinum M. in Apol. 2. Augustinum. cit. hic apud Aresium, D. Thomam, & alios passim; pro omnibus autem audiat Ambrosius & Damascenus. Ille L. 4. de Sacr. C. 4. *vinum, inquit, cum aqua in calicem misum sit Sanguis consecratione.* Et infra: *ante verba Christi calix est vini & aquæ plenus, ubi verba Christi operata fuerint, ibi Sanguis efficitur* &c. Damascenus autem L. 4. Fid. Orthod. C. 14. *non potest panem suum ipse Corpus facere, & vinum & aquam Sanguinem?* & rursus ibid. *quomodo naturaliter per comestionem panis, vinum & aqua per potationem in corpus & sanguinem comedentis & bibentis transmutatur: sic & propositionis panis, vinumque & aqua per invocationem & adventum Spiritus Sancti supernaturaliter transmutatur in Corpus & Sanguinem Christi.* En! non vinum solum, sed ipsam etiam aquam converti in Sanguinem.

- 109 At reliquam esse, inquires, quæstionem: num hæc aquæ in Sanguinem conversio sit mediata tantum, an immediata? Fateor olim celebrem fuisse hanc controversiam: mediatam conversionem propugnantibus passim veteribus cum Alberto Mag.



Mag. Alenſi, Richardo &c. ac ſubinde Suarezio, Vaſquezio, Eſthio & aliis multis, quibus ipſe D. Th. hic qu. 74. An. 8. ac etiam Innoc. III. L. 4. de Myſter. Miſſæ C. 30. favere videntur; immediatam ex adverſo tuiti ſunt Alanus, Toletus, Præpoſitus, Coninch, Arefius, & Recentiorum plurimi; quibus & ipſe accedo.

Eſt vero ita ſentiendi ratio *imo*, quia, tametſi modica aqua per ſui mixtionem ſenſibiliter tranſeat in ſubſtantiam vini, ita ut mixtum hoc totum in æſtimatione morali, ac ſpectato ejus ſtatu phyſico & ſenſibili ſit vinum uſuale, nec amplius aqua rationem ſui ſenſibilem & denominationem retineat: eadem nihilominus in ſua entitate permanet, cum certa conſtet experientia, etiam poſt longius a mixtione tempus aquam ſeparari a vino; quo quidem penitus ſubruitur fundamentum adverſæ opinionis. *2do*, quia laud. Patres, nullo ſacto diſcrimine, perinde loquuntur de aquæ ac vini converſione in Sanguinem. *3tio*, quia vinum uſuale, quod eſt certa Calicis materia, per conſecrationem immediate tranſit in Sanguinem; at mixtum ex vino & modica aqua (tametſi hæc in ſua entitate remaneat) eſt vinum uſuale; totum igitur mixtum illud immediate converti in Sanguinem dicendum eſt.

Verum adverſus hanc opinionem videntur pugnare tria. Nempe, ſi aqua immediate convertatur in Sanguinem, ſequitur *imo*, Sacramenti hujus partialem materiam eſſe aquam: cum autem ejus mixtio ſit ex præcepto Eccleſiæ, materiam Eucharistiæ ſaltem ex parte ab Eccleſia ipſa inſtitutam dicendum erit; *2do*, Eucharistiā non modo eſſe ſub panis & vini, ſed etiam aquæ ſpeciebus; *3tio*, ſeparatione facta ſpecierum vini conſecrati a ſpeciebus aquæ, Sanguinem Chriſti uti ſub ſolis vini, ſic & ſub ſolis aquæ ſpeciebus extitutum; at hæc ſuſtineri nequeunt; nequit igitur etiam dici, aquam immediate in Sanguinem converti.

Resp. ex doctrina a nobis asserta nihil sequi, quod catholico dogmati adversetur. Itaque

Ad 1<sup>um</sup> dico, aquam vino permixtam esse Calicis Eucharistici materiam ex solius Christi institutione: hic quippe pro materia instituit vinum usuale, quale non magis est vinum purum, ac vinum modica aqua permixtum. Inde in sententia hac aqua, ut talis & sub ratione aquæ, non est ulatenus materia vel partialis: verum sub ratione duntaxat vini, in cuius sensibilem substantiam transit.

Conformiter ad hoc etiam de 2<sup>do</sup> sentiendum est: negamus videlicet in Calice consecrato Sanguinem existere sub speciebus aquæ; cum enim aqua vino permixta non amplius retineat statum sensibilem sibi proprium, sed fiat sensibilibiter vinum, species pariter aquæ amittit, nec alias habet, quam quæ sunt vino usuali propriæ; in Calice igitur Eucharistico Sanguis Christi existit tantum sub speciebus vini usualis.

Quod demum attinet ad 3<sup>ium</sup>, omnino dicendum est, Sanguinem Christi non extitutum sub ipsius aquæ speciebus, si hæc videlicet in consecrato Calice separarentur a speciebus vini: sicut enim aqua sola non est idonea Eucharistiæ materia, sic nec remanet eadem sub specie solius aquæ; inde PP. & CC. solum dicunt Corpus & Sanguinem Christi sub speciebus panis & vini contineri: nusquam autem sub speciebus aquæ. Nec pugnat contra nos Concil. Tridentini Sess. 13. Can. 3. hic enim cum ait *sub unaquaque specie, & sub singulis cujusque speciei partibus, separatione facta, totum Christum contineri*, agit solum de speciebus panis & vini usualis, aut de speciebus materiæ necessario requisitæ ad Eucharistiam; id quod colligitur tum ex Can. præcedente: tum ex eo, quod Trid. his Canonibus statuerit doctrinam contra Novatores, a quibus controversia hæc, in Scholis duntaxat enata, neuti-quam mota fuit.

Corol-

## Corollarium.

**C**onformiter ad ea, quæ supra N. 100. & 101. dicta sunt, 110  
 isthic etiam ex posita Assertionem complura deduci pos-  
 sunt Corollaria. Nobis universim dixisse suffecerit: quidquid  
 non est vinum de vite, hocque ipsum usuale, idonea non est  
 Calicis Eucharistici materia. Invalida proinde foret conse-  
 cratio in liquore ex pomis, cerasis, idque genus fructibus  
 aliis, aut etiam ex immaturis uvis expresso: in succo item  
 etiamnum intra uvas contento: in vino corrupto, degene-  
 rante videlicet in vappam vel acetum: pane vino imbuto:  
 vino copiosis aromatibus condito &c. Mustum contra, seu  
 vinum ex uvis recenter expressum sufficiens est materia: pro-  
 pter feces admixtas attamen illicita extra necessitatis casum  
 aut regionis consuetudinem, ut decidit Julius Papa Cap. Cum  
 omne crimen. dist. 2. de Consecr. De vino congelato va-  
 riant opiniones: posse in eo valide consecrari affirmant Sylve-  
 ster, Soto, Suarez, Vasquez, & maximam partem DD.  
 alii, eo quod sit substantialiter vinum; ex adverso Alanus,  
 Henriquez, Ledesma cum quibusdam negant propterea,  
 quod non habeat rationem potus. Ac sane nisi istud ad va-  
 lorem materiæ Calicis Eucharistici requiratur, non erit ratio,  
 cur vinum in uvis contentum, aut in pane imbibitum non  
 queat valide consecrari, cum & istud per expressionem, sicut  
 glacies per resolutionem, possit reddi potabile. Ut ut in-  
 terim sint ista: dubiam saltem esse materiam vinum congela-  
 tum negari nequit, hinc tametsi forte in eo valida sit, non  
 tamen etiam licita consecratio. De pluribus id genus vide  
 Theologos Morales.

## §. III.

*Quæ sit Forma Sacramenti Eucharistiæ?*

COMplura sunt, quæ isthic in quæstionem a nonnullis vocantur, ac nominatim: an Christus ipse in Eucharistiæ consecratione certa verborum forma usus fuerit? num verba, quibus consecrationem Sacerdos perficit, proferenda sint ab eo historice duntaxat & narrationis instar: an potius assertive, ita videlicet, ut intendat id efficere, quod illa significant? quibus demum verbis necessario constet forma consecrationis? Ac nos quidem de primis duobus sensum nostrum paucis aperiemus in Resp. ad Obj. N. 118. & 119. postremum autem quæsitum, ceu magis ad explicandum fidei dogma pertinens, peculiari Assertionem resolvemus: notatis attamen prius Novatorum circa illud erroribus, & DD. Catholicorum opinionibus.

Novatorum error,  
& DD. Orthodoxorum opiniones.

- III. I. COMMunis Novatorum error est, uti ad Sacramenta alia, sic ad perficiendum etiam Eucharistiæ Mysterium nulla omnino requiri verba consecratoria, ut L. I. Dissert. I. §. IV. retulimus; at, num requirantur saltem concionalia, & quæ illa? in hoc ab invicem dissident. Calvinus L. 4. Inst. C. 17. non opus esse ait illis Christi verbis, *hoc est Corpus meum, hic est Sanguis meus*; solumque præscribit lectionem Capituli II. ex Ep. I. ad Cor. concionem item ministri, & quasdam præfationes. Lutherus autem, quamvis L. de Cap. Bab. C. de Bapt. aperte scribat, parum referre, quibus verbis Sacramentum conficiatur, modo adsit fides accipientis: attamen L. de abrog. Missa priv. & in Forma Missæ pro

pro Eccl. Wittemb. docet, non modo verbis Evangelicis, sed etiam tota Liturgia opus esse ad perficiendam Eucharistiam. Utrique adversatur Bucerus in C. 26. Matth. asserens, ad consecrationem hujus Sacramenti nulla omnino verba esse necessaria. Moderni Lutherani & Calviniani in doctrina pro more suo variant; tametsi enim plurimi omnia Christi instituentis verba proferenda esse existiment: sunt nihilominus, qui sine ullis verbis Eucharistiam perfici contendunt.

II. Quamvis Catholici DD. in eo convenient omnes, <sup>112</sup> quod in his Christi verbis, *hoc est Corpus meum, hic est Sanguis meus*, forma consecrationis habeatur; hæc attamen verba non esse completam & sufficientem formam existimant aliqui.

Ita Scotus in 4. dist. 8. qu. 2. docet, etiam verba illa Canonis præcedentia, *qui pridie quam pateretur. &c.* ad formæ panis consecratorię substantiam pertinere: aut certe ita esse necessaria, ut sine illis non perficiatur Sacramentum; quia (ut ille ait) nisi verba illa præmittantur, in forma consecrationis  *Corpus meum* non significabit Corpus Christi, sed ipse Sacerdos. Ad consecrationem autem Calicis quod attinet, plerique Thomistæ, Doctore Ang. 3. p. qu. 78. Ar. 3. pro se laudato, contendunt formam ejus constare his omnibus verbis, *hic est calix Sanguinis mei, novi & æterni testamenti, mysterium fidei, qui pro vobis & pro multis effundetur in remissionem peccatorum.*

De forma demum tam panis quam vini consecratoria peculiaris est opinio Ambrosii Catharini e Familia Prædic. Theologi in duobus Opuscul. de consecrationis forma, qua Christus est usus: item Cl. le Brun ex Congr. Orator. Prestyteri in Explicatione precum & Cæremoniarum Missæ. Uterque nimirum docet, consecrationem perfici non modo verbis illis, *hoc est Corpus meum, hic est Sanguis meus*: verum apud Latinos etiam antecedente illa Canonis Oratione, *Quam oblationem*

*nem tu Deus &c.* apud Græcos autem precibus illis, quas in sua Liturgia verbis Christi subjiunt orantes Deum, ut *mitat Spiritum S. super proposita dona, & panem faciat Corpus Christi, vinum vero Sanguinem ejus &c.* quæ quidem sententia indubitanter convenit cum ea, quam e Schismaticis Græcis propugnarunt Sec. XIV. Nicol. Cabasilas Theſſalonicen. & Sec. XV. Marcus Ephesinus, aliique apud Arcud. L. 3. Concord. C. 26.

His omnibus contraria est doctrina apud Theologos communiter recepta, quam & nos amplectimur. Sit itaque

### ASSERTIO.

**F**orma Sacramenti Eucharistiæ confistit in solis his aut æquivalentibus Christi verbis: hoc est Corpus meum, hic est Sanguis meus; ea proinde, quæ illis Latini & Græci præterea adjiciunt, necessaria non sunt ad valide perficiendum hoc Sacramentum.

- 113 Probatur I. ratione in S. Literis fundata. Nempe, cum forma cujusvis Sacramenti debeat esse a Christo instituta, eademque significare ipsum Sacramentum, ea utique solum verba vim formæ Eucharisticæ habent, quæ Christus in conficienda Eucharistia adhiberi voluit, & quæ simul memoratam significationem continent; at hujusmodi verba sunt hæc, aut his æquivalentia, *hoc est Corpus meum, hic est Sanguis meus*, neque ulla alia; in his igitur solis habetur completa & tota forma. Maj. prop. omnibus certa est; Min. autem perinde certis nititur momentis. Etenim imo indubium est, iis Christum nos uti voluisse in conficienda Eucharistia verbis, quibus & ipse in conficienda illa usus est: de aliis quippe istud affirmandi nusquam Scriptura aut Patres præbent fundamentum; verba porro illa hæc fuisse nominatim, *hoc est Corpus meum, hic est Sanguis meus*, testatur Matthæus C. 26. & Marcus

C. 14.

C. 14. illis autem æquivalentia refert Lucas C. 22. & Apostolus I. Cor. 11, verba autem, quæ præter hæc Latini & Græci in Canone recitant, Christum adhibuisse aut adhiberi voluisse nullo Scripturæ aut Patrum testimonio evincitur. 2do, verba eadem, ut pariter omnibus certum est; super panem & vinum enuntiata significant & quidem præctice (secus enim non forent vera) Christi Corporis & Sanguinis præsentiam sub speciebus panis & vini, in quo sita est Sacramenti hujus natura; reliqua autem verba, quæ Evangelistæ institutionem Eucharistiæ narrantes referunt, aut non sunt a Christo prolata, ut *accepit JESUS panem, benedixit &c.* aut tamen si Christi verba sint, significant duntaxat aut præceptum & finem sumendæ Eucharistiæ, ut illa, *accipite, comedite, bibite, hoc facite in meam commemorationem:* aut passionem Christi vel effectum Sacramenti, qualia sunt de Corpore, *quod pro vobis tradetur,* de Sanguine, *qui pro vobis effundetur, in remissionem peccatorum.*

Probatur II. auctoritate Patrum, qui per hæc sola Christi verba consecrationem peragi tradunt, ut Justinus M. Apol. 2. Irenæus L. 4. contra Hæreses C. 18. Gregorius Naz. Orat. 2. de Pasch. Augustinus Serm. 28. de verbis Domini, & alii apud Bellarm. L. 4. de Euch. C. 13. Pro omnibus audiantur verba trium. Ambrosius L. 4. de Sacram. C. 4. *Panis iste, inquit, panis est ante verba Sacramentorum; ubi accesserit consecratio, de pane fit caro Christi. - - Consecratio igitur quibus verbis est? Domini JESU; nam per reliqua omnia, quæ dicuntur, laus Deo deferitur, petitur pro populo, - - ubi venit, ut conficiatur ven. Sacramentum, jam non suis sermonibus Sacerdos, sed utitur sermonibus Christi; ergo Sermo Christi hoc conficit Sacramentum.* Chrysostomus Hom. 1. de proditione Judæ ait: *hoc est Corpus meum, hoc verbum proposita munera transmutat.* Damascenus L. 4. Orthod. Fid. C. 14. *dixit Deus: hoc est Corpus meum, & hic est Sanguis*

R. P. Muszka Tom. II. de Sacr.

R

meus,

meus, & hoc facite in meam commemorationem; & omnipotenti ipsius præcepto, donec ipse veniat, hoc efficitur. Hæc & similes Patrum locutiones, si invicem, ac etiam cum ratione super. N. adducta conferantur, validum ad rem præsentem suggerunt argumentum, ut videre est apud laud. Bellarminum.

- 115 Probatur III. ex Conciliis Florentino & Tridentino. Certe Florent. in Decr. pro Arm. dicit, formam huius Sacramenti esse *verba Salvatoris*, quibus Sacerdos *in persona Christi loquens* hoc conficit Sacramentum; & Trident. Sess. 13. Cap. 1. ait, Eucharistiam a Christo institutam, cum *post panis & vini benedictionem se suum Corpus præbere & Sanguinem perspicuis verbis testatus est*, quæ verba ab Evangelistis commemorata, a D. Paulo postea repetita sunt: item Sess. ead. Cap. 3. dicitur, Corpus Christi esse sub specie panis, & Sanguinem sub specie vini *ex vi verborum*; quæ jam autem præter hæc, *hoc est Corpus meum, hic est Sanguis meus*, alia verba sunt, quibus hæc omnia conveniant? hæc igitur solum ex mente utriusque Concilii sunt forma hujus Sacramenti.

- 116 Hæc jam autem momenta, quibus Assertio generatim comprobata est, ultro admonent, rejiciendas omnino esse in particulari etiam opiniones Scoti, Thomistarum, Catharini item, & quorundam Græcorum. Igitur (ut speciatim perstringam singulas) ad valorem formæ consecratorię non requiruntur imo verba illa, *qui pridie quam pateretur &c.* quia nec Christus hoc Sacramentum conficiens ea protulit: nec Sacerdos illa profert in persona Christi. Non 2do illa *novi & æterni testamenti &c.* quia nec Apostolus nec Evangelistæ Calicis formam referunt cum his omnibus verbis; nominatim autem *et æterni*, ac etiam *mysterium fidei*, ab omnibus omittitur: quin nec Patrum veterum ullus in illis formam constituit. Quid quod præcedentia verba, *hic est Calix Sanguinis mei*, complete significant conversionem vini in Sanguinem Christi: cum igitur simul sint practica, eandem etiam operantur. Non 3tio deni-



denique oratio Latinorum, *quam oblationem tu Deus &c.* aut Græcorum preces, quibus petunt *panem fieri Corpus Christi &c.* neque enim verba hæc sunt a Christo instituta, quæ tamen sola consecrationis formam faciunt. Idem autem potiori jure dicendum est de particula *enim*, quam Latini interjicimus verbis Calicem consecratoriis, *hic est enim Calix &c.*

Illud demum isthic monitum velim Theologiæ studio-  
sum: quamvis doctrina a nobis propugnata, tam ob rationes jam adductas, quam ob communem Theologorum sensum certa sit, fidei attamen certitudinem ei non attribuimus, ut quæ nusquam in Scripturis clare expressa legitur, neque etiam ab ullo Oecumenico Concilio aperte definita est. Et de Scriptura quidem, Conciliis item, quæ Florentinum & Tridentinum antecesserunt, ac etiam Lateranensi V. controversi nequit: perinde autem in ipso Florent. & Trident. nullam omnino de re præsentis decretoriam definitionem reperias.

Sane Florentinum, tametsi voluerit a Græcis declarari (quod etiam Sess. 25. præstiterunt) Eucharistiam perfici verbis Christi: non tamen definivit, an solis illis; quin neque primum deinde in fidei Definitionem retulit, id necesse non esse contententibus Græcis, cum in eo a Latinis diversum non sentirent. Nec obest, in Decr. pro Arm. dici *formam Eucharistiæ esse verba Salvatoris*; rursus enim non exprimitur, quæ nominatim sint hæc verba, & an sola? Quid quod multorum opinione Decretum hoc non habeat auctoritatem definitivam; dubitari autem certo non potest, aliqua in eo contineri etiam de Sacramentorum materia & forma, quæ fidei articulis non accensentur, ut alias jam diximus L. III. Diff. I. §. III. N. 36.

Ad Tridentinum autem quod attinet, ex verbis quidem ejus supra N. 115. laudatis legitima fit pro nobis illatio, jureque cenferi potest ejusdem illud nobiscum fuisse sententiæ:

R 2

at

at in hoc etiam aperta definitio desideratur, præsertim cum doctrinam hanc nullo Canone proponat, nec anathemate feriat oppositum sentientes, tametsi aliquos esse non ignoraverit. Hoc certe tuetur se Catharinus in fine Opusculi secundi de Consecr. forma, cum ait, misisse se hac de re lucubrationem ad Concilium Tridentinum, *nihil tamen ei dignum morte actum esse*. Idem testatur noster Salmeron, qui Concilio interfuit, ut videre est Operum ejus Tom. 9. Tract. 13. circa finem.

### Respondetur Adversariis.

118 **O**pponent I. Christus instituens Eucharistiam non consecravit illam hac verborum forma, *hoc est Corpus meum, hic est Sanguis meus* : verum sola voluntate & virtute divina, vel ad summum benedictione interna, aut etiam externa verbis quibusdam expressa secundum illud quod Evangelistæ referunt, *benedixit, gratias egit &c.* Arguitur vero istud ex S. Marco, qui C. 14. narrat, verba illa, *hic est Sanguis meus*, a Christo prolata primum post sumptum ab Apostolis Calicem; *accepto*, inquit, *calice gratias agens dedit eis, & biberunt ex illo omnes*; & ait illis: *hic est Sanguis meus &c.* Favet huic opinioni etiam Innocentius III. L. 4. de Myster. Missæ C. 6. ita scribens:  *dici potest, quod Christus virtute divina consecravit (Eucharistiam) & postea formam expressit, sub qua posteri benedicerent; ipse namque virtute propria benedixit, nos autem ex illa virtute, quam indidit verbis.* Hanc eandem sententiam propugnat Catharinus in Opusculis supra N. 112. laudatis, Concilio Trident. submissis, nec tamen ab eo confixis: item Christoph. a Capite Fontium ex Ord. Min. Archiep. Cæsarien. in Tract. de correctione Theologiæ Scholasticæ, quod opus Sixto P. inscripsit; uterque vero pro se laudat e vetustioribus Rupertum, Anselmum &c. e recentioribus Franciscum Mayronis, Gabr. Biel &c. Quod si autem istud ita se habeat, quid-

quidni & nunc Eucharistiâ perficiatur sola Sacerdotis benedictione & oratione? non autem nominatim illis verbis: *hoc est Corpus meum* &c. præsertim cum Christus post factam institutionem dixerit, *hoc facite* &c.

Resp. I. Non consequi id, quod ex nunc laud. opinione arguitur, vel inde conjicias: quod ipsorum ejus Patronorum sententia modo quidem non aliter quam verbis Eucharistiâ conficiatur. Quamvis autem inter eos non satis conveniat, quæ illa sint potissimum verba: nobis nihilominus certum est, non alia esse, quam quæ in Assertionem propugnamus, idque ob momenta illic allata. Cæterum

Resp. II. opinionem, a qua in Object. argumentum ducitur, omnino rejiciendam esse, ceu minus conformem Scripturæ & Patrum sensui. Nimirum, cum Christus post institutam Eucharistiâ dixerit, *hoc facite in meam* &c. plane credibile est, ea forma illum consecrasse, qua nos consecrare voluit, cum forma universim ad substantiam Sacramenti pertineat; voluisse autem Christum a nobis consecrationem perfici his verbis, *hoc est Corpus meum* &c. jam comprobatum est; iisdem igitur verbis & Christum consecrasse dicendum est. Hunc eundem porro fuisse sensum Tridentinorum Patrum non obscure colligitur ex Concilii verbis N. 115. citatis; quod ipsum jam multo ante vetustiores PP. apertius etiam docuerunt. Certe Tertull. L. 4. contra Marcion. C. 40. *acceptum panem, inquit, & distributum discipulis Corpus illum suum fecit dicendo: hoc est Corpus meum.* Et Ambrosius L. de Myster. C. 9. *clamat Dom. JESUS, hoc est Corpus meum; ante benedictionem verborum cælestium (quorum, nisi quæ paulo ante recitavit?) illa species (panis videlicet) nominatur: post consecrationem Corpus significatur. Ipse dicit Sanguinem suum; ante consecrationem aliud (nempe vinum) dicitur: post consecrationem Sanguis nuncupatur.* Quid his desideres clarius?

At urget, inquires, Innocentii III. oppositum sentientis auctoritas? non equidem in præsentī; cum constet sensa hæc fuisse privati Doctoris, non Pontificis ex cathedra loquentis. Minus autem favet opinioni illi silentium Tridentini; siluit, non ut silentio suo approbaret: sed ne se controversiis Scholasticorum discutiendis distineret, satis alioqui occupatum in Novatorum erroribus, ad quos convellendos convenerat. Ac sane infirmum esse universim in hujusmodi silentio præsidium vel illud sit argumento: quod Concil. Florentinum contra Græcos, divortia ob adulterii crimen esse licita docentes, nihil pronuntiaverit; an vero propterea approbasse etiam dici potest? Non deerant interim ex Patribus Tridentinis, qui in Catharini opinionem acriter insurgerent, eamque etiam damnationi subjiiciendam censerent, ut fatetur ipse Catharinus.

Si demum ad locum ex S. Marco in Object. citatum provocet Adversarius, occurrimus ei cum S. Thoma, qui 3. p. qu. 78. Ar. 1. ad 1. ait: *Evangelistæ non semper eundem ordinem in recitando servaverunt, quo res sunt gestæ.* Id quod omnino in præsentī dicendum est: verba proinde illa, *biberunt ex eo omnes*, per anticipationem relata esse ajo. Habes hujusmodi exempla complura apud Augustin. de consensu Evangelistarum C. 30. 31. & 44.

- 119 Oppon. II. Verba, *hoc est Corpus meum &c.* a Sacerdote proferuntur *historice* duntaxat, ut docet cum compluribus Salmeron hic Tract. 13. Tom. 9. quis vero sic prolata dixerit habere vim ac efficaciam Eucharistiæ conficiendæ? eadem igitur etiam non habent rationem Sacramentalis formæ.

Resp. in definiendo modo, quo consecrationis verba proferuntur, non consentire Theologos. Multi cum Vasquez oppositam Salmeroni propugnant sententiam, ac verba illa *assertive*: alii autem, iique cum Suarez & Lugo plurimi *historice* simul & *assertive* enuntiari contendunt.

Ac

Ac mihi quidem cum postremis sentiendum videtur: Sacerdos quippe narrat factum & verba Christi, cum dicit, *benedixit, fregit, deditque &c.* simul dein nomine Christi significat practice, vultque fieri, imo re ipsa efficit id, quod per sua verba fecit Christus; quod quid aliud est apud Theologos, quam Christi verba proferre tam historice quam assertive? Non negaverim attamen, ad Sacramenti valorem satis esse consecrationis verba assertive duntaxat prolata; certe enim si, omisis prioribus, sola hæc, *hoc est Corpus meum*, enuntientur, non fiet Christi factorum & verborum enuntiatio historica: valida nihilominus erit consecratio, cum & Christus iis verbis solum assertive prolatis consecraverit. Enuntiatio igitur hæc historica necessaria est solum necessitate præcepti, non Sacramenti. Præterea, quamvis verba illa, *hoc est Corpus meum*, historice prolata referantur omnino ad panem a Christo consecratum: eadem attamen simul, ut assertiva est eorum enuntiatio, Sacerdotis intentione determinantur ad præsentis panis transubstantiationem efficiendam.

Ut ut interim sit de hac Scholarum controversia, nullam positæ Objectioni inesse vim satis illud declarat: quod Salmeron ipse cum sequacibus in sua etiam sententia admittat, verbis Christi consecrationem perfici. Ex institutione nempe Christi habent illa vim significandi practicam; ut adeo a Sacerdote prolata non possint non efficere id, quod significant: modo tamen ea adsit intentio, quam universim in Sacramentorum Ministro requiri jam alias diximus.

Oppon. III. pro sententia Scoti illud facere, quod omis-<sup>120</sup> sis verbis, *qui pridie quam pateretur &c.* forma consecrationis, *hoc est Corpus meum*, sit indifferens ad significandum Corpus Christi; imo potius significet Corpus Sacerdotis. Thomistarum autem opinioni favet Missale Rom. in quo eodem characterē exprimuntur omnia hæc verba: *hic est enim Calix Sanguinis mei, novi & æterni testamenti &c.* Favet item Eugenius

IV. in Decr. pro Arm. pro consecrationis forma hæc eadem verba omnia recitans. Demum favet etiam S. Thom. 3. p. qu. 78. Ar. 3. ubi de iisdem verbis, *dicendum est*, inquit, *quod omnia prædicta verba sunt de substantia formæ*. In solis igitur his verbis, *hoc est Corpus meum*, *hic est Sanguis meus*, non consistit forma Sacramenti Eucharistiæ.

Resp. momenta pro Assertionem pugnantia multo his, quæ opponuntur, validiora esse, ut ea invicem conferenti patebit. Ut autem speciatim respondeam;

Non est, quod Scotistas sollicitos reddat consecrationis verborum indifferentia: tametsi enim omnittatur illa narratio, *qui pridie &c.* nihilominus verba, *hoc est Corpus meum*, ad significandum & efficiendum Christi ipsius Corpus sufficienter determinantur per intentionem Sacerdotis in persona Christi agentis & loquentis, ut nominatim istud docet S. Thom. loco supra cit. Ar. 1. ad 4. Hac ipsa etiam causa ad suffereendam eorum verborum indifferentiam necesse non est addere, *quod pro vobis datur*, vel *tradetur*. Equidem illa a Christo adjecta refert Lucas: at sine illis perfectam Sacramenti significationem haberi certum est; omissa sunt præterea a Matthæo & Marco, quod idem facit Latina Ecclesia; quin in Græcorum etiam Liturgiis loco eorum dicitur, *qui pro vobis frangitur*: ut adeo dubitari nequeat, non ea mente fuisse a Christo prolata, ut illa ad consecrationis valorem necessaria esse voluerit.

Sed nec Thomistæ quidquam convincens adserunt. Ut enim in Missali omnia illa verba uno charactere exprimerentur, sufficiens causa erat, continuum sensum ea facere, ac ad unam totalem orationem omnia pertinere. Quid quod iisdem plane characteribus Canonem totum in Missalibus compluribus descriptum legamus; an vero propterea consecrationis forma in toto Canone reponenda? Ad Eugenium quod attinet; ut formam recitans omnia illa referret verba, plane congruum

gruum erat, tum quod ex præcepto Ecclesiæ pronuncianda sint omnia : tum quod aliquorum opinione omnia ad formæ substantiam requirantur. Nec tamen idcirco existimandum est, & ipsum cum his sensisse : jam enim antea in Concilio approbaverat Græcorum consecrandi ritum; in horum autem quibusdam Liturgiis non recitantur omnia illa verba. Ita in Liturgia S. Basilii non leguntur hæc voces, *aterni & mysterium fidei*.

Demum S. Thomas omnia hæc verba requirit solum ad substantiam formæ, prout ea est plene significans virtutem Sanguinis Christi: non vero prout eadem est practice efficiens Sacramentum. Ita explicandi Doct. Angelicum ipse contextus fundamentum præbet. *Dicendum ergo* (inquit ille cit. Art. in ☉) *quod omnia prædicta verba sunt de substantia formæ; sed per prima verba, cum dicitur, hic est Calix Sanguinis mei, significatur ipsa conversio vini in Sanguinem, eo modo, quo dictum (Art. 2.) in forma consecrationis panis; per verba autem sequentia designatur virtus Sanguinis effusi in passionem, quæ operatur in hoc Sacramento. Ex mente igitur S. Doctoris per sola prima verba habetur conversio vini in sanguinem; cum ergo facta hac conversione perficiatur Sacramentum, sola verba illa habent perfectam formæ Sacramentalis rationem. Hoc certe uno argumento idem S. Doctor ibid. Art. 2. probat, verba, *hoc est Corpus meum*, esse formam panis consecrandi.*

Nec obstat, jussu Pii V. ex Commentariis Cajetani expunctam esse Dissertationem, qua contendebat, verba *novi & aterni &c.* non esse de formæ substantia: factum quippe id solum est ad cautelam, ne forte quis existimaret ea perinde a Latinis licite omitti posse, sicut in panis consecratione omitimus verba illa, *quod pro vobis tradetur*. Certe idem Pius ratam habuit Græcorum formam, tametsi in quibusdam eorum Liturgiis non legantur voces, *aterni & mysterium fidei*,

R. P. Muszka Tom. II. de Sacr.

S

ut

ut jam meminimus ; non censuit ergo omnia prædicta verba pertinere ad substantiam formæ, ut ea est consecratoria.

- 121 Oppon. IV. Catharini & Græcorum quorundam sententiam fundari in Patribus, cum eorum multi asserant Eucharistiam confici precibus & invocatione. Ita justinus M. Apol. 2. *eam*, inquit, *in qua per preces Verbi - - gratia sunt astra, alimoniam, - - incarnati illius JESU carnem & Sanguinem edo-cti sumus*. Dionysius Areop. L. de Eccl. Hier. C. 3. dicit consecrationem fieri post verba, *hoc facite in meam commemorationem* ; non igitur per illa, quæ his præmittuntur, nempe, *Hoc est Corpus meum*. Basilius L. de S. Spir. C. 27. quærit : *quis Sanctorum in scripto nobis reliquit invocationis verba, cum conficitur panis Eucharistia ?* Cyrillus Hier. Catech. 3. *post S. Spiritus invocationem non est amplius panis communis, sed est Corpus Christi*. Et rursus Catech. 5. exponens conficiendæ Eucharistiæ ritum, nulla verborum Christi facta mentione, *Deum*, inquit, *oramus, ut super illa proposita Spiritum S. emitrat, ut panem quidem faciat Corpus Christi &c.* Denique Augustinus L. 3. de Trin. C. 4. *Eucharistia est id, quod prece mystica consecratum sumus &c.*

Resp. Hæc & similia his Patrum effata videntur fundamentum præbere asserendi, Christi verba, *hoc est Corpus meum, hic est Sanguis meus*, ne partialem quidem esse consecrationis formam ; istud vero cum nec Adversarii velint, nec admitti possit ob momenta supra allata, ultro consequitur, explicari oportere Patrum sententias : non vero ad literam accipiendas. Atque in hanc rem duo generatim observari velim.

imo, Patribus de Sacramentorum forma loquentibus prorsus familiare fuit, ut eam universim precum & invocationis aut benedictionis nomine compellarent. Neque id abs re: formarum quippe aliquæ expressam invocationem & preces continent ; ut in Confirmatione, Extrema unctione &c. aliæ vero ; ut in Baptismo, Eucharistia, Pœnitentia &c. ta-  
cita



cita saltem & implicita sunt deprecatio ; dum enim Minister earum verba a Christo præscripta recitat, tacite simul ac æquivalenter per merita Christi Deum invocat, ut virtute Spiritus Sancti id efficiat, quod verba significant. Ita Augustin. L. 5. de Bapt. C. 20. *quomodo exaudit (Deus) homicidam deprecantem vel super aquam Baptismi, vel super oleum, vel super Eucharistiam?* ubi ipse etiam Baptismi formam vocat deprecationem. Atque hoc omnino sensu non incongrue exposueris in Object. cit. Justinum, Basilium, Cyrillum, & Augustinum.

2do, non infrequens etiam erat apud Patres, totam Liturgiam, aut saltem ejus Canonem, etiam secundum partes ad integritatem tantum pertinentes, consecrationem vocare latiore quodam videlicet sensu; idque propterea, quod preces illi ab Ecclesia insertæ sint instar præparationis proximæ ad ipsam Eucharistiæ consecrationem vel sumptionem. Certe Basilii loco cit. *nec enim his, inquit, contenti sumus, quæ commemorat Apostolus aut Evangelium: verum alia quoque & ante & post dicimus, tanquam multum habentia momenti ad mysterium.* Quæ autem sunt hæc alia, quæ ante & post dicuntur, nisi preces? at has non ait S. Doctor necessario recitari ad ipsius Eucharistiæ consecrationem: sed tantum momenti habere multum ad mysterium, quo videlicet illud digne ac reverenter celebratur. Rursum autem hoc etiam sensu loqui laud. Patres, præsertim Justinum, Basilium & Augustinum, nihil vetat dicere.

Paulo difficilior est, fateor, locus Dionysii; cum interim is non explicet, quibus verbis fiat consecratio, quisque sit reliquorum verborum ordo, de mente ejus certi nihil statui potest. Probabile nihilominus putat esse Bellarm. L. 4. de Euch. C. 14. Dionysium fuisse usum Liturgiæ, in qua verba, *hoc facite &c.* præmittebantur his, *hoc est Corpus meum*, idque propterea, ut Sacerdos se Christi mandato excusaret prævie,

quod Eucharistiam conficere attentet. Id si ita se habeat, cessat objectio.

122 Urgeri nihilominus potest I. ex veteribus Liturgiis, quibus hodie etiam utuntur Orientales, ac nominatim Græci, Armeni, Coptitæ, Syri &c. In his videlicet post verba, *hoc est Corpus meum, hic est Sanguis meus*, aut his æquivalentia, Sacerdos orat, *ut adveniat Spiritus S. super dona propofita - & panem quidem hunc faciat Corpus Sanctum ipsius Dom. Dei Salv. nostri JESU Christi, - & hunc Calicem Sanguinem pretiosum - ipsius Domini &c.* Hæc nominatim ad verbum leguntur in Liturgia S. Basilii; hoc ipso autem ordine & iisdem pene verbis ac sensu orationem conceptam videre est in Liturgia SS. Apostolorum Petri, Joannis, Marci, Jacobi, & duodecim Apostolorum: item SS. Clementis Rom. Basilii, Cyrilli, Chrysostomi &c. quin & in Missa Mozarabica, olim per Hispaniam & Galliam usitata. At istud utique argumento est, sine adjecta precatione non effici conversionem panis & vini Eucharisticam: si enim ea fiat per sola Christi verba, quomodo post prolata illa Sacerdos orare potest, *ut Spiritus S. faciat Corpus & Sanguinem Christi?* Eo autem istud urget amplius, quod Ecclesia Latina Græcorum saltem & Armenorum ritus liturgicos approbet.

Resp. negari non posse, in vetustissimis Liturgiis post Christi verba haberi memoratam orationem; reperi certe eam in omnibus illis, quas ex authenticis exemplaribus & MSS. veteribus Codicibus copiose collegit, & Dissertationibus ac Notis eruditus illustravit Renaudotius. At ex hujus ipsius Cl. Auctoris animadversione notandum est: multas ex veteribus his Liturgiis in hodiernis exemplaribus minus fideliter referri, nec Originali suo respondere; ut adeo certum sit earum aliquas esse interpolatas, mutilas alias, alias interpretum vitio quoad verba & sensum corruptas. Quin nec omnes ad eos referendæ sunt Auctores, sub quorum nomine circumfer-

run-

runtur, ut nominatim certum videtur de Liturgia S. Petri Apostolorum Principis, Joannis Evang. duodecim Apostolorum &c. Ex collatis demum invicem Liturgiis & Patrum testimoniis id etiam indubitatum conficitur, nullam antiquitus fuisse Eucharistiæ consecrandæ formam, in qua quoad substantiam Orientales & Occidentales non consentirent. Vide de his laud. Renaudotii Præfat. & Dissertation. Prælimin. in Tom. 1. ejusdem item Commentar. & Notas in utroque Tomo Collect. Liturg. Orient. Ac hæc quidem haud parum lucis affundunt ad rite sentiendum de proposita Objectione: vim interim ejus non elidunt, cum constet hodie etiam Græcos & Armenos id genus oratione uti non reclamante, imo & approbante Ecclesia.

Quo igitur ad Object. directe respondeam, dico: oratione hac non peti *absolute*, ut panis & vinum fiant Corpus & Sanguis Christi, sed ut *nobis* fiant Corpus & Sanguis Christi. Clarius: petitur, ut panis & vinum, jam antea per consecrationem facta Corpus & Sanguis Christi, etiam nobis per nutritionis Spiritualis effectum fiant Corpus & Sanguis Christi; hoc est: nos spiritualiter nutrant, fiant nobis in salutem &c. Atque hoc omnino sensu isthic *τὸ* fiant accipiendum esse, ac re ipsa accipi ab Orientalibus (si demas Schismaticos quosdam Cabasilæ errorem secutos) invicte probant, Bona Rer. Lit. L. 2. C. 13. Bellarm. de Euch. L. 4. C. 14. Renaudotius in Collect. Liturg. sparsim in Dissert. & Notis, ac præter alios BENEDICTUS XIV. S. P. de Sacrif. Missæ Sect. 1. n. 241. apud quos pro eadem sententia reperies laudari etiam Græcos DD. Card. Bessarionem, Goarium, Allatium, & cum primis Arcudium L. 3. suæ Concordiæ C. 27. & novem seqq. de hoc copiose differentem. Conformiter porro jam ad horum momenta, expositionis nunc factæ

Ratio est *imo* ex Græcorum confessione. Ut enim legitur in Conc. Florentini Actis græco - latinis, cum Sess. 25. An. 1439. 24. Martii quæreretur ex Græcis: cur post Chri-

si verba recitarent memoratas preces? responderunt se credere consecrationem fieri per Christi verba; precibus autem illis solum peti, ut Eucharistia nobis fiat ad salutem. *Fateri nos diximus* (sunt verba Græcorum in laud. Actis) *per hæc verba, hoc est Corpus meum, transubstantiari sacrum panem & fieri Corpus Christi; sed postea quemadmodum & vos dicitis, jubet hæc perferri per manus S. Angeli tui in sublime altare tuum; ita nos quoque oramus dicentes, ut Spiritus S. descendat super nos, & efficiat in nobis panem hunc pretiosum Corpus Christi sui, transmutetque ipsa (dona) Spiritu S. suo, ut fiant communicantibus in purgationem animæ, in remissionem peccatorum, & non fiant in iudicium &c.* Eandem declarationem ibid. factam ab Ilidoro Ruffiæ Metropoli- tano refertur in Actis ejusd. Concilii, ab Horat. Justiniano. Bibliothecæ Vatic. Custode collectis & illustratis Collat. 22. ubi prætera Card. Julianus de Græcis hæc narrat: *confessi sunt, quod solis verbis Dominicis (Eucharistia) conficeretur; & quod putarent anathema, qui aliud crederet. Fuit institutum, ut hoc poneretur in definitione. Dixerunt, quod hoc non erat necessarium; imo si poneretur, Ecclesia ipsorum reciperet ignominiam, ac si hæcenus tenuisset aliud - - Unde SS. Dom. noster obtemperavit: ut non deduceretur in dubium, quod nunquam fuit.*

Ratio est 2do ex ipsis Liturgiis: in illis quippe obj. Oratio in sensum a nobis expositum desinit. Ita in Liturgia Marci: *ut fiant nobis, qui ex iis participamus, in fidem & sanctificationem &c.* in Clementis Liturg. *precamur, - - ut ostendas panem hunc Corpus Christi tui & calicem hunc Sanguinem Christi tui, ut qui eum participant, ad pietatem firmentur &c.* in Liturg. Chrysostomi; *ut sit iis, qui participant, ad emundationem animæ &c.* Idem legitur in Liturg. aliis, ut videre est apud Renaudotium; in Missis item Mozarabicis apud Bonam supra cit. C. N. 5. Verum ex ipsis Liturgiis adhuc

123 Urgebit quispiam II. ac 1mo quidem ex eo, quod secundum ritum in illis præscriptum post recitata a Sacerdote verba,

verba, *hoc est Corpus meum &c.* hic est Calix Sanguinis &c. populus respondeat, *Amen*, quod petitionem significat, nempe, *fiat*; ergo per illa verba non censent factum Corpus & Sanguinem Christi. 2do in Liturgia nominatim Chrysostomi post eadem verba ita orat Sacerdos: *fac panem hunc pretiosum Corpus Christi tui* - - μεταβαλὼν, hoc est, *mutans Spiritu tuo Sancto &c.* nondum igitur esse desierat *panis*, sed primo mutatur orationis hujus virtute. 3tio in Liturgia Basilii inter Christi verba & Orationem, qua petitur, ut Christi Corpus fiat, hæ interponuntur preces: *altari tuo appropinquamus, & (προσέυντες τὰ ἀντίτυπα) proponentes antitypa Sancti Corporis & Sanguinis Christi te rogamus, ut &c.* ubi vides post Christi verba & ante Orationem memoratam oblata dona vocari tantum *antitypa*, hoc est, imagines & figuras Corporis & Sanguinis Christi.

Resp. ad 1um, ex mente Orientalium isthic τὸ *Amen* non est petitio præsentis Corporis Christi: sed ejusdem professio, idemque significat, ac, *hoc est verum, ita credimus*, teste Ambrosio L. 4. de Sacram. C. 5. Quin in Missa Æthiopum, statim post *Amen* ter repetitum, expressis verbis additur: *credimus & confidimus* - - *hoc est vere Corpus tuum &c.* ut refert Antoine. Quod si tamen aliqui proferant *Amen* pro *fiat*, conformiter ad prius dicta intelligunt sensu restricto, nempe, *fiat nobis ad Salutem &c.*

Resp. ad 2dum: verba illa, *mutans Spiritu S. tuo*, non reperiri in omnibus Chrysostomi Liturgiis; in duabus certe, quas refert Renaudotius, desiderantur. Præterea, verbum græcum μεταβαλὼν male redditur per *mutans*: cum enim sit in aoristo secundo, magis proprie significat tempus præteritum, ut adeo verbi illius significatio sit, *qui mutasti &c.* Quod vero ad compellationem *panis* attinet, quo sensu ea Eucharistis nonnunquam attribuitur, jam supra dictum est Dif-  
fert. I.

fert. I. N. 67. & 68. in Resp. ad I. id quod de Chrysostomo eo est certius, quod Hom. 1. de prodit. Judæ aperte asserat per verba, *hoc est Corpus meum*, panem oblatum transmutari.

Resp. ad 3<sup>tium</sup>: rursus verba hæc non legi in omnibus S. Basilii Liturgiis, ac nominatim in Coptitarum & Alexandrina, a Renaudotio Tom. 1. relatis, & illustratis; harum prima ex Codice Coptico, altera ex Græco-Arabico in latinum translata est, ac utriusque memorata oratio his fere verbis absolvitur: *rogamus - - ut veniat Spir. S. tuus - -* (ἐν τὰ προκειμένα σὺ δῶρα ταῦτα) *super propofita hæc dona tua &c.* Quod si interim voces, quæ opponuntur, in aliquo exemplari legantur, congrue dici potest: oblata isthic vocari *antitypa* tantum relate ad tempus verba Christi præcedens; vel certe non sumi pro nuda imagine & figura qualicumque, verum tali, quæ id ipsum contineat, quod representat. Hujus alterius rationem & expositionem vide supra Diss. I. N. 53. Primi autem ratio est ex ipso græco verbo *προθέντες*, quod cum sit in aoristo secundo, per præteritum reddi debet; ut adeo precatio illa hunc faciat sensum: *appropinquamus altari tuo, & qui antea proposuimus antitypa Corporis & Sanguinis Christi, te rogamus, ut &c.* Atque hoc omnino sensu cit. Basilii verba ipse Joannes Damascen. L. 4. Orth. Fid. C. 14. exponere videtur. Altera interim expositio plus ad rem præsentem momenti habet, satisque omnino illa Objectioni occurritur.

## §. IV.

### *Qui sint Sacram. Eucharistiæ effectus?*

**D**E solis Eucharistiæ, ut ea Sacramentum est, effectibus isthic agere constitutum habemus; quos enim præterea eadem sub ratione Sacrificii operatur, patebit ex Diss. IV.

Jam

Jam vero Doctrinam hanc non aliunde certius, quam<sup>124</sup> ex Florent. & Trident. Conciliis discimus. Et Florent. quidem in Decr. pro Arm. §. *Tertium*, hæc habet. *Hujus Sacramenti effectus, quam in anima operatur digne sumentis, est adunatio hominis ad Christum; & quia per gratiam homo Christo incorporatur, & membris ejus unitur, consequens est, quod per hoc Sacramentum in sumentibus digne magis augeatur, omnemque effectum, quem materialis cibus & potus quoad vitam agunt corporalem, sustentando, augendo, reparando, & delectando, Sacramentum hoc quoad vitam operatur Spiritualem: in quo (ut inquit Urbanus P.) gratiam Salvatoris nostri recensemus memoriam, a malo retrahimur, confortamur in bono, & ad virtutum & gratiarum proficimus augmentum.* Trident. autem Sess. 13. Cap. 2. se declarat. *Sumi voluit (Christus) Sacramentum hoc, tanquam spirituales animarum cibum, quo alantur, & confortentur videntes vitam illius, quia dixit: qui manducat me, & ipse vivet propter me; & tanquam antidotum, quo liberamur a culpis quotidianis, & a peccatis mortalibus præservamur. Pignus præterea id esse voluit futura nostra gloria & perpetua felicitatis &c.* Conformiter ad quæ tres esse præcipuos hujus Sacramenti effectus jure dixeris. Nempe

I. est *nutritio Spirituality per augmentum ejusmodi sanctificantis gratiæ, cui proprium sit jus ad specialia auxilia, per quæ juvemur ad charitatem Dei in nobis conservandam & augendam: cum enim charitatis fervore arctius Deo conjungimur, hoc eodem in Spiritu magis proficimus & nutrimur.* Est nimirum nobis in Eucharistia Corpus Christi cibus, & Sanguis ejus potus Joan. 6. cibi autem & potus effectus præcipuus est nutritio.

II. effectus est *remissio culparum venialium, & a mortalibus præservatio.* Utrumque istud expressis verbis declarat laud. Tridentinum. Remissionem porro hanc venialium fieri

R. P. Muszka Tom. II. de Sacr.

T per

per charitatis fervorem, cum quo illa componi nequeunt, docet S. Th. 3. p. qu. 79. Ar. 4. An perinde etiam poena temporalis peccato debita remittatur? controvertunt Theologi. Ex mente Doctoris Ang. cit. qu. Ar. 5. *quia hæc unitas (hoc est, unio ad Christum per Eucharistiæ nutritionem) fit per charitatem, ex cujus fervore aliquis consequitur remissionem non solum culpæ, sed etiam pænæ; - ex consequenti, per quamdam concomitantiam ad principalem effectum, homo consequitur remissionem pænæ, non quidem totius, sed secundum modum suæ devotionis & fervoris.* Quod vero ad præservationem a mortalibus attinet, operatur eam Eucharistia mediantibus gratiis actualibus, quibus & tentationum vehementia impeditur, & ad resistendum illis robur additur. Hac ipsa autem præservatione efficitur perseverantia in bono, & per eam gloriæ consecutio secundum illud Joan. 6. *qui manducat hunc panem, vivet in æternum*; inde & Trident. cit. C. Eucharistiam dicit esse *pignus futuræ nostræ gloriæ & perpetuæ felicitatis.*

127 III. est *delectatio spiritualis*, quod rursus cibo & potui proprium est, ut notat Florent. in laud. Decr. Et Clemens V. in Concil. Vienn. in hoc Sacramento, inquit, *habetur omne delectamentum, & omnis saporis suavitas, ipsaque dulcedo Domini degustatur.* Neque mirum istud, quando vel in ipso manna, quod erat figura Eucharistiæ, Deus Israelitis panem dederat *omne delectamentum in se habentem, & omnis saporis suavitatem*, Sap. 16. Evenit interim non raro, ut rerum terrenarum affectus & sensuum oblectamenta, quibus distinemur, sacras has epuli Eucharistici delicias nobis eripiant, prohibeantque, quo minus suavitatis hujus gustu pascamur; hinc S. Bernard. Serm. 5. de Ascens. unde *Spiritualis gratiæ*, inquit, *inopia tantâ quibusdam, cum aliis copia tanta exuberat? præoccupatam nempe secularibus desideriis animam delectatio sancta declinat; nec misceri poterunt vera vanis, æterna caducis &c.*



## §. V.

*An, & quæ sit Sacramenti Eucharistiæ  
necessitas?*

**S**I hujus Sacramenti effectus attendas, nulla ejus necessitas esse videtur; quando & gratiæ sanctificantis quoad substantiam (sine jure videlicet illo peculiari) augmentum, & gratiæ actuales illi respondentes aliunde obtineri possunt. Contra, si spectentur Christi verba, *nisi manducaveritis carnem Filii hominis &c.* non modo præcepti, sed & medii necessitas videri potest; ut quidam Græci, & Novatores contendunt. Neutrum interim horum cohæret cum doctrina Ecclesiæ; cum qua sit

## A S S E R T I O.

*Sacramenti Eucharistiæ perceptio non est ulli necessaria necessitate  
medii; adultis autem necessaria est necessitate præcepti tam  
Divini, quam Ecclesiastici.*

**P**ars prima quoad parvulos est de fide ex Trident. Sess. 21. 128  
Can. 4. ubi anathema dicitur afferenti; *parvulis, antequam ad annos discretionis pervenerint, necessariam esse Eucharistiæ communionem.* Idem de adultis ita certum est, ut oppositum saltim sine temeritate sustineri nequeat: nam Trid. Sess. 5. in Decr. de pec. orig. §. 3. declarat generatim, *nihil esse damnationis iis, qui vere conscripti sunt cum Christo per Baptisma, - ita ut nihil profus eos ab ingressu Cæli remoretur.* Fundatur autem hæc doctrina in Apostolo ad Rom. 8. universim dicente, *nihil damnationis est iis, qui sunt in Christo Jesu;* & ad Gal. 3. *quicumque in Christo baptizati estis, Christum induistis;* per Apostolum igitur baptizato, si in gratia Baptismi

decedat, nihil deest ad salutem. Idem de parvulis aperte docuit Augustin. L. 1. de Peccat. meritis. & remiss. C. 19. pro causa id reddens, *peccata enim, inquit, sola separant inter homines & Deum, quæ solvuntur Christi gratia; quæ ratio cum perinde pro adultis faciat, pro iis etiam recte arguitur ex Augustino. Demum: ad consequendam salutem sufficit status gratiæ; atqui ad hunc necessaria non est sumptio Eucharistiæ, cum ea non conferat primam gratiam, sed supponat; ergo eadem etiam ad salutem non est necessaria.*

- 129 Ex his autem ultro consequitur, Eucharistiam ne in voto quidem esse necessariam necessitate mediæ: illud quippe solum ita necessarium dicitur, sine quo salus omnino obtineri nequit; cum igitur istud Eucharistiæ non conveniat, frustra ei attribueris mediæ necessitatem in voto. Nec adversatur in hoc nobis D. Thomas; cum enim 3. p. qu. 73. Art. 3. in  $\odot$  dicere videtur, *saltem in voto necessarium esse Eucharistiæ Sacramentum*, loquitur solum de eo, quod in Sacramento se tenet ex parte rei, nempe de unitate corporis mystici. Colligitur id ex contextu, nam Conclusionem hanc statuit: *Quantum non quoad realem perceptionem; sicut Baptismus, Eucharistiæ Sacramentum ad salutem necessarium sit; est tamen ex parte rei, quæ est unitas corporis mystici necessarium ad salutem.* Dein in  $\odot$  se explicat: *dictum est autem, quod res hujus Sacramenti est unitas corporis mystici, sine qua non potest esse salus; nulli enim patet aditus extra Ecclesiam &c.* Demum ita concludit: *& ideo hoc Sacramentum non hoc modo est de necessitate salutis, sicut Baptismus.*

- 130 Pars altera Assertionis quoad præceptum Divinum constat ex illis Joan. 6. Christi verbis: *nisi manducaveritis carnem Filii hominis, & biberitis ejus Sanguinem, non habebitis vitam in vobis;* quibus quidem verbis aliquam sumendæ Eucharistiæ necessitatem imponi extra dubium est: non autem necessitatem

tatem medii, ut ex N. priore patet: necessitatem igitur præcepti pro adultis, ut qui soli ejus capaces sunt.

De præcepto Ecclesiæ minus controversi potest, cum clari sint de hoc Canones Concilii Lateran. IV. & Tridentini. Ita autem Lateran. Can. 21. statuit: *omnis utriusque sexus fidelis, postquam ad annos discretionis pervenerit, omnia sua peccata confiteatur semel saltem in anno - suscipiens reverenter ad minus in Pascha Eucharistiæ Sacramentum; nisi forte de consilio Sacerdotis, ob aliquam rationabilem causam, ad tempus ab ejus perceptione duxerit abstinendum: alioquin & vivens ab ingressu Ecclesiæ, & moriens Christiana careat sepultura.* Poena hæc satis indicat gravem præcepti obligationem. Idem porro præceptum renovavit Tridentinum Sess. 13. Can. 9. dicto etiam anathemate secus sentientibus; Innocentius XI. autem præterea definivit, præcepto huic non satisfieri per Sacrilegam communionem, ut constat ex prop. 55. ab eo damnata.

### Diluitur Objectio

contra I. part. Assertionis.

**Q**uo se potissimum sustentant Adversarii, sunt Christi verba apud Joannem. Sicut enim, inquit, Christus dixit Joan. 3. *nisi quis renatus &c.* sic & C. 6. *nisi manducaveritis &c.* sicut igitur ex priori loco Baptismum, ita ex altero Eucharistiæ Sacramentum colligimus esse necessarium necessitate medii vel in re, vel in voto; quod ipsum probari ajunt usu veteris Ecclesiæ, ipsi etiam parvulis statim a Baptismo Eucharistiam conferentis.

Resp. hunc loquendi modum ex se indifferentem esse ad significandam necessitatem medii vel præcepti; secus pari jure arguere liceret, lotionem pedum esse de necessitate medii, cum Christus dixerit Joan. 13. *si non laveris te, non habebis partem mecum.* De sensu itaque hujusmodi locutionis statuendum

dum est ex subiecta materia; si enim sermo sit de re aliqua ad obtinendam justificationem necessaria, importatur necessitas medii, ut fit in Baptismo & Pœnitentia; alias autem significatur solum præcepti necessitas, uti in præsentī de Eucharistia per quam non obtinetur ipsa justificatio, sed augmentum ejus duntaxat. Adde: universim Scripturæ sensum nobis innotescere ex interpretatione Ecclesiæ, quæ pro nobis facit.

Frustra etiam opponitur usus veteris Ecclesiæ: hæc quippe parvulis non modo Eucharistiam, sed & Confirmationis Sacramentum simul cum Baptismo conferre in more habuit; quis autem propterea dixerit eam credidisse, Confirmationem esse necessariam necessitate medii? At discrimen est (inquires) inter Confirmationem & Eucharistiam: hæc enim est cibus animæ, non item illa; sine cibo autem materiali corpus vitam habere nequit, non igitur etiam anima sine illo. Verum animadvertendum est, Eucharistiam esse quidem animæ cibum, at non unicū; nam & oratione & virtutum actibus nutritio spiritalis peragitur: cum ex adverso corpus sine materiali cibo nutriri non possit. Inde Trident. postquam Sess. 21. Cap. 4. declaravit, *parvulis nulla obligari necessitate ad Sacramentalem Eucharistia communionem*, ratione hujus reddita, continuo subjicit: *neque ideo tamen damnanda est antiquitas, si cum morem (dandi videlicet communionem parvulis) in quibusdam locis servavit. Ut enim SS. illi PP. sui facti probabilem causam pro illius temporis ratione haberent: ita certe eos nulla salutis necessitate id fecisse, sine controversia credendum est.* Interim

- 132 Instari potest: ex verbis illis Christi, *nisi manducaveritis* &c. Patres inferunt necessitatem medii etiam pro parvulis. Ita Augustin. L. 1. de pecc. remiss. & mer. C. 20. *Dominum, inquit, audiamus dicentem de Sacramento mensæ suæ, - - nisi manducaveritis* &c. *quid ultra quærimus? - - etiam pro parvulorum*

lorum vita Caro data est, quæ data est pro seculi vita, & si non manducaverint Carnem Filii hominis, nec ipsi habebunt vitam. Idem repetit Innocentius I. in Ep. ad PP. Concilii Millevitani; cujus ipsius auctoritate usus Augustinus L. 1. contra Julian. C. 4. ita rursus arguit: *Sancto Innocentio vide quid respondeas, - qui parvulos d. finivit, nisi manducaverint Carnem Filii hominis, vitam prorsus habere non posse. Huic responde, imo ipsi Domino, cujus ille Antistes usus est testimonio.* Adde Gelasium I. in Ep. 7. ad Epp. per Picenum eandem plane sententiam ex laud. Christi verbis pronuntiantem.

Resp. Quamvis PP. laudata Christi verba ut plurimum fumant in sensu literal: eadem nihilominus, cum ad parvulos etiam extendunt, solo sensu mystico exponunt. Ita dum in præsentii Augustinus, Innocentius, & Gelasius ex illis Christi verbis docent, parvulos salvari non posse sine Corporis & Sanguinis Christi sumptione, sumptionem intelligunt mysticam, duntaxat, quæ in eo sita est, quod quis per Baptismi gratiam incorporètur Christo. Quod igitur volunt, id unum est: parvulos salvari non posse, nisi per Baptismum incorporètur Christo, viva ejus membra efficiantur per gratiam, & mystico ejus Corpori, hoc est, Ecclesiæ inserantur, atque sic mystice sumant Corpus & Sanguinem Christi.

Ac ne hæc arbitrarie dicta existimes, observatum velim, laud. PP. pugnassee contra errorem Pelagianorum. Docebant nempe isti nullum dari peccatum originale, ac propterea salvari posse parvulos sine Baptismo; cumque urgerentur Christi verbis, *nisi quis renatus fuerit ex aqua & Spiritu Sancto, non potest introire in regnum Dei*, respondebant: non baptizatos excludi quidem a regno Dei, non tamen a vita aterna, seu salute. Ut proinde PP. huic responsioni occurrerent, opposuerunt alia Christi verba, *nisi manducaveritis carnem Filii hominis &c. non habebitis Vitam in vobis.* Ita autem deinde ex his arguebant: qui Corpus Christi non manducat mystice in sensu

sensu jam exposito, non habet vitam æternam; atqui sine Baptismo Corpus Christi non manducatur mystice eodem sensu; ergo sine Baptismo non habetur vita æterna. Unde patet, ex mente Patrum utrumque hoc Christi effectum pertinere quidem ad parvulos, at non eodem sensu: primum nempe sensu literali, alterum mystico.

Neque omnino controverti potest, hanc fuisse nominationem Augustino in cit. locis sententiam. Etenim 1mo, S. Doctor cum alibi sæpius, tum etiam hoc eod. L. de pecc. remiss. & mer. expressis verbis docet, parvulum *percepto Baptismate de hac vita emigrantem, soluto reatu originalis culpæ, perfici in illo lumine veritatis, quod - - in æternum iustificatos præsentia Creatoris illuminat; idque propterea, quia peccata sola separant inter homines. & Deum, quæ solvantur Christi gratia in Baptismo accepta.* Sententia igitur S. Doctoris ad Salutem parvuli sufficit Baptismus. 2do, idem S. Doctor verba *nisi manducaveritis &c.* sæpe alias etiam sensu mystico exponit. Ita Tract. 26. in Joan. *hunc itaque cibum & potum Societatem vult intelligi Corporis & membrorum suorum, quod est Sancta Ecclesia &c. & infra: hoc est ergo manducare illam escam, - - in Christo manere &c.* Demum 3tio, ipse Fulgentius Ep. Ruspen. idemque fidus Augustini discipulus & interpret, eodem, quo nos, sensu doctrinam S. Patris intelligit, ac exponit Ep. ad Ferrandum de Baptismo Æthiopis moribundi C. 11. ubi ait: *arbitror Sancte Frater disputationem nostram Doct. Augustini sermone firmatam, nec quicquam esse ambigendum, tunc unumquemque fidelium Corporis Dominici participem fieri, quando in Baptismate membrum Christi efficitur: nec alienari ab illo panis calicisve consortio, etiamsi antequam panem illum comedat, & calicem bibat, de hoc Seculo in unitate Corporis Christi constitutus abscedat; Sacramenti quippe illius participatione ac beneficio non privatur, quando ipse hoc, quod illud Sacramentum significat, invenitur.* Confer hæc invicem, ac etiam cum verbis ex Augustino

stino supra objectis, & comperies, nullam illis expositione nostra vim inferri, quin potius ea ad mentem S. Doctoris prorsus accomode explicari. Idem porro sentiendum de Innocentii doctrina, cum eam ipsam sequatur Augustinus. Nec Gelasium diverso ab his sensu accipiendum vel illud suadet, quod & ipse Sec. V. floruerit, quo contra Pelagianos pugnandum erat.

## DISSERTATIO III.

### DE MINISTRO ET SUBJECTO SACRAM. EUCHARISTIÆ.

#### §. I.

*Quis possit ministrare Eucharistiæ Sacramentum?*

**E**X Irenæo L. 1. contra Hæres. C. 9. constat, hæreticum quemdam nomine Marcum pro conficienda Eucharistia mulierum ministerio usum; quod ipsum de Collyridianis refert Epiphanius Hær. 49. Eandem potestatem Waldenses tribuebant cuivis probo laico, ut scribit Reinerius L. contra eosd. C. 5. Lutherus vero in L. de Capt. Bab. eam ad omnes baptizatos, etiam mulieres, extendit: imo L. de Miss. priv. ne Diabolo quidem illam negat. Quæ omnia potiori jure intelligenda sunt de dispensatione Eucharistiæ. Nos erroribus his doctrinam orthodoxam opponimus; acturi primum de consecrationis, tum de dispensationis Ministro.

## De Ministro Consecrationis.

## ASSERTIO.

*Soli Sacerdotes possunt valide conficere Eucharistiam; hi  
proinde soli sunt consecrationis Ministri.*

133 **E**St vero istud certum vel ex perpetuo tam Orientalis quam Occidentalis Ecclesiæ sensu; neutra enim unquam potestatem hanc in alio agnovit: nec passa est Clericos Sacerdote inferiores id muneris sibi arrogare. Ac id quidem plane conformiter ad Scripturam, in qua legimus Christum, consecrata Eucharistia, ad solos Apostolos dixisse, *hoc facite in meam* &c. quibus verbis potestatem consecrandi solis Apostolis, ac eorum in Sacerdotio successoribus factam docet Traditio, cujus testes habemus PP. & CC. Ex Patribus consulendi sunt Justinus Apol. 2. Tertull. L. de Præscript. C. 41. & L. de Cor. Mil. C. 3. Epiphan. Ep. ad Joan. Hierosol. Hieronym. Dial. contra Lucif. Multo etiam apertius id tradunt Concilia, quæ pro fronte Libri hujus laudata reperies, nempe Nicæn. I. Can. 18. Lateran. IV. Can. 1. Florent. in Decr. pro Arm. & Trident. Sess. 22. Can. 2. quod ipsum Sess. ead. Cap. 1. jam ante declaravit.

134 Quæ hic opponi possunt, fere ea sunt, quæ jam L. I. de Sacr. in Gen. Diss. IV. §. I. Num. 112. & 113. retulimus ac dissolvimus. Si tamen quis porro urgeat: in casu saltem necessitatis ac in Sacerdotum defectu olim potuisse a laicis etiam confici Eucharistiam; cum Frumentius, a S. Athanasio ordinatus Indorum Episcopus, Mercatoribus in Indiam comitantibus suaserit, ut *ex more Romanorum ad divina Mystéria celebranda* conveniant, quod refert Theodoret. L. 1. Hist. Cap. 22.

Resp.



Resp. isthic Frumentium per *divina Myſteria*, non Eucharistiæ Sacrificium, sed orationes duntaxat in cœtu plurimum ſuſas intellexiſſe. Certe Rufinus, ex quo Theodoretus hanc hiftoriam mutuatus eſt, conſilium Frumentii his verbis L. 1. Hiſt. reſert: ut *ritu Romano orationis cauſa confluerent*. Socrates etiam L. 1. C. 19. & Sozomenus L. 2. C. 24. qui ante Theodoretum ſcripſerunt, in ſua Hiſt. Eccl. rem eandem narrantes ſolius orationis meminerunt.

At Diaconis ſaltem, inquires, poteſtas confeſcrandi pro-135 pria fuit primis ſeculis. Quidni enim iſtud inferre liceat ex Conc. Ancyrano An. 314, quod Can. 2. de Diaconis lapſis ita ſtatuit: *Diaconi ſimiliter, qui immolaverunt, - - ceſſare ab omni ſacro Miniſterio, ſive a pane, ſive a calice offerendo, vel prædicando debent*. Huc facit & Conc. Arelatenſe I. An. eod. celebratum, cum Can. 15. ſtatuat: *de Diaconis, quos cognovi- mus multis locis offerre, placuit minime fieri debere*.

Resp. tò offero vario ſenſu a Patribus & Conciliis accipi, nunc videlicet pro confeſcratione, alias pro panis & vini porrectione, vel etiam pro Eucharistiæ diſtributione; hinc ex verbo illo certi nihil argui poteſt.

Nominatim Canonis Ancyrani ſenſus eſt: lapſos Diaconos non debere *offerre*, hoc eſt, non debere porrigere panem & vinum in divinis Officiis, atque ſic miniſterio ſuo cooperari ad oblationem confeſcratoriam, quæ fit per Sacerdotem. Iſtud nempe miniſterium peculiare eſt Diaconis, a quo ob admiſſum crimen cit. Can. ſuſpenduntur. Certe S. Hieronymus, qui ſeculo eodem, quo Conc. Ancyranum fuit habitum, floruit, Ep. 85. ad Evagr. poteſtatem confeſcrandi ſolis Sacerdotibus competere ſatis declarat, cum quorundam Diaconorum elationem reprimens, ait: *quis patiatur, ut menſarum & viduarum miniſter (Diaconus) ſupra eos ſe ſe offerat, ad quorum preces Chriſti Corpus & Sanguis confeſcitur?*

De Arelatenſi Canone non una eſt DD. opinio. Morinus cum quibusdam putat, aliquando Diaconos præſumpſiſſe Eucharistiā conficere; hosque omnino laud. Can. peti. Neque iſtud improbabile eſt, cum conſtet plures huiusmodi errores per Miniſtrorum ruditatem, aut etiam malitiam quandoque irrepſiſſe. Plurimum interim ſententiæ Canon hic non agit de ipſa conſecratione, neque enim alias tantum crimen inultum reliquiſſet Synodus: verum de ſola Eucharistiæ diſpenſatione, quæ ipſa ſine indultu Episcopī aut Presbyteri Diaconis non competit, ut habet idem Concil. Can. 18.

### De Miniſtro diſpenſationis.

#### ASSERTIO.

*Ordinarius Eucharistiæ diſpenſandæ Miniſter eſt Sacerdos; extraordinarius vero Diaconus.*

136 **P**rimum Assertionis membrum fundatur in Christi verbis, *hoc facite in meam &c.* quibus uti conficiendæ, ſic & jure ordinario diſpenſandæ Eucharistiæ poteſtatem ſolis Sacerdotibus factam docet ſenſus & uſus Eccleſiæ. Certe Tertullian. L. de corona Mil. C. 3. ad traditionem Apoſtolicam refert, quod Eucharistiā *non de aliorum manu, quam præſidentium* (nempe Sacerdotum) *ſumamus.* Et Trident. Seſſ. 13. Cap. 8. ait: *in Sacramentali ſumptione ſemper in Eccleſia Dei mos fuit, ut laici a Sacerdotibus communionem acciperent, Sacerdotes autem celebrantes ſe ipſos communicarent; qui mos tanquam a traditione Apoſtolica deſcendens jure ac merito retineri debet.*

137 Altera pars etiam in dubium vocari nequit, cum ex Patribus & Conciliis conſtet, Diaconis Eucharistiæ diſpenſandæ munus peculiari quodam jure concedi poſſe, ac etiam olim ſæpe conſeſſum fuiſſe. Ita Cyprianus in Traſt. de lapſ. meminit, *Diaconum præſentibus Calicem offerre*; idem reſertur in Actis

Actis passion. S. Laurentii, in L. Constit. Apost. C. 28. quia Ordo Rom. inter Diaconorum munia nominatim recenset distributionem Eucharistiæ; & Concil. Aquisgranense Sec. IX. celebratum C. 7. ait: *Sicut in Sacerdote consecratio, ita in Ministro dispensatio Sacramenti est; ille oblata sanctificat, hic sanctificata dispensat.*

Hæc interim omnia pro eo solum casu intelligenda sunt, quo aut necessitas exposcebat, aut peculiaris facultas Episcopi vel Presbyteri accessit; inde, si quando jus hoc dispensandi sibi, ceu proprium ac debitum, arrogarunt Diaconi, continuo repressi sunt. Claro in hanc rem testimonio sunt quædam veterum Decreta. Ita Concil. Carthagin. IV. Can. 38. statuit: *Diaconus præsentè Presbytero Eucharistiam Corporis Christi populo, si necessitas cogat, jussus eroget; & Arelat. I. Can. 15. Diaconus Corpus Christi præsentè Presbytero tradere non præsumat:* quod ipsum legitur etiam in Gelasii I. Epist. ad Epp. Lucaniæ. Atque hoc illud est, cur dicamus Dicanos esse solum extraordinarios dispensationis Ministros; quo quidem ipsa etiam Assertionis pars prima firmior redditur. Hodie facultas hujusmodi non facile conceditur Diaconis; & in hoc interim mos cujusque particularis Ecclesiæ est attendendus.

Utro autem jam ex his consequitur: Subdiaconos, & his<sup>138</sup> inferiores Clericos non posse solemniter & in cætu publico Eucharistiam ministrare. Docet nempe id nos constans usus Ecclesiæ, munus hoc nulli unquam alteri committentis, quam Sacerdoti vel Diacono. Consulto dictum est, *solemniter*; privatim enim, in necessitatis casu, & in defectu Sacerdotis ac Diaconi inferioribus etiam & laicis quandoque concessum legimus, ut Eucharistiam aliis porrigerent: aut eam ipsi de manibus suis fumerent. Constant hæc ex Epist. Innocentii I. & ex Actis S. Tharsici Acolyti, ex historia item Serapionis N. 76. relata: ac denique ex praxi veterum fidelium, quos

V 3

perse-

persecutionum tempore Eucharistiam domi suæ asservasse, ac etiam sumpsisse ex Hist. Eccl. novimus. Quamvis autem hæc omnia contrario Ecclesiæ usu abolita sint, potest nihilominus hodie etiam ea necessitas quandoque occurrere, e. g. in peste, in captivitate fidelis cujuscumque apud Tyrannos &c. ut Episcopo (nam de Pontifice dubium non est) sit integrum hujusmodi facultatem Clericis inferioribus, aut etiam laicis concedere. Ita memorant quidam, Sec. XVI. Mariam Scotorum Reginam, in carcere detentam ac morti proximam, peculiari indulto Eucharistiam, quam apud se asservabat, sibi ipsi ministrasse. Fateor interim in id genus indultis hodie cautela opus esse magna, præsertim propter Concilii Trident. Decretum, cujus N. 136. meminimus.

## §. II.

*Cui ministrari possit Eucharistiæ Sacramentum ?  
& quæ in percipientibus illud requiratur dispositio ?*

**N**on agitur isthic de Eucharistiæ perceptione mere reali & materiali, cujus quisque, etiam non baptizatus, est capax: verum de sola Sacramentali & Spirituali, ea videlicet, quam fructus Sacramenti comitatur. Nec sermo est de dispositione supererogatoria, aut omnibus Sacramentis communi; de qua dictum L. I. Dissert. V. de ea solum quaerimus, quæ & Sacramento huic peculiaris est, & ad fructum ejus percipiendum in adultis necessaria. De utroque hoc autem ita compendio statuimus.

## ASSERTIO I.

*Omnis & solus homo baptizatus, idemque viator, est capax  
suscipiendæ Eucharistiæ.*

**139** **D**octrina hæc certa est ex sensu & praxi Ecclesiæ. Ac omnino, cum Baptismus sit janua Sacramentorum, quidni

ni is omnibus, ac etiam solis baptizatis viam aperiat ad hoc ipsum\**Mysterium*? Hos ipsos nihilominus Viatores esse necessum est, cum universim (ut alias dictum) Sacramenta pro solis Viatoribus instituta sint, & Eucharistia nominatim vocetur *Viaticum*, id est, Viatorum cibus. Inde cum olim pia quorundam simplicitate abusus invalesceret dandi Eucharistiam mortuis, aut cum eorum corporibus illam sepeliendi, Concil. Carthaginense III. An. 397. Cap. 6. statuit, *ut corporibus defunctorum Eucharistia non datur; dictum est enim a Domino: accipite & edite; cadavera autem nec accipere possunt, nec edere.* Quæ ipsa prohibitio subinde repetita est a Conc. Antissiodor. Can. 12. & Trullano Can. 83.

Moveri hic potest dubium I. de infantibus. Verum & hosti<sup>140</sup> Eucharistiæ cum fructu percipiendæ esse capaces docet vetus Ecclesiæ disciplina, secundum quam illis statim a Baptismo, ac etiam alias, usque ad Sec. XII. dabatur Eucharistia, & quidem ut plurimum sub specie vini duntaxat. Moris hujus jam Sec. III. meminit Cyprianus Traët. de laps. Pro reliquis deinde Seculis testes sunt Ambrosius L. de Myst. C. 8. Gregorius M. in Sacram. Ordo Rom. Tit. de Bapt. nominatim autem pro Sec. XII. Paschalis II. S. P. apud Baron. ab An. Chr. 1118. quo ipso Seculo praxis hæc in Occidente aboleri cœpit, dum tandem penitus abiret in desuetudinem. Mutatæ porro disciplinæ causa erat periculum effundendi Sacri Sanguinis, ac ut subinde majore cum reverentia susciperetur Eucharistia, nec usus ejus (quod pronum erat) vilesceret. Inde, spectata hodierna Latine Ecclesiæ disciplina, parvulis ante annos discretionis danda non est Eucharistia. Græci etiamnum veterem morem retinent.

Moveri potest dubium II. de amentibus & energume<sup>141</sup> nis. Ita autem de his communior Theologorum sententia habet. Si amentia sit perpetua & a nativitate, neganda est communio: amentes enim hujusmodi pro infantibus

tibus habentur. Si non sit perpetua, occasione lucidi (ut dicimus) intervalli conferri potest. Quin tamen nulla id genus intervalla amplius observentur in amente, si tamen is ante amentiam christiane vixerit, aut saltem poenitentiae signa dederit, conferendam illi Eucharistiam (praesertim in mortis articulo) praescribit Conc. Nicænum I. Can. 18. & Carthagin. IV. Can. 76. modo nullum sit irreverentiae periculum. Semi-amentibus negari non debet communio in Paschate & mortis periculo; alias etiam eis concedi potest, non tamen frequenter, ne Sacramenti dignitas vilescat. Quod spectat Energumenos, fere in mortis tantum articulo primis Seculis ad mensam Eucharisticam admittebantur, ut patet ex Conc. Eliberitano Can. 29. & 37. inde etiam Sacrae Oblationis tempore una cum Cathecumenis exesse jubebantur, Diacono inclamante: *omnes Catechumeni, omnes possessi discedite.* Sequentibus deinde Seculis saepius concessa est energumenis communio, modo sua habuerint lucida intervalla, ac dispositi fuerint ad eam cum fructu & reverentia obeundam, ut colligitur ex Caesariano Collat. 7. & D. Thoma 3. p. qu. 80. Art. 9. ad 2. quod ipsam hodie etiam observatur.

## ASSERTIO II.

*Ad Eucharistiam cum fructu percipiendam ex parte animae necessario requiritur status gratiae: ex parte corporis vero regulariter jejunium naturale.*

242 **P**ARS I. est contra Lutherum & Calvinum, quorum sententia Eucharistiae Sacramentum est institutum ad remissionem peccatorum mediante fide causandam: ut adeo perceptio ejus non praerequirat, sed inducat statum gratiae. Hinc Lutherus in Conc. de praeparat. ad Euch. *optima dispositio*, inquit, *est non nisi ea, qua pessime es dispositus*; & Calvin. I. 4. Inst. C. 16. *iustus non prodesse Eucharistiam* ait. At pro more suo

suo hallucinantur. An non enim in Eucharistia Caro Christi est vere cibus, & Sanguis ejus vere est potus? ut habetur Joan. 6. cibus autem supponit vitam, non dat: eamque solum sustentat & conservat. Quid præterea illud Pauli 1. Cor. 11. probet autem se ipsum homo, & sic de illo pane edat, -- qui enim manducat indigne, judicium sibi manducat &c. de quibus verbis Trident. Sess. 13. Cap. 7. ita habet: *Ecclesiastica consuetudo declarat eam probationem esse necessariam, ut nullus sibi conficius mortalis peccati, quantumvis sibi contritus videatur, absque præmissa Sacramentali Confessione ad Sacram Eucharistiam accedere debeat, quod a Christianis omnibus - - hæc S. Synodus perpetuo observandum esse decrevit.*

Neque nova hæc doctrina est, verum jam longe ante a Patribus tradita. Adeant Novatores Cyprianum L. 3. Ep. 14. qua in abusum quorundam, etiam peccatores nondum expiatis ad Eucharisticam mensam admittentium, ita invehitur: *nondum poenitentia acta, nondum exomologesi - - Eucharistia illis datur, cum scriptum sit: qui ederit panem, aut biberit calicem Domini indigne, reus erit Corporis & Sanguinis Domini.* Audiant & Ambrosium L. 6. in Lucam C. 9. *nemo cibum accipit Christi, nisi fuerit ante sanatus. - - ubique mysterii ordo servatur, ut prius per remissionem peccatorum vulneribus medicina tribuatur, post alimonia Mensa cælestis exuberet.* Patres alii, ac momenta reliqua huc facientia videri possunt apud Bellarm. L. 4. de Euch. C. 17. 18. & 19.

Patrocinari sibi quidem Novatores putant illud Matth. 26. 143 *hic est Sanguis meus, qui pro multis effunderetur in remissionem peccatorum*; item orationem Ecclesiæ in Missa, *hæc nos communio purget a crimine, sit ablutio scelerum &c.* ac denique PP. quosdam dicentes, *Eucharistia nos mundari & lavari &c.* Verum frustra sunt. Etenim per *effunderetur* significatur effusio, quæ in remissionem futura erat in cruce: non quæ fiat

in Eucharistia. Oratio autem cit. pertinet ad Eucharistiam, ut est Sacrificium, cui vim inesse impetrandi remissionem peccatorum etiam mortalium, infra Diff. IV. dicemus. Demum verba ~~mundari~~ <sup>lavari</sup> &c. intelligi possunt de liberatione a culpis, pravis affectibus, peccatorum poenis, aut etiam de præservatione a mortalibus. Non nego interim (ut jam L. I. Diff. III. §. I. N. 84. insinuavimus) in aliquibus circumstantiis, per accidens fieri posse, ut sumptione Eucharistiæ causetur prima gratia, ac proinde & remissio gravis peccati; at de hoc isthic non instituitur quæstio.

- 144 Pars II. etiam est contra Novatores, hanc jejunii necessitatem fugillantes. At eadem certa est ex præcepto Ecclesiæ in Traditione Apostolica fundato. Evincitur vero id totum vel ex Augustino, qui in Ep. ad Januar. 118. nunc 54. hæc scribit. *Ideo non præcepit (Christus) quo deinceps ordine sumeretur (Eucharistia) ut Apostolis, per quos Ecclesias dispositurus erat, servaret hunc locum. Nam si hoc ille monuisset, ut post cibos alios semper acciperetur, credo quod eum morem nemo variaisset. Et rursus ibid. liquido apparet, quando primum acceperunt Apostoli Corpus & Sanguinem Domini, non eos accepisse jejunos. Numquid tamen propterea calumniandum est universæ Ecclesiæ, quod a jejunis semper accipitur? ex hoc enim placuit Spiritui Sancto, ut in honorem tanti Sacramenti in os Christiani prius Domini Corpus intret, quam cæteri cibi. Nam ideo per universum orbem mos iste servatur. In eadem deinde Ep. originem hujus præcepti ab Apostolis repetit, & quidem nominatim ex Cap. II. Ep. I. ad Corinth. ubi Paulus inordinatas Corinthiorum epulas improbens, dicit: cætera, cum venero, disponam. Hinc nempe S. Doctor infert, ad occurrendum malo inter Corinthios grassanti, statuisse Paulum, ne deinceps post cænam distribueretur Eucharistia. Unde intelligi debet, inquit, - - ab ipso ordinatum esse, quod nulla morum diversitate variatur. - - Quin autem ita faciendum sit, disputare, insolentissimè*



*fmæ infantiæ est.* Legem porro hanc ab Apostolo latam constans Ecclesiæ usus roboravit, & confirmarunt Concilia, Carthagin. III. Can. 5. Toletanum VII. Can. 2. Constantiense Sess. 13. contra Joan. Hus.

Fuit equidem (non diffiteor) quibusdam Affricanis mos feria V. Maj. hebd. ad vesperam post cœnam in memoriam cœnæ Dominicæ Eucharistiam sumendi, moremque hunc Augustinus improbare non est ausus, imo eum Conc. Carthagin. III. Can. 29. approbavit; at hoc peculiare fuit, neque nisi semel in anno indultum, quin etiam deinde gravibus de causis ab Ecclesia abrogatum: unde hoc Affricanorum factum Novatoribus patrocinari non potest.

Dictum autem est I. in hac Assertionis parte, jejunium<sup>145</sup> requiri *ordinarie*; nam infirmis, etiam non jejunis, urgente mortis periculo ministrari potest Eucharistia per modum viatici: ac etiam complures necessitatis casus evenire possunt, in quibus hæc jejunii lex non obligat, ut e. g. cum Sacerdoti post consecrationem deficienti non potest substitui alius quam non jejunus &c. de quibus Theologos Morales consule. Utrumque autem hoc docemur & praxi Ecclesiæ, & Decreto Concilii Constantiens. Sess. 13. cujus verba pro fronte L. hujus recitata sunt.

Dictum est II. requiri jejunium <sup>*ad q. 16.*</sup> ~~regularem~~; ejusmodi videlicet, ut ante susceptionem Eucharistiæ nihil sumatur per modum cibi, potus, aut medicinæ. Unde si quid gustes, nec tamen in stomachum demittas: aut si demittas etiam, id tamen rationem cibi aut potus non habeat, ut est saliva, sanguis ex capite defluus &c. hæc, & his similia non sunt obex Sacræ Communionis. At hæc rursus copiosius repetenda sunt a Theologis Moraliibus, quibus jejunii hujus ratio multiplicis controversiæ præbet argumentum.

## §. III.

*An laicis, ac universim omnibus non Sacrificantibus  
debeat ministrari Eucharistia sub utraque specie?*

**Q**uæstio hæc unum est præcipuis nos inter & Novatores controversiæ capitibus. Cum autem constet, hodierno usu laicis & universim omnibus non Sacrificantibus sub specie tantum panis, non autem etiam sub specie vini Eucharistiam conferri, ad resolvendam quæstionem propositam satis fuerit definire: num istud non adversetur præcepto Christi, sitque etiam jure statutum ab Ecclesia? pro quo ipso prius consulenda nobis erit Ecclesiæ disciplina, & Novatorum error notandus.

De Sacramentali communione  
Ecclesiæ Disciplina & doctrina, item Novatorum  
error.

146 I. **A**n te omnia discrimen faciendum est inter publicam & privatam laicorum (idem est de omnibus non Sacrificantibus) communionem. Ac publicam quidem, eam videlicet, quæ intra Missæ Solemnia fiebat, a primis Ecclesiæ temporibus usque ad ~~Sec. XI.~~ <sup>Sec. XII.</sup> semper fuisse tam Clericis quam laicis adultis datam sub utraque specie, ex Hist. Eccl. probabilius est; sunt enim aliqui, qui cum Tournelyo contendunt, etiam hanc quandoque sub una tantum specie collatam. Quod si autem infantibus aut adultis extra Sacrificium & Ecclesiam privatim ministranda fuit Eucharistia, ut plurimum sub una tantum specie peragebatur Sacra communio.

Ita nominatim ægrotos mortis articulo proximos, peregrinos item in longis itineribus imminente periculo, Anachoretas in vastis ac remotis solitudinibus degentes, ac demum fide-

fideles persecutionum tempore se ipsos ex asservata domi Eucharistia communicantes, sub panis duntaxat specie (quandoque saltem) Sacramenti hujus factos fuisse participes passim docent Annales Ecclesiastici, & ex proposito compluribus exemplis comprobant Bellarmin. L. 4. Euch. C. 24. Bona Rer. Liturg. L. 2. C. 18. Idque ipsum suadet ratio; cum Eucharistia sub specie vini nec potuerit deferri procul citra effusionis periculum; nec citra corruptionem diu asservari. His adde Græcos in Præsanctificatorum Missa sub sola panis specie communicantes; quem quidem ritum vetustum esse vel inde conjicias, quod Missæ hujus præceptum renovet Synodus Trullana An. 707. habita Can. 52. Huc denique facit mos ille, secundum quem feria VI. maj. hebd. Sacerdos sub panis duntaxat specie Eucharistiam sumit; quem ritum rursus antiquum esse constat ex Innocentii I. sub initium Sec. V. Pontificis Ep. 1. C. 4. & antiquis LL. Ritualibus, quos vide apud Martene L. de ant. Eccl. Discipl. C. 23.

Sub sola etiam vini specie ministratam olim Eucharistiam, & quidem nominatim infantibus statim a Baptismo, ac etiam deinde primis eorum annis, dubitari nequit: Testis hujus est Cyprianus Ep. 63. ad Cæcilium, *post Baptismum - - inquit, a baptizatis - - ad bibendum Calicem Domini pervenitur.* Et L. de laps. ubi narrat historiam cujusdam infantulæ, quæ cum Parentum incuria panem vino mixtum de idolothytis antea comedisset, ipso Cypriano Sacrificante aderat cum matre in Ecclesia, ubi vero Solennibus adimpletis Calicem Diaconus offerre præsentibus cæpit, & accipientibus cæteris locus ejus advenit, faciem suam parvula instinctu Divinæ Majestatis avertere, & labiis obturantibus premere, Calicem recusare. Perstitit tamen Diaconus, & reluctanti licet de Sacramento Calicis infudit. Tunc sequitur singultus & vomitus; in corpore atque ore violato Eucharistia permanere non potuit &c. Fuisse vero istud in usu etiam apud Latinos adhuc Sec. XII. constat ex Scriptoribus

X 3

hujus

hujus ævi, Hugone a S. Viſt. L. 1. de Sacr. C. 20. & Rodulpho Piſtaviē. Serm. in die Paſchæ; ubi uterque moris ejus meminit, eumque ſervandum docet.

- 147 II. Hoc ipſo interim Sec. XII. in multis per Occidentem locis tam parvulorum communio, quam pro adultis uſus Calicis prohiberi cœpit ab Episcopis: idque ad evitandum irreverentiæ & effuſionis periculum, quod, aucta jam nimium fidelium multitudine, abeſſe non poſſe experientia docuit: utque hac ipſa praxi contraria docerentur fideles, ſub quavis ſpecie totum Chriſtum contineri. Ob has certe cauſas etiam Rodulphus Abbas S. Trudonis, qui ſub initium hujus ſeculi floruit, uſum Calicis a laicis removendum eſſe ſuadebat his verſibus:

*Hic & ibi cautela fiat, ne Presbyter agris  
Aut ſanis tribuat laicis de Sanguine Chriſti;  
Tamen noſſet leviter: ſimplexque putaret,  
Quod non ſub ſpecie ſit totus Jeſus utraque.*

Ita ſubinde factum, ut ſublato ſenſim uſu Calicis, in Eccleſia Latina (de Græca dicemus N. 150.) mos invaleſceret ſub ſola panis ſpecie communicandi laicos, ac etiam Clericos Presbyteris inferiores: quod ipſum deinde traductum eſt ad Presbyteros extra Sacrificium communicantes. Et jam ritum hunc pacate proſequebatur Eccleſia uſque ad Sec. XV. cum ecce! ſub initium hujus exorti Huſſitæ pro Calice laicis reſtituendo pugnare incipiunt, palam docentes, neminem ſine uſu illius ſalvari poſſe, ut legere eſt apud Æneam Sylvium in Hiſt. Bohem. C. 35. Cui malo ut occurreret Eccleſia, in Concilio Conſtantienſi 15. Junii An. 1415. Seſſ. 13. laicorum ſub ſola panis ſpecie communionem peculiari Decreto approbavit, ac in perpetuum obſervari juſſit.

III. Compressum in Hussitis errorem Lutherus & Calv<sup>148</sup>  
 nus Sec. XVI. resuscitarunt. Quamvis autem Lutherus, uti  
 in aliis, sic & in præsentimurum variaverit, ut adeo triginta  
 sex contradictiones ejus de hoc uno articulo notatæ sint, cum  
 videlicet nunc diceret, necessariam esse laicis communionem  
 sub utraque specie: alias id arbitrarium & liberum cuique  
 vellet &c. attamen L. de Visitat. Saxonica aperte damnavit  
 communionem sub una specie, tanquam institutioni Christi  
 contrariam. Quid re ipsa interim hac sua doctrina spectave-  
 rit, facile est intelligere ex ejus Formula Missæ, ubi hæc  
 scribit: *si quod Concilium statueret, aut permetteret utramque spe-*  
*ciem, nos nequaquam utraque uti vellemus: sed in despectum Con-*  
*cilii aut una, aut neutra, & minime utraque uti vellemus: male-*  
*dicturi universos, qui ex potestate aut statuto Concilii utraque ute-*  
*rentur.* Vide de his Bellarm. L. IV. de Euch. C. 21. Calvi-  
 nus in errore tuendo fuit pertinacior: uti enim L. 4. Instit.  
 C. 17. ita & alias constanter docuit, negari non posse laicis  
 Calicem, dandum esse ex præcepto Christi &c. adjecta etiam  
 calumnia, contrariam Ecclesiæ doctrinam ex officina diaboli  
 prodiisse. Utrique huic Hæresiarchæ opposuit se Concil. Tri-  
 dentinum An. 1562. Sess. 21. damnatisque eorum erroribus,  
 laicorum & universim omnium non Sacrificantium sub una  
 specie communionem approbavit, quidque de hoc catholice  
 sentiendum sit, copiose exposuit ejusd. Sess. Cap. 1. 2. 3. & Can.  
 1. 2. 3. quæ isthic recolenda sunt.

IV. Verum non destiterunt errare cum Magistris suis<sup>149</sup>  
 Lutherani & Calviniani, hodie etiam pro utraque specie pu-  
 gnantes; quamvis sciam, eorum nonnullos sub sola panis spe-  
 cie ægrotis communionem præbere. Catholicorum ex ad-  
 verso, ad mentem Concilii Tridentini una est omnium doctri-  
 na: utramque speciem non esse necessariam ad substantiam  
 Sacramenti; sub quavis earum totum Christum contineri;  
 æqualem gratiæ fructum ad salutem necessarium ex una vel  
 utra-

utraque percipi ; ac demum jure etiam & licite usum Calicis negari laicis, imo universim omnibus non Sacrificantibus. In ipso nihilominus Concilio Tridentino fuere etiam e Theologis nonnulli, qui ad preces Ferdinandi I. Imper. item Caroli IX. Gall. Reg. & Alberti III. Ducis Bavar. usum Calicis restituendum postularent, ad sedandas videlicet Novatorum turbas, & præcidendam illis omnem nos calumniandi occasionem. Quamvis autem generali huic petitioni Concilium subscribere noluerit, sub finem Sessionis 22. attamen reliquit Pontificis arbitrio, ut, si e re Christiana fore censuerit, alicui regno vel nationi usum Calicis concedat: uti re ipsa deinde pro Germania An. 1563. concessit. Ac jam omnino quibusdam Germaniæ locis sub utraque specie cœpit ministrari Eucharistia ; verum cum speratus inde fructus non sequeretur, imo abusus etiam nonnulli irrepererent, evoluta vix anno Pius V. concessionem revocavit, ac sub interminatione anathematis præcepit, ut Decretum de communione sub una specie ab omnibus inviolabiliter servaretur. Pluribus hæc Pallavicinus sparsim in Hist. Conc. Trid. a L. 17. usque ad L. ultimum, scilicet 24.

Inde jam hodie in Ecclesia Latina ne Viaticum quidem ministrare licet sub specie vini, tametsi æger illud sub specie panis sumere non posset ; quamvis non negem evenire posse casum, quo licita sit Eucharistiæ sub vini etiam specie sumptio, ut e. g. si post peractam consecrationem Sacerdos irruentibus hæreticis profugiat ; tum enim etiam laicus ad impediendam profanationem absumere potest, quin & debet utramque consecratam speciem. Idem est de illis, quibus peculiari indulto Sedis Pontificiæ concessa est quandoque utriusque speciei sumptio, ut nominatim Galliæ Regibus eo die, quo inaugurantur.

150 V. Atque hæc apud Latinos ; Græcæ enim Ecclesiæ permissum est veterem sub utraque specie communionis ritum

tum retinere, & quidem iis etiam Græcis, qui in Italia degunt, ea tamen cum cautela, ut ubi *præfatus ritus consuetudine hætenus receptus non est*, Episcopis, quorum jurisdictioni Græci subijciuntur, curæ sit, ne *imposterum admittatur*, ut ait BENEDICTUS XIV. jam alias laud. Const. *Etsi Pastoralis*. Neque interim Græci ob unicam speciem Latinos reprehendunt: minus existimant utramque ex præcepto Christi esse necessariam; quin ipsi etiam sub una tantum specie Eucharistiam præbent quandoque. Ita nominatim infantibus solum cochlear Sanguine intinctum lambendum porrigunt. Adultis etiam ægrotis sub sola panis specie Viaticum ministrant, si rem, ut est, spectare velimus. Etenim ex more suo Feria V. maj. hebdomadæ panem solito majorem in usum infirmorum consecrant, ex quo (parte quarta a Sacerdote absumpta) reliquæ tres comminuuntur in exiguas particulas, quas *Meridas* vel *Margaritas* vocant; quamvis autem hæc primum imbuantur Sanguine, dein tamen subjecto igne penitus siccantur ita, ut induratae toto anno a corruptione immunes servari possint. Ab his jam particulis ita siccatis species vini abesse necesse est, remanet proinde Corpus Christi sub sola panis specie; cum igitur deinde hæc particulae vino duntaxat communi emollitæ porrigantur in Viaticum, dubitari nequit, sub sola panis specie illud ministrari.

Hæc eadem porro cum Græcis sentiunt, & in usu habent Maronitæ, Abyssini, Syri, & reliquæ passim nationes Orientales, ut colligitur vel ex L. Constit. Eccl. Orient. in quo postquam C. 3. statuitur, *non licere Sacerdoti præbere Corpus sine Sanguine*, continuo additur: *exceptis ægrotis, & qui longe distant ab Ecclesia*, - - deferre autem ad hos Calicem periculosum est, ideoque Corpus sine Sanguine detur illis. Consule de his Card. Bonæ Rer. Liturg. L. 2, Cap. 18. Num. 2. & 3. Eadem copio-

sus refert Auct. Perp. Fid. Tom. 5. L. 2. C. 8. & 9. cumprimis autem L. 8. C. 1. 2. 3. & 4. Nobis jam de proposita controversia contra Novatores statuendum est.

## ASSERTIO.

*Communio sub utraque specie non est ex præcepto Christi necessaria laicis & universim omnibus non Sacrificantibus; jureque illis Ecclesiæsum Calicis prohibuit.*

151 **P**ARS I. tum inde certa est, quod nullo penitus fundamento præceptum hoc adstruatur a Novatoribus, ut patebit ex Resp. ad Objecta; tum quod Christus Joan. 6. his verbis, *si quis manducaverit ex hoc pane, vivet in æternum*, item, *qui manducat hunc panem, vivet in æternum*, solius Eucharistiæ sub specie panis mentionem faciat, ejusque sumptioni salutem promittat: id quod utique non fecisset, si eam sub utraque specie universim sumi præciperet; post latum quippe. hujusmodi præceptum sub una duntaxat specie fumentes, ceu transgressores, damnationis forent rei: non autem digni vita æterna. Confirmari potest id ipsum exemplo Christi, qui Luc. 24. legitur sub specie tantum panis dedisse Eucharistiam Discipulis duobus in Emaus Castello, *dum recumberet cum eis* (inquit Lucas) *accepit panem, & benedixit, ac fregit, & porrigebat illis.* Fuisse autem hunc panem Eucharisticum cum Augustino & Chrysostomo Patres complures inde colligunt, quod ex hoc facto eum cognoverint; nam ibid. V. 35. habetur, Discipulos deinde hos sibi invicem narrasse, quæ gesta erant in via, & *quomodo cognoverunt cum in fractione panis.*

Cumprimis attamen hæc Assertionis pars evincitur ex sensu & disciplina Ecclesiæ. Etenim ipsi etiam Apostolorum temporibus sub sola panis specie non nunquam communicasse Fideles videtur certum ex Luca, qui in Act. Ap. C. 2. asserit eos



eos fuisse *perseverantes* - - in *fractione panis* & *orationibus*, - - *frangentes circa domum panes* &c. ubi indubium est agi de Sacramentali communione, & tamen unius solum speciei fit mentio. Ut ut interim sit istud, ad rem nostram satis momenti est ex relata a N. 146. disciplina Ecclesiæ: cum enim hæc (ut ibid. comprobamus) ipsis etiam primis Seculis sub una tantum specie quandoque Eucharistiam præbuerit non Sacrifificantibus, censuit utique non esse universim a Christo præceptam sub utraque specie communionem; eadem vero cum sit infallibilis verbi divini interpret, ex hoc ejus sensu certum fit, nullum ejusmodi extare Christi præceptum. Idem argumentum potiori jure ducitur ab Ecclesiæ Decretis isthuc pertinentibus. Recole hic ea, quæ Assertioni præmisimus de Ecclesiæ Disciplina.

Pars II. ex probatione partis primæ ultro consequitur.<sup>152</sup> Quod si enim Christus non præceperit communionem sub utraque specie, cur Ecclesiæ non sit integrum eam aut permittere, aut abolere? cum constet, in ea, quæ ad Religionem & nominatim ad ritum dispensandi Sacramenta pertinent, neque a Christo præcepta sunt, datam esse universim Ecclesiæ potestatem Math. 18. V. 18. Hac certe potestate usa, facientibus ipsis Novatoribus, jure mutavit quædam circa Subjectum & tempus percipiendæ Eucharistiæ: cur non igitur eodem jure certum dispensandæ illius modum præscribere, & receptum alias Calicis usum sufferre potuerit? Quæ omnia eo urgent amplius, quod ad id Ecclesia sit inducta justis & gravibus de causis, quas commemorat Concilium Constantiense & Tridentinum locis supra laud.

Sunt autem earum præcipuæ. 1<sup>mo</sup>, ut evitetur effundendi Sacri Sanguinis periculum, quod abesse non potest præfertim in concursu multorum, eorumque rudium, parvulorum &c. 2<sup>do</sup> ob periculum corruptionis specierum Eucharistiæ, si

ea sub vini speciebus pro infirmorum communione asservanda foret. 3<sup>io</sup> propter rituum uniformitatem, quæ permissio Calicis usu observari non posset: cum multi vel odorem vini sustinere nequeant, alii abhorreant bibere ex eodem vase cum aliis, in nonnullis regionibus præterea sit summa vini penuria &c. 4<sup>to</sup> ad abolendum errorem eorum, qui docebant sub una specie non contineri totum Christum, aut utriusque speciei sumptionem esse necessariam ad salutem.

### Refelluntur argumenta Novatorum.

153 **A**rguunt vero usum Calicis pro omnibus esse ex præcepto Christi propterea I. quod Joan. 6. utriusque speciei sumptionem conjungens, dixerit: *nisi manducaveritis carnem Filii hominis, & biberitis ejus Sanguinem, non habebitis vitam in vobis*; utriusque igitur speciei sumptio ad salutem est necessaria.

II. quod Christus voluerit Eucharistiam sumi in suæ Passionis memoriam, quæ fieri nequit per unius solum speciei sumptionem juxta illud I. Cor. II. *quotiescunque manducabitis panem hunc, & Calicem bibetis, mortem Domini annuntiabitis*.

III. quod in ead. Ep. Paulus institutionem Eucharistiæ referens, testetur V. 24. & 25. Christum non modo post datum suum Corpus, sed & post porrectum Calicem seorsim ac speciatim dixisse, *hoc facite in meam commemorationem*; ergo utriusque sumptionem fieri voluit.

IV. quod Matth. 26. Christus, cum Calicem daret, dixerit: *bibite ex hoc omnes*; quæ verba utique universim pro omnibus continent præceptum bibendi Calicis.

Resp. ad I. cum Bellarmino: receptum esse Hebræis loquendi modum, ut quandoque simplicem tantum conjunctionem

nem ponant, quamvis negationem jam ante præmissam subintelligant. Ita Psal. i. V. 6. in textu hebraico sic habet: *non surgent impii in iudicio, & peccatores in concilio justorum*; qui V. propter subintellectam negationem in Vulgata nostra ita redditur: *non resurgent impii in iudicio, neque peccatores &c.* Cum ergo interpretes nonnunquam imitentur phrasim hebraicam, & Christus laud. in Object. verba hebraice vel syriace protulerit, evenire potuit, ut Joannes ea in suo Evang. servata phrasi ad verbum græce reddiderit, eumque deinde etiam Latinus interpretes secutus fuerit; ut adeo ex more loquendi Hebræorum verba illa hunc faciant sensum: *si neque manducaveritis, neque biberitis &c.* vel: *si non manducaveritis, aut non biberitis &c.* Quod si autem hic sit eorum sensus, clarum est, non recte deduci ex illis, voluisse Christum utriusque speciei sumptionem esse omnibus necessariam ad salutem. Ac omnino hoc sensu accipienda esse docet tam veteris quam modernæ Ecclesiæ sensus & praxis: tum etiam, quod ibid. apud Joan. non multo post V. 58. & 59. Christus absolute dicat: *qui manducat me, vivet propter me, - - qui manducat hunc panem, vivet in æternum*; quod utique verum non esset, si priora verba, *nisi manducaveritis &c.* non disjunctive, sed conjunctive forent intelligenda. Plura de hac Object. vide apud Bellarm. L. 4. de Euch. C. 25.

Resp. ad II. falso asseri, quod ex cit. Apostoli verbis deducatur, Passionis Christi memoriam fieri non posse nisi per utriusque speciei sumptionem. Consule ipsum verborum contextum. Et sane, cum in morte Christi Corpus a Sanguine separatum fuerit, cur per unius speciei sumptionem sufficienter non repræsentetur, & in memoriam revocetur mors Christi? Fit equidem istud multo expressius in ritu communionis per utramque speciem; at istud non officit: secus enim Baptismus per affusionem erit irritus aut saltem illicitus, cum

immersio distinctius exprimat mortem & sepulturam Christi.

Resp. ad III. hunc ex Apostolo locum pro nobis facere: illic enim refert, Christum post Corpus suum datum absolute dixisse, *hoc facite in meam commemorationem*; post Calicem autem solum conditionate & limitate, *hoc facite, quotiescumque bibetis, in meam commemorationem*, quod idem est, ac: *si, vel quando bibetis, facite hoc in meam &c.* non præcepit itaque ipsum Calicis usum omnibus: verum sui duntaxat memoriam pro eo etiam casu, cum quis de Calice biberit.

Resp. ad IV. verba illa, *bibite ex hoc omnes*, directa fuisse tantum ad præsentem Apostolos, de his enim solis Marcus testatur C. 14. *& biberunt ex illo omnes*. Qui autem hi *omnes*? illi utique, qui aderant; quibus apud eundem Matth. Christus dixit V. 31. *omnes vos scandalum patiemini in me in nocte ista*; at hi non erant fideles omnes, sed Apostoli soli, ergo &c. Quod si tamen ad alios etiam verba illa pertinuerint, non alios certe quam Apostolorum in Sacerdotio Successores, ut ex sensu Ecclesiæ colligitur: secus enim non admisisset unquam, ut Eucharistia sub una specie dispenseretur, quod tamen primis etiam Seculis factum jam supra notavimus.

154

Instant I. Christus ab omnibus fidelibus voluit sumi totum Eucharistiæ Sacramentum; at totum non sumitur nisi sub utraque specie; sub utraque igitur illud ab omnibus sumi voluit. Min. prob. Eucharistia instituta est per modum convivii spiritualis: sicut ergo plenum convivium non est sine cibo & potu, sic nec plenum ac integrum Eucharistiæ Sacramentum sumitur, nisi sub utraque specie, hoc est, cibi instar simul & potus sumatur. Pro quo confirmando recitant ex Epistola Gelasii I. verba a Gratiano Can. *Comperimus*. de Consecrat. Dist. 2. relata: *Comperimus* (inquit Pontifex) *quod quidam, sumpta tantummodo Corporis sacri portione, a calice sacri*  
cruc-

*cruoris abstineant ; qui procul dubio (quoniam nescio qua superstitione docentur obstringi,) aut integra Sacramenta percipiant, aut ab integris arceantur : quia divisio unius ejusdemque mysterii sine grandi Sacrilegio non potest provenire.*

Resp. D. Maj. voluit ab omnibus sumi Sacramentum totum quoad substantiam C. totum etiam quoad modum, seu quoad utramque speciem, iter. Dist. ita voluit sumi ab omnibus Sacrificantibus C. etiam non Sacrificantibus N. Eadem distinctione explicandæ sunt & reliquæ propositiones. Nempe cum Sacramenti hujus substantia sit Corpus & Sanguis Christi, hæc vero sub quavis specie contineantur: sub una etiam tantum specie sumenti nihil deerit, quod ad Sacramenti Eucharistiæ substantiam pertineat.

Quod de Convivio additur, ajo : non esse eandem rationem convivii Eucharistici & corporalis. Etenim in corporali diversa est cibi & potus substantia, solumque cibus ad famem, potus autem ad sitim relevandam ordinantur ; inconvivio contra spirituali Eucharistiæ tota spiritualis fames & sitis sedantur per Christi Corpus & Sanguinem: cum igitur hæc habeantur perinde sub una ac sub utraque specie, perinde etiam sub una ac utraque expletur fames & sitis spiritualis, atque ita sub una etiam sola specie plenum ac integrum est convivium Spirituale.

Quod demum ad Gelasii epistolam attinet, ex laud. ejus fragmento de sensu Pontificis certi nihil statui potest : consulendus in hanc rem esset contextus Epistolæ, quæ tamen tota vix extat, ut opinatur Bellarminus. Verisimiliter interim dici potest imo, Gelasium hic loqui de solis Sacerdotibus Sacrificantibus, qui jure divino obstringuntur ad sumendam utramque speciem, seu, quod idem est, *ad percipienda Sacramenta integra* etiam quoad modum. Istud opinandi rationem suggerit ipse Titulus, quem Capitulo huic Gratianus præfixit  
his

his verbis: *Corpus Christi sine ejus Sanguine Sacerdos non debet accipere.* Dicitur potest 2do, hanc Pontificis reprehensionem spectare ad Manichæos & Priscillianistas, qui, quod putarent vinum esse creaturam diaboli, nec Christum habuisse verum Sanguinem, a specie vini in communione Eucharistica abstinebant. Colligitur vero istud tum inde, quod jam annis aliquot ante Leo I. Serm. 4. de quadages. ad detegendos Manichæos jussit observari eos, qui nunquam communicabant sub utraque specie; tum etiam, quod (Anastasio teste) ætate Gelasii in ipsa etiam Urbe nimium grassati sint Manichæi, ac ipse Gelasius in priore parte hujus Ep. fragmenti (quod refert id. Gratianus Can. 25. qu. 2. Cap. fin.) commemoret graves persecutiones in Pastores excitatas, quarum auctores fuerint Manichæi. Accedit, in fragmento nobis objecto Pontificem dicere: *quoniam nescio qua superstitione docentur obstringi &c.* id quod apuissime convenit Manichæis, ut qui superstitioso errore suo unum idemque Mysterium grandi cum Sacrilegio dividebant, cum videlicet prava opinione sua & Christi Corpus a Sanguine separarent, & in Eucharistia Corpus esse sine Sanguine assererent.

155 Instant II. Nequit saltem sine injuria negari communio sub utraque specie; cum enim sic sumpta Eucharistia plus gratiæ conferat, ut vel ipsi DD. Catholici fatentur, quis non videat fideles Sacramenti fructu fraudari? Ita Kemnitius.

Resp. I. Quamvis admittatur plus conferri gratiæ per utriusque speciei, quam unius sumptionem, nulla tamen fidelibus irrogatur injuria per sublatum Calicis usum. Etenim 1mo, etiam in hac sententia non plus confertur gratiæ ad salutem necessariæ, ut ex jam dictis patet; 2do tametsi omnes fideles capaces sint Calicis percipiendi, is tamen illis ex præcepto Christi non debetur; 3tio magis congruum est fideles carere fructu non necessario, quam Sacramentum exponi periculo

riculo irreverentiæ. Sicut igitur ex his ipsis causis (quod fatentur Novatores) Ecclesia jure prohibet dari Eucharistiam infantibus, nec laicos permittit quotidie Mysterii hujus participes fieri, minus vero pluries eodem die: ita censendum est, jure agere Ecclesiam, nec injuriæ quidquam fidelibus irrogare, cum vetat usum Calicis. Nihilominus

Resp. II. Etsi probabilis sit opinio quorundam cum Card. Lugo hic Disp. 12. Sect. 3. docentium, majorem conferri gratiam sub utraque specie, quam sub una: mihi tamen cum Bellarmino L. 4. de Euch. C. 23. oppositum videtur verisimilius, estque hæc communior Theologorum sententia.

Est vero in hanc rem ratio 1<sup>mo</sup>, quod perinde sub una ac sub utraque specie sit totum Sacramentum, totus Christus cum Corpore & Sanguine, ac plenum etiam spirituale convivium & refectio integra; quid igitur est, quo minus tantum sub una, quantum sub utraque specie efficiat? 2<sup>do</sup>, quia fames & sitis spiritualis in re sunt idem, tametsi per diversos respectus explicentur; proinde sicut per Eucharistiam sub specie panis sumptam sedatur fames, sic & sitis. 3<sup>io</sup>, quia opinioni huic favet Concil. Moguntinum An. 1549. celebratum, dum C. 32. ait; *illum sub una specie communicandi morem ad salutem fidelium aque utilem ac efficacem esse, quam alterum sub utraque specie*. Idem arguunt quidam ex Concilio Tridentino; cum enim ex mente illius sub una etiam specie Sacramentum verum (nulla limitatione adjecta) sumatur, respondere illi necesse est pariter illimitate omnes effectus vero Eucharistiæ Sacramento proprios. Quamvis autem Concilium de hac controversia nihil aperte statuerit; teste attamen Pallavicino Hist. L. 17. C. 7. & 12. plerique Patres ejusdem nobiscum fuerunt sententiæ; imo Card. Hosius Legat. Pontific. & Georg. Draskovicus Orator Ferdinandi I. pro Reg. Hung. postularunt eam definiri.

R. P. Muszka. Tom. II. de Sacr.

Z

At

At alius est, inquires, effectus cibi, alius effectus potus? ita equidem, si cibus & potus non sint una eademque res, uti non est in cibo & potu corporali; verum in Eucharistiæ Sacramento una eademque res, Christus videlicet, est nobis simul cibus & potus spiritualis. Inde cum PP. Eucharistiæ sub specie panis sumptæ effectum dicunt esse famis expletionem: effectum autem Calicis expletionem sitis aut exhilarationem spiritus, id genus loquendi modis non diversam, sed eandem plane gratiam significant.

Nec obest, Clementem VI. in Bulla, qua Regi Galliarum concedit facultatem communicandi sub specie utraque, dicere: id ei indulgeri *ad majus gratiæ augmentum*. Quid enim vetat dicere? intellexisse Pontificem augmentum gratiæ obtinendum *ex opere operantis*, hoc est, vi majoris dispositionis & devotionis, qua supponebat Regem communicaturum sub utraque specie. Quamvis interim loquatur de augmento, quod ipsum Sacramentum *ex opere operato* efficiat, nihil nos urget: integrum quippe nobis manet ab ejus, ceu privati Doctoris, sensu recedere; certum etenim est, nihil hic eum definire voluisse, sed per occasionem duntaxat concessionis factæ causam redidisse.

## DISSERTATIO IV.

### DE SS. EUCHARISTIA, UT EA EST SACRIFICIUM.

#### §. I.

*An Eucharistia sit verum Legis novæ Sacrificium?*

**S**acrificium, late & minus proprie acceptum, in Scriptura & Patribus crebro sumitur pro actione quavis ad Dei cultum ordi-



ordinata, ut est oratio, eleemosyna &c. quo quidem sensu Eucharistiæ celebrationem esse Sacrificium, nemo in dubium revocat. Tota igitur in præsentī est controversia de Sacrificio propriè dicto: quod quid sit, quamque varium, quid item de illo tam Sectarii quam Orthodoxi sentiant, ante Assertionem observandum est.

### Sacrificii definitio & varietas.

I. **S**acrificium propriè dictum est, *oblatio rei sensibilis, per* 136 *aliquam ejus destructionem, Deo facta in protestationem supremi illius in res omnes dominii.* Itaque in Sacrificio propriè tali offerri debet *res sensibilis*: quia Sacrificium est unum e signis præcipuis, quibus & in unum Religionis cætum colligamur, & cultus divini testimonium perhibemus; quod utrumque inter homines convenit fieri signis sensibilibus, ceu statui humano pariter sensibili accommodatis. Hujus ipsius autem rei sensibilis *destructio aliqua*, physica videlicet aut moralis saltem, est necessaria: quo significatur, dignum esse Deum, cujus obsequio res omnes, ipsam adeo vitam nostram impendamus. Oblatio eadem dicitur *Deo facta*: Sacrificium enim est cultus patriæ, qui soli Deo debetur; idcirco *nemo unquam Sacrificandum esse censuit, nisi ei, quem Deum aut scivit, aut putavit, aut finxit*, ut notat Augustin. L. 10. de Civ. Dei C. 4. Demum oblatio hæc fieri debet *in protestationem supremi in nos Dei dominii*: hic quippe Sacrificii præcipuus est finis, ac per hoc cumprimis ab ipsis Sacramentis differt; unde si quæ præterea Sacrificium operetur, ut sanctificationem, & satisfactionem &c. id genus effectus indirecte duntaxat & secundario ad illud pertinent.

Ex quibus ultro colligitur in omni Sacrificio propriè tali adesse *rem oblatam*, quæ est instar materiæ; *actionem Sacrifi-*

*candi*, quæ habet rationem formæ; *finem Sacrificii*, qui si præter protestationem divini dominii alius sit, secundarius dicitur; *ritum mysticum*, cujus substantia in ipsa Sacrificandi actione consistit, ritus autem præter hanc alii inter accidentales numerantur; demum *Ministrum*, qui ut legitimus sit, speciali deputatione aut etiam consecratione opus habet, cum Sacrificium sit actio Ecclesiæ publica & nobilissima.

- 157 II. Conformiter jam ad hæc varia Sacrificiorum genera distinguuntur. Spectata nempe materia Sacrificium est vel *Victimæ*, vel *Immolatio*, aut *Libamen*. Victimæ seu hostia Judæis erat, cum animal aliquod, e. g. ovis, hædus, bps &c. sacrificabatur; in Immolatione contra offerebatur res inanima solida, ut panis, fal &c. in Libamine vero res liquida, ut sanguis, vinum, oleum. Quoad formam Sacrificium dividitur in *Holocaustum*, *Hostiam pro peccato*, *Hostiam pacificam*. Holocaustum peragebatur totius rei oblatæ combustionem; ex Hostia pro peccato pars combusta est, pars comedebatur a Sacerdotibus in atrio templi; ex Hostia pacifica similiter pars comburebatur, reliquum vero cedebat in usum Sacerdotum simul & offerentium. Demum ratione finis quodvis Sacrificium est *Latreuticum*, ut constat ex dictis: Judæis interim hoc nomine solum Holocaustum veniebat propterea, quod in eo, excluso omni fine alio, protestationem divini dominii spectaverint. Quia nihilominus & alios fines adjunctos habere potest Sacrificium, *Eucharisticum* est, si offeratur in gratiarum actionem pro acceptis beneficiis; item *Impetratorium*, si fiat pro novis beneficiis impetrandis, quale Judæis erat Hostia pacifica; ac tandem *Propitiatorium* & *Satisfactorium*, cum offertur pro peccatorum & poenarum peccatis debitarum remissione, ut in Lege Mosaica fuit Hostia pro peccato.

De

## De Eucharistiæ Sacrificio

Catholicorum doctrina: vocis *Missa* ethymologia:

Novatorum error.

I. **C**onsentiens Orthodoxorum omnium doctrina est, Eu-158  
 charistiæ mysterium non modo esse Sacramentum,  
 sed & verum Legis Evangelicæ Sacrificium, idque longe  
 præstantius omnibus veteribus. Ex eorundem porro sen-  
 tentia Sacrificium hoc peragitur in eo sacro Officio, quo Sa-  
 cerdos in persona Ecclesiæ panem & vinum Deo offert, at-  
 que ex his solemnem consecrationem conficit Eucharistiam. Quod  
 quidem Officium tametsi veteres variis nominibus designa-  
 rint; a Græcis enim Patribus nonnunquam vocatur *perfectio*,  
*elevatio*, *oblatio*, *res arcana*, *servitus* &c. a Latinis autem *col-  
 lecta*, *hostia*, *fractio panis*, *gratia* &c. vocabulo attamen ma-  
 xime recepto Græcis dicebatur *Λειτουργία*, Latinis *Missa*, quæ  
 hodie etiam ut plurimum obtinent. Quamvis autem vox *Li-  
 urgia* ex prima sua notione quodvis ministerium significet,  
 ejus tamen usum Ecclesia Græca jam a primis Seculis pecu-  
 liarem esse voluit, ad designandum duntaxat Eucharistiæ Sa-  
 crificium, ceu Ministerium omnium nobilissimum. Apud  
 Latinos etiam vocem *Missa* antiquam esse, ac jam Sec. II. pro  
 significando Eucharistiæ Sacrificio usitatam, constat ex Pii I.  
 S. P. Ep. ad Sororem Euprepiam; pro Seculo III. idem erui-  
 tur ex Cornelii P. Epist. ad Lupicinum Episcopum; pro Se-  
 culo IV. certissimum testimonium est Ambrosii Serm. 39. &  
 Ep. ad Soror. Marcellinam.

II. Quæ interim sit vocis *Missa* ethymologia, variantur 159  
 Eruditi. Mihi verisimilior videtur opinio BENEDICTI XIV.  
 S. P. qui, Bellarminum & Bonam secutus, Tract. de Sacrif.  
*Missæ* Sect. I. N. 68. censet eam esse originis latine, a

verbo scilicet *mitto*, seu *missione* derivatam. Nempe in primæva Ecclesia occasione Sacrificii bis palam annunciabatur abeundi e templo venia, seu quod idem est, bis fiebat solemnis dimissio populi. Ac primum quidem post Evangelium & Homiliam dimittebantur Catechumeni cum reliquis in Eucharistia non participantibus, Diacono intonante, *exite Catechumeni, pœnitentes, indigni!* quæ Liturgiæ pars vocabatur *Missa Catechumenorum*; quod reliquum erat, dicebatur *Missa fidelium*, vel *initiatorum*; toto enim peracto Sacrificio dimissi sunt fideles, Diacono rursus inclamante, *Ite, Missa est*: hoc est, *ite, dimittimini, fit missio, datur venia abeundi &c.* quæ omnia idem significant. Cum autem diebus jejunii Sacrificium sero fieret, ac illi continuo subjiceretur Officium vespertinum, cui fideles adesse moris erat, completo Sacrificio Diaconus, non *Ite missa est*, verum *Benedicamus Domino* intonabat; quo moneretur populus, nondum esse abeundi tempus: verum post peractum etiam Sacrificii ministerium superesse divinas laudes omnibus persolvendas.

Hæc jam vero argumentum præbent verisimiliter opinandi, Sacrificium ab hac populi *missione* dictum esse *Missam*: præsertim cum veteribus non infrequens fuerit id genus vocabulis uti, ut cum dicebant remissam peccatorum pro remissione, ascensam Christi pro ascensione &c. ut notat erud. Bosfuet. Attenta etiam hac nominis ethymologia ratio congrua redditur, cur Sacrificium hoc quandoque plurali numero *Missa*, vel *Missarum solennia* diceretur: a duplici videlicet memorata populi missione. Plura in hanc rem vide apud Bellarm. L. I. de Sacrif. Missæ C. I. & Bonam Rer. Lit. L. I. C. I. ubi & veterum complures pro hac opinione laudari reperies.

160 III. Ad Sectarios quod attinet, omnes, qui realem Christi in Eucharistia præsentiam negant, negant pariter Eucharistiam

stiam habere rationem veri Sacrificii, ut Berengariani, Wicleffitæ, Zwingliani & Calvinistæ. Lutheranis jam inde a principio suæ Sectæ difficilius visum non admittere verum Eucharistiæ Sacrificium, cum profiteantur in ea Christi Corpus contineri, & vel ipsorum sententia *Missæ Pontificiæ fons est Corporalis præsentia*, ut habet Hospinianus Lutheran. Missæ Sacrament. Par. 2. Istud certe Lutherum cum primis sollicitum habuit; inde, quamvis Catholicorum Missam diceret *abominationem*, duo tamen hæc conciliandi invicem cura supererat, dum denique a dæmone, non per somnum, sed vigilans persuaderetur, *Missæ Sacrificium abrogandum esse*, quod ipse fatebatur in L. de Missa priv. An. 1534. edito. Ac in hoc quidem Doctori suo acquievit Lutherus: nondum tamen habebat unde difficultatem elideret. Debebatur scilicet hæc gloria (quod sine invidia profitetur Lutherus) Philippo Melanchtoni, qui primus aiebat salva reali præsentia expungendi Sacrificii medium efficax haberi in eo, quod Christus (ut Lutherani docent) in Eucharistia non sit realiter præsens nisi in actuali sumptione. Adeo vero istud probatum est Luthero, ut (teste laud. Hospiniano) in Collatione Ratisbonensi An. 1541. palam Philippo applauderet his verbis: *Macte virtute & pietate mi Philippe! tibi debetur gratia, qui Pontificiæ Missæ poruisti Sacramentum adimere, quod ego tentavi, & aggredi non fui ausus.* At quam futile medium, cujus efficacia ab errore novo repetitur! sed de hoc satis dictum supra Dissert. II. §. I. ubi probavimus Eucharistiam in re permanenti consistere. Nunc directe contra Sectarios omnes, qui Eucharistiæ Sacrificium negant, doctrina Ecclesiæ est asserenda.

ASSER-

## ASSERTIO.

*Eucharistia est verum ac proprie tale Legis Evangelicæ Sacrificium, quod in Missa offertur.*

161 **S**I vel rationem consulant Sæctarii, habent unde de hac veritate convincantur. Cum enim Sacrificium proprie dictum sit præcipuus Dei cultus & veræ religionis actus, quis unquam sibi persuaserit Ecclesiam Christi eo destitui? præsertim cum certum sit non defuisse vera Sacrificia Ecclesiæ Moisaicæ, quæ tamen multo erat inferior. Quod jam autem istud in Lege Evangelica Sacrificium nisi Eucharistia? convenire illi rationem Sacrificii patebit ex §. sequ. nec certe præter illam proferri potest quidquam aliud, cui prærogativa hæc attribui queat, si relatam Sacrificii definitionem attendas, ergo &c.

162 Sed nempe Scripturæ ipsius in hanc rem testimonia requirunt Novatores. Neque hæc defunt, eaque complura; nos interim duo duntaxat proferemus.

I. Malach. C. 1. Israeli Deus dicit: *munus non suscipiam de manu vestra. Ab ortu enim solis usque ad occasum magnum est nomen meum in gentibus: & in omni loco sacrificatur, & offertur nomini meo oblatio munda.* Quæ jam autem hæc illa oblatio munda? non utique gentilium Sacrificia, quæ non Deo, sed dæmoni fiunt; non etiam Sacrificia Judæorum: hoc ipso enim Cap. prædicuntur rejicienda, uti etiam rejecta sunt: certe non offeruntur in omni loco ab ortu solis usque ad occasum &c. oblatio igitur hæc munda, quam prædixit Malachias, est Religionis Christianæ per orbem totum diffusæ Sacrificium: quod rursus aliud non est, quam Eucharistia, cui ita veri Sacrificii ratio est propria, ut nulli alteri conveniat. Ita certe locum hunc exponendum censuerunt PP. Justinus in Dial. cum Tryphone, Irenæus L. 4. contra hæres. C. 32.

Chry-

Chrysostom. in Ps. 95. & Hom. 5. contra Judæos, Hieronymus item, Theodoretus. & plures alii apud Bellarm. L. I. de Sacr. Missæ C. 10. Fatemur equidem mortem Christi fuisse Legis novæ verum Sacrificium; at quia hoc semel tantum ac in uno duntaxat loco oblatum est, nequit dici oblatio illa, quam isthic Malachias prænuñciavit.

II. Juxta Apostolum ad Hebr. 13. *habemus altare, de quo edere non habent potestatem, qui tabernaculo deserviunt*; & supra ibid. C. 7. *Christus est Sacerdos in æternum secundum ordinem Melchisedech*. Quod si autem habemus altare, utique & verum Sacrificium: propter hoc enim est illud. In altari hoc præterea illud offertur Sacrificium, de quo edere possimus nos quidem, non autem a Lege Christiana alieni; atqui hoc est Eucharistia, quæ solis Christianis manducanda proponitur, ergo &c. Denique hoc altaris Sacrificium non aliud est, quam quod Christus secundum ordinem Melchisedech Sacerdos obtulit, quodque idem in sua Ecclesia offerri voluit; quod vero illud nisi Eucharistia? in hac certè Corpus suum & Sanguinem sub specie panis & vini Deo Patri obtulit, sicut olim Melchisedech panem & vinum: hanc præterea oblationem & deinceps a nobis fieri Christus voluit, cum ea peracta dixerit: *hoc facite in meam* &c. testimonio igitur Apostoli Eucharistia est verum Legis novæ Sacrificium. Hic idem est de laud. ex Apostolo verbis Patrum sensus, ac nominatim Irenæi loco supra cit. Cypriani Ep. 48. Augustini Conc. 2. in Ps. 33. & Serm. de Temp. 130.

Scripturæ testimonio accedat Traditionis auctoritas, 163 quam desumimus ex vetustissimis Liturgiis, Patrum & Conciliorum consensu.

Consule Liturgias Basilii, Gregorii, Cyrilli, Chrysostomi, & alias a Cl. Renaudotio in Op. sæpius jam laud. relatas & illustratas: nullam certe reperies, in cujus aliqua saltem oratione

R. P. Muszka Tom. II. de Sacr.

A a

Sacer-

Sacerdos non dicat facere se *oblationem incruentam*, offerre *Sacrificium incruentum* &c. Patres etiam plurimi, cum de celebratione Eucharistiæ agunt, utuntur passim vocibus *Sacrificiû, hostiæ, victimæ*: verbis item *immolare, offerre, sacrificare*. Vide, præter PP. jam sup. N. citatos, Cyrillum Hierof. Catech. 5. & Ambrosium L. 1. in Luc. C. 1. item in Ps. 38. Pro omnibus quorundam recitabimus verba, argumentum ex Scriptura paulo ante institutum non minus confirmantia, quam Traditionem testantia.

Justinus M. in Dial. cum Triphone Judæo: *de Sacrificiis a vobis tum oblatis Deus per Malachiam ait: Sacrificia vestra non suscipiam* &c. *de nostris vero, quæ in omni loco offeruntur, Sacrificiû, hoc est, pane & poculo Eucharistiæ prædixit, nos quidem glorificare nomen ejus* &c. Irenæus L. 4. contra hæres. C. 32. *Eum, qui ex creatura panis est, accepit, & gratias egit dicens, hoc est Corpus meum: & similiter Calicem suum Sanguinem confessus est, & novi Testamenti novam docuit oblationem, quam Ecclesia ab Apostolis accipiens in universo Mundo offert Deo, - de quo Malachias sic præsignavit* &c. Augustinus L. 16. de Civ. Dei C. 22. post enarratam Melchisedech oblationem, *ibi primum, inquit, apparuit Sacrificium, quod nunc a Christianis offertur Deo* &c. His similia leguntur in reliquis Patrum jam laud. locis.

Quibus omnibus si denique adjicias vel cit. pro fronte hujus Libri Conciliorum Nicæni I. Ephesini, Nicæni II. ac demum Tridentini verba, certissimum habes pro doctrina præsentî Traditionis testimonium ex consensu veteris & modernæ Ecclesiæ.

### Respondetur ad Objecta.

- 164 **O**bjicitur illud de Christo Apostoli dictum ad Hebr. 9. V. 26. *semel in consummatione seculorum ad destitutionem peccati*



*cati per hostiam suam apparuit, & ibid. C. 10. V. 12. & 14. unam pro peccatis offerens hostiam in sempiternum sedet in dextera Dei, - - una enim oblatione consummavit in sempiternum sanctificatos.* Juxta Apostolum igitur Christus semel tantum oblatus est in hostiam, & hac sui oblatione (ut quæ infiniti erat valoris) consummavit sanctificatos; ergo non offertur amplius, imo nec est, cur offeratur. Istud vero si ita se habeat, Eucharistiæ attribui nequit ratio Sacrificii.

Resp. ex contextu cit. Epistolæ præsertim Capituli 9. elucet, Apostolum non aliud voluisse, quam quod Christus semel tantum fuerit pro peccatis hostia per cruentum crucis sacrificium oblata: hanc item oblationem ex se sufficientis fuisse valoris ad nos sanctificandos, non esse proinde iterandam. At istud utique non prohibet, quo minus idem Christus etiamnum sit pro nobis incruenta hostia, ac in Missa modo incruento sacrificetur.

Neque enim propterea inutile dixeris hoc Sacrificii genus; valet quippe ad exhibendum Deo supremum cultum; ad constituendam religionem, quæ sine vero Sacrificio esse nequit: ad Sacrificium crucis commemorandum, ejusque fructum nobis applicandum. Nempe quamvis Sacrificium crucis, spectata pretii in eo oblatis sufficientia, sit valoris infiniti: quo tamen virtute illius salutem consequamur, necesse habemus illud nobis applicare, ad quod præstandum unum e præcipuis mediis est Missæ Sacrificium. Ex quo ipso liquet, Sacrificio crucis non derogari quidquam per Missæ Sacrificium: neque enim hoc offerimus ad supplendam illius insufficientiam, sed ad valorem duntaxat ejus nobis applicandum.

Accipe hæc omnia ipse Tridentini verbis Sess. 22. Cap. 2. ubi ait: *in divino hoc Sacrificio, quod in Missa peragitur, idem ille Christus continetur & incruentus immolatur, qui in ara crucis semel se ipsum cruento obtulit; - - una enim ea-*

demque est hostia, idem nunc offerens Sacerdotum ministerio, quā se ipsum tunc in cruce obtulit, sola offerendi ratione diversa. Cujus quidem oblationis cruenta fructus per hanc uberrimi percipiuntur, tantum abest, ut illi per hanc quovis modo derogetur.

165 Instabis I. Teste Apostolo ad Hebr. 7. V. 23. & 24. in lege veteri plures facti sunt Sacerdotes, idcirco quod morte prohiberentur permanere; hic autem (Christus) eo quod maneat in aeternum, sempiternum habet Sacerdotium; in Lege nova igitur solus Christus est Sacerdos, & nullus alius: at Sacrificium peragi nequit sine Sacerdote; ergo ne incruento quidem modo Christus a nobis potest in Missa sacrificari.

Resp. Dist. illat. primam: solus Christus est Sacerdos & nullus alius supremæ ejusdem cum illo in Sacerdotio dignitatis & potestatis C. nullus alius, ne quidem potestate & dignitate inferior, hoc est, Christi in Sacerdotio Minister & delegatus N. Hinc etiam ad reliqua responsum habes. Nempe cit. loc. indicat Apostolus, in Lege veteri post demortuum Aaronem fuisse ejusdem dignitatis & potestatis Sacerdotum plurium successionem: Christum contra, cum non moriatur, etiamnum in Lege nova permanere Sacerdotem ita, ut in suprema Sacerdotii sui dignitate neminem habere debeat, imo nec habere possit successorem. Quis vero hinc inferat? præter Christum dari non posse alios inferioris ordinis Sacerdotes; præsertim cum etiam in Lege Mosæica præter summum Sacerdotem alii illo inferiores fuerint: ac ipse Apostolus 1. Cor. 4. universim dicat, sic nos existimet homo ut Ministros Christi, & 2. Cor. 5. pro Christo legatione fungimur. Quid quod si Christus etiamnum est Sacerdos, offert utique etiamnum sacrificium: at non utique per se ipsum, ergo per delegatos alios Sacerdotii sui Ministros. At

Instabis II. Vel ideo, quod alii Sacerdotes sint delegati, duntaxat Ministri Christi, nequeunt per celebrationem Eucharistiae

ristiæ facere Sacrificium, nisi Christus ipse voluerit Eucharistiam esse Sacrificium; at non voluit, ergo &c. Min. prob. ex triplici capite. Nam *1mo* Christus instituens Eucharistiam, dedit eam quidem Discipulis, at Patri æterno non obtulit; ergo ipse non sacrificavit. *2do*, spectata institutione Eucharistiæ in ea Christus non immolatur: immolatio enim rei viventis occisione peragitur, quod in Missa non fit. *3tio*, Christus Eucharistiam instituit in repræsentationem cruenti sui Sacrificii, in testamentum item & Sacramentum novæ Legis: quæ omnia Sacrificii rationem non habent.

Resp. C. Maj. N. Min. nec probationes evincunt quidquam. Etenim, ut ad singulas respondeam;

Probationis *1mæ* N. Ant. Et quamvis sint, qui hanc oblationem tacite saltem designari putent illis verbis, quæ Christus post datum Corpus suum subjecit, *quod pro vobis datur*: & rursum post Calicem, *qui pro vobis fundetur*, vel (ut in græco est) *funditur*: istud interim rem, de qua agitur, certo non conficit. Existimo itaque id repetendum a sola Traditione fundata in Patribus, quorum sententia Christus se ipsum in Eucharistia Patri æterno obtulit. Ita Cyprianus Ep. 63. *quis magis, inquit, Sacerdos Dei summi, quam Dom. N. J. Christus? qui Sacrificium Deo Patri obtulit hoc idem, quod Melchisedech obtulerat, id est, panem & vinum, suum scilicet Corpus & Sanguinem.* Item Gregor. Nyssen. Orat. i. in Christi resurrectione. ubi postquam dixit, Christum ante Pilati sententiam arcano Sacrificii genere se ipsum pro nobis hostiam obtulisse, quærit: *quando id præstitit? cum Corpus suum discipulis edendum & Sanguinem bibendum præbuit, tunc aperte declaravit Agni Sacrificium jam esse perfectum; - quare cum Corpus edendum & Sanguinem bibendum discipulis exhibuit, jam arcana ratione Corpus erat immolatum &c.* Idem deducitur ex reliquis Patribus N. 162. & 163. laudatis; cum enim secundum illos in

Eucharistia a nobis Christus sacrificetur, nos vero juxta præceptum *hoc facite in meam &c.* in celebratione hujus mysterii non aliud faciamus, quam quod ipse Christus fecerit; jure utique arguitur, Christum pariter eorum sententia se ipsum sacrificasse in Eucharistia tempore cænæ ultimæ instituta. Clara denique de hoc est doctrina Tridentini, quod Sess. 22. Cap. 1. ita loquitur: *Christus Sacerdotem secundum ordinem Melchisedech se in æternum constitutum declarans, Corpus & Sanguinem suum sub speciebus panis & vini obtulit: ac sub earumdem rerum symbolis Apostolis, quos tunc novi testamenti Sacerdotes constituerebat, ut sumerent, tradidit, & eisdem, eorumque successoribus ut offerrent præcepit per hæc verba, hoc facite in meam commemorationem.*

Ad 2<sup>am</sup> probat. dico, in Eucharistia Christum vere immolari: ad veram enim immolationem victimæ sufficit ejus vel moralis destructio, ut certum est ex Sacrificio capri emisarii, qui re ipsa non occidebatur, sed in desertum duntaxat, ceu exul, ejiciebatur Lev. 16. Jam vero Christus, quamvis in Eucharistia vivus maneat, ponitur tamen in illa modo quasi mortuo; ponitur enim in forma rei inanimatæ & in specie aliena: item vi consecrationis verborum sub specie panis directe ponitur tantum Corpus, sub specie autem vini tantum Sanguis; hæc ipsa autem est moralis destructio & occisio. Clariora hæc erunt ex §. sequ.

De 3<sup>io</sup> ita habet: ex institutione Christi Eucharistiam non minus esse Sacrificium incruentum ac cruenti Sacrificii repræsentationem, testamentum item, & Sacramentum: at hæc omnia ei sub diversâ ratione conveniunt. *Repræsentatio* est, quatenus (ut paulo ante diximus) vi verborum sub una specie ponitur tantum Corpus Christi, sub altera tantum Sanguis: per quod repræsentatur realis separatio Corporis & Sanguinis facta in cruce. Est & *Sacrificium*, cum in Eucharistia Christus

Christus

stus per aliquam sui destructionem sub specie sensibili offeratur Deo in agnitionem dominii; *Testamentum* etiam, quatenus est instrumentum, quo nobis applicantur promissiones gratiæ & gloriæ; denique *Sacramentum*, ut est signum sensibile sanctitatem operans.

Instabis III. Tametsi Eucharistia non sit Sacrificium, non deerunt attamen Ecclesiæ alia, quæ veri Sacrificii rationem habeant. Cur enim prærogativa hæc attribui non possit internis virtutum actibus, commemorationi mortis Christi, precationi externæ, piis operibus, thuris incenso, & similibus? Certe hæc nonnunquam apud Patres ipsos Sacrificii nomine veniunt.

Resp. N. Assertum: nihil enim in Lege hac præter Eucharistiam est aliud, cui tota Sacrificii natura conveniat; inde PP. cum nomen hoc rebus quibusdam aliis attribuunt, in sensu minus proprio illud sumere censendi sunt. Ac ut generatim dicam de omnibus illis, quæ nobis pro Sacrificio obtruduntur: verum Sacrificium nequit offerri nisi per legitimum Ministrum, hoc est, publica Ecclesiæ auctoritate deputatum aut etiam consecratum; preces autem, pia opera, & reliqua id genus a quibusvis promiscue possunt peragi & Deo offerri: vel hoc igitur nomine verum Sacrificium non sunt. Sed & in aliis deficiunt.

Ita nominati interni virtutum actus non sunt oblatio sensibilis. Commemoratio passionis Christi etiam actu mere interno peragi potest, neque necessario fit per aliquid sensibile. Preces & pia opera ordinantur primario ad obtinendum aliquid a Deo, vel alium id genus finem: non vero ad protestandum Dei dominium; hæc eadem nullo peculiari ministerio opus habent, sed omnibus sunt communia. Thuris incensum, ceræ vel olei in luminaribus consumptio, & his similia ritus sunt duntaxat accidentales, quæ omitti possunt: cum interim

interim Sacrificium deficere non possit durante Ecclesia. Plura id genus ultro occurrent veri Sacrificii conditiones expendenti. Consuli etiam potest Vasquez hic Disp. 223. N. 54.

## §. II.

*In quo consistat Eucharistiae Sacrificium, quod in Missa peragitur?*

CUM Sacrificii cujusvis naturam duo constituent, res oblata videlicet, & actio Sacrificandi, duplex nobis est isthic resolvenda quaestio. Prima quidem: an in Missae Sacrificio res oblata sit panis & vinum, an potius ipse Christus, & hic rursus an cum speciebus simul, an sine illis? Altera deinde: num actio hujus Sacrificii habeatur per oblationem panis & vini, an tantum per consecrationem, vel etiam fractionem hostiae consecratae, item & populi aut saltem Sacerdotis communionem? De utroque varias Doctorum opiniones vide apud Vasquez de Sacrif. Mis. Disp. 222. C. 1. & seqq.

## ASSERTIO I.

*Res oblata in Missae Sacrificio est solus Christus, prout sub panis & vini speciebus existens.*

168 **R**atio est ex Apostolo, juxta quem 1. Cor. 5. Pascha nostrum immolatus est Christus; & ad Eph. 5. is solus tradit semetipsum pro nobis oblationem & hostiam Deo; atqui ex mente Tridentini Sess. 22. Cap. 2. in Sacrificio Missae una eademque est hostia, idem nunc offerens Sacerdotum ministerio, qui se ipsum tunc in cruce obtulit, sola offerendi ratione diversa; ergo in Sacrificio Missae res oblata est solus Christus, prout vide-

videlicet incruente immolatur, qui in ara crucis semel se ipsum cruenta obtulit, ut ait Trident. lococit.

Ejusdem plane sensus sunt etiam Patres. Chrysostom. Hom. 24. in Ep. 1. ad Corinth. *Christus, inquit, suam nostri ostendit curam, - & pro ead. brutorum se ipsum jussit offerri.* Ambrrosius in Ps. 38. *etsi nunc Christus non videtur offerre, tamen ipse offertur in terris, quando Christi Corpus offertur, imo ipse offerre manifestatur in nobis, cujus sermo sanctificat Sacrificium, quod offertur.* Augustinus in Ps. 33. *ipse (Christus) d: Corpore & Sanguine suo instituit Sacrificium secundum ordinem Melchisedech &c.* Idem legere est apud Justinum & Irenæum N. 163. laudatos, aliosque Patres.

Dictum autem est consulto, *Christum, prout sub speciebus* 169 *sacramentalibus existentem, esse rem oblatam; ut enim is sub specie propria in cælo existit, sub Missæ Sacrificio nullatenus immutatur aut destruitur, quod tamen fieri debet in re oblata.* Idem contra Christus sub specie panis & vini existens, morali destructione aliqua immutatur & mystice occiditur in Missa vel ideo: quod ponatur sub specie aliena modo quodam mortuo, sub ratione item cibi & potus; tum etiam, quod vi verborum sub specie panis ponatur solum Corpus, & sub specie vini solus Sanguis. Ex quo ultro consequitur: species Sacramentales, quamvis non sint ipsa res oblata, esse tamen conditionis instar necessaria requisitas ad Missæ Sacrificium.

## ASSERTIO II.

*In Missa actio Sacrificandi est sola consecratio: quæ jure divino debet esse utriusque speciei, ut perfectum sit Sacrificium.*

**P**ARS I. inde deducitur, quod per consecrationem, seclusis 170 etiam aliis Missæ actionibus, totum Eucharistiæ Sacrificium  
R. P. Muszka Tom. II. de Sac. B b cium

cium perficiatur. Nempe consecratio est inprimis a Christo instituta actio, eademque ponitur a Sacerdote in persona Christi, cum ipse sit juxta Trid. Sess. 22. Cap. 2. etiam in Missa *offerens* (videlicet principalis) *Sacerdotum ministerio*. Per eandem consecrationem præterea vero sensu immolatur Christus cum aliqua sui immutatione, ut jam dictum est. Denique idem sic per consecrationem immolatus, tametsi non explicite, implicite tamen æterno Patri offertur : ut enim in Lege veteri e. g. ovis jugulatio facta ad cultum Dei erat oblatio realis & implicita, eaque sufficiens ad rationem Sacrificii : sic & consecratio ex institutione Christi facta cum intentione sacrificandi saltem confusa, contenta videlicet in voluntate faciendi; quod Christus instituit, est oblatio realis & exercita sufficiens ad Eucharistiæ Sacrificium. Hæc autem ad completam sacrificandi actionem & perficiendum Sacrificium sufficiunt.

Inde actiones, quæ præterea in Missa fiunt, ritus sunt duntaxat accidentales Sacrificii, non autem ipsa sacrificandi actio. Nec difficile est hujus rationem vel ex jam dictis reddere; omnes enim actiones reliquæ vel non sunt a Christo institutæ: vel non fiunt a Sacerdote in persona Christi: aut certe per illas non habetur vera immolatio. Ita panis & vini oblatio non est facta a Christo ante consecrationis verba; imo nec post hæc prolata species jam consecratas Patri æterno amplius obtulit, aut fregit: nulla enim est horum in S. Literis mentio; actiones igitur istæ non sunt a Christo institutæ, cum is eas tantum, quas ipse fecit, instituerit & præceperit, ut colligitur ex verbis illis, *hoc facite in meam* &c. Communio etiam Sacerdotis aut fidelium nequit dici actio sacrificandi, cum non fiat in persona Christi; præterea communio ex se non est immolatio & oblatio, nam nec in Lege Mosaica Sacerdotes dicebantur sacrificare per absumptionem victimæ jam ante immolatæ; denique sine communionis perfecta habetur



tur Sacrificii ratio, id quod nominatim de communione populi omnibus certum est.

Momentum opinioni huic accedit etiam ex sensu Patrum, quorum complures Sacrificii novæ legis actionem reponunt in consecratione, nulla actionis alterius facta mentione. Ita Irenæus L. 4. contra Hæres. C. 32. ait, Christum per consecrationem panis & vini docuisse *novam oblationem*. Verba ejus recitata sunt supra N. 163. Gregorius M. L. 4. Dial. C. 18. *quis fidelium, inquit, dubitet, in ipsa immolationis hora ad Sacerdotis vocem Cælus aperiri?* immolatio igitur est Sacerdotis vox, quæ ipsa est consecratio. Idem colligitur ex Gregor. Nyss. Orat. 1. de Resur. Christi. Apertissime autem D. Thom. 3. p. qu. 82. Ar. 10. ad 1. id ipsum docet his verbis: *alia Sacramenta perficiuntur in usu fidelium, - sed hoc Sacramentum perficitur in consecratione, in qua Sacrificium Deo offertur.*

Pars II. Assertionis fundatur in Concil. Tridentino, quod Sess. 22. Cap. 1. ita se declarat: Christus, *ut relinqueret Sacrificium, quo cruentum illud semel in cruce peragendum representaretur; - Sacerdotem secundum ordinem Melchisedech se in æternum constitutum declarans, Corpus & Sanguinem suum sub speciebus panis & vini Deo Patri obtulit, ac sub earundem rerum symbolis Apostolis, - ut sumerent, tradidit, & eisdem, eorumque in Sacerdotio successoribus, ut offerrent, præcepit per hæc verba: hoc facite &c. uti semper Catholica Ecclesia intellexit & docuit.*

Declarationis hujus auctoritas tametsi sufficiens sit argumentum; ex ea nihilominus pro Asserto confirmando tres rationes Theologicas libet adducere. Nempe ex mente Tridentini imo, Christus Eucharistiæ Sacrificium esse voluit representationem Sacrificii cruenti in cruce peracti, in quo Corpus Domini separatum est a Sanguine; hæc autem repræ-

sentatio non fit nisi per separationem eorundem mysticam, quæ ipsa rursum per solam utriusque speciei consecrationem habetur in sensu jam alias exposito. 2do, idem Sacrificium Christus, ut Sacerdos secundum ordinem Melchisedech instituit: sicut igitur Melchisedech suum Sacrificium peregit oblatione panis & vini, sic & Sacrificium Eucharistiæ peragi debet consecratione speciei panis & vini. Demum 3tio, sicut Christus in ultima coena Corpus & Sanguinem suum obtulit, ita pariter eadem in Sacrificio Eucharistiæ offerenda præcepit: at is obtulit sub utraque specie; ergo præcepit etiam sub utraque specie offerenda. Hæc vero omnia certo sunt utique argumento, Concilium Tridentinum existimasse utriusque speciei consecrationem ita esse juris divini, ut sine illa non perficiatur Eucharistiæ Sacrificium a Christo institutum.

### Adversæ partis momenta resolvuntur.

173 **C**ontra Assertion. I. opponitur: ex mente Patrum, tam hoc quam priore §. laudatorum, ac etiam ipsius Tridentini in Eucharistiæ Sacrificio id offertur, quod olim obtulit Melchisedech; at in hujus Sacrificio res oblata fuit panis & vinum; ergo etiam in Eucharistiæ Sacrificio. Neque omnino quidquam deesse videtur pani & vino, quo minus saltem partem rei oblatæ faciant in hoc Sacrificio: nam & peculiari oratione offeruntur a Sacerdote, ut constat ex ritu Offertorii; eadem per consecrationis verba etiam destruuntur, ac proinde vero sensu immolantur. Igitur in Missæ Sacrificio res oblata non est solus Christus.

Resp. D. Maj. idem offertur, quod obtulit Melchisedech, idem inquam quoad speciem mere externam C. idem etiam quoad rem ipsam, quæ sub externa specie illa continetur N. ac dein Min. admissa, N. illat. Nimirum juxta PP. & Concilium Tri-

Trident. sicut Melchisedech fuit tantum figura Christi, sic & Sacrificium ejus pane & vino constans figurabat duntaxat Sacrificium Eucharistiæ a Christo institutum: item juxta eosdem in Sacrificio Eucharistiæ offertur & immolatur una eademque hostia, quæ in ara crucis fuit immolata, proinde solus Christus; ergo ex mente Patrum & Concilii nequit dici, in hoc Sacrificio quoad rem ipsam offerri idem, quod obtulit Melchisedech. Locutiones præterea hujusmodi vel per hoc explicantur congrue, quod sicut Melchisedech panem & vinum sacrificavit, sic & in Missæ Sacrificio sub speciebus panis & vini offerantur Corpus & Sanguis Christi, quæ ipsa fiunt per transubstantiationem ex pane & vino, tanquam materia remota. Ac revera hoc sensu fuisse locutos Patres ipse contextus, si eum consulas, te edocebit. Ita e. g. Cyprianus cum dicit Ep. 63. Christum *hoc idem, quod Melchisedech, obtulisse, id est panem & vinum*, quid re ipsa his intelligi velit, continuo explicat subjungens: *suum scilicet Corpus & Sanguinem*, quæ utique quoad speciem duntaxat externam sunt panis & vinum, sub quorum videlicet speciebus in Eucharistia continentur.

Sed nec, quæ in Objectione adduntur præterea, evincunt quidquam. Equidem ante consecrationem ex ritu jam recepto offertur panis & vinum: at jam N. 170. probatum est, oblationem hanc non esse actionem sacrificandi. Quid quod oblatio illa panis (idem est de vino) ordinetur ad ipsum Christum, ita ut jam prævie offerantur Corpus & Sanguis Christi, quæ mox per consecrationem ex pane & vino efficienda sunt. Sensus proinde Orationis illius, *suscipe S. Pater - hanc, immaculatam hostiam &c.* est sequens: *suscipe immaculatam hostiam, quam ex hoc pane & vino confecturus & sacrificaturus sum, quamque jam nunc offero pro peccatis meis, vivis atque defunctis &c.* Colligitur porro istud vel inde, quod

res oblata vocetur *immaculata hostia*, quod proprie convenit Christo Agno immaculato, non autem pani & vino. Quod vero ad panis & vini destructionem attinet, destruuntur illa quidem in Missæ Sacrificio; at destructio hæc ex institutione Christi fit solum eo fine, ut sub eorum speciebus ponatur Corpus & Sanguis Christi: non autem in dominii divini protestationem, quod in Sacrificio ad rationem rei oblatae requiritur.

- 174 Instari potest: species saltem, sub quibus ponitur Christus, esse partem rei oblatae in Missæ Sacrificio; nam juxta Trident. Sess. 22. Cap. 1. Christus in Eucharistia *Ecclæ visibile, sicut hominum natura exigit, Sacrificium relinquit*: solæ autem species sacramentales faciunt *visibile Sacrificium Eucharistiæ*. Atque istud omnino in Decr. Gratiani Can. *Hoc est, de Consecr. dist. 2.* aperte asseritur his verbis: *contendimus, Sacrificium Ecclæ duobus confici, duobus constare, visibili elementorum specie, & invisibili Domini N. J. C. carne.*

Resp. Ex eo, quod Eucharistiæ Sacrificium sit visibile, non sequi determinate, rem oblatam debere esse integre, aut saltem ex parte visibilem; hæc quippe visibilitas, seu sensibilitas Sacrificii habetur sufficienter, si modo aliquid sensibile ad rem oblatam & Sacrificium pertineat instar conditionis necessario requisitæ: uti re ipsa pertinent species sacramentales. Diversum a nobis (fatemur) habet laud. Canon; at cum is privati duntaxat sit Doctoris, Lantfranci videlicet Archiep. Cantuariensis: nec Decretum Gratiani canonicam auctoritatem habeat, fas nobis est ab eo recedere ob momenta pro Affertione allata.

Ex his ipsis autem haud difficile est assignare discrimen: cur verisimilius sit, Eucharistiam sub ratione Sacramenti sumptam non modo Corpore & Sanguine Christi, sed & speciebus

bus constitui, non autem etiam Eucharistiæ Sacrificium? Nempe Sacramentum ex genere suo est signum sensibile ad nostri sanctificationem institutum: speciatim autem Eucharistia instituta est instar cibi & potus sensibilis, quod esse requirit sine speciebus panis & vini; Sacrificium autem pro re oblata acceptum non aliud est, quam victima, quæ in domini divini testimonium offertur: potest autem esse hujusmodi victima, tametsi sit esse invisibilis, modo tamen visibiliter sacrificetur *sicut hominum natura & conditio exigat*, quod ait laud. Tridentinum. Ex quibus Concilii verbis non obscure colligitur: Sacrificii sensibilitatem non tam ex natura Sacrificii, quam ratione conditionis humanæ requiri.

Denique (quod isthic nobis momentum est præcipuum) res oblata in Missæ Sacrificio, non ex argutatione humana, sed ex Verbo Dei scripto aut tradito est definienda. Traditio autem, ut ea ex Patribus, & præsertim ex Concilio Trident. colligitur, docet, *unam eandemque* in Sacrificio altaris esse *hostiam*, quæ fuit in Sacrificio crucis, *sola offerendi ratione diversa*; sicut igitur in hoc solus Christus fuit res oblata, sic & in illo, ita ut panis & vinum, eorumque species constituent solum *offerendi rationem diversum*.

Contra Assertionis II. partem *1am* arguitur ex Tridentino, quod Sess. 23. Cap. 1. ait a Christo Sacerdotibus *potestatem traditam consecrandi, offerendi, & ministrandi Corpus & Sanguinem ejus &c.* igitur existimavit consecrationem esse diversam ab actione offerendi, seu sacrificandi. Et profecto, si sola consecratione perficeretur Missæ Sacrificium, non esset ratio, cur post illam Sacerdos peculiari oratione defunctos Deo commendet: perfectum etenim Sacrificium continuo ex se ipso suum effectum operatur.

Resp. C. Ant. Dist. Illat. existimavit esse diversam ratione nostra C. diversam re ipsa N. Quamvis enim in Missa consecra-

secratio & oblatio sit una eademque actio, hæc ipsa attamen a nobis diverso conceptu explicatur: consecrare enim est ponere Corpus & Sanguinem Christi sub speciebus panis & vini; offerre autem est eadem ponere modo quodam destruktivè in protestationem dominii: quod utrumque cum per consecrationem fiat, consecratio & oblatio est una eademque actio, solam rationis diversitatem involvens. Inde post peractam consecrationem complete jam omnino perfectum est Sacrificium, fructusque ei ex opere operato respondens statim percipitur ab illis, quibus per intentionem Sacerdotis applicatur Sacrificium; Oratio autem, quæ pro defunctis subjungitur, non aliam vim habet quam ex opere operantis, solumque adhibetur per modum impetrationis.

- 176 At urgebis forte I. universim in Sacrificiis victima præexistere debet actioni sacrificandi; cum ergo consecrationi non præexistat Missæ Sacrificii victima, seu Christus sub speciebus panis & vini, nequit consecratio esse ipsa sacrificandi actio.

Resp. N. Ant. nam ad perfectionem Sacrificii satis est, si victima per eandem simul actionem ponatur, simul in protestationem divini dominii destruat, ut sit in Eucharistiæ Sacrificio; certe oppositum nullo sufficienti fundamento asseritur. Nec licet arguere a veteribus Sacrificiis, aut etiam crucis Sacrificio: in his enim actio sacrificandi non erat simul victimæ productiva, ut igitur sacrificari posset, præexistere illam oportebat. Unde etiam clarum fit, non eandem esse rationem consecrationis ad Sacrificium Altaris, quæ erat incarnationis ad Sacrificium Crucis.

- 177 Urgeri potest II. Etiam communio Sacerdotis est actio sacrificandi proprie talis; ergo prærogativa hæc soli consecrationi non potest attribui. Assertum probatur ex triplici capi-

capite. Etenim 1<sup>mo</sup>, Sacrificium Eucharistiæ est perfectum holocaustum, in hoc autem tota victima consumi debet, id quod in Sacrificio hoc fit per communionem saltem Sacerdotis. 2<sup>do</sup>, per eandem communionem dicitur consummari Missæ Sacrificium; hinc ea nullo casu omitti potest, nam, ut habet Concil. Toletanum Can. *Relatum*. de Consecr. dist. 2. *quale erit illud Sacrificium, cui nec ipse Sacrificans pariceps esse cognoscitur?* Demum 3<sup>io</sup>, præcepto audiendi Sacrificium Missæ non satisficit, si quis consecrationi duntaxat, non autem etiam Sacerdotis communioni interfit.

Resp. I. generatim; jam ex dictis N. 170. constare, communionem Sacerdotis dici non posse vero sensu actionem sacrificandi. Actio nempe hujusmodi in Missæ Sacrificio debet esse oblatio, eademque fieri in persona Christi per potestatem vi ordinationis acceptam, cum juxta Trident. Sess. 22. Cap. 2. Christus ipse sit principalis Sacerdos, & *offerens* (seu Sacrificans) *Sacerdotum ministerio*; communio autem Sacerdotis non est ejusmodi actio, per quam aliquid offeratur Deo: eadem non fit in persona Christi, nec per potestatem vi ordinationis directe acceptam, cum & laicis jure Baptismi conveniat. Hinc

Resp. II. nominatim ad probationis 1<sup>um</sup> caput: arbitrarie asseri ad ipsam holocausti naturam pertinere consumptionem totius victimæ. In veteribus quidem holocaustis igne consumebatur victima: at non alio fine, quam ne res semel Deo oblata in usus deinde profanos cederet. Igitur holocausti ratio in eo consistit, ut victima tota offeratur Deo, atque ita in protestationem ejus dominii saltem moraliter destruatur, ut in usum profanum amplius verti nequeat: hæc vero omnia habentur per consecrationem seclusa etiam communionem. Ipsum certe Christum in suo cœnæ ultimæ Sacrificio Eucharistiam non sumpsisse probabilius est: quod enim

sumptionis hujus in Scriptura aut Traditione fundamentum ? Quamvis autem (ut quidam cum S. Thoma hic qu. 81. Ar. 1. & ab eo cit. Hieronymo putant) sumpserit, non continuo potest argui, sumptionem hanc esse de substantiâ Sacrificii: constat quippe Christum in celebratione Eucharistiæ complura alia fecisse, quin propterea sequatur, omnia illa ad perficiendum Sacrificium esse necessaria.

Resp. ad 2dum: per communionem Sacerdotis Sacrificium consummari hoc sensu, quod eam vel Christus ipse, vel saltem Ecclesia inviolabiliter fieri præceperit in ordine ad consequendum Eucharistiæ fructum ac finem integrum. Est videlicet Eucharistia non modo Sacrificium sed & Sacramentum; hinc ex institutione Christi destinata est tam ad profitendum Dei dominium, quam refectionem spirituales fidei-  
lium: sicut autem primum fit per consecrationem, sic alterum per communionem, quam Sacerdos, seu Ecclesiæ persona, in Missa nomine populi peragit. Atque hinc patet, quo sensu cit. Toletan. Canon sit intelligendus. Quid quod idem Can. in contextu aperte distinguat Sacrificium a communione, cum dicit, *toties esse Sacrificio participandum, quoties Corporis & Sanguinis Domini N. J. C. immolatio facta confiterit*; ubi vides communionem dici tantum participationem immolationis, seu Sacrificii.

Resp. ad 3ium: id provenire ex præcepto duntaxat Ecclesiæ, volentis fideles interesse non tantum Sacrificio Missæ, sed & præcipuis ejus cæremoniis, quas inter est offertorium & communio Sacerdotis.

- 178 Contra ejusdem Assertionis partem 2dam opponitur I. consecrationem utriusque speciei ad perficiendum Sacrificium esse necessariam cum Tridentino colligitur ex illis Christi verbis, *hoc facite in meam commemorationem*; at verba hæc Christus



stus dixit solum post consecrationem panis, ut refert Lucas C. 22. ergo ex Christi verbis hæc necessitas non recte deducitur.

II. Ad conficiendum Eucharistiæ Sacramentum sufficit consecratio unius speciei, ut docemur exemplo Christi in Emaus consecrantis; cur non igitur etiam ad perficiendum Eucharistiæ Sacrificium? præferum cum eadem sit potestas consecrandi & sacrificandi.

III. Ex Raphaele Volaterrano & Onuphrio Panuino (ut videre est apud Vasquez hic Disp. 123. C. 1.) referunt quidam, Innocentium IV. & rursus Innocent. VIII. Norwegis indulgisse, ut Eucharistiæ Sacrificium, ob vini penuriam, solum panis consecratione peragerent. Istud vero argumento est, consecrationem utriusque speciei non esse jure divino necessariam ad perficiendum Missæ Sacrificium.

Resp. ad I. C. Maj. N. Min. tametsi enim Lucas hæc verba referat solum post consecrationem panis: non asserit atamen post hanc solum esse dicta; Apostolus imo 1. Cor. 11. testatur eadem dixisse Christum etiam post Calicem consecratum.

Resp. ad II. non esse certum apud Theologos hujus probationis assertum. In eo quidem conveniunt: Sacerdotem, cui intentio est saltem virtualis conficiendi totum Sacrificium, singulas species seorsim valide consecrare, ita ut mox a perfecta panis consecratione sub ejus speciebus adsit Corpus Christi; inde si post consecratum panem deficeret Sacerdos, nec adesset alius, qui complere posset Sacrificium per vini etiam consecrationem, haberetur omnino Sacramentum Eucharistiæ sub specie panis sola valide confectum, at Sacrificium esset incompletum duntaxat. Ratio discriminis est: nam Corpus Christi, sub sola etiam panis specie contentum, est signum

sensibile ad spiritualem hominis nutritionem divinitus institutum, ac etiam sufficiens ad præstandum hunc effectum; contra, nisi utraque species consecratur, non habetur repræsentatio completa cruenti in cruce Sacrificii, quod factum est per Sanguinis effusionem: ergo nec perfectum ac completum Eucharistiæ Sacrificium, idque conformiter ad mentem Concilii Tridentini, ut ex jam dictis constat.

Quid vero sentiendum sit de eo casu, quo Sacerdos solum omnino panem, vino penitus secluso, consecrare vellet? de hoc variant sententiæ. Mihi cum Lugone hic Disp. 19. verisimilius videtur, ne Sacramentum quidem Eucharistiæ hoc casu valide confici: quomodo enim Sacerdos valide conficiat Sacramentum, si is agere intendat contra institutionem Christi quoad substantiam? ita autem agere intenderet in præfenti: constat quippe ex Tridentino ita Christum instituisse Eucharistiam, ut Sacramentum hoc esset simul Sacrificium secundum ordinem Melchisedech, ac per illud explicite repræsentaretur cruentum crucis Sacrificium, & mors Christi facta per effusionem Sanguinis. Consule sæpe jam laudatum Cap. 1. ex Trident. Sess. 22. præsertim illa sub ejus medium verba, quibus dicitur, Christum instituisse novum Pascha, se ipsum - - immolandum in memoriam transitus sui - - quando per sui Sanguinis effusionem nos redemit.

Hæc jam autem opinio si obtineat, elisum est Objectionis robur. Nec urget exemplum Christi in Emaus consecrantis: is enim, ut in aliis, sic & in hoc summo jure suo uti poterat, fasque illi erat, Sacramentum a ratione Sacrificii separare. Cæterum neque de Christo in Emaus consecrante certum est, sub sola panis specie eum Eucharistiam consecrassse: sunt quippe complures Theologi graves, qui & hanc consecrationem in utraque specie factam censeant, tametsi unius

tax-

tantum Evangelista meminerit; quin aliquibus videtur fractio illa panis penitus non fuisse Eucharistica.

Resp. ad III. cum laud. Lugone, dispensationes illas Pontificum commentitias esse; neque enim ab ullo unquam exemplar earum authenticum in lucem productum est; defectus etiam vini perperam pro causa adducitur, modica enim illa vini portio, quæ ad Sacrificia Missæ sufficit, haud difficulter commercii beneficio in Norwegiam devehiri potest. Volaterranus præterea concessionem hanc referens, indultum esse ait, *ut Calix sine vino consecratur*; quod ipsum (ut notat Lugo) fabulam prodit.

### Confectarium de Missa Præsanctificatorum, & Missa sicca.

Cum juxta doctrinam hoc §. assertam in Missæ Sacrificio *res oblata* sit ipse Christus, *actio autem sacrificandi* habeatur per consecrationem, ultro consequitur, Missam præsanctificatorum & Missam siccam non esse verum Missæ Sacrificium. Nempe

I. Missa præsanctificatorum dicitur illa, in qua certo ritu sumitur Eucharistia jam ante consecrata. Officii porro hujus ritus his fere apud Græcos absolvebatur: die Dominica, præter oblationem illius diei, quinque alios panes Sacerdos consecrabat pro totidem sequentibus feriis usque ad Sabbatum; tum singulis diebus sub vesperam in Ecclesia conveniebant cum Sacerdote fideles, ac, præmissis quibusdam orationibus & lectionibus sacris, unum e consecratis panibus sumebant: unde etiam Officium hoc dictum est Missa præsanctificatorum, a pane videlicet jam antea consecrato, seu præsanctificato. Nec dubitari potest originem Missæ hujus anti-

quam esse, cum jam Synodus Laodicensis, quæ juxta Baronium Concil. Nicænum I. antecessit, ejus meminerit Can. 49. Fiebat autem in memoriam passionis Christi, præsertim ejus jejunii: hinc etiam usus ejus erat solum Quadragesimæ tempore, ut testatur Balsamon, & colligitur ex Conc. Trullani Can. 52. qui ita habet: *in omnibus S. Quadragesimæ jejunii diebus, præterquam Sabbato & Dominica & S. Annunciationis die fiat sacrum Præsanctificationum ministerium.* Jam vero ritus hic proprius erat Orientali duntaxat Ecclesiæ; quin hodie etiam ab ea (non tamen universim) observatur, ut scribit Card. Bona. Apud Occidentales contra in usu nunquam fuit, si demas majoris hebdomadæ feriam sextam, qua etiamnum, præmissis quibusdam Missæ caeremoniis, Sacerdos sumit hostiam pridie consecratam: qui ritus tametsi Præsanctificationum Missæ speciem referat aliquam, ab illa nihilominus in multis diversus est, ut constat.

Hanc jam Præsanctificationum Missam æquivoce tantum, propter quamdam scilicet ejus cum vera Missa analogiam, nomine hoc compellari, nec esse verum Missæ Sacrificium, controverti non potest: tametsi enim re oblata vero Missæ Sacrificio propria non careat, deficit attamen in actione sacrificandi, cum sine consecratione, quæ ipsa est sacrificandi actio, peragatur. Idem ex eadem ratione sentiendum est de sacro Officio feria sexta maj. hebdomadæ nobis usitato. Nec officit, Sacerdoti ex more dicenti, *Orate fratres, ministerium populi nomine respondere: suscipiat Dominus hoc Sacrificium de manibus tuis &c.* oratione enim hac intelligitur Sacrificium late sumptum pro caeremoniis: vel certe id solum illa petitur, ut Sacrificium ante peractum Sacerdoti fidelium nomine illud consumenti proficiat, & ad laudem Dei cedat.

- 180 II. Missa sicca juxta Durantum in Rationali L. 4. hoc ritu peragitur: Sacerdos sacris vestibus indutus omnia, ut in  
vera

vera Missa, usque ad Offertorium recitat, tum & Præfationem ac orationem Dominicam cum reliquis precibus & Joannis Evangelio in fine; omittitur autem Canon cum Secretis: hostia & vinum non ponuntur in altari: nulla fit consecratio, nec communio. Officium id genus dictum est Missa *secca* propterea, quod in eo nec sumatur Christi Corpus, nec Sanguis ejus bibatur. Quo tempore primum ritus hic inductus sit, non satis liquet: ex Gaufrido interim & Rocherio constat Seculo XI. ejus usum fuisse, indultumque in solatium & pro devotione eorum, quibus verum Missæ Sacrificium celebrari non poterat, ut sunt præsertim in mari navigantes, unde & *Missa nautica* alio nomine dicta. Mos hic jam hodie abolitus est: nisi forte excipere velis Galliam, in cujus nominatim Claromontana Diocæsi occasione funeris ritum siccæ Missæ observatum ad An. 1718. narrat Cl. Moleon in Itinere Liturgico.

His vero attentis rursus clarum est, neque hoc Missæ siccæ officium habere veram Sacrificii Eucharistici rationem: cum enim in ea nec fiat consecratio, nec adsit Corpus & Sanguis Christi, destituitur tam re oblata, quam sacrificandi actione, sine quibus neutiquam constare potest verum Missæ Sacrificium. Quin (ut Bona ait) larva est Juntaxat & simulatio veræ Missæ, sicca proinde & jejuna procul dubio: quo nomine etiam a multis impugnata novimus.

Reliqua de Missa Præsanctificatorum reperies apud Alatum in Dissert. ad Nihusium, Goarium in Not. ad Eucharolog. & Theodorum Balsamon in Notis ad Trullan. Can. 52. De Missa sicca autem ex proposito agunt, præter Vicecomitem, Bonam, & Martene, Durantus in Rationali L. 4. C. 1. item L. 2. de Rit. Eccl. C. 4. ac cum primis BENEDICTUS XIV. S. P. in Tract. de Missæ Sacrif. Sect. 2. Num. 48.

## §. III.

*Quale sit Eucharistiæ Sacrificium: an videlicet non tantum latreuticum, sed etiam eucharisticum, impetratorium, & propitiatorium?*

JAM supra meminimus Sacrificium, spectato ejus fine, posse esse quadruplex: latreuticum videlicet, eucharisticum, impetratorium, & propitiatorium. Nunc quæritur: num hæc omnes Sacrificii species Eucharistiæ Sacrificio conveniant?

## ASSERTIO.

*Eucharistiæ Sacrificium est simul latreuticum, simul eucharisticum, impetratorium, & propitiatorium.*

181 **A**C primo quidem esse *latreuticum* dubitari nequit, cum Sacrificium quodvis ex genere suo ordinetur ad cultum Dei & protestandum supremum ejus in nos dominium. Idem porro est etiam *eucharisticum*, ut vel ipsum Eucharistiæ nomen indicat: offertur enim etiam Deo in gratiarum actionem; hinc Augustin. L. 1. contra advers. Leg. & Proph. C. 18. *quod est, inquit, sacratius laudis Sacrificium, quam in actione gratiarum?* - - *quod totum fideles in Ecclesia Sacrificio faciunt &c.* Est item *impetratorium*: valet quippe plurimum ad impetrandam nova beneficia, ac re ipsa in eum finem etiam ab Ecclesia offertur; unde jam Tertullian. L. ad Scapulam C. 2. dixerat, *Sacrificamus pro salute Imperatoris &c.* Denique *propitiatorium* est: ut enim Christus suum Crucis Sacrificium, sic & Ecclesia istud offert ad placandum Deum, & veniam peccatorum impetrandam; id quod satis indicat Apostolus ad Hebr.

Hebr. 5. dicens, omnem Pontificem' ex hominibus assumptum pro hominibus constitui, ut offerat dona & Sacrificia pro peccatis. Idem docent Origenes Hom. 13. in Levit. Cyrilus Hierosol. Catech. 5. Ambrosius L. 1. de Offic. C. 48. Hieronymus in C. 1. Ep. ad Tit. & Augustin. Qu. 57. in Levit. ubi, in multis Sacrificiis, inquit, quæ pro peccatis offerebantur, unum hoc Sacrificium significatur, in quo vera sit remissio peccatorum.

Hæc omnia cum primis evincuntur ex usu & praxi Ecclesiæ, Sacrificium Missæ offerentis tam in gratiarum actionem pro acceptis beneficiis, quam pro novis impetrandis, ac etiam ad remissionem peccatorum, ut constat ex ordine Missæ. Quibus demum accedit auctoritas Concilii Tridentini, quod postquam Sess. 22. Cap. 2. docuit *Sacrificium istud vere propitiatorium esse, cujus oblatione placatus Dominus, gratiam & donum penitentiae concedens, crimina & peccata etiam ingentia dimittit*; dein Can. 3. anathema dicit illis, qui asserunt, *Missæ Sacrificium esse tantum laudis & gratiarum actionis, - - non autem propitiatorium: vel soli prodesse sumenti, neque pro vivis & defunctis, pro peccatis, pœnis, satisfactionibus, & aliis necessitatibus offerri debere*. Ex sensu igitur Concilii Sacrificium Missæ supponitur esse eucharisticum: simul autem definitur esse impetratorium, & propitiatorium.

Atque hæc generatim dicta ex Tridentino, attentis ejus 182  
verbis, ultro indicant, proprios Missæ Sacrificii effectus esse non modo cultum Dei, & nostram erga illum gratitudinem: sed etiam beneficiorum quorumvis impetrationem, ac peccatorum tam gravium quam venialium, imo & pœnæ temporalis pro peccatis jam condonatis debitæ remissionem. Hos autem effectus omnes causat ex opere operato; cum enim Christus in hoc Sacrificio non tantum sit victima, sed etiam offerens principalis; atque ita Eucharistiæ Sacrificium non tam sit  
R. P. Muszka Tom. II. de Sacr. D d opus .

opus Sacerdotis quam Christi, pollet utique vi movendi Deum independentem a fide & probitate Sacerdotis, adeoque ex opere operato. Quod ipsum colligitur ex illis Tridentini verbis Sess. 22. Cap. 1. *hæc est oblatio munda, quæ nulla indignitate aut malitia offerentium inquinari potest.*

183 Nominatim attamen (quo Objectionibus occurras) de impetrationis & propitiationis effectibus, ex communi Theologorum sententia, cum Platellio hic C. 4. §. 6, hæc præterea observanda veniunt.

Ac primum quidem: quamvis per Missam ad impetrandum aliquid oblatam semper beneficium aliquod infallibiliter obtineatur, id quod ad salvandam Sacrificii impetratorii rationem sufficit: determinate nihilominus id, quod petimus, non semper conceditur. Cujus ratio esse potest multiplex: quia videlicet beneficium ejusmodi ad gloriam Dei & salutem nostram non expedit; vel quod nos illo indignos reddamus per peccata; aut quod diutius rogari velit Deus, nec vi pacti cum Christo initi teneatur determinate id, quod petimus, nobis elargiri intuitu Sacrificii.

Quod autem ad vim propitiatoriam attinet, Sacrificium Missæ non operatur eadem ratione remissionem culpæ & pænæ. Temporalis siquidem pæna (si nullus sit obex ex parte subiecti) virtute Sacrificii immediate & infallibiliter condonatur, & quidem vel tota vel ex parte saltem, pro ratione nimirum dispositionis ejus, cui a Sacerdote Missa applicatur. Contra remissio peccatorum mediate dumtaxat causatur, mediantibus scilicet actualibus gratiis, quæ intuitu Sacrificii conferuntur peccatori ad agendam poenitentiam, cujus dein virtute ipsa peccatorum remissio obtinetur. Inde, quia gratiæ istæ non sunt semper efficaces, non semper etiam ad Sacrificium Missæ consequitur remissio.

Ex his vero invicem collatis ultro elucet: in Missæ Sacrificio virtutem ex opere operato non eo per omnia modo  
fe



se habere, quo in Sacramentis; hæc quippe effectus sibi proprios, eosque determinatos, semper ac infallibiliter, & quidem immediate operari constat ex L. I. de Sacr. in Gen. Diff. III.

### Confectarium

de oblatione Missæ in honorem Sanctorum, item pro vivis & defunctis.

**M**Os Ecclesiæ vetus est Sacrificium Missæ offerendi ad honorem Sanctorum, ac etiam pro vivis & defunctis; utrumque autem istud recte fieri deducitur ex eo, quod Sacrificium hoc (ut probavimus) sit eucharisticum, impetratorium, & propitiatorium. Etenim

I. Cum Missa sit Sacrificium gratiarum actionis & impe- 184  
trationis, cur ea fieri non possit ad persolvendas Deo gratias pro beneficiis, quæ Sanctis aliquando collata sunt? cur item offerri nequeat ad id, quod petimus, per merita & intercessionem Sanctorum certius impetrandum? Certe oblatione id genus nihil derogatur gloriæ Dei; hocque sensu jam in primæva Ecclesia in honorem SS. oblatas Missas docent veteres Liturgiæ & Patres, præsertim Cyrillus Hier. Catech. 5. & Augustin. L. 20. contra Faustum C. 21. item L. 18. de Civ. Dei C. 27. Sed nec nunc in hujusmodi oblationibus alia est mens Ecclesiæ, ut declarat Trident. Sess. 22. Cap. 3. his verbis: *Quamvis in honorem & memoriam SS. nonnullas Missas Ecclesia celebrare consuevit, non tamen illis Sacrificium offerri docet, sed Deo soli, qui illos coronavit. Unde nec Sacerdos dicere solet: offero tibi Sacrificium Petre vel Paule; sed Deo de illorum victoriis gratias agens, eorum patrocinia implo- rat, ut ipsi pro nobis intercedere dignentur in cælis, quorum memoriam agimus in terris.* Inde Sess. eadem Can. 5. jure damnantur dicentes, imposturam esse, Missas celebrare in honorem Sanctorum.

D d 2

II.

185 II. Similiter, cum pro vivis & defunctis offerre possimus preces & pia opera, quibus gratias agamus pro beneficiis in eos collatis, novasque gratias illis impetremus, ac præsertim remissionem culparum & poenæ: utique potiori jure pro iis offerri potest Missæ Sacrificium, ceu opus peculiarem habens virtutem eucharisticam, impetratoriam, & propitiatoriam. Neque ritus hic novitius est: in omnibus enim veterum Liturgiis vivorum & defunctorum fieri memoriam legimus. Imo (quod notant Theologi) nequit Sacerdos sine piaculo ab oblatione excludere ullum e fidelibus, si non sit excommunicatus: omnes enim fideles (si excommunicatos demas) jus habent ad bona Ecclesiæ communia, e quibus præcipuum est Missæ Sacrificium. Quo jure ex adverso quia privantur excommunicati non tolerati; nequit pro iis fieri oblatio Sacrificii publica, ita ut in publicis Missæ orationibus nominentur; nihil vetat interim pro iis etiam offerre privata intentione, cum id nusquam vetitum legatur, & aperte doceat S. Thom. in 4. Dist. 18. Qu. 2. Art. 1. Pro omnibus demum in gratia defunctis utiliter offertur Sacrificium: non item pro iis, qui sine gratia decesserunt; utriusque ratio ex dictis colligitur.

186 III. Atque hic tam multiplex Sacrificii fructus præcipua indubie fuit occasio, ut subinde fideles offerrent honorarium aliquod (*stipendium* vulgo dicimus) pro Missa: quo videlicet ejus, sibi nominatim applicatæ, peculiari quodam jure fierent participes. Nec dubitari potest sine ulla simoniæ labe acceptari posse a Sacerdotibus id genus honoraria, ut docet vel usus & praxis Ecclesiæ; cavendum nihilominus, ne in hoc recedatur ab Urbani VIII. & Alexandri VII. Decretis, ac cumprimis notandæ propositiones damnatæ, quas pro fronte hujus L. recitavimus. At de hoc argumento uberius consulendi sunt Theologi Morales.

Corollarium  
de Missa judicii, seu purgatoria.

**V**eterum quidam, præter nunc memoratos fines, eo etiam referebant Missæ Sacrificium, ut virtute illius judicium fieret de accusato vel suspecto de crimine, num videlicet reus esset, an innocens; atque hinc dicta est *Missa judicii*, item & *purgatoria*: quæ quo ritu peracta sit? quidque de ea sentiendum? paucis insinuabimus.

I. Ritus Missæ purgatoriæ fuit duplex. Primus quidem hoc absolvebatur uno, quod Sacerdos sub ordinaria Missa Eucharistiam offerret sumendam judicando, monens: sumptionem hanc fore illi in damnationem, si reus esset. Quod si jam is Christi Corpus ultro suscepit, liber a crimine pronuntiabatur: reus contra, si sumere detrectavit. Fuisse autem hujusmodi judicii usum jam Seculo IX. dubitari non potest, cum (teste Graveson Hist. Eccl. Tom. 3.) in Concilio Wormatiensi An. 868. inter alios 45. Canones, etiam hic legatur: ut ad inquirendum furti auctorem in Monasteriis, Missa ab Abbate celebretur, & singuli Monachi pro purgatione sua Corpus & Sanguinem Christi percipiant, ut hoc pacto se innocentes probent. Ejusdem judicii exemplum de se dedit Gregorius VII, Pontifex ab Henrico III. Imp. criminum quorundam falso postulatus, ut meminit Baronius, & alii Annal. Eccl. Scriptores. 187

II. Alter Missæ purgatoriæ ritus peculiaria quædam præterea habuit. Ante omnia nempe Sacerdos benedixit ignem & ferrum, hocque simul in illum conjecit; tum dicta est Missa cum Introitu: *Iustus es Domine & rectum &c.* ejusdem orationes & lectiones a consuetis erant diversæ, ac ad judicium pertinentes; fiebat dein, ut supra, judicandi communicatio; hanc si non recusavit, peracta Missa & recitatis quibusdam 188

dam precibus contrectandum ei erat ferrum candens benedictum; id quod si absque ullo aduersionis vel tumoris vestigio præstitit, innocens nominatus est: sin autem, pro reo habebatur. Atque hic etiam probandi ritus in compluribus Christianorum Provinciis circa Seculum XI. in usu fuit, nominatim in Anglia, teste Boxhornio in Hist. universali; in Gallia ex Baluzzio Tom. 2. Capitular. Reg. Franc. C. 2. item in Hungaria, ut colligitur ex fragmento quodam Decreti Colomanni Reg. sub An. 1100. regnantis, & certum fit ex Libro a Georgio Monacho, deinde Episcopo Varadin. An. 1550. Claudiopoli edito, in quo probationis hujus judiciariæ in Ecclesia Varadinensi factæ exempla referuntur ab An. 1214. ad 1235. ac etiam ritus nunc memoratus describitur.

189

III. Quid jam vero de Missis id genus purgatoriis sentiendum? Communis opinio est, originem sumpsisse illas a fidelium partim ruditate, partim nimia in Deum fiducia; inde factum non raro, ut Deus, bonæ eorum menti se accomodans, hoc judicii ritu veritatem aperte detegeret, ac manifesto etiam prodigio plurium innocentiam comprobaret. Nunquam interim hujusmodi purgationes universim probabantur; tametsi etiam posterioribus Seculis non defuerint Viri docti, qui primum saltem Missæ judiciariæ ritum existimaverint non esse penitus improbandum: quos inter cumprimis numerandus est Vasquezius in 3. part. D. Th. Disp. 210. Cap. 1. 2. & 3. ubi in hanc rem ex Gratiano laudat Can. *Si Episcopo*, & Can. *sæpe*, Causa 2. Quæst. 5. ac etiam a juramento purgatorio arguit.

Nunc attamen utrumque hoc Missæ purgatoriæ genus ab omnibus rejicitur; nam (verba sunt BENEDICTI XIV.) *cum cæteris omnibus vulgaribus purgationibus ea etiam, de qua loquimur, a sacris Canonibus est sublata; non enim hoc Sacramentum Christus instituit, ut fontium reatus reperiretur: neque id fieri potest, quin ipse tentetur Deus; præterquam quod occasio*

*sto offertur Sacramentum indigne suscipiendi iis, qui ne fontes deprehendantur, sacram Eucharistiam sumere non perhorrescunt. Ita Land. S. P. in Tract. de Missæ Sacrif. Sect. 2. Num. 172. ubi ex proposito differit de Missa Judicii. Hæc eadem autem etiam intelligenda sunt de Missa Judicii per aquam ferventem vel frigidam.*

## DISSERTATIO V.

### DE CÆREMONIIS AD EUCHARISTIÆ SACRAMENTUM ET SACRIFICIUM PERTINENTIBUS.

**SS.** Eucharistia uti tam Sacramenti quam Sacrificii rationem habet: sic & Cæremoniæ ad eam pertinentes aliæ Sacramento, aliæ Sacrificio sunt propriæ. Ac eæ quidem, quæ ad illam, prout Sacramentum est, speciatim referuntur, fere sunt: in loco decenti Eucharistiæ asservatio, ejusdem adoratio, circumlatio in publicis supplicationibus, tum communio, de quibus quia jam sparsim per decursum hujus L. egimus, non est, cur eadem repetantur: de communionis attamen ritu quædam præterea §. IV. notabimus. De Cæremoniis etiam, nominatim ad Eucharistiæ Sacrificium pertinentibus, multa jam ex occasione insinuata sunt: isthic præinde de reliquis dumtaxat, facto earumdem peculiari delectu, differeamus. Quoniam autem omnes cæremoniæ in Missa usitatæ Eucharistiæ Sacramento non minus quam Sacrificio sunt communes, cum in hoc conficiatur illud: ad propositum nostrum satis fuerit eos isthic explanare ritus, qui ex disciplina Ecclesiæ ad Missam referuntur. Sit itaque

## §. I.

*De varietate Missæ.*

QUamvis Missæ omnes in substantia, hoc est, in re oblata & sacrificandi actione convenient, differentia nihilominus inter illas est multiplex, si accidentalalia spectentur; ut sunt: idioma, quo Missa dicitur; finis ejusdem, cum videlicet nunc pro vivis, alias pro mortuis offertur; ritus item & precationum vel actionum diversitas, ut est inter Latinorum & Græcorum Missas: apud ipsos imo Latinos etiam pro ratione temporis. Quæ quidem omnia partim ex jam dictis constant; partim colligi possunt vel inspectis Missæ Rubricis, Libris item Missalibus Latinorum, & Græcorum Liturgiis. Quod igitur reliquum est, de ea dumtaxat Missæ varietate agendum habemus, quæ a circumstantibus fidelibus repetitur, hoc est: de Missa solemni, privata, & solitaria.

*Missæ solemnis.*

- 190 I. SOlemnem Missam hodie dicimus eam, quæ assistente Clero, aut cum cantu saltem peragitur; spectata interrim veteris Ecclesiæ disciplina nomen hoc Missæ inditum est a solo populi circumstantis, offerentis, & communicantis conventu. Inde, si proprie & ex usu veteris Ecclesiæ loqui velis, Missa quævis, cui fideles interfunt ac etiam Eucharistiæ fiunt participes, *solemnis* dicenda est: propter quam ipsam populi fidelis collectionem dicta est *Collecta*, item *Missæ publica, generalis*, quin etiam *legitima*: eo quod primis Ecclesiæ legibus hoc potissimum Missæ genus sit comprobatum. Nec dubitari potest ejus cum primis in primæva Ecclesia fuisse usum; id certe evincunt vel orationes & Canon ipse, cum eorum verba magnam partem plurali numero, tanquam

quam plurium nomine, efferantur. Ita nominatim Sacerdos dicit: *Dominus vobiscum, Oremus, Memento - - omnium circumstantium* &c. post communionem, *quod ore sumpsimus* &c. in fine, *ite Missa est*, & plura his non absimilia, ut videre est in LL. Missalibus; qui mos hodie etiam retinetur, quamvis non intersit populus, sæpeque uno duntaxat præseste Ministro Sacrificium peragatur.

II. Neque tamen est, quod hinc Novatores modernam<sup>191</sup> Ecclesiam abusus infimulent: quasi vero verba illa falso enuncientur plurali numero, cum Missa fit præseste solo Ministro. Etenim uti primitus omnes circumstantes fideles Sacrificio assistebant, ac communiter omnes ad verba Sacerdotis respondebant: ita hodie vel unus Minister totius populi personam sustinet, omniumque Ecclesiæ fidelium nomine Sacerdoti assistit & respondet; ut adeo in Ministro vel uno repræsentetur Ecclesia, quæ sicut est una in multis fidelibus: ita per fidem, quæ eadem est in omnibus, tota est in singulis. Clariora hæc fient ex mox dicendis.

### Missa Privata.

I. **M**issa Privata, prout solemnè opponitur, ac ab hæreticis<sup>192</sup> ut plurimum impugnatur, est illa, quæ fit sine conventu & communionè populi, uno duntaxat Ministro, aut paucis aliis præsentibus, solo Sacerdote communicante. Ac istud quidem Missæ genus nobis usitatum esse, satis constat; quibus autem Novatores argumentis illud impetant, videre est apud Bellarm. L. 6. Euch. C. 9. & 10. ubi eis copiosè singulè respondet. Nobis, quo calumniantium ora obturemus, satis fuerit paucis ostendisse, in primæva etiam Ecclesia quandoque fuisse usum privatæ Missæ, ex quo rectè intuleris non esse novitium, ut volunt sectarii. Et quidem

R. P. Muszka Tom. II. de Sacr.

Ee

II.

193 II. Olim etiam sine conventu populi celebratam Missam, complura docent exempla. Ita Apostoli ipsi, quin convocarent fidelium multitudinem, *circa domos frangebant panem*, hoc est, sacrificabant; idem præstitit Christus in cæna ultima coram paucis Discipulis. An non autem hoc ipsum a Sacerdotibus factum, cum persecutionis tempore (ut constat ex Hist. Eccl.) in carcere, cryptis, & cavernis sacrum Missæ officium peragerent? sane loca hæc neque apta erant capiendæ multitudini, nec tutum erat eo fideles convenire. Sed & extra persecutionum tempus in privatis domibus & exiguis cellis, sine collectione proinde populi, Missam celebrasse Gregorium Naz. refert Sozomenus L. 7. Hist. Ambrosium Paulinus in Vita ejusd. Presbyterum quendam e suis Augustinus L. 22. de Civ. Dei; idem est de pluribus aliis, ut videre est apud Scriptores Ecclesiasticos. Quin eorundem testimonio, uno etiam tantum præsentem sacrificatum est nonnunquam; ut enim omittam alia, Joannes Damasc. in Hist. de Barlaam & Josaphat scribit, Barlaam Presbyterum in sua cella, solo Josaphat præsentem, Missæ Sacrificium peragere consuevisse. Huc pertinet etiam Concilii Nannetensis Can. 30, qui citatur ab Ivone in Decr. Par. 3. Cap. 70. ubi jubentur *Presbyteri non celebrare soli Missam, nisi habeant unum saltem secum, qui respondeat.*

194 III. Perinde etiam certum est, Missas, tametsi potissimum cum populi communione fierent, sine illa attamen non raro peractas, solo Sacerdote communicante. Colligitur id ex paulo ante laud. Concil. Nannetensi; tum ex Toletano XII. quod cum Can. 5. dicat, *quale erit Sacrificium, cui nec ipse sacrificans participasse dignoscitur?* aperte indicat, peracta quandoque Sacrificia sine ullius omnino communione: & tamen non amplius requirit, quam ut ipse Sacerdos communicet. Certius idem discimus ex Chrysostomo Hom. 3. in Ep. ad Ephes. conquerente, *frustra*, ait, *habetur quotidiana oblatio,*



tio: cum nemo sit, qui simul participet; & Hom. 17. in Ep. ad Hebr. scribente, plurimos semel tantum in anno ad Sacramenti communionem accedere. Ambrosius etiam L. 5. de Sacram. C. 4. notat, Græcos non nisi evoluto anno Mensæ Eucharisticæ reddi participes; & Serm. 34. populum suum hortatur, ut singulis diebus intersit Missæ: in Quadragesima autem, die saltem Dominico, offerat & communicet. En! Seculo IV. non amplius fuisse usum quotidianæ populi communionis, quin tamen propterea desineret mos sacrificandi quotidie. At de his plura laud. Bellarminus, & Card. Bona L. 1. Rer. Liturg. C. 13. & 14.

### Missæ Solitaria.

I. **H**oc nomine venit Missæ, quæ a Sacerdote peragitur sine Ministro, nullo etiam præsentē alio, ipsoque Sacerdote sibi respondente. Fuisse in usu hunc etiam Missæ ritum, apud Monachos saltem in solitudine degentes, dubitari nequit. Pro omnibus in hanc rem testimonium sit Stephani Eduensis Sec. X. Scriptoris, qui L. de Sacram. Alt. C. 13. hæc habet: *Sciendum est, quod si unus tantum sit præsens, vel nulli sint præsentēs, ut in Missis Solitariis, non ideo mutantur, quæ pluraliter solent fieri orationes. Primo enim Missæ non solebant celebrari sine collecta fidelium multitudine; postea mos inolevit Solitarios, seu Monachos, celebrare solitarias, quod eis concessum est ex indulgentia &c.* Quin easdem jam ante, videlicet VIII. saltem & IX. Seculo, ritu hoc solitario peractas, colligitur ex C. 43. Concilii Moguntini sub Leone III. & L. 1. C. 48. Synodi Parisiensis sub Gregorio IV. ubi Missæ solitariæ impugnantur & prohibentur: quod ipsum jam ante præstitit Concil. Nannetense supra laudatum.

II. Omnia porro hæc Concilia prohibitionis suæ causam eo potissimum referunt: quod, si nullus omnino adsit, ne-

queat Sacerdos cum veritate dicere : *Dominus vobiscum, Orate fratres, Gratias agamus Domino &c. Memento - - - omnium circumstantium &c.* At enim ratio hæc non probatur omnibus. Certe Petrus Damiani Sec. XI. Scriptor in Op. ad Leonem inclusum, a quo consultus erat: num liceret Eremitis, cum soli sacrificant, verba Missæ plurali numero efferre? cui Operi propterea Petrus titulum præfixit *Dominus vobiscum*: in hoc inquam Op. multis contendit, nihil in eo absurdi esse; cum verbis hujusmodi salutetur Ecclesia, cujus personam ipse Sacerdos gerit, quæque proinde in ipso moraliter est præsens per fidem & charitatem. Idem cum Petro sentit. Car. Bona sæpe jam cit. L. 1. C. 13. Num. 6. *quod si enim, inquit, Sacerdos, cum solus recitat nocturnas & diurnas preces, omnia pluraliter profert, quæ plurali numero in divinis officiis digesta sunt, dicit enim: Venite adoremus, Oremus, Benedicamus Domino &c. cum nemo illic sit, qui secum adoret, oret, benedicat; cur id non liceat Sacrificium offerenti, cum id agat in persona Ecclesiæ, cujus Corpus unum est unius fidei soliditate subsistens &c.* Ac omnino ipse etiam huic sententiæ accedo,

- 197 III. Addendum nihilominus cum eod. Bona: solitariæ Missæ usum, sine peculiari Sedis Apost. dispensatione, hodie jam non amplius esse ulli licitum, more contrario, qui olim vigeat, dudum antiquato & legibus Ecclesiasticis abrogato, ac nominatim Sec. XII. per Decretalem Alexandri III. in Cap. *Proposuit.* de Filiis Presbyter. Notanda attamen est isthic BENEDICTI XIV. opinio, quam Tract. de Missæ Sacr. Sect. 2. N. 52. his profert verbis: *etsi generalis ea regula est, non posse Missam sine Ministro celebrari juxta Decret. Alexandri III. - - tamen potest Sacerdos etiam sine Ministro Missam celebrare, sibi que ipse respondere, si Viaticum opus sit infirmo ministrare, ut docet Sylvius 3. p. qu. 83. Ar. 5. qui etiam censet Sacerdotem, cui die Festo non sit copia Missæ audiendæ, meliore*  
con-

*consilio Missam prætermittere, quam sine Ministro celebrare; quanquam negat illum peccare, si sine Ministro celebret. Ita ille secutus Sylvium, cujus dein verba recitat,*

## §. II.

### *De Loco & Tempore Missæ.*

**L**ocus, in quo ex usu & Legibus Ecclesiæ Sacrificium Missæ offertur, est Templum & Altare; tempus vero ejusdem, dies certi ad sacrificandum destinati, qui propterea Liturgici dicuntur. Seorsim de his singulis præcipua notabimus.

### Templum.

**T**empli nomine intelligitur ædes cultui divino destinata, 198  
& peculiari benedictione sacrata. Id genus vero domos jam in primæva Ecclesia fuisse, patebit ex mox dicendis; eas interim primi fideles (ne quid commune haberent cum Ethnicis, quibus Templi nomine veniebant idolorum fana) non vocabant *Templa*; verum ut plurimum *Ecclesiās*, a fidelium videlicet congregatione, quæ in illis fiebat. Fuisse porro jam inde a nascentis Christianitatis principio in usu hujusmodi sacras ædes ex ipso Apostolo discimus, cum 1. Cor. II. v. 18. ait: *convenientibus vobis in Ecclesiam audio scissuras esse; & v. 22. numquid domos non habetis ad manducandum, - - aut Ecclesiam Dei contemnitis?* ubi cum domibus habitationi communi destinatis opponat *Dei Ecclesiam*, indubium est, hoc nomine eum intelligere ædem divinis officiis consecratam. Hocque omnino sensu locutum Apostolum docet Basilius in Reg. brevior. Interrog. 310. & Augustinus Qu. 57. in Levit. ubi simul testimonium perhibent de Christiano-

rum sacris ædibus: quod ipsum habetur ex Irenæo L. 4. contra Hæref. C. 20. Tertulliano de Idololat. C. 7. Origene, Clemente Alex. & alijs.

Quamvis autem ædes hæ sacræ primitus angustæ & humiles fuerint; seu quod ampliores erigere tutum non fuerit sævientibus in Christianos gentilibus: seu quod exiguo fidelium cætui capiendo sufficerent: seu demum quod tenues eorum facultates majoribus impendiis non essent pares; subinde attamen persecutionibus sedatis, ac etiam crescente Christi gregis numero, præsertim a Sec. IV. amplæ etiam & magnificæ excitari cæperunt. Eædem progressu temporis varia nomina sortitæ sunt; præterquam quod enim communiter dicerentur *Ecclesiæ*, *Templa*, *Domus Dei*, *Domus orationis*, *Dominica*, *Oratoria*: vocabantur etiam *Tituli*, propter appositum Crucis vel Christi sacrum signum, quo ceu titulo quodam indicabatur, ædes illas ad cultum divinum pertinere; quæ super Martyrum sepulchra construebantur, aut eorum honori consecrabantur, dictæ sunt *Martyria*, uti aliæ ex causa simili *Apostolia*, vel *Propheta*; augustiores demum *Basilicæ*, seu Regiæ.

199 II. Universim porro veterum *Templa*, præsertim capaciora, tribus constabant partibus: atrio videlicet, aula, & sanctuario.

Atrium, seu Vestibulum Templi, fuit spacium quadratum, porticu & cellis instructum, ac *Flenibus* (erant Pœnitentes primi ordinis) item & egenis stipem corrogantibus destinatum; pro huius foribus erant fontes salientes, vel putei cum conchis & cantharis, quo fideles Eucharistiam sumpturi os manusque ablueri possent. His subinde suffecta sunt vasa, aquam benedictam fronti aspergendæ ministrantia.

Aula, seu ipsum Templi Corpus, dividebatur in Narthecem, Naon, & Ambonem. Narthex fuit locus januis proximus, & a Nao cancellis distinctus: atque in hoc consisten-

stendum erat Catechumenis, energumenis, & pœnitentibus secundi ordinis, qui *Audientes* dicti sunt. Naon, seu Navis Templi, pariete interposito, ad jungendos viros a mulieribus, secabatur bifariam; in hujus parte infima erant Pœnitentes tertii ordinis, seu *Prostrati*: tum Pœnitentes quarti ordinis, seu *Consistentes*: demum Fideles reliqui. Ambon, seu Chorus, fuit locus paulo editior; hic Clerus inferior psallebat, Evangelium a Diacono legebatur, ac recitabantur *Dipticha*, seu nomina fidelium, quorum peculiaris memoria fiebat in Missa.

Sanctuarium demum (dicebatur etiam *Sacrarium*, *Secretarium*, *Presbyterium*, *Tribunal*, *Sancta Sanctorum*) pars Templi fuit præcipua: in hac, præter Presbyterorum subsellia & eminentiorem sedem Episcopi, loco medio consistebat Altare princeps, in quo Sacerdos facie ad populum conversa Missarum solemnia peragebat. Altari fornicis instar imminabat sacrum reconditorium, seu Tabernaculum ex lapide vel metallo formatum, & columnis quatuor suffultum: quod ipsum vocabatur etiam *Ciborium*, a *Cibo Eucharistico* illic asservato. Ad latus collocabatur præterea aliud minus Altare (Græci Πε-  
9511 dixerunt) pro fidelium oblationibus, pane scilicet & vino in usum Sacrificii, destinatum.

III. Quod jam vero ad propositum nostrum facit cumprimis: tametsi ædes hæ sacræ ad omnia divina officia deservierint, præcipue attamen destinatæ erant ad celebrandum Eucharistiæ Mysterium, idque adeo, ut extra illas celebrari non posset. Testis hujus est Basilii in Regul. brevior. Inter. 310. dicens: quemadmodum ratio non permittit, ut vas ullum commune in Sancta introferatur; eodem modo etiam vetat Sancta in domo communi celebrari. Lex interim hæc non stringebat ita universim, ut gravi ex causa etiam extra Ecclesiam, præsertim persecutionum tempore, quovis loco Missas facere non liceret. Clarum in hanc rem testimonium est Dionysii Ale-

xan-

xandrini, ex quo Eusebius L. 7. Hist. C. 22. hæc verba recitat: *Cum ab omnibus fugeremur, - - tunc quoque dies festos egimus. Quivis locus, - - ager inquam, solitudo, navis, flubulum, carcer, instar Templi ad sacros conventus peragendos fuit.* Eadem constant ex Actis Martyrum Processi & Martiriani, Clementis Ancyрани, Luciani &c. ut videre est sparsim in Hist. Eccl. apud Nicephorum, Baronium &c. & in Vitis SS. apud Hagiographos Antverpienses.

De moderna Ecclesiæ disciplina si quæras: regulariter non licere Missæ Sacrificium offerri, nisi in Ecclesia ab Episcopo consecrata, vel saltem auctoritate ejus a Sacerdote benedicta, constat ex C. Nullus. de Consecrat. ubi istud præcipitur sub pœna depositionis; tum etiam ex Tridentino, quod Sess. 22. in Decr. de observ. & evitand. in Missa, præcipit Episcopis, *ne patiantur privatis in domibus, atque omnino extra Ecclesiam, & ad divinum tantum cultum dedicata oratoria, ab eisdem Ordinariis designanda & visitanda, Sanctum hoc Sacrificium a Secularibus aut Regularibus quibuscumque peragi.* Dictum autem est *regulariter*: nam in certis casibus, cum privilegio Sedis Apostolicæ aut Episcopi dispensatione, etiam in loco profano & sub dño Sacrificium peragi potest, ut habetur C. *concedimus.* de Consecrat.

### Altare.

201 **L**egimus Missæ celebrandæ locus, præter Templum, est Altare. Ita dictum quidam volunt ab altitudine, quasi *altam aram*: aram autem ab ariditate vel ardore, quod in ea olim ignis ad cremandas victimas arserit. Ut ut sit istud: dubitari nequit, jam primis Ecclesiæ temporibus Sacrificia Missæ super altaria fuisse peracta. Colligitur id ex Apocst. ad Hebr. 13. *habemus, inquit, altare, de quo edere non habent potestatem, qui tabernaculo deserviunt*; at certius est ex Basilio in Ps. 114. Gregorio Nyss. L. de Bapt. & passim aliis. Du

Duplex autem Altarium genus jam inde a principio Ecclesiae in usu fuit: fixa videlicet, & mobilia.

Fixa sunt, quæ immobiliter affiguntur alicui Ecclesiae loco; hæc eadem apud veteres etiam instar mensæ efformabantur, seu quod figura hæc cæteris esset oportunior ad sacrificandum, seu quod in altari fiat convivium eucharisticum; inde apud Scriptores Ecclesiasticos sæpe vocantur *Mensæ sacræ, Dominica &c.* Materiam quod attinet, primis seculis promiscue formabantur ex ligno vel lapide: Sec. V. leguntur fuisse etiam argentea: demum circa Sec. VI. partim usu, partim legibus inductum est, ut lapidea tantum adhiberentur. Cujuslibet interim materię fuerint, in figuram mensæ efformata imponebantur primum uni vel pluribus columnis: dein vero progressu temporis tumulo quadrato, ita ut formam tumuli referrent, cum videlicet passim super Martyrum sepulchra erigerentur; unde mos invaluit, ut hodie etiam nullo altare sine Martyrum reliquiis consecratur.

Aræ portatiles dicuntur, quæ loco moveri, ac alio facile deferri possunt; harum vero non minus nunc, quam in primæva Ecclesia usus fuit, imo etiam frequentior, cum Tyrannis sævientibus Sacrificii locum mutare sæpe necesse habuerint Sacerdotes. Efformantur autem hæc ipsa altaria in figuram tabulæ quadratæ, cui insertus sit lapis tantæ amplitudinis, ut in eo Calix & Hostia commode collocari possint. Sunt vero universim in supplementum altaris fixi; hinc usus eorum a veteri est pro iis casibus, quibus extra consecratam Ecclesiam Missa perficitur, e. g. in Oratoriis privatis, Templis non consecratis, sub dio &c. Græci id peculiare habent, quod in defectu altaris fixi non utantur Portatili nostro, sed pannis quibusdam altarium ritu consecratis, quos *Antimensia* vocant, eo quod loco Mensæ, seu Altaris adhibeantur.

II. Universim jam horum Altarium, seu fixa illa, seu mobilia sint, ea est prærogativa: quod regulariter a solo

R. P. Muszka Tom. II. de Sacr.

F f

Epi-

Episcopo consecrari possint, nec sine illis Missam facere liceat, idque non modo ex hodierna, verum etiam veteri Ecclesiæ disciplina. Utrumque (ne in recerta congeramus plura testimonia) patet ex Felicis IV. sub initium Seculi V. Pontificis Decretali de Eccles. & Altar. consecr. ubi non tantum confirmat, Ecclesias & Altaria consecrari debere: sed etiam testatur, antiquis Canonibus esse prohibitum, ne sacra Missarum solemnia extra Ecclesiam & sine Altari (magna necessitate excepta) ullus celebrare præsumat.

Non desunt interim (sateor) extraordinaria exempla peracti Sacrificii sine ullo Altari. Ita apud Hagiogr. Antverp. ad 15. Febr. legitur, Appollonium Brixien. Episcop. in velo cælitus demisso Missam fecisse, cum esset in carcere. Et Theodoretus, à Mari in carcere detento rogatus, cum altare deesset, in manibus Diaconorum consecravit Eucharistiam, ut ipse narrat Hist. Religiosæ C. 20. Metaphrastes etiam in vita Luciani Mart. refert, S. hunc Martyrem a discipulis in carcere rogatum, ut incruentam Deo litaret hostiam, pro Altari usum fuisse suo pectore, ac in eo consecrasset: *Mensa erit (verba sunt Luciani Mart.) hoc pectus meum, non futura Deo minus honesta ea, quæ sit ex inanimi materia; Templum vero sanctum vos mihi eritis, me ex omni parte circumdantes &c.* Complura his similia legere est apud Thomassinum in Discipl. Eccl. Alexandrum Nat. Baronium, & alios. Sed nempe hæc, ut pote extraordinaria, neque nisi peculiari instinctu divino facta, aut etiam ex pia simplicitate profecta, in exemplum trahi non debent.

### Dies Liturgici.

- 203 I. **S**ecundum hodiernam Ecclesiæ disciplinam, ut plurimum saltem receptam, diebus omnibus (si demas Feriam VI. majoris hebdomadæ) Missæ Sacrificium peragi potest: idemque



que regulariter unicum duntaxat a singulis Sacerdotibus, excepta Nativitatis Domini die, qua ter litare cuique licitum est. Inde spectato hoc more, dies *Aliturgicus* nobis unicus est, nempe Feria VI, maj. hebd. reliqui omnes sunt *Liturgici*: demum sola Natalis Domini festivitas dies *Polyliturgicus*.

II. Quod si jam veterum de hoc disciplinam consulas, 204 variam fuisse reperies. Vel Augustini ætate (ut ipse scribit Ep. 118.) quibusdam locis die quovis sacrificatum est; quibusdam contra tantum Sabbatho & Dominico: in aliis Dominico duntaxat. In Monasteriis ut plurimum soli Dominici & Festi dies erant Liturgici; certe Petrus Blacensis Ep. 86. testatur Carthusianos (quos primum Sec. XI. ortos novimus) solis Dominicis Missam celebrasse. De Græcis jam alias dictum, \*Quadragesimæ tempore eos Sabbatho tantum, & Dominico, ac Annunciat. Festo sacrificare solitos a multis Seculis. In ipsa Latina Ecclesia feria V. universim, Romæ Sabbathum, Alexandriæ etiam feria IV. & VI. olim erant dies aliturgici; Mediolani omnes ferias sextas in Quadragesima caruisse Sacrificio notat Card. Bona.

Contra dies polyliturgicos complures censuit vetus Ecclesia. Vel in Romana, primo die Januarii ab eodem Sacerdote duæ Missæ dictæ sunt, una de Octava Nativ. Domini, altera de B. Virgine; die Cænæ Domini Episcopus tres faciebat Missas, primam pro reconciliatione poenitentium, alteram pro conficiendo chrysmate, tertiam sero vespere de Festo: quod ipsum (teste Augustino Ep. 118.) in Africa est observatum; item in Vigilia Ascensionis Domini duæ fiebant Missæ, de Rogationibus videlicet, & de Vigilia; demum Festo Nativ. Dom. mos idem erat, qui hodie viget. Quid quod constet, Sacerdotes quosdam quotidie omnino bis aut ter etiam sacrificasse, ut de S. Udalrico Ep. retert Berno Angiensis, de SS. Norberto & Alberto Surius &c. imo Leonem

III. septem quandoque, ac etiam novem Missas celebrasse ex Walfrido Strabone narrat Baronius ad An. 816. Plura de his legere est apud Card. Bona Rer. Lit. L. 1. C. 17. quo toto argumentum hoc pertractat: ubi etiam variæ hujus circa di-  
es Liturgicos disciplinæ originem & causas reperies.

### §. III.

#### *De Apparatu ad Missam requisito.*

**A**pparatus ad Missam pertinens alius est Altaris, Sacerdotis alius; de utroque dicendum erit compendio.

#### Apparatus Altaris.

**Q**uæ præ aliis ad Altare pro Missæ Sacrificio instruendum ex disciplina utriusque Ecclesiæ adhiberi debent, sunt: calix, patena, corporale; item Christi in Cruce pendentis effigies, & luminaria. Jam vero

- 205 I. Horum tria priora excipiendæ ipsi Eucharistiæ proxime deserviunt, ut quisque novit. Nec dubitari potest, usum calicis in Sacrificio originem habere ab ipso Christo, cum instituens Eucharistiam (quod referunt Evangg.) acceperit Calicem, & dixerit, *hic est Calix* &c. Quamvis autem primis Seculis ut plurimum aurei vel argentei calices adhiberentur, ut apud Baronium ad An. 303. videre est; aliquando tamen in lapideis etiam, vitreis, corneis, imo & ligneis consecratio Sanguinis peracta est. Lapidiorum meminit Synodus Duziacen. C. 5. & Surius ad diem 16. Apr. in vita S. Theodori Archimandritæ; vitreorum, præter Irenæum & Hieronym. Gregorius M. L. 1. Dial. C. 7. de corneis testimonium est ex Synodo Calcutensi in Anglia sub Adriano I. Cap.

10. ubi usum eorum prohibet; demum de ligneis fidem facit vel S. Bonifacii Ep. in Synodo Triburiensi sub Formoso P. habiti celebre illud dictum: *quondam Sacerdotes aurei ligneis calicibus utebantur, nunc e contra lignei Sacerdotes aureis utuntur calicibus.* Sed nec moles & figura in omnibus fuit eadem; quidam enim leguntur fuisse ansati, & capacitatis prorsus magnæ, ut erant calices a Leone III. Ecclesiæ S. Petri donati, quos duabus ansis fuisse instructos, ac 36. 50. unum etiam 70. libr. ponderasse ex Anastasio Biblioth. & aliis refert Baronius in laud. Leone.

Hæc eadem tam de materia quam mole Patenæ notant Rituum Scriptores. Certe Anastasius Bibl. inter donaria Pontificum memorat patenas 25. ac etiam 30. libr. appendentes; harumque aureas quasdam, alias argenteas, & aliquas quidem ansis instructas. Quæ quidem Calicum & Patenarum moles ac figura eo indubie pertinebat, ut quotidianæ fidelium in Missa præsentium communioni essent oportuniora; inde, deficiente sensim communicantium numero, vasorum quoque factorum moles coepit diminui, ansarumque in iis usus aboleri.

Corporale, a Corpore Christi, quod in illo collocatur, dictum, primitus erat amplum adeo, ut eo totum altare tegetur. Colligitur id ex Ord. Rom. ubi præscribitur: *Diaconus accipiens Corporale ab Acolytha, alio se adiuvante Diacono, super altare distendat; quod tantæ quantitatis esse debet, ut totam Altaris superficiem capiat.* Amplitudo eadem esse debebat tanta, ut Calix parte Corporalis tegi posset: nullus enim tum adhuc erat palles usus; atque hunc morem hodie etiam a Carthusianis retineri notat Bona.

Modernam quod attinet disciplinam, de mole & figura tam factorum vasorum, quam Corporalis non est necesse dicere; quæ autem peculiaria de illis lege Ecclesiæ sancita ha-

bemus, hæc fere sunt. Calix & Patena debent esse consecrata ab Episcopo, vel alio ex privilegio Pontificis; eadem fieri oportet ex auro aut argento, vel saltem (urgente paupertate) ex stanno aut cupro, sic tamen, ut Calicis cuppa interiorius sit inaurata: ut docet partim usus, partim Rubricæ Missalis Romani, ac etiam Can. 44. & 45. de Consecrat. dist. 1. De Corporalibus autem statutum est: ut sint linea, ab Episcopo aut ab alio potestatem habente benedicta, eademque conserventur munda; ita Can. 47. de Consecr. dist. 1. & Innocent. III. de Eucharistiæ custodia.

De mystica demum horum significatione si quæras; sicut Altare est quædam figura Crucis, in qua cruentum suum Christus perfecit Sacrificium; ita Calix mystice repræsentat sepulchrum Domini, Patena lapidem sepulchri, Corporale Sindonem, uti istud notatur vulgari illo versu:

*Ara Crucis, tumulique Calix, lapidisque Patena,  
Sindonis officium candida bissus habet.*

- 206 II. Duo reliqua, Crucifixus nempe & lumen, sunt proprius ipsius Altaris apparatus; utrumque attamen ita necessarium, ut sine illis Missæ Sacrificium peragere non liceat. Et Lumen quidem aperte præcipitur Cap. ult. de Celebratione; pro Cruce autem facit Can. 3. Concilii Turonen. II. An. 561. habiti, ac etiam vetus Ecclesiæ consuetudo, cuius originem haberi a Traditione Apostolica probat Juenin Dissert. 5. de Euch. Quamvis autem ex ritu recepto requirantur duo luminaria cerea: in casu attamen necessitatis unum sufficit, imo etiam ex alia materia juxta aliquos; sine omni autem lumine nunquam permittitur fieri Sacrificium: quod ipsum satis indicat, luminis in Missa usum sub gravi culpa obligare. Crucifixi contra necessitas non est tanta, ut sine eo sacrificari non possit

possit gravi ex causa e. g. ad viaticum ministrandum &c. quin universim ejus usum non esse sub obligatione gravi censet communior cum Lugo, disp. 20. Sect. 2.

Cæterum Crucifixi simulacrum in Altari proponitur, ut ejus aspectu Sacerdos admoneatur Passionis Domini, cujus in Missa fit commemoratio; Luminis autem usus est tam in typum Sacrificii, cum in eo cera vel oleum consumatur in obsequium Dei: quam in signum fidei & lætitiæ spiritualis, ut jam L. I. de Sacr. in gen. Dissert. VI. §. IV. meminimus.

### Apparatus Sacerdotis.

**I.** P<sup>E</sup>culiaries illæ vestes, quibus sacrificaturi induuntur, 207 Sacerdotis apparatus definiunt: amictus videlicet, alba, cingulum, manipulus, stola, & casula. Ac hæc quidem ab Episcopo, vel alio privilegium habente, benedicta esse oportere: ac, si quid eorum desit, omittendam esse Missam, generalis est regula; actio quippe, quæ debito modo fieri nequit, potius ommittenda est, quam indecenter & contra præscriptum Ecclesiæ exercenda. Hæc ipsa interim regula non ita universim stringit, ut sine aliqua harum vestium in certis casibus Missa peragi nequeat: nec eadem est omnium obligatio; de quibus minutim pertractant Theologi Morales, quos consulere poteris. Nobis ea duntaxat hic de memoratis sacris vestibus exequi est propositum, quæ ad earum originem & significationem mysticam pertinent. Itaque

**II.** Amictus, sive humerale (olim *ambolagium*, vel *ana-208 boladium*) est linteum ad amiciendos & contegendos sacrificantis humeros destinatum; ex quo de utriusque nominis ethymologia statuere pronum est. Cl. le Brun usum ejus Sec. IX. inductum contendit ad operiendum collum, quod ad hanc usque ætatem moris non erat contegere: nuditas autem hæc

hæc in sacrificante cumprimis visa est indecora. Ac omnino hujus Seculi Scriptor Amalarius L. 2. C. 17. *amictus est*, inquit, *primum vestimentum nostrum, quo collum cingimus*. Cæterum eodem primitus etiam caput ipsum obnubere moris erat, ut scribit Rupertus Abb. L. 1. de Divin. Offic. C. 19. quod etsi non sit in usu amplius, ex præscripto attamen Rubricarum aliquantum saltem super caput adducendus est principio amictus, cui ritui consonat Oratio tum dici solita: *imponere Domine Capiti meo galeam salutis ad expugnandos diabolicos incurfus*. Vestimento porro hoc, juxta Rupertum Abb. & Clericatum, mystice significatur divinitas in Christo humanitate cooperta; item velum, quo a militibus facies Christi velata fuit nocte passionis; tum & *galea salutis*, seu spes, qua Sacerdos munitus esse debet ad insultus dæmonis retundendos: quod postremum indicatur supra memorata Oratione.

Alba, seu Carhisia, est coloris candidi tunica, eademque ad talos usque protensa, inde Græcis dicitur ποδήρης. Usus vestis hujus fuisse Seculo IV. primumque ejus mentionem fieri in Concil. Carthagin. sub finem hujus Sec. celebrato notat Fleuri in Hist. Eccl. L. 20. Utebantur eadem principio etiam Acolythi, & univertim alii Clerici inferiores: deinde, quo in ministerio sacro ad ambulandum expeditiores essent, *super pelliceum suffectum* scribit Cl. Saussay in Panoplia Clericali. Mystice significat vestem albam, qua Christus apud Herodem indutus & illusus est: item cordis munditiem, hinc Sacerdos camisiā induens orat: *Dealba me Domine & munda cor meum* &c. ut ex S. Thoma & Innocentio III. notat Gavantus in Rubr. Missæ. Olim feria VI. Parasceves Sacerdos induebatur camisia nigra in signum luctus.

Cingulum, quod veteres etiam baltheum vel zonam vocarunt, adhibetur ad Albam corpori adstringendam. Primum ejus meminit Ordo Rom. & post eum Rabanus Maurus L. 1. de

de

de Instit. Cler. C. 13. ubi ait : *Sacerdotes - - accinguntur baltheis, ne castitas sit remissa & negligens* ; ex quo colligitur cinguli sacerdotalis usum esse in Symbolum castitatis, quod ipsum indicat Sacerdotis se præcingentis oratio : *præcinge me Domine cingulo puritatis, & extingue in lumbis meis humorem libidinis &c.* Hinc modernus S. P. in sæpe laud. Tract. Sect. 1. N. 42. monet : *sacerdotale cingulum non circa pectus, quod quidam perperam faciunt, sed circa renes circumduci debere.*

Manipulus olim erat instar mappulæ & sudarioli, hisque imò etiam nominibus compellabatur, ut legere est apud Rabanum Maurum & Amalarium. Principio adhibebatur ad sudorem, lachrymas, & fordes quasvis sub Sacrificio abstergendas ; hinc pendebat ex manu sinistra, quo & in promptu esset sacrificanti, nec tamen eum in actionibus impediret. Progressu temporis, & quidem juxta Card. Bona Seculo X. juxta alios (ut notat hodiernus S. P.) jam Sec. VIII. sudario suffectus est manipulus, a manu sic dictus : neque amplius propter necessitatem, sed ornatus causa : simul etiam in memoriam illius sudarii, quo a muliere quadam (quæ vulgo Veronica dicitur) sudans Christi vultus est absterfus. Verius tamen est in signum pœnitentiæ, quod colligitur ex Sacerdotis oratione : *merear Dom. portare manipulum fletus & doloris &c.*

Stolæ nec forma semper eadem, nec idem nomen fuit. Ut enim nihil dicam de Ethnicorum, Judæorum, ac Regum stolis : Sacerdotes primitus erant indumentum, quo corpus totum, præter caput & collum, ad talos usque obtegeretur. Quando autem in eam, quam nunc habet formam, mutatum sit, non constat ; Durantus interim in Rationali L. 3. C. 5. id factum putat eo tempore, quo Alba deferri cœpit. Id certum est, veteribus dictum esse *Orarium*, vel a fascia, quæ in limbo seu ora antiquarum stolarum affuta fuit, ut censet Bona :

R. P. Muszka Tom. II. de Sacr.

G g

vel

vel a græco verbo *τεω*, id est, *obseruo*, ut ait Balsamon: vel denique ab orando, quod indicat Concilium Toletan. IV. Can. 59. & Burius in suo Onomast. existimat. De mystica etiam ejus significatione variant opiniones. Concilii Moguntini An. 813. habiti Cap. 28. verba fundamentum præbent dicendi, stolæ usum apud Sacerdotes esse in signum dignitatis sacerdotalis; Gavantus & Clericatus ea Crucem Christi significari putant, ac idcirco in modum crucis illam ad pectus Sacerdotis componi; juxta alios designat innocentiam vel pignus æternæ vitæ, ut colligitur ex oratione: *redde mihi Dom. stolam immortalitatis, quam perdidisti in prævaricatione* &c.

Casula, teste Rabano Mauro L. 1. Inst. Cler. C. 21. dicitur a *casu*, eo quod totum hominem tegat, quasi minor casa; eadem, quod propter amplitudinem limbis errantibus veluti evagaretur, dicta est etiam Planeta. Olim promiscue fuit tam secularium quam sacrarum personarum commune indumentum, ut constat ex Procopio L. 2. de Bello Vandal. C. 26. Cassiano L. 1. Inst. C. 17. & aliis apud Bona. Quo autem tempore nominatim ad usum sacrificantis Sacerdotis translata sit, non liquet; certe Walfridus Strabo Cap. 24. contendit, primitus Sacerdotes in Altaris ministerio usos fuisse Dalmaticis: quia interim Ordo Rom. hoc vestis genus peculiariter sacrificanti Sacerdoti attribuit, dubitari nequit, jam ante Sæculum VIII. Casulam ad Sacerdotis apparatus pertinuisse. Erat autem primitus figuræ prorsus rotundæ, ac ampla adeo, ut Sacerdotem totum a collo usque ad pedes obtegeret, unica in medio apertura relicta, qua caput immitteretur; hinc sacrificans necesse habebat casulam super brachia revolvere & complicare, quo manibus uti posset. Eadem, ne prolixitate & amplitudine sua in certis actionibus e. g. genu flexione, incensatione &c. Sacerdotem impediret, a Ministris paululum elevabatur; unde hodie dum perducit mos casulam paulisper ele-



elevandi sub consecratione, elevatione Hostiæ & Calicis, item incensatione. Cæterum progressu temporis, quo ad sacrum Altaris ministerium esset commodior, scindi & minui cœpit: dum denique a Seculo X. & XI. ad eam, quam nunc habet, formam sensim redigeretur. In mystica demum ejus significatione conveniunt omnes: designari videlicet illa Crucem Christi & jugum Legis Evangelicæ; hinc & Crucis figura insignitur, & Sacerdos eam assumens orat: *Domine, qui dixisti jugum meum suave est &c.*

## §. IV.

*De Cæremoniis, quibus ipsum Missæ Sacrificium peragitur.*

EXplicandi demum sunt ritus, quorum usus est in ipsa Missæ celebratione, quique haud incongrue reducuntur ad certas Sacrificantis actiones, orationes item & lectiones, tum communionem Sacerdotis & fidelium.

### Actiones.

- I. **P**Rinceps in Missa Sacerdotis actio est ipsa actio sacrificandi, seu consecratio; ac de hac quidem super. Dissert.
- §. II. satis jam dictum. Reliquæ sunt: elevatio oculorum & manuum; inclinatio corporis & genuum incurvatio; tussio pectoris; osculum altaris & Evangelii; signi Crucis formatio super librum, altare, oblata &c. mixtio aquæ & vini; manuum lotio. De singulis minutim disserere prolixum foret; generatim autem duo insinuasse suffecerit: *1*um quidem nullam actionum harum esse, quæ non fuerit primis Ecclesiæ Seculis usurpata; deinde, omnibus ex sensu Ecclesiæ inesse significationem mysticam, omnes proinde referri ad cultum Dei & reverentiam SS. Mysterii.

G g 2

II. Ita

- 210 II. Ita (ut exemplum demus aliquod) oculorum & manuum elevatio est signum nostræ in Deum fidei & spei, ac etiam petitionis; utriusque præterea usus fundatur in S. Liberis. *Volo viros orare - levantes puras manus*, ait Apost. 1. ad Thimoth. 2. Oculos autem ipsum Christum sæpe in cœlum levasse, legitur Matth. 14. Lucæ 9. & alibi: quin in ultimæ coenæ actione etiam id eum fecisse asserit Abrosius L. 4. de Sacram. C. 5. Tertullianus autem in Apologet. C. 30. scribit Christianos orare nudo capite, extensis manibus, & sublati in Cœlum oculis. Universim autem certe tam elevatio, quam memoratæ actiones reliquæ omnes leguntur in vetustissimis Patrum Liturgiis: quod videre est apud Bellarm. L. 6. de Euch. C. 15. & sparsim in hodierni S. P. Tract. de Sacrific. Missæ Sect. 1. apud quos etiam singularum reperies sensum mysticum: quanquam hunc non difficile sit ultro assequi, si modo actionum ratio attendatur.

### Lectiones & Orationes.

- 211 I. **L** Ectionum nomine veniunt universim ea, quæ in Missa leguntur, quin expressam ad Deum precationem contineant, uti sunt: Epistola, Evangelium, ac ut plurimum versus Introitus, Gradualis, Tractus, Offertorii & Communionis. Orationes vero sunt ipsæ preces, seu dein ex Psalmis, seu aliunde depromptæ, ut: Psalmus *Judica*, Confessio, *Lytania Kyrie eleison*, Hymnus *Gloria*, Symbolum, Collecta, Præfatio, Canon, Dominica Oratio, & aliæ. Quem jam finem his spectet Ecclesia, quidque iis significari velit, sensus ipse tam Lectionum quam Orationum docet: universim utem hæc omnia ad cultum Dei, majestatem & venerationem SS. Mysterii, ac denique ad excitandam fidelium pietatem, eorumque utilitatem dirigi, res ipsa manifestum facit.

II. Ne-

II. Neque interim existimandum, in ipso statim Ecclesiæ<sup>212</sup> exordio hæc omnia in usu fuisse sacrificantibus. Certe Gregorii M. Honorii, & Strabonis (apud Bonam Rer. Lit. L. I. C. 5.) opinione, Apostoli perfecerunt Sacrificium sola Oratione Dominica, & verbis consecrationis. Quia attamen iidem, Procli Constantinopol. L. de traditione Liturg. & Chrysostomi Hom. 27. in Ep. I. ad Cor. testimonio, plures hymnos ac orationes in Sacrificio recitarunt, quin & fidei dogmata explanarunt, adhibitis etiam quibusdam cæremoniis; ad conciliandos Scriptores hos congrue dixeris: Apostolos pro ratione circumstantiarum nunc brevem, prolixiorē alias sacrificandi methodum usurpasse; brevem quidem in casu necessitatis & impendente persecutionis periculo: prolixiorē contra extra id genus casum & pericula.

Nominatim autem actiones, lectiones & orationes quoad feriem ac numerum, ut nunc in usu sunt, non nisi progressu temporis inducta esse fatendum est. Plurima attamen ex primævæ Ecclesiæ disciplina originem ducunt; licet complures subinde etiam in his intercesserint mutationes quoad ordinem & verborum contextum, ut patebit conferenti invicem veteres Liturgias, hodiernum item Missæ ordinem. Ita Psalmum *Judica*, *Lytaniam Kyrie eleison*, Hymnum *Gloria*, Epistolam, Evangelium, Symbolum & Præfationem primis jam quatuor Seculis recitata fuisse sub Missæ Sacrificio Bellarminus & Bona probant Patrum & veterum Liturgiarum testimonio. Contra: recitationem versuum, quos Introitum dicimus, a Cœlestino I. Seculi V. Pontifice introductam esse inter AA. convenit; usus Symboli Constantinopolitani apud Orientales antiquior est, quam apud Occidentales: apud Germanos certe & Gallos potissimum invaluit Seculo IX tempore Caroli Magni; ut in fine Missæ innitium Evangelii S. Joannis per totam Ecclesiam legeretur, primum Seculo XVI. a Pio V. constitutum est. At

hæc pluribus Bellarmin. L. 6. de Euch. C. 16. & 17. item Bonaer. Lit. L. 2. a C. 2. usque ad C. 11.

- 213 III. Præcipua porro Missæ Orationum pars est Canon, quem cumprimis insectantur hæretici; ut adeo Lutherus peculiari L. de abominat. Can. audeat dicere, *homines audito Canonis nomine debere fugere, ac si illis diabolus occurrisset*. Est vero nobis isthic Canon idem ac regula, seu ritus in celebratione Missæ præcipue observandus. Proprie incipit a verbis, *Te igitur clementissime Pater* &c. & ex communione sententia durat usque ad orationem Dominicam, a qua fit initium præparationis pro S. Communione. Quamvis autem (teste Isidoro L. 1. de Offic. C. 15.) S. Petrus, adjunctis ad verba Christi certis precibus & ritibus, formam aliquam Sacrificii celebrandi primus dederit: postea tamen complures actiones & preces adjectæ sunt a variis Pontificibus usque ad Gregorium M. post quem a nemine amplius adjectum est quidquam Canonis, ut colligitur ex Walfrido L. de observation. Eccles. C. 22. Unde (quod recte notat Bellarm.) tametsi Liturgia quædam dicatur Basilii, alia Ambrosii &c. nulla tamen earum ab his Patribus est integre confecta; verum ea duntaxat, quæ illorum ætate fuit in usu, ad meliorem formam redacta, detractis videlicet quibusdam, adjectis aliis, sic tamen, ut substantiales partes Liturgiæ ab Apostolis traditæ remanerent. Ita dicitur Liturgia Gregorii Magni: hic attamen ad eam id solum contulit, quod in illam reposuerit antiquos Ecclesiæ ritus, quosdam autem recentiores expunxerit, ut ipse scribit L. 7. Ep. 73.

- 214 IV. Quod jam vero Sectarîi potissimum in Canone insectantur, est ejus (ut illi quidem volunt) novitas & falsitas. Sed nimirum probanda hæc forent, non asserenda duntaxat. Sane vel ea, quæ nunc compendio retulimus, antiquitatem Canonis abunde comprobant. Quid quod, ut antiquitatis prærogati-

gativam obtineat, fatis sit illum integre omnino, ut nunc in usu est, referri in Ordine Romano, quem cum Alcuinus & Amalarius (uterque floruit tempore Caroli M. proinde sub initium Seculi IX.) citent, necesse est fuisse Seculo VIII. scriptum; hic idem autem Ordo cum Canonem referat, ceu rem in Ecclesia usitatam, ac universim ab omnibus observandam, ultro consequitur, usum Canonis hodierni multo esse antiquiorem Ordine Romano. Quamvis autem ante hunc nullus (quod sciam) Liber totum Canonem contineat: extant nihilominus complures longe vetustiores, in quibus legere est certas Canonis partes, ex quibus de reliquis prudens sit conjectura. Ita apud Ambrosium L. 4. de Sacram. C. 5. & 6. verbis aliquantum mutatis referuntur hæ quatuor præcipuæ Canonis partes: *Quam oblationem tu Deus &c. Qui pridie quam pateretur &c. Unde & memores &c. Supra quæ propitio &c.* Cum autem Ambrosius has Canonis partes non instituerit, sed eas, ceu in Ecclesia jam usitatas, recitet, institutionem earum Ambrosio antiquiorem esse, proinde jam ante Seculum IV. aut saltem hoc Seculo in usu fuisse, certo evincitur. Plura in hanc rem vide apud Bellarm. sæpe laud. L. C. 20.

Canonis falsitatem objectantibus Sectariis, non est, cur speciatim respondeamus. Consulant ejus verba & sensum: ac omnia cum dogmate, quod Orthodoxi profitemur, coherere deprehendent: modo pervicacia iis lucem veritatis non eripiat. Quod si autem rem enucleatius sibi velint propositam, adeant Bellarminum, veritatem Canonis quoad omnes ejus singillatim orationes L. 6. de Euch. a C. 21. sex integris Capitibus demonstrantem.

### Communio.

**U**Na e præcipuis Missæ partibus est Communio, cum ea in sensu alias exposito Sacrificium consumetur. Ac hoc jam

jam de illius ritu multa sparsim per decursum hujus L. insinuata sint: supersunt nihilominus complura alia, quæ Rituum Scriptores ex veteri non minus quam moderna Ecclesiæ disciplina adnotarunt. Ac primum quidem

215 Quod ad veterem disciplinam attinet, cum quotidianæ communionis, ejusque sub utraque specie, mos vigeret, hæc fere observata sunt.

I. Communicaturi nitidiorem induebant vestem, ac in ipso Templi ingressu os manusque abluebant; in quem usum pro foribus atrii fuisse fontes salientes, vel puteos cum conchis aut cantharis, supra notavimus. Moris hujus meminit Chrysostomus Hom. 52. in Matth.

II. Appropinquante communionis tempore Diaconus sacrificanti assistens inclamabat: *Sancta Sanctis!* item, *agnoscite vos invicem!* ut legitur in quibusdam Liturgiis teste Card. Bona; quem morem etiamnum a Græcis observari, idem scribit in sæpe laud. Op. L. 2. C. 17. Monitum vero istud eo pertinebat, ut nemo nisi munda conscientia & charitate aliis conjunctus sacram mensam accederet.

III. De ordine communionis dispensandæ ex Ord. Rom. & Græcorum Euchologiis hæc notat laud. Bona. Ante omnes Eucharistiam sumpsit Sacrificans; tum eandem porrexit Presbyteris præsentibus, qui omnes una cum ipso (ut nunc fit in ordinatione Presbyterorum) idem Missæ Sacrificium faciebant; dein sequebantur Diaconi, Subdiaconi, aliique ex Clero; post hos Monachi, Diaconissæ, & sacræ Virgines; demum reliqui fideles, sic tamen, ut viri fæminas antecederent.

IV. Sed nec locus idem fuit communicantium. Sacrificans communicabat in medio Altaris, alii Presbyteri in circuitu, Diaconi retro Altare, Subdiaconi & Clerici in limine Sanctuarii, reliqui extra cancellos. Quamvis autem Græci  
juxta

juxta Trullan. Can. 69. permetterent Imperatorem ingredi Sanctuarium, non perinde etiam Latini; hinc Theodosium, ex græco more eum locum occupantem, inde amovit S. Ambrosius, *docens* (inquit Bona) *purpuram Imperatorem facere, non Sacerdotem*. Hunc vero morem diu permanisse in Ecclesia Latina, colligitur ex Concil. Toletani IV. C. 17. & Bracarenfis I. C. 31. quorum primum fuit habitum Sec. VI. alterum Sec. VII. Hoc eodem interim Seculo mos hic mutari cœpit, nam in Synodo Turonensi C. 4. sancitum legitur: ne laici intra cancellos ad Missam stare præsumant, ad communicandum vero omnibus pateant Sancta Sanctorum.

V. De situ communicantium (si Sacrificantem excipias, qui in utraque Ecclesia stans semper communicabat) variant AA. Græcos quidem stantes SS. Mysteria percepisse, certum est ex eorum LL. Ritualibus, & Græcis PP. Cyrillo Hierof. Catech. 5. & Chrysostomo Orat. in Encaenia; quem ipsum morem hodie etiam observant. Idem universim de veteribus etiam Latinis asserunt Martene, Habert, Valesius &c. idque propterea, quod extra cancellos positi vix flexis genibus oblata dona percipere potuissent; plurimi contra alii negant, aut saltem incertum id esse volunt.

VI. Verba illa, *Domine non sum dignus &c.* quæ nunc Sacerdos profert, communicaturi ipsi recitabant; quem ritum Durantus L. 2. de Rit. Eccl. C. 55. antiquissimum esse probat, ejusque testes profert Origenem & Chrysostomum. Sacerdos vero Eucharistiam porrigens eadem fere verborum formula, quæ nunc est, utebatur, nempe: *Corpus Domini N. J. C. conservet animam tuam*, ut legitur in Vita Gregorii M. a Joanne Diacono scripta. Apud alios alia, sed fere ejusdem sensus, præferuntur verba: ad quæ communicantes respondebant *Amen*, ut certum est ex Cyrillo Hierof. Catech. 5. Ambrosio L. 4. de Sacram. C. 5. Sacramentario Gregorii, &

R. P. Muzka Tom. II. de Sacr.

H h

aliis.

aliis. Interea autem, dum communio fieret, canebatur Psalmus aliquis, uti istud Bona probat ex Liturgia S. Jacobi, Ordine Rom. & Augustino; atque hinc est, quod hodie etiam *Communio* vocetur Antiphona illa, quam Sacerdos præmittit orationi *Post-communio* dictæ.

VII. Modus percipiendæ Eucharistiæ id peculiare habuit: quod Viri nuda manu exciperent Corpus Christi, fœminæ autem linteolo manui superposito, ut constat ex Cyrillo Hieros. Catech. 5. & Augustino Serm. 252. de Temp. Gregorio Naz. Hieronymo &c. Qui mos (si conjectura uti licet) profluxerit inde, quod primitus indultum fuerit fidelibus Eucharistiam domum deferre. Cæterum, tametsi ritus hic primis Seculis frequens fuerit: non tamen semper idem, nec diuturnus; certe hodiernum Corporis Christi dispensandi modum jam ante Gregorii M. tempora obtinuisse constat ex ejus L. 3. Dial. C. 3. sed & Sanguinem Eucharisticum sumendi non eadem semper fuit ratio: primum bibebatur ex calice; dein aucta fidelium multitudine, ad vitandum (ut opinor) effusiois periculum fugebatur per fistulam auream vel argenteam, & quidem tam a Sacerdote quam populo, ut habetur ex Ord. Romano; alias (præsertim apud Græcos) porrigebatur cochleari simul cum particula panis consecrati. Atque postremum hunc communionis ritum hodie etiam conservant Græci, ac recepto nomine *Communionem intinctam* dicunt; ejus auctorem Cl. Lupus Oper. suorum Tom. 5. pag. 411. putat fuisse S. Chrysostomum.

VIII. Post peractam communionem (ut habet Ordo Rom.) ad signum a Diacono datum canebatur Psalmus, Gloria Patri &c. tum Sacerdos dixit Orationes, quæ nunc vocantur Post-communio: recitabantur autem tam ad agendas Deo gratias, quam ad populum benedicendum; demum, postquam Sacerdos fideles salutavit his verbis *Dominus vobiscum,*



*biscum*, per Diaconum annuntiata est missio, seu venia abeundi hac vel simili formula: *ite, missa est*; vel, *ite in pace*; aut, *procedamus in pace*. Pluribus hæc Bona.

Si modernam porro de SS. Communionem disciplinam<sup>216</sup> spectes, peculiaria sunt: a quo, quibus, & sub qua specie ministrari possit Eucharistia? quæ item, & quando ad eam percipiendam obligatio? tum, quæ in suscipientibus dispositio animi sit necessaria? at de his ex proposito jam actum Dissert. II. & III. Reliquum igitur est, ut speciatim dicamus tam de ritu, quo ex usu nunc recepto dispensatur S Communio: quam de tempore, quo ea fidelibus dispensari possit. Itaque

I. Inter Communicantes fideles Sacrificanti soli proprium est, ut Eucharistiam in altaris medio stans sumat: inclinato nihilominus corpore, ad testandam in SS. Mysterium reverentiam. Quo autem ritu idem tam Corpus quam Sanguinem Christi percipiat, ex Missæ Rubricis cuique notum est. Quosdam e Romanis Pontificibus olim cum solemnem Missam dicerent, in solio confidentes Eucharistiam sumpsisse notat BENEDICTVS XIV. laud. Op. Sect. 1. N. 339. idem attamen addit, hodierno more id ab illis stantibus fieri. Habet interim Rom. Pontificis communio peculiaris quædam, ac a reliquorum Sacrificantium communione omnino diversa. Et enim (teste ibid. laud. BENEDICTO) cum solemniter celebrat, post consecrationem ad altare peractam conscendit Pontificale solium, ac in eo stans, corpore paululum inclinato, facieque ad populum conversa sumit dimidium Hostiæ consecratæ, parte ejus altera pro Diacono & Subdiacono Cardinalibus reservata; dein (ut refert Bona) ex Calice sibi porrecto per auream fistulam fugit partem Sanguinis Eucharistici, parte residua rursus pro Diacono & Subdiacono relicta. Rationes hujus ritus dantur variae; præcipua est, quod Ponti-

fex in editiore folio communicans typum gerat Christi palam in cruce immolati: hinc etiam in memoriam calami, quo Christus in eadem cruce fel & acetum degustavit, utitur fistula ad fugendum Sanguinem. Ita Angelus Rocca peculiari Difert. de hoc ritu Oper. suorum Tom. I.

II. Reliqui omnes, nempe non sacrificantes, tam laici quam Clerici (si in solemnī Missa Pontificis excipias Diaconum, qui stans communiat) flexis genibus percipiunt Eucharistiam. Hanc vero priusquam distribuat Sacerdos, præmissa Ministri vel aliorum adstantium Confessione, dicit *Misereatur vestri &c.* item *Indulgentiam & absolutionem &c.* cujus moris nulla extare antiqua monumenta fatetur Gavantus; le Brun autem ortum dicit Sec. XIII. e consuetudine Ordinum Mendicantium. Illud vero, quod Sacerdos distributioni præmittat versum *Domine non sum dignus &c.* item *Corpus Domini nostri &c.* a veteri more originem habere constat ex priore N. Versu VI. *Verba illa &c.*

III. Secundum ritum jam nunc usitatum non modo sub Missa, sed & post finitam illam, aut extra tempus Missæ ministratur S. Communio. Tamen si autem etiam posterioribus Seculis in usu fuerit, ut Sacerdos, post finitam Missam communicans fideles, id præstaret Casula & Manipulo depositis, in sola proinde Alba & Stola: hodie interim jam obtinuit, ut toto Sacerdotali apparatu retento Eucharistiam dispenset. Quod si extra tempus Missæ id muneris obeat, satis est Superpelliceo & stola indutum esse. De Missa defunctorum peculiaris movetur quæstio: an sub ea etiam Communio ministrari possit? Negant plurimi propterea, quod id Sac. Rit. Congregationis Decreto An. 1701. sit vetitum; ac cum eadem S. Congregatio dein An. 1711. sententiam mutaverit, ac etiam Decretum illud vulgari prohibuerit, ut testatur BENEDICTVS XIV. qui tum Promotoris Fidei munus gerens laud. Con-

Congregationi interfuit, non est, cur in defunctorum etiam Missa Communio distribui non possit: nisi forte obset longior contraria alicujus particularis Ecclesiæ consuetudo. Vide laud. Pontificis Tract. de Sacrif. Missæ Sect. 2. N. 163.

IV. Controverſum etiam est nominatim: num nocte Nativitatis Domini, item feria VI. in Parasceve, ac demum Sabbato Sancto ministrari possit Eucharistia? Nos, prætermittis aliorum opinionibus, satis habemus de hoc proferre sententiam sæpe laud. hodierni Summi Pontificis. Is autem paulo ante cit. Sect. N. 166. id omnino vetitum esse asserit: exceptis etiam infirmis, quibus S. Viaticum quovis tempore ministrare licet. Et pro nocte Nativ. Dom. quidem citat Sac. Congr. Rit. Decretum An. 1641. 7. Decemb. pro feria VI. autem Parascev. Decret. An. 1622. 19. Febr. quibus hoc tempore populi communio fieri prohibetur. Pro Sabbato Sancto etsi nulla peculiaris prohibitio habeatur, existimare se tamen ait, *servandam esse consuetudinem communem nullis, nisi infirmis, eo die Eucharistiam ministrandi*; quam in rem dein ex Macri Vocabul. Eccles. illud assert: *quod in Missa Sabbati Sancti non dicatur ea antiphona, quæ appellatur Communio, quia videlicet non fiebat populi Communio &c.* Cæterum his omnibus contraria eaque diuturniore quarundam Ecclesiarum praxi derogatum novimus: ut adeo, si qua in Ecclesia vetus mos est, his etiam diebus populo Communionem ministrandi, is omnino improbari non possit, dum peculiari sit tuto abrogetur.

Hæc nos de SS. Eucharistiæ Ritibus (quoad licuit) compendio; uberior notitia haberi potest ex Josephi Vicecomitis LL. quinque de Rit. Missæ, Joannis Steph. Duranti LL. tribus de Rit. Eccl. Menardo item, Lupo, Martenio, ac a nobis hac Dissert. sæpe laudatis Bellarmino, Bona, cum primis autem ex eruditissimi Pontificis BENEDICTI XIV. Commentario de Sacrif. Missæ.

## LIBER V.

*De Pœnitentia.*

**D**OCTRINAM de Sacramento Pœnitentiæ Dissertationibus quinque explanabimus, acturi I. de ejus Natura, Existentiâ, & Institutione II. de Materia & Forma. III. de Effectibus & Necessitate. IV. de Ministro & Subjecto. V. de Ritibus secundum veterem & modernam Ecclesiæ disciplinam. Præmittemus more nostro Canones Tridentinos, quædam item Oecumen. Conciliorum Decreta, & Propositiones damnatas.

## CANONES CONCILII TRIDENTINI.

*Ex Sess. XIV. de Sanctissimo Pœnitentiæ Sacramento.*

**I.** **S**I quis dixerit, in Catholica Ecclesia Pœnitentiam non esse vere, & proprie Sacramentum pro fidelibus, quoties post Baptismum in peccata labuntur, ipsi Deo reconciliandis, a Christo Domino nostro institutum: anathema sit.

**II.** Si quis Sacramenta confundens, ipsum Baptismum, Pœnitentiæ Sacramentum esse dixerit, quasi hæc duo Sacramenta distincta non sint, atque ideo Pœnitentiam non recte secundum post naufragium tabulam appellari; anathema sit.

**III.** Si quis dixerit, verba illa Domini Salvatoris: Accipite Spiritum sanctum: quorum remisistis peccata, remittuntur eis; & quorum retinueritis, retenta sunt: non esse intelligenda de potestate remittendi, & retinendi peccata in Sacramento Pœnitentiæ, sicut Ecclesia Catholica ab initio semper intellexit; detorserit autem, contra institutionem hujus Sacramenti, ad auctoritatem prædicandi Evangelium, anathema sit.

IV.

IV. Si quis negaverit, ad integram, & perfectam peccatorum remissionem requiri tres actus in pœnitente, quasi materiam Sacramenti Pœnitentiæ, videlicet, Contritionem, Confessionem, & Satisfactionem, quæ tres Pœnitentiæ partes dicuntur; aut dixerit, duas tantum esse Pœnitentiæ partes, terrores scilicet incussos conscientiæ agnito peccato, & fidem conceptam ex Evangelio, vel absolutione, qua credit quis sibi per Christum remissa peccata; anathema sit.

V. Si quis dixerit, eam Contritionem, quæ paratur per discussionem, collectionem, & detestationem peccatorum, qua quis recogitat annos suos in amaritudine animæ suæ, ponderando peccatorum suorum gravitatem, multitudinem, foeditatem, amissionem æternæ beatitudinis, & æternæ damnationis incursum, cum proposito melioris vitæ, non esse verum, & utilem dolorem, nec præparare ad gratiam, sed facere hominem hypocritam, & magis peccatorem; demum illum esse dolorem coactum, & non liberum, ac voluntarium; anathema sit.

VI. Si quis negaverit, Confessionem Sacramentalem institutam, vel ad salutem necessariam esse jure divino: aut dixerit, modum secretæ confitendi soli Sacerdoti, quem Ecclesia Catholica ab initio semper observavit, & observat, alienum esse ab institutione, & mandato Christi, & inventum esse humanum; anathema sit.

VII. Si quis dixerit, in Sacramento Pœnitentiæ ad remissionem peccatorum necessarium non esse jure divino, confiteri omnia, & singula peccata mortalia, quorum memoria cum debita, & diligenti præmeditatione habeatur, etiam occulta, & quæ sunt contra duo ultima Decalogi præcepta, & circumstantias, quæ peccati speciem mutant; sed eam Confessionem tantum esse utilem ad erudiendum, & consolandum pœnitentem, & olim observatam fuisse tantum ad satisfactionem canonicam

nicam imponendam ; aut dixerit, eos, qui omnia peccata confiteri student, nihil relinquere velle divinæ misericordiæ ignoscendum ; aut demum, non licere confiteri peccata venialia ; anathema sit.

VIII. Si quis dixerit, Confessionem omnium peccatorum, qualem Ecclesia servat, esse impossibilem, & traditionem humanam, a piis abolendam ; aut ad eam non teneri omnes, & singulos utriusque sexus Christi fideles, juxta magni Concilii Lateranensis constitutionem semel in anno, & ob id suadendum esse Christi fidelibus, ut non confiteantur tempore Quadragesimæ ; anathema sit.

IX. Si quis dixerit Absolutionem Sacramentalem Sacerdotis non esse actum judiciale, sed nudum ministerium pronunciandi, & declarandi remissa esse peccata confitenti : modo tantum credat se esse absolutum ; aut Sacerdos non serio, sed joco absolvat ; aut dixerit, non requiri Confessionem poenitentis, ut Sacerdos eum absolvere possit ; anathema sit.

X. Siquis dixerit, Sacerdotes, qui in peccato mortali sunt, potestatem ligandi, & solvendi, non habere ; aut non solos Sacerdotes esse ministros absolutionis, sed omnibus, & singulis Christi fidelibus esse dictum : Quæcunque ligaveritis super terram, erunt ligata & in cælo : & quæcunque solveritis super terram, erunt soluta & in cælo ; & quorum remisistis peccata, remittuntur eis ; & quorum retinueritis, retenta sunt ; quorum verborum virtute quilibet absolvere possit peccata ; publica quidem per correptionem duntaxat, si correptus acquieverit : secreta vero per spontaneam confessionem ; anathema sit.

XI. Si quis dixerit, Episcopos non habere jus reservandi sibi casus, nisi quoad externam politiam, atque ideo casuum reservationem non prohibere, quo minus Sacerdos a reservatis vere absolvat ; anathema sit.

**XII.**

XII. Si quis dixerit totam pœnam simul cum culpa remitti semper a Deo, satisfactionemque pœnitentium non esse aliam, quam fidem, qua apprehendunt Christum pro eis satisfecisse; anathema sit.

XIII. Si quis dixerit, pro peccatis, quoad pœnam temporalem, minime Deo per Christi merita satisfieri pœnis ab eo inflictis, & patienter toleratis, vel a Sacerdote injunctis, sed neque sponte susceptis, ut jejniis, orationibus, eleemosynis, vel aliis etiam pietatis operibus, atque ideo optimam pœnitentiam esse tantum novam vitam; anathema sit.

XIV. Si quis dixerit, satisfactiones, quibus pœnitentes per Christum Jesum peccata redimunt, non esse cultus Dei sed traditiones hominum, doctrinam de gratia, & verum Dei cultum, atque ipsum beneficium mortis Christi obscurantes; anathema sit.

XV. Si quis dixerit, Claves Ecclesiæ esse datas tantum ad solvendum, non etiam ad ligandum; & propterea Sacerdotes, dum imponunt pœnas confitentibus, agere contra finem Clavium, & contra institutionem Christi; & fictionem esse, quod virtute Clavium, sublata pœna æterna, pœna temporalis plerumque exsolvenda remaneat; anathema sit.

## DECRETA

### ALIORUM CONCILIORUM.

*Concil. Lateranense IV. An. 1215. Can. 21. statuit:* Omnis utriusque sexus fidelis, postquam ad annos discretionis pervenerit, omnia sua peccata confiteatur fideliter, saltem in anno, proprio Sacerdoti, & injunctam sibi pœnitentiam studeat pro viribus implere, - - si quis autem alieno Sacerdoti voluerit iusta de causa sua peccata confiteri, licentiam prius

*R. P. Muzka Tom. II. de Sacr.*

li

postu-

postulet, & obtineat a proprio Sacerdote, cum aliter ille ipse non possit absolvere vel ligare.

*Ibidem sub finem:* Caveat Sacerdos, ne verbo aut signo, aut alio quovis modo aliquatenus prodat peccatorem: *dein violati sigilli reum jubet a Sacerdotali officio deponi, & in arctum Monasterium ad perpetuam agendam pœnitentiam detrudi.*

*Constantiense Sess. 8. An. 1415. 4. Maji, inter alios Wicleffi, 45. Articulos, hos etiam damnavit:* Sacerdos non potest peccatorem confessum & contritum absolvere. *Item:* si homo debite fuerit contritus, omnis confessio exterior est superflua & inutilis. *Item:* laicus, si vir frugi fuerit, Clavium potestatem a Christo accepit.

*Florentinum in Decr. pro Arm. §. de Pœnitentia.* Quatum, *inquit,* Sacramentum est pœnitentia, cujus quasi materia sunt actus pœnitentis, qui in tres distinguuntur partes: quarum prima est cordis contritio, ad quam pertinet, ut doleat de peccato commisso, cum proposito non peccandi de cætero; secunda est oris confessio, ad quam pertinet, ut peccator omnia peccata, quorum memoriam habet, suo Sacerdoti confiteatur integraliter; tertia, sit satisfactio pro peccato secundum arbitrium Sacerdotis, quæ quidem fit præcipue per orationem, jejunium & eleemosynam.

*Idem in Decr. eod.* Forma hujus Sacramenti sunt verba absolutionis, quæ Sacerdos profert, cum dicit: ego te absolvo &c.

*Idem ibidem:* Minister Sacramenti Pœnitentiæ est Sacerdos habens auctoritatem absolvendi ordinariam, vel ex commissione Superioris.



## PROPOSITIONES DAMNATÆ

*Ab Alexandro VII.*

*Propof. XI.* Peccata in Confessione omiffa, feu ob inftans periculum vitæ, aut ob aliam caufam, non tenemur in fequenti Confessione exprimere.

XIII. Satisfacit præcepto annuæ Confessionis: qui confitetur Regulari, Epifcopo præfentato, fed ab eo injufte reprobato.

XIV. Qui facit Confessionem voluntarie nullam, fatisfacit præcepto Ecclefie.

XV. Pœnitens propria auctoritate fubftituere fibi alium poteft, qui loco ipfius pœnitentiam adimpleat.

*Ab Innocentio XI.*

*Propof. LVII.* Probabile eft, fufficere attritionem naturalem, modo honeftam.

LVIII. Non tenemur Confeffario interroganti fateri peccati alicujus confuetudinem.

LIX. Licet sacramentaliter abfolvere dimidiate tantum confeffos, ratione magni concursus pœnitentium, qualis v. g. poteft contingere in die magno alicujus feftivitatis, aut indulgentiæ.

LX. Pœnitenti habenti confuetudinem peccandi contra legem Dei, naturæ, aut Ecclefie, etfi emendationis fpes nulla appareat, nec eft neganda, nec differenda abfolutio; dummodo ore proferat, fe dolere & proponere emendationem.

LXI. Poteft aliquando abfolvi, qui in proxima occafione peccandi verfatur, quam poteft, & non vult omittere; quin imo directe, & ex propofito quærit, aut ei fe ingerit.

LXIV. Absolutionis capax est homo, quantumvis laboret ignorantia Myſteriorum fidei, & etiamſi per negligentiam etiam culpabilem, neſciat Myſterium SS. Trinitatis & Incarnationis Domini N. I. C.

*Ab Alexandro VIII.*

*Propoſ. IX.* Revera peccat, qui odio habet peccatum mere ob ejus turpitudinem, & diſconvenientiam cum natura, ſine ullo ad Deum offenſum reſpectu.

X. Intentio, qua quis deteſtatur malum, & proſequitur bonum, mere ut cœleſtem obtineat gloriam, non eſt recta, nec Deo placens.

XIV. Timor gehennæ non eſt ſupernaturalis.

XV. Attritio, quæ gehennæ, & pœnarum metu concipitur, ſine dilectione benevolentia Dei propter ſe, non eſt bonus motus, ac ſupernaturalis.

XVI. Ordinem præmittendi Satisfactionem abſolutioni induxit non Politia aut inſtitutio Eccleſiæ, ſed ipſa Chriſti lex, & præſcriptio, natura rei id ipſum quodam modo diſtante.

XVII. Per illam praxim mox abſolvendi, ordo pœnitentiæ eſt inverſus.

## DISSERTATIO I. DE NATURA, EXISTENTIA, ET INSTITUTIONE SACRAMENTI PŒNITENTIÆ.

### §. I.

*Quid, & quotuplex ſit Pœnitentia?*

**Q**uod Latinis eſt *Pœnitentia*, Græci μετανοια dicunt, a verbo ſcilicet μετανοειν, quod idem eſt, ac poſt cogitare; unde, ſpecta-

ſpectato vocis etymo *μετανοια* eſt *mentis mutatio*, ſeu *reſpiſcentia*. Vocabulum autem *Pœnitentia* Latinorum omnium ſententia ducit originem a *pœna* vel *punitio*ne: ut adeo *pœnitere* idem ſit, ac *pœnam tenere*, ſe ipſum *punire*. Inde Iſidorus Hiſpal. L. 6. Origin. & in Exhort. ad pœnitent. *Pœnitentia*, inquit, *nomen accepit, quaſi punitentia aut pœna-tenentia, per quam ſcilicet homo pœnitendo punit, quod male admifit peccando*. Ex hoc autem ultro conſequitur, quod cum in Scriptura Gen. 6. item 1. Reg. C. 15. & alibi legitur, Deum pœnituiſſe, iſtud ſenſu duntaxat improprio accipi oportere: pro eo videlicet, quod Deus conſtituerit aliquid mutare, ſicut homines ea, quorum eos pœnitet, mutare conſueverunt, ut exponit Catech. Concilii Trident. Par. 2. de Sacram. Pœnit. Nobis deinceps ſermo erit de ſola Pœnitentia propriè tali; quæ quia ſpectari poteſt vel ut Virtus, vel ut Sacramentum eſt, utriusque ante omnia definitionem dabimus.

### Definitio Virtutis Pœnitentiæ.

**V**irtus Pœnitentiæ eſt habitus inclinans ad dolorem & deteſtationem peccati commiſſi, ad emendationis item propoſitum, & voluntatem Deo ſatiſfaciendi pro injuria illi per peccatum illata.

Hæc omnia clara ſunt, ut adeo explicatione opus non habeant; ſatis fuerit igitur aliqua ad uberioſiorem notiſiam hinc deducere. Et quidem

I. Cum habitus Pœnitentiæ inclinet ad deteſtationem peccati, emendationem, & ſatiſfactionem, qui actus ſunt honeſti, quibuſque Exech. 18. Deus promittit vitam æternam, dubitari nequit, Pœnitentiam eſſe Virtutem propriè talem. Eadem vero cum ad hos actus inclinare poſſit ex motivo cujuſlibet virtutis, e. g. charitatis, ſpei &c. atque ſic pertinere ad quamlibet virtutem, hoc ſenſu dicitur *Virtus generalis*.

Est nihilominus etiam *Virtus specialis* : nam stricte sumpta speciale motivum habet, honestatem scilicet relucens in placando Deo & compensanda divina injuria; quod motivum nulli virtuti alteri est proprium. Neque interim ista officunt, quo minus dicatur simul esse quædam *justitia specialis*, eademque latiore quodam sensu reducatur ad speciem *justitiæ commutativæ*. Ratio *1<sup>mi</sup>* est: quia sicut peccata sunt contra jus Dei, ita Pœnitentia, per quam illud reparatur, est quædam hominis ad Deum justitia, longe proin superior illa, quæ est hominis ad hominem. Ratio *2<sup>di</sup>*: tametsi enim plerique ad justitiam commutativam requirant æqualitatem inter injuriam & satisfactionem, hæcque in præsentia non habeatur; cum nihilominus Pœnitentia stricte sumpta ex mente D. Thomæ sit compensatio pro offensa, eadem simul est quædam pro offensa commutatio, præsertim cum fiat secundum voluntatem Dei offensi: id quod sufficit ad justitiæ commutativæ latiore sensu acceptam.

II. Objectum materiale virtutis Pœnitentiæ, seu materia circa quam versatur, est omne peccatum personale præteritum & proprium; hoc enim solum cadit sub detestationem retractativam & emendationis propositum. Objectum autem formale, seu motivum Pœnitentiæ consistit in honestate speciali, quæ habetur in placatione Dei & reparatione divinæ offensæ. Finis ejusdem est ipsa hæc Dei placatio & offensæ reparatio, seu compensatio. Demum actus Virtutis Pœnitentiæ proprii sunt: dolor de peccato, ejus retractatio, satisfactio, & propositum emendationis; atque hi actus veniunt nomine Pœnitentiæ actualis.

De his omnibus minutim ac copiose Theologi disputant speciatim in Præliminari Tractatu ad Sacram. Pœnitentiæ; quia interim horum præcipua ipsi etiam Sacramento Pœnitentiæ sunt propria, præsertim cum Virtus Pœnitentiæ secundum

dum suus actus sumpta sit partialis materia hujus Sacramenti, a methodo communi consulto recedimus: opinamurque nos ad propositum Theologi facturos, si ea, quæ ad Virtutis Pœnitentiæ notitiam pertinent, sparsim per hujus L. decursum exequamur. Fiet vero istud potissimum Dissert. II. & III.

### Definitio Sacramenti Pœnitentiæ.

**P**œnitentia sub ratione Sacramenti accepta est ritus quidam externus, quo ex institutione Christi per Sacerdotis absolutionem homini contrito & confesso peccata post Baptismum commissæ remittuntur.

Definitione hac exponitur tota Sacramenti Pœnitentiæ natura: materia quidem per contritionem & confessionem; forma per Sacerdotis absolutionem; effectus per remissionem peccati post Baptismum admissi; demum additur ex institutione Christi, sine qua Sacramenti novæ Legis ratio non habetur. Sed nempe hæc ipsa pluribus deinceps explananda erunt.

Nunc notasse suffecerit, ex hac ipsa definitione patere discrimen, quod Virtutem inter & Sacramentum Pœnitentiæ intercedit. Nimirum, cum illa in actibus pœnitentis tota consistat, hoc præterea Sacerdotis absolutione perficitur. Sed nec eadem est utriusque quoad necessitatem ratio: etenim Virtus Pœnitentiæ quovis tempore peccatori fuit necessaria; contra Sacramenti Pœnitentiæ necessitas primum cœpit cum Lege nova: quin & in hac aliquando a peccatore potest obtineri salus sine Sacramento, non item etiam sine virtute Pœnitentiæ. Hæc demum cum Catechismo Rom. Par. 2. Tit. de Pœnit. interior Pœnitentia dici potest, cum solis actibus internis peragi queat: illud vero exterior, cum sine actu externo confessionis & absolutionis nunquam perficiatur.

## §. II.

*An detur verum novæ Legis Pœnitentiæ Sacramentum? & quando sit a Christo institutum?*

**P**OST Sacramenti Pœnitentiæ definitionem asserenda est ejus existentia; quia vero hæc haberi nequit sine Christi institutione, de hac pariter, ejusque nominatim tempore dicendum erit. Uti autem Sæctarii complures in iis, quæ Virtutem Pœnitentiæ spectant, ab Ecclesiæ doctrina dissident, ut Dissert. II. & III. insinuabimus; ita non desunt, qui Sacramentum Pœnitentiæ omnino sublatum velint: ac de his nunc ante Assertionem compendio agemus.

Sæctarii Sacramentum Pœnitentiæ negantes.

3 I. **S**UNT quidam, qui ad hanc Sæctariorum classem referant Montanistas, Valdenses & Wicleffitas; at, mea quidem opinione, errarunt hi circa Pœnitentiæ Sacramentum, illud attamen penitus sublatum noluerunt.

Certe Montanistæ, tametsi graviora quædam crimina, idololatriam videlicet, homicidium, & mœchiam a solo Deo, nullatenus autem ab Ecclesia remitti posse assererent: agnoverunt nihilominus datam esse Ecclesiæ potestatem reliqua peccata post Baptismum commissæ remittendi, ut constat ex Tertulliano L. de Pudicit. C. 18. non negarunt proinde Pœnitentiæ Sacramentum.

Valdenses etiam, cum (Reynero teste) de Sacr. Pœnit. C. 5. docuerint, quod nullus possit absolvi a malo Sacerdote; item quod bonus laicus habeat potestatem absolvendi: item, quod confitendum sit potius bono laico, quam malo Sacerdoti &c. circa Ministrum

strum Sacramenti omnino errarunt, ipsam nihilominus Pœnitentiam e numero Sacramentorum non expungebant. Pluribus istud persequitur erud. Bossuet Ep. Meld. L. 2. in Hist. Variation. ubi probat, Valdenses septenarium Sacramentorum numerum constanter retinuisse usque ad Sec. XVI. hocque primum a Calvinianis inductos, ut duo tantum Sacramenta cum ipsis profiterentur.

Wicleffitarum demum circa Sacram. Pœnitentiæ error idem plane fuit, qui Valdensium, ut rursus egregie ostendit Bossuetus in laud. Hist. L. 11. Quid quod Wicleffus L. 4. Trial. C. 10. 14. & aliis diserte doceat, in Ecclesia Clavium potestatem residere: eam attamen a solis Sacerdotibus probis, imo probisetiam laicis exerceri posse.

II. Qui proinde in hanc Sectariorum classem ex merito <sup>4</sup> veniunt, sunt: Novatianus, Lutherus, Zwinglius & Calvinus.

Ac Novatianus quidem, licet principio solum idololatriæ crimen ab Ecclesia remitti non posse doceret: progressu tamen temporis non est veritus asserere, nullam Ecclesiæ potestatem esse ad ullum omnino peccatum remittendum, ut ex Ambrosio mox citando patebit: quo utique & Clavium potestatem, & ipsum Pœnitentiæ Sacramentum Ecclesiæ sufferebat. Nec defuerunt ex discipulis ejus complures, qui teste Eusebio L. 6. Hist. C. 43. & Epiphanio Hæresi 59. eundem sequerentur errorem; tametsi ii, qui se Catharos dicebant, cum Montanistis profiterentur, habere Ecclesiam potestatem remittendi peccata post Baptismum commissa, exceptis idololatria, homicidio, & mæchia, ut constat ex Ambrosio L. 1. de Pœnit. C. 1. *Ajunt (inquit ille hoc loco) Novatiani se exceptis gravioribus criminibus relaxare veniam erroris. - - Non hoc quidem auctor vestri erroris. In eo igitur Patrem vestrum propria damnatis sententia, qui distinctionem peccatorum facitis:*

R. P. Muszka Tom. II. de Sac.

Kk

quæ

*quæ solvenda a nobis putetis, & quæ sine remedio esse arbitrentur.* Quo autem remedio? utique ab Ecclesia ministrando; eod. enim Cap. subjicit: *ajunt se Domino deferre reverentiam, cui soli remittendorum criminum (graviorum scilicet) potestatem reservant.* Quæ quidem manifestum faciunt, Novatianum cum quibusdam sui sectatoribus Sacramentum Pœnitentiæ negasse: erroris proinde hujus originem a Seculo III. esse repetendam. Inde assentiri non possum opinioni Cl. Auctoris Rei Sacram. qui L. 6. Quæst. 2. §. 1. & 2. contendit, ante Seculum XVI. a nemine Christiano Sacramentum Pœnitentiæ esse negatum: primosque fuisse Lutheranos, Zwinglianos & Calvinistas, qui errorem hunc invexerint.

Illud interim etiam indubitatum est, sepultum cum Novatianis errorem Lutherum omnino primum resuscitasse. Quamvis enim L. de Capt. Babil. sub principium, negatis septem Sacramentis, dicat: *tantum tria pro tempore ponenda, Baptismum videlicet, Pœnitentiam & Panem;* in fine attamen ejus L. si rigide, inquit, loqui velimus, *tantum duo sunt in Ecclesia Sacramenta, nempe Baptismus & Panis, - - nam Pœnitentiæ Sacramentum, quod ego his duobus accensui, signo visibili & divinitus instituto caret; & aliud non esse dixi, quam viam ac reditum ad Baptismum.* Vertigine eadem agebatur Melanchthon, Lutheri assecla: in Apol. enim Confessionis August. Pœnitentiam Sacramentis accenset, in Locis autem Commun. An. 1522. editis eandem e numero illorum expungit. Quod ad modernos Lutheranos attinet, quidam ex iis cum Melanchthone nunc cit. & Kemnitio in Exam. Concilii Trident. ad Can. 10. de Bapt. item Can. 1. de Pœnit. negant Pœnitentiam esse Sacramentum: admittere contra videntur alii. Et quidem primum illi, qui utuntur parvo Lutheri Catechismo, in quo (ut refert Bossuet L. 3. Hist. Variat. C. 48.) post auditam peccatorum Confessionem super Pœnitentem hæc verba Minister pro-



pronuntiare jubetur : *ego ex Christi mandato remitto tibi peccata tua in nomine Patris &c.* item illi, qui jurant in Confessione Augustanæ Apologiam, in hac enim diserte dicitur : *vere igitur sunt Sacramenta, Baptismus, Cæna Domini, Absolutio, quæ est Sacramentum Pœnitentiæ.* Constat denique id ipsum ex multorum praxi : ut enim novimus, quibusdam locis Lutherani Ministrelli peculiaribus cathedris utuntur, in quibus confidentes suorum Confessionem excipiunt, & quidem nonnulli etiam auricularem. Hi ipsi interim circa hujus Sacramenti doctrinam in multis dissident a nobis : non enim requirunt singillatim omnium peccatorum Confessionem ; ipsam etiam Ministri absolutionem dicunt esse declaratoriam duntaxat, non judicalem : solaque Baptismi memoria & fide obtineri remissionem, modo quis credat se esse absolutum.

Zwinglius & Calvinus multo apertius, & constanter quidem, negarunt Pœnitentiam esse peculiare Sacramentum : ille L. de vera & falsa Relig. hic autem L. 4. Instit. C. 15. Utriusque nimirum sententia Pœnitentiæ Sacramentum est ipse Baptismus, hujusque sola memoria remittuntur quælibet peccata post Baptismum commissa. Ex qua doctrina Calvinus cit. L. C. 19. hæc deducit : confessionem peccatorum esse solum legis humanæ, ejusque ante Innocentium III. incognitæ ; Sacerdotem non habere potestatem absolvendi a peccatis ; eadem facilitate deleri peccata post Baptismum admissa, atque illa, quæ Baptismum antecesserunt ; nulla opus esse Satisfactione, irritarique illa potius quam placari Deum, ut quæ in iuria sit Baptismi & mortis Christi efficacix. Atque hæc doctrina hodie etiam communiter recepta est apud Zwinglianos & Calvinianos ; qua quidem ad omne scelerum genus januam aperiri, quis non videat ? Ita nimirum præclari hi (si superis placet) Ecclesiæ reformatores patentem & expeditam

ad Cœlum voluerunt esse viam, quam tamen arctam esse, nec nisi a violentis rapi Cœlum, Christi oraculo docemur.

Contra omnes hos Sectariorum errores per decursum hujus L. suis locis singillatim disputabimus; isthic contra eosdem asserenda est duntaxat veri Pœnitentiæ Sacramenti existentia.

## ASSERTIO I.

*Datur in Ecclesia verum novæ Legis Pœnitentiæ Sacramentum a Christo institutum.*

5 **P**Rob. I. ex S. Literis & definitione hujus Sacramenti. Nimirum Pœnitentiæ Sacramenti nomine intelligitur ritus quidam Ecclesiæ externus & judicialis, cui ex institutione Christi adnexa sit gratia sanctificans, peccati post Baptismum admissi remissiva in ordine ad fideles contritos & confessos; id genus autem ritum dari comprobant illa Christi ad Apostolos verba Joan. 20. *accipite Spiritum Sanctum : quorum remiseritis peccata, remittuntur eis; & quorum retinueritis, retenta sunt.*

Etenim 1<sup>mo</sup>, verba illa, *quorum remiseritis & retinueritis*, indicant potestatem judicalem remittendi peccata Apostolis & eorum Successoribus a Christo concessam, ut patet vel ex modo loquendæ. 2<sup>do</sup>, eandem potestatem Christus exerceri voluit utique modo hominibus accommodato, externo proinde ritu aliquo, ut sit in humanis judiciis. 3<sup>io</sup>, cum universim in hac providentiæ lege non remittantur unquam peccata sine dolore & retractatione : cum item sine pœnitentis confessione Sacerdos habere nequeat causæ notitiam, quæ ad omne judicium prærequiritur, certum fit, potestatem hanc judicalem exerceri non posse nisi in contritos & confessos.

fos. 4to, cum Christus eodem plane post resurrectionem tempore (ut colligitur ex Matth. 28. & Marci 16.) per verba, *euntes docete - baptizantes* &c. dederit Apostolis potestatem Baptismi remedium applicandi ad delendam culpam originalem & peccata Baptismum præcedentia, ultro conficitur, hoc Joannis C. factam illis potestatem remittendi peccata post Baptismum admissa. 5to demum, ritui huic judiciali adnexam esse gratiam sanctificantem peccati remissivam, indicant illa verba, *remittuntur eis*: neque enim in hoc providentiæ ordine peccata remittuntur unquam, nisi per sanctificantem gratiam.

Prob. II. ex Traditione. Hanc vero primum habemus 6 ex consensu Patrum, Tertulliani, Cypriani, Ambrosii, Hieronymi, Augustini, & aliorum apud Bellarm. L. 1. de Pœnit. C. 10. quorum verba hoc L. sparsim recitabimus. Nunc pro omnibus sit Cyprianus Serm. de lapsis, ubi ait: *confiteantur singuli - delictum suum, dum adhuc, qui deliquit, in seculo est, dum admitti ejus confessio potest, dum Satisfactio & remissio facta per Sacerdotes apud Dominum grata est.* Item Augustinus L. 2. de adulterin. Conjug. C. 16. *si homicidium, inquit, a Catechumeno factum sit, Baptismo abluitur; si autem a baptizato, Pœnitentia & reconciliatione sanatur.* Quali autem Pœnitentia? ea utique, quæ sit Sacramentum: nam eod. L. C. 28. ait: *quæ Baptismatis, eadem est reconciliationis causa;* & Ep. 180. ad Honorat. referens, ab aliis in Ecclesia flagitari Baptismum, ab aliis Pœnitentiæ actionem, his ait peti *Sacramentorum confessionem & erogationem.*

Pro eadem Traditione faciunt Concilia pro fronte L. citata, Lateranense IV. Constantiense, Florentinum; ac cum primis constans praxis Ecclesiæ Sacramentum hoc ministrantis; tum & perpetua tam Latinæ quam Græcæ Ecclesiæ, etiam post ejus Schisma, consensus, ut videre est apud Ar-

cud. L. 4. C. 1. & Auct. Perpet. Fid. Tom. 5. L. 3. a C. 1. usque ad 7. Inde jure factum, ut Trident. Sess. 14. Can. 1. anathema diceret negantibus, Pœnitentiam esse verum Sacramentum, pro fidelibus post Baptismum in peccata lapsis a Christo institutum.

Ex his porro, præsertim Probat. I. certum fit, Pœnitentiæ Sacramenti auctorem esse ipsum immediate Christum; solum igitur jam ejus institutionis tempus definiendum est.

## ASSERTIO II.

*Sacramentum Pœnitentiæ tum præcipue fuit a Christo institutum, dum post resurrectionem suam Joan. 20. Apostolis dixit: accipite Spiritum sanctum, quorum remisistis &c.*

- 7 **A**D quod enim tempus aliud institutio hæc referenda est, nisi illud, quo Christus Ecclesiæ contulit potestatem a peccatis absolvendi ritu huic Sacramento proprio? istud vero Christum præstitisse hoc præcipue Joannis loco constat ex N. 5. igitur Sacramentum hoc tum præcipue instituit, dum post resurrectionem Apostolis dixit, *accipite Spiritum S. &c.* Estque hæc doctrina ipsius Concilii Trident. Sess. 6. Cap. 14. ubi ait: *pro iis, qui post Baptismum in peccata labuntur, Christus JESUS Sacramentum instituit Pœnitentiæ, cum dixit: accipite &c.* Idem pluribus declarat Sess. 14. Cap. 1. Dominus autem, inquit, Sacram Pœnitentiæ tunc præcipue instituit, cum a mortuis excitatus insufflavit in discipulos suos, dicens: *accipite Spir. S. quorum remisistis &c.* Quo tam insigni facto, & verbis tam perspicuis potestatem remittendi & retinendi peccata, ad reconciliandos fideles post Baptismum lapsos, Apostolis & eorum legitimis successoribus fuisse communicatam, univrsorum Patrum consensus semper intellexit.

Con-

Consulto autem in Assertionem addita est cum Concilio Trident. particula, *præcipue*: fatendum enim est, Christum Sacram. Pœnitentiæ institutionem inchoasse jam ante mortem, seu cum Matth. 16. promitteret se daturum Petro Claves regni Cœlorum, ac eandem promissionem apud eund. Matth. C. 18. confirmaret; seu cum in ultima cœna Apostolos in Sacerdotes ordinavit illis verbis, *hoc facite* &c. character quippe Sacerdotalis est inchoata potestas absolvendi a peccatis. Hanc ipsam interim institutionem non nisi a mortuis resurgens Joan. 20. perfecit, cum tunc completam absolvendi potestatem contulerit. Atque hoc omnino sensu particula illa, *præcipue*, est accipienda.

### Respondetur Sæctariis.

**O**pponitur directe contra Assertionem I. Ad Hebr. 6. dicitur, *impossibile est eos, qui semel sunt illuminati* (hoc est, baptizati) - - & *prolapsi sunt, rursus renovari ad Pœnitentiam* &c. & ibid. C. 10. *voluntarie peccantibus nobis post acceptam notitiam veritatis* (intellige, fidei in Baptismo) *jam non relinquitur pro peccatis hostia*. Igitur, testante Apostolo, post Baptismum lapsis non conceditur amplius venia; quædque hinc consequitur, non datur Pœnitentiæ Sacramentum, quod sit in remissionem peccati a baptizato commissi.

Resp. N. Illation. primam; proinde & altera est illegitima. Quomodo enim post Baptismum lapsis nulla sit amplius spes veniæ? quando Ezech. 33. V. 14. & 15. universim dicit Deus, si impius egerit *pœnitentiam a peccato suo* - - *vita vivet* &c. Christus vero similiter generatim ad Apostolos Joan. 20. *quorum remisistis peccata, remittuntur eis*. Ac profecto, si nulla est post Baptismum lapsis remissio, cur Petrus Act. 8. Simoni Mago post acceptam Baptismi gratiam delinquenti præ-

præcepit, *Pœnitentiam age ab hac nequitia tua?* Neque obeſt ibid. ſubdi: *roga Deum, ſi forte remittatur tibi*; nam in S. Litteris vox *forte* non ſemper ſignificat incertitudinem, ut patet ex illo Proverb. 24. *in ruina ejus (inimici) ne exultet cor tuum, ne forte videat Dominus, & displiceat ei.* Sæpe igitur ſignificat libertatem vel rei difficultatem, uti Jerem. 26. *noli ſubtrahere verbum, ſi forte audiant & convertantur* &c. quæ ipſa eſt & Act. 8. particulæ *forte* ſignificatio. Ex his autem patet, niſi Scripturas invicem pugnantes dicas, verba ex Apoſtolo objecta alio, quam Sectarius velit, ſenſu accipienda eſſe.

Ac revera ad Hebr. 6. agitur ſolum de renovatione ad pœnitentiam per Baptiſmum obtinenda, quæ omnino impoſſibilis eſt jam ſemel baptizatis, cum Baptiſmus iterari nequeat. Nec arbitrarie iſtud aſſeritur: hæc quippe eſt omnium fere veterum hujus loci expoſitio; ex eo enim probant Baptiſmum repeti non poſſe. Id ipſum colligitur ex contextu capitis, & ſine ab Apoſtolo intento: ſatagit quippe eximere errorem Hebræis, qui in Judaismo repetitis baptiſmīs, ſeu ablutionibus, uti ſoliti, etiam Chriſtiani facti putabant iteratione Sacramenti Baptiſmatis peccata expiari poſſe. Satis denique iſtud indicat verbo *renovari*, quod Baptiſmo peculiariter convenit ex ſenſu Apoſtoli, cum illum ad Tit. C. 3. vocet *lavacrum regenerationis & renovationis*. Non diſſiteor interim eſſe alios, qui hoc loco putent agi de Pœnitentia generatim; horum autem ſententia *τὸ impoſſibile* ſignificat impotentiam moralem, quaſi nempe dicat Apoſtolus; baptizatos, qui *gula-verunt* (ut ibidem loquitur) *donum cæleſte*, - - *bonum Dei verbum, virtutesque ſæculi venturi*, hoc eſt, qui poſt Baptiſmum multas gratias acceperunt, prolapſi ſunt nihilominus, non niſi difficultate magna Pœnitentiam agere. Et omnino certum eſt, pluribus Scripturæ locis *τὸ impoſſibile* ſignificare hanc  
mora-

moralem impotentiam, ut cum Lucæ 17. dicitur: *impossibile est, ut non veniant scandala.*

Quod autem ad Hebr. 10. vult Apostolus, id unum est: voluntarie peccantibus per defectionem a fide nullam superesse hostiam, qua peccata expient in hoc ipso apostasiæ statu perseverantes; cum sine fide in Christum haberi nequeat vera pro peccatis hostia, seu poenitentia. Ita exponendi cit. verba fundamentum præbet ipse contextus, & propositum Apostoli a V. 19. in eo elaborantis, ut Hebræos a malo apostasiæ absterreat, & in fide Christiana confirmet. Rursus attamen & isthic aliqui existimant, eum loqui de difficultate duntaxat Poenitentiae comparate ad illos, qui *post acceptam notitiam veritatis*, seu fidei, ab ea voluntarie deficiunt. Verum

Instari potest I. Dici saltem nequit baptizatis peccata 9 remitti per Sacerdotis absolutionem: nam jam ante hanc peccatorem per ipsum immediate Deum ad vitam gratiæ revocari docent PP. ac nominatim Augustin. Tract. 49. in Joan. & Gregorius Mag. Hom. 26. in Evang. ubi uterque in hanc rem utitur exemplo Lazari prius a Christo suscitati, quam a Discipulis solveretur; ergo id genus Poenitentiae Sacramentum frustra statuitur, quo Sacerdotis ministerio fiat remissio peccati. Quid quod istud asserere, injurium sit Deo, quis enim *poteſt dimittere peccata, nisi solus Deus?* Mar. 2. injurium item Christo, qui una sui per mortem *oblatione consummavit in sempiternum sanctificatos* ad Hebr. 10.

Resp. N. assertum. Exemplum certe Lazari pro nobis facit: sicut enim is a Discipulis vere fuit solutus institis, quibus adhuc erat ligatus; ita peccatores a Sacerdotibus vere solvantur a vinculo peccati. Sed nec laud. Patribus aliud erat propositum, quam ut exemplo Lazari ostenderent: quod sicut ille prius fuit a Christo ad vitam excitatus, quam a

Discipulis solveretur: ita non posse peccatorem a Sacerdote vinculis peccatorum exolvi, nisi prius a Deo ad vitam excitetur per gratias actuales, quibus moveatur ad veros pœnitentiæ actus, quibusque jam prævie ad absolutionem incipiat Deo vivere, non quidem vita animæ perfecta, sed inchoata duntaxat. Hujus omnino sententiæ fuisse laud. Patres, ipsa eorum declarant verba, quæ cit. locis subjiciunt. Ita Augustinus, *Lazarus*, inquit, *processit: sed adhuc ligatus est; tamen jam foras processit &c. Quando confiteris, procedis; quid est enim procedere, nisi ab occultis velut exeundo manifestari? sed, ut confitearis, Deus facit magna voce vocando, id est magna gratia vocando. Ideo cum processisset mortuus adhuc ligatus, confitens & adhuc reus, ut solverentur peccata ejus, ministris dixit Dominus: solvite illum & finite abire. Et Gregorius propterea esse ait Sacerdotis absolutionem, ut quos omnipotens Deus per compunctionis gratiam visitat, illos Pastoris sententia absolvat.*

Neque absolutio hæc injuria est Deo, aut Christo. Non Deo: fatemur quippe solum Deum (qui unus est cit. ex Marco loci sensus) peccata posse dimittere potestate principali: eam vero, quæ Sacerdoti convenit, esse ministerialem duntaxat, hancque ipsam a Deo concessam. Non etiam Christo: tametsi enim ejus passio & mors ex se sit sufficiens ad nostri sanctificationem, quo tamen re ipsa & in actu secundo (ut Scholæ ajunt) nos sanctificet, atque a peccatis emundet, ipso volente Christo peculiariter nobis applicari debet; hæc vero applicatio, inter alia, fit per Sacramentum Pœnitentiæ, quod ipsum non aliter, quam in virtute Passionis & meritum Christi, gratiam sanctificantem peccati remissivam operatur.

10 Instabis II. Quamvis forte per Pœnitentiæ ritum in Ecclesia usitatum fiat peccati remissio, qui attamen ille sit verum novæ Legis Sacramentum? cum totus perficiatur sine usu



usu cujuspiam elementi, quod tamen ad Sacramentum requiritur ex sensu Augustini Tract. 80. in Joan. dicentis: *accedit verbum ad elementum, & fit Sacramentum.*

Resp. Pœnitentiæ ritum jure dici Sacramentum, cum (ut ex N. 2. & 5. constat) *fit signum sensibile ex institutione Christi causans gratiam*, in quo novæ Legis Sacramenti natura consistit, seu dein signum hoc sit elementum, seu res externa alia. Augustin. autem loco cit. solum de Baptismo loquitur, ut certum est ex ipso textu, quem L. 1. N. 31. integre recitavimus. Multi interim hæc ipsa S. Doctoris verba aliis etiam Sacramentis latiore quodam sensu accommodant: elementi videlicet nomine intelligentes rem quamvis sensibilem, quæ accedentibus verbis sacramentalibus fiat Sacramentum. At istud nos non urget.

Impugnatur jam ipsa ejusd. Assertionis Probatio, & quidem nominatim prima; quasi nempe falso asseratur, Apostolis Joan. 20. datam esse a Christo potestatem peccata remittendi per Sacramentum Pœnitentiæ. Ita autem Sectarii arguunt: hoc loco data est Apostolis potestas in Pœnitentiam illam, quam Prophetæ in suis de Lege Evangelica vaticiniis prænuntiarunt: quamque dein prædicarunt Apostoli, simul potestatem sibi collatam exercentes; at Prophetæ non prænuntiarunt Pœnitentiam, quæ esset Sacramentum: neque talem prædicarunt Apostoli, minus autem ministrarunt; igitur Joan. 20. non est data Apostolis potestas remittendi peccata per Sacramentum Pœnitentiæ. Maj. propos. non controvertitur; Min. autem fundatur in silentio Scripturæ: neque enim ullum est in ea horum vestigium.

Resp. C. Maj. N. Min. quæ quia duabus constat partibus, de singulis speciatim dicendum erit.

De 1<sup>ma</sup> autem notasse suffecerit: tametsi Prophetæ Sacramentum Pœnitentiæ expressis verbis & explicitè non præ-

dixerint; at implicite saltem prædixerunt omnibus iis locis, quibus prænuntiarunt Christum Salvatorem, & Legis gratiæ, suæque Ecclesiæ auctorem. Cæterum expressas etiam hujus nominatim Sacramenti figuras versus Testamentum exhibet; an non enim expiationes & purgationes Mosaicæ, saltem aliquæ, jure dici possint figura Sacramenti Pœnitentiæ: sicut vetera baptismata erant typus Sacram. Baptismi?

Quod ad 2dam ejusd. Min. partem attinet: fateor, nullum in S. Literis reperiri locum, quo aperte significantur Apostoli Pœnitentiæ Sacramentum prædicasse, aut etiam ministrasse. Cum enim Aët. 2. 5. 17. & 26. leguntur annuntiasse Pœnitentiam, ac etiam de agenda illa cohortationes instituisse, sermo illis erat ad Gentiles aut Judæos, Sacramenti Pœnitentiæ nondum capaces; quibus proinde virtutem duntaxat Pœnitentiæ, aut Baptismum in pœnitentiam prædicare oportebat. Cæterum & prædicasse & ministrasse illos Sacramentum Pœnitentiæ, satis evincit id unum, quod Sacramentum hoc fuerit a Christo institutum, ut probatum est. Ita nusquam leguntur Apostoli Baptismum contulisse cum invocatione Trinitatis; ut tamen eos sic contulisse credamus, sufficienti argumento nobis est, voluisse Christum Matth. 28. eos docere *baptizantes in nomine Patris &c.* Sunt interim, qui existiment, haud obscure indicari prædicatum a Petro Pœnitentiæ Sacramentum illis ad Simonem Magum verbis Aët. 8. *Pœnitentiam age ab hac nequitia tua &c.* item a Joanne in Ep. 1. C. 1. ubi ait: *si confiteamur peccata nostra, fidelis est & justus Deus, ut remittat nobis peccata &c.* ministratum autem a Paulo 2. Cor. 2. cum fornicarium Corinthium, cujus 1. Cor. 5. fit mentio, in gratiam recepit; ita enim de hac ejus reconciliatione loquitur: *ego, quod donavi, si quid donavi, propter vos in persona Christi.*

Ut ut interim istud se habeat, Sacramenti Pœnitentiæ veritatem a nobis comprobata Scripturæ in præsentī silentium,

tium, quodcumque demum sit illud, non elidit: constat quippe non esse scripta minutim omnia, quæ egerunt Apostoli, ut vel exemplum de Baptismi forma allatum satis docet. Quod autem Baptismi, Confirmationis, & Eucharistiæ ministratio ab Apostolis facta nominatim notetur in Act. Apost. non item etiam Sacramenti Poenitentiae, causa a congruo in promptu est: eorum quippe Sacramentorum nascente Ecclesia frequentior & magis necessarius fuit usus, seu ad initiandos fideles, seu ad confirmandos in fide, & corroborandos in gratia; cum ex adverso rara admodum fuerit Sacramenti Poenitentiae necessitas ob singularem illam primorum fidelium innocentiam & sanctitatem, quæ in L. Act. Apost. magnificis elogiis sæpe commendatur.

Si Instet Sectarius: non est saltem data Apostolis potestas 12 ritu aliquo externo, eoque sacramentali, dimittendi peccata; eod. enim Joan. 20. Cap. Christus ad Apostolos dixit: *sicut misit me Pater, & ego mitto vos*; sicut igitur Christus remisit peccata sine ritu externo, sine Sacramento: sic & Apostolis dedit potestatem.

Resp. futilem esse argutationem: quando universim constat, non eandem per omnia fuisse Christi & Apostolorum missionem; ut adeo controverti nequeat, *τ: sicut in cit.* Christi verbis non significare omnimodam æqualitatem. Ac sane conveniens erat, ut gratiæ divinæ aliter a Domino, aliter a ministris dispensarentur.

Contra Assertion. II. argui solet ex illis Matth. 18. ver- 13 bis, quæ Christus ante mortem suam ad Apostolos dixit: *Amen dico vobis, quæcumque alligaveritis super terram, erunt ligata & in Cælo; & quæcumque solveritis super terram, erunt soluta & in cælo.* Hæc nimirum verba prorsus similia sunt illis Joan. 20. *quorum remiseritis &c.* cur igitur dici nequeat, jam ante mortem suam Christum instituisse Sacram. Poeniten-

tiae? Quo & illud facit, quod Thomas non adfuerit, cum Christus post resurrectionem Joan. 20. dixit: *accipite Spiritum S. quorum remiseritis &c.* certum nihilominus est, eum perinde, atque Apostolos alios, habuisse potestatem Clavium.

Resp. in definiendo institutionis hujus tempore niti me potissimum auctoritate Concilii Tridentini, cujus sensum, ac etiam particulæ *præcipue* ab eo adjectæ explanationem N. 7. retulimus. Congruè interim etiam cum D. Thoma dixeris: cit. Matth. loco non agi de potestate Clavium ad remittenda peccata; cum Christus non præmiserit illud, *accipite Spiritum Sanctum*; verum de potestate tantum ferendi sententiam in foro externo per censuras Ecclesiasticas, quod S. Doctor ex contextu probat. Postquam enim isthic Christus præcepit certum in fraterna correctione servandum ordinem, addit: *si Ecclesiam non audierit, sit tibi sicut Ethnicus & Publicanus*, hoc est, separatus a communione Ecclesiæ. Quo autem pateret hujus potestatis Ecclesiasticæ efficacia, subjunxit: *amen dico vobis, quæcumque alligaveritis &c.* ubi S. Thomas, *sic dicitur*, inquit, *alligare, quia non solvit, vel quia excommunicat.* In eundem demum Matthæi locum recte observat Platellius: Apostolos tum nondum fuisse Sacerdotes, cum tamen potestas Clavium ad dimittenda peccata pro foro interno supponat Sacerdotium.

At Thomas Apostolus, inquires, absens erat Joan. 20. quomodo ergo tum & ipse accepit potestatem Clavium? absentem etiam ajo accepisse vi verborum Christi; cur enim eam summa sua potestate Christus absenti conferre non poterat? Ac revera non Thomæ tantum, sed & reliquis absentibus discipulis collatam docet S. Cyrillus apud Bosco hic Sect. 1. N. 54. Neque tamen propterea etiamnum absentes ordinari posse inferas: tametsi enim istud poterat Christus potestate excellentiæ sibi propria, aliter tamen statuit pro Ecclesia, uti ex ejusdem sensu docemur.

§. III.

## §. III.

*An Sacramentum Pœnitentiæ sit diversum a  
Baptismo, ejusque memoria?*

**J**uxta Lutheranos quosdam, & Calvinianos omnes reconcili-  
ationis remedium pro baptizato non aliud est, quam ipse  
Baptismus, vel potius repetita ejus memoria: atque adeo in  
eorum sententia diversum ab his non est Pœnitentiæ Sacra-  
mentum, ut colligitur ex supra dictis N. 4. Idcirco Triden-  
tinum Sess. 14. ad peculiarem hunc Novatorum errorem con-  
vellendum, oppositam Ecclesiæ doctrinam pluribus declaravit  
Cap. 2. ac dein Can. 2. aliter sentientibus anathema dixit,  
Cum quo & nobis sit peculiaris

## ASSERTIO.

*Sacramentum Pœnitentiæ a Baptismo & ejus memoria  
est omnino diversum.*

**D**iversitas hæc I. deducitur ex S. Literis. Numquid enim 14  
Christus ipse distinctum dedit mandatum Baptismi & Pœ-  
nitentiæ? Baptismi quidem illis Matth. 28. verbis, *euntes do-  
cete omnes gentes, baptizantes eos &c.* Pœnitentiæ vero Joan.  
20. dicens: *accipite Spiritum S. quorum remiseritis peccata &c.*  
Et Petrus Act. 8. Simoni Mago, ad obtinendam peccati ve-  
niam, non commendat memoriam Baptismi, sed monet nomi-  
natim de Pœnitentia, *Pœnitentiam*, inquit, *age ab hac nequitia  
tua.* Joannes etiam in 1. Ep. C. 1. agens cum baptizatis de  
remedio peccati, nulla Baptismi mentione facta, *si confitea-  
mur*, inquit, *peccata nostra, fidelis est & justus Deus, ut remit-*  
122

rat nobis. His profecto locis memoratur Pœnitentia, ceu aliud a Baptismo remedium pro baptizatis peccatoribus.

- 15 Eadem diversitas II. certa est ex sensu Ecclesiæ, quem habemus ex Patribus inter Baptismum & Pœnitentiam distinguentibus. Ita Tertullian. L. de Pœnit. C. 7. præter Baptismum, qui repeti non potest, de alio peccati remedio providisse Deum referens, *inunctionis* (Baptismi) *sera obstructa*, inquit, *aliquid adhuc patere permisit*; collocavit in vestibulo Pœnitentiam secundam &c. quam ipsam ibid. vocat secundam spem, & jam antea C. 4. secundam post naufragium tabulam dixerat. Et Augustinus Ep. 98. alias 23. ad Bonifacium de peccatis a parvulo baptizato ætatis accessu commissis loquens addit, *quæ non regeneratione auferuntur, sed alia curatione sanantur*. Eandem distinctionem facit in Enchirid. ad Laurent. C. 46. & omnium clarissime L. 2. de adulter. Conjug. C. 16. jam supra a nobis cit. N. 6. ubi vide & Cyprianum laudatum.

Huc item faciunt omnes PP. per decursum commemorandi, qui post Baptismum lapsos admonent de labore Pœnitentiæ & Clavium Ecclesiæ potestate, non autem Baptismi memoria; ac demum Græcorum & Latinorum in hoc dogma consensus: uti etiam pro fronte hujus L. cit. Decreta Concil. Lateranensis, Constantiensis & Florentini; cum primis vero Tridentini, quod simul Sess. 14. Cap. 2. multis rationibus ostendit hoc Sacramentum a Baptismo differre. Nempe (ut ibid. arguit) alia est Baptismi, alia Pœnitentiæ materia & forma; idem est de Ministro, subiecto, effectu &c. quidni igitur ipsa etiam Sacramenta diversa esse oporteat?

### Satisfit Objectiõnibus.

- 16 **O**bjicitur autem I. Baptismus Luc. 3. vocatur *Baptismus Pœnitentiæ in remissionem peccatorum*; eidem ad Eph. 5. V. 26.

V. 26. attribuitur perfecta mundatio, & Marci ult. salus promittitur: non est igitur, cur Pœnitentia dicatur peculiare, & a Baptismo distinctum Sacramentum.

II. Cum præterea Baptismus non deleatur unquam: cur non perinde deinceps, sicut principio, utilis esse possit ad emundationem & deletionem peccati?

III. Nec alia fuit sententia Patrum, quorum complures cum Fulgentio L. de Fide ad Petrum C. 30. Baptismum vocant Sacramentum Pœnitentiæ. Quin Augustin. L. 1. de Nupt. & Concup. C. 33. & alibi docet, omnia peccata, etiam a baptizato commissa, per ipsum Baptismum remitti; quomodo autem per Baptismum, qui jam præterit? non utique aliter, quam prout idem in memoriam revocatur.

Resp. ad I. C. Ant. N. Illationem; hanc vero non recte ferri patebit ex eorum explanatione, in quibus argumentum fundant Novatores. Nimirum Lucæ 3. agitur de Joannis Baptismo, qui uti non erat Legis Evangelicæ Sacramentum, ita tota ejus omnino ad remissionem peccatorum efficacia habebatur ex virtute Pœnitentiæ; hinc ab eo ad ipsum Baptismi Sacramentum argui nequit. Vide dicta de Joannis Baptismo L. 2. Dissert. II. §. IV. Cum autem Apostolus ad Ephes. scribens perfectam emundationem attribuit Baptismo, loquitur de emundatione peccatorum Baptismum antecedentium; non nego interim, etiam ad ea, quæ a baptizatis committuntur, emundanda aliquid Baptismum conferre in sensu quo Augustini verba in Resp. III. exponemus. Relata demum apud Marcum salutis promissio intelligenda est ex hypothesi: si nimirum gratia per Baptismum accepta non amittatur; vel certe amissa alio remedio recuperetur. Sane, si promissio hæc absoluta foret, cum ibid. dicatur: *qui crediderit & baptizatus fuerit, salvus erit*, sola fide & Baptismo perveniri posset ad salutem; istud vero sustineri nequit, cum aliis Scripturæ lo-

R. P. Muszka Tom. II. de Sacr.

Min

cis

cis præterea requiratur mandatorum observatio, perseverantia in bono, aut Pœnitentia post lapsum : uti hæc aliunde certa sunt contra Novatores.

Resp. ad II. Baptismum non deleri in sensu orthodoxo non aliud est, quam quod ejus character permaneat, quodque in virtute Baptismi semel suscepti Christiani esse perseveremus ; at quod fundamentum est dicendi, hoc titulo competere Baptismo efficaciam peccati post illum commissi remissivam ? Sed nec istud volunt Novatores ; totum quippe, quod in præfenti urgent, repetunt a sola Baptismi memoria, qua excitari ajunt fidem, hacque dein immediate deleri peccata. At hæc rursus perperam ab eis asseri ex dictis constat ; nominatim autem fidem solam non habere vim justificandi, L. I. de Sacr. in Gen. N. 75. jam comprobatum est.

Resp. ad III. Baptismum a Patribus vocari Sacramentum Pœnitentiæ relate ad infideles adultos tantum ; neque enim his prodest Baptismus sine prævia pro peccatis Pœnitentia, ut cit. loco testatur Fulgentius. Augustinus autem peccatorum a baptizatis commissorum remissionem eo duntaxat sensu Baptismo attribuit, quod is ad illam virtute Clavium Ecclesiæ per Sacram. Pœnitentiæ obtinendam necessario prærequiratur ; hinc eod. C. *quid enim, inquit, prodesset vel ante Baptismum Pœnitentia, nisi Baptismus sequeretur : vel postea, nisi præcederet ?* Constat præterea ex N. 6. & 15. Augustinum inter Baptismi & Pœnitentiæ Sacramenta disertis verbis discrimen fecisse.

Differ-



## DISSERTATIO II.

DE MATERIA ET FORMA SACRAM.  
POENITENTIÆ.

## §. I.

*Quibus tanquam materia & forma perficiatur  
Pœnitentiæ Sacramentum?*

**Q**uæstio hæc in re nobis idem est, ac si quæras: quæ illa sint, quæ requiruntur ad id, ut revera habeatur Pœnitentiæ Sacramentum?

## Orthodoxorum doctrina, &amp; Novatorum error.

**A**D hoc quæsitum DD. Catholici consentientibus omnino 17 respondent suffragiis: requiri videlicet contritionem, confessionem, & satisfactionem pœnitentis; tum & Sacerdotis absolutionem. Inde lis tota, quæ inter eos est, in eo duntaxat definiendo versatur: quidnam horum habeat rationem partis intrinsece constituentis Sacramentum? quæ, ut vides, controversia fori est Metaphysici: unitatem præinde doctrinæ Theologicæ non distrahit, ut videre est apud Pallavic. L. 12. Hist. Conc. Trid. C. 10. & 12. ubi testatur, nullam in præsententi DD. Orthodoxorum opinionem Concilium perstringere voluisse. Aliter se habet diffidium Novatorum: qui, uti in definienda hujus Sacramenti veritate, ita in iis, quæ ad illud perficiendum requiruntur, a nobis dissentiunt. Lutheri quippe ad id sufficiunt *terrores conscientiæ*, & *fides ex Evangelio vel absolutione concepta de remissione peccati*: Calvino autem

*mortificatio vitiorum & vivificatio, seu pium bene vivendi studium, de quibus consule Bellarm. L. 1. de Pœnit. C. 18. 19. & 20. ubi simul errores hos singillatim confutat.*

Idem ut nos contra Novatores generatim præstemus, satis fuerit ad mentem Conciliorum doctrinam orthodoxam stabilire, definiendo scilicet : quæ ad perficiendum Pœnitentiæ Sacramentum requirantur ; quid item horum sit tanquam materia & tanquam forma ejusdem Sacramenti.

## ASSERTIO.

*Sacramentum Pœnitentiæ perficitur pœnitentis contritione, confessione, & satisfactione tanquam materia proxima : Sacerdotis autem absolutione tanquam forma.*

Ac hæc quidem ad perficiendum Pœnitentiæ Sacramentum requiri, vel id argumento est : quod illud Christus ad modum judicii instituerit ; in hoc vero, quis nesciat ? præter sententiam judicis, adesse oportere notitiam delicti, & pro eodem satisfactionem, ut reus absolvatur. Contritio autem (contra quam in humano judicio) propterea nominatim est necessaria : quia ex lege hujus providentiæ non fit unquam peccati remissio sine prævia ejus retractatione. Ex his porro pœnitentis contritionem, confessionem, & satisfactionem esse instar materiæ, absolutionem vero Sacerdotis instar formæ illud evincit : quod per hanc memorati actus, qui ex se indifferentes sunt ad rationem Sacramenti, ad eandem determinentur.

Doctrinam hanc expressis verbis tradit Concil. Tridentinum, dum Sess. 14. Cap. 3. dicit : *sunt autem quasi materia hujus Sacramenti ipsius pœnitentis actus, nempe contritio, confessio, & satisfactio*, quod ipsum Can. 4. definit ; eodemque Cap. statim principio docet, *Sacramenti Pœnitentiæ formam, in qua*

*qua praeipue ipsius vis sita est, in illis Ministri verbis positam esse: ego te absolvo &c.* Ubi observandum: non dici *totam*, sed *praeipue* vim sitam esse in absolutionis forma; vis igitur huius Sacramenti sita est in alio etiam praeterea, in materia videlicet, seu in actibus poenitentis. Praecipue interim sita est in absolutionis forma, quia haec determinat actus poenitentis ad rationem Sacramenti. Quibus plane congruit sententia D. Thomae hic qu. 86. Art. 6. ac etiam Eugenii IV. in Concil. Florent. peculiare Decretum pro Arm. cujus verba sub init, huius L. retulimus.

Veritas Assertionis amplius innotescet ex Responsis ad Objecta: cumprimis autem ex iis, quae seqq. §§. de actibus poenitentis, & absolutione sacramentali copiose differemus. Hic, ad plenius intelligendam Assertionem, praevis animadvertisse juverit

I. Cum Confessio (idem deducitur ex contritione & satisfatione, ac etiam absolutione) ad Sacram. Poenitentiae requiratur instar materiae proximae, ultro consequitur, ejusdem Sacramenti remotam materiam esse peccata ab homine baptizato commissä; haec quippe sunt id, circa quod praedicti actus versantur. Dictum autem est, *peccata a baptizato commissä*: quia Sacramentum Poenitentiae non est institutum in remedium peccati originalis, aut etiam actualium Baptisma antecedentium. Id quod constat tum sensu & praxi Ecclesiae eorum Confessionem non admittentis: tum ex Tridentino Sess. 6. Cap. 14. ubi *pro iis*, inquit, *qui post Baptismum in peccata labuntur, Christus Sacramentum instituit Poenitentiae*; quod ipsum Sess. 14. Cap. 1. repetit. Quid quod Sacramentum hoc rationem iudicii habeat, *Ecclesia autem* (ut ait Trident. Sess. 14. C. 2.) *in neminem iudicium exercet, qui non prius in ipsam*

*per Baptismi januam fuerit ingressus ; quid enim mihi, inquit Apostolus, de iis, qui foris sunt, judicare ?*

Inter ipsa interim peccata post Baptismum admissa discrimen faciendum est. Quamvis enim omnia sint hujus Sacramenti materia remota sufficiens : non tamen etiam perinde necessaria. Et peccata quidem mortalia necessariam esse materiam, certum est ; neque enim remitti possunt sine hoc Sacramento in re vel in voto suscepto ; unde ea in Confessione aperire oportet, ut constat ex Trident. Sess. 14. Cap. 5. ac propterea Sacram. Pœnitentiæ vocatur *Sacramentum reconciliationis*. Contra, cum peccata venialia nec teneamur confiteri, eademque aliis remediis expiari possint juxta Trident. cit. Cap. 5. non sunt materia hujus Sacramenti necessaria.

- 20 II. Quamvis satisfactio habeat rationem materiæ in Pœnit. Sacramento, non est tamen ad illud absolute necessaria, nec *essentialiter* (ut dicitur) requisita : nam & suus Sacramento huic, in aliquibus saltem casibus, valor constare potest, quin ulla injungatur satisfactio, e. g. cum absolvitur moribundus jam sensibus destitutus, omnisque propterea satisfactionis implendæ incapax ; & universim præcipuus Sacramenti Pœnitentiæ fructus, culpæ videlicet remissio ; ante satisfactionem re ipsa exhibitam obtinetur. Pro quo plenius intelligendo juverit notasse duplicem hujus Sacramenti acceptionem. Sumitur nimirum primo *essentialiter*, seu prout est signum practicum remissionis culpæ ; sicque sumptum non includit necessario satisfactionem ex rationibus jam dictis. Sumitur item *integraliter*, prout nempe, spectata Sacramenti integritate, est simul signum practicum tam culpæ quam poenæ temporalis remissivum ; atque sub hac acceptione requirit etiam satisfactionem, quæ propterea dicitur ejus *materia vel pars integralis*, seu ad Sacramenti integritatem requisita.

Sol-

## Solvuntur Objectiones.

**O**bjicitur I. generatim contra *1am* Assertionis partem. 21  
 Id, quo tanquam materia proxima Sacramentum aliquod perficitur, est partialis causa ex opere operato efficiens gratiam Sacramento propriam; at memorati actus pœnitentis causa ejusmodi esse nequeunt gratiæ Pœnit. Sacramento propriæ; nequit igitur illis tanquam materia proxima Sacram. Pœnitentiæ perfici. Maj. certa est tam ab exemplo Sacramentorum aliorum; quam etiam ex eo, quod materia & forma sint ipsum Sacramentum: sicut igitur hoc, ita & illa, ejusmodi causam esse oportet. Pro Min. autem facit *1mo*, quod actus pœnitentis sint prævia dispositio ad sacramentalem Pœnitentiæ gratiam; *2do*, quod iidem, saltem omnes, non existant tum, dum Sacerdote sacramentaliter absolvente hæc gratia causatur; *3tio*, quia alias recte diceretur, ipsum pœnitentem sibi remittere peccata: sicut Sacerdos non alia causa dicitur illa remittere, quam quod per actum absolutionis a se positum causet gratiam peccati remissivam.

Resp. C. Maj. N. Min. Nec urgent ejus probationes. Non *1ma*: nam pœnitentis actus non sunt mera dispositio ad Pœnitentiæ Sacramentum, verum (in quo nihil est repugnantiae) simul ejus materia & partes, ut constat ex Trident. Sess. 14. Cap. 3. Non *2da*: tametsi enim hi actus non physice, at moraliter saltem cum ipsa absolutione conjunguntur vel ideo, quod ad eam referantur; qua ipsa causa in judiciis accusatio rei cum sententia judicis uniri dicitur. Hæc vero moralis conjunctio in præsentī cur non sufficiat? quando universim Sacramenta solum moraliter causant gratiam. Non *3tia* denique: quia Sacerdos idcirco recte dicitur remittere peccata, quod gratiam eorum remissivam causet nominatim per actionem judici propriam; actus autem a pœnitente positi

positi non sunt iudicis, sed rei. Fundatur autem istud in eo, quod Pœnit. Sacramentum ad modum iudicii sit institutum; is igitur solum in eo remittit peccata, qui causat gratiam per actionem iudicialem, quod soli Sacerdoti convenit.

- 22 Instabis: si actus pœnitentis sint materia hujus Sacramenti, cur non etiam manus impositio? Certe e Patribus quidam cum Augustino L. 5. de Bapt. C. 20. & 23. Sacramentum Pœnitentiæ vocant *manuum impositionem*; & Concil. Carthaginense IV. Can. 78. ait: *Pœnitentes, qui in infirmitate Viaticum Eucharistiæ acceperint, non se credant absolutos sine manus impositione, si convalescant.* Igitur manus impositione perinde ac pœnitentis actibus hoc Sacramentum perficitur; at non tanquam ex forma, cum ex se sit ad rationem Sacramenti indifferens; ergo tanquam materia, quæ videlicet per Sacerdotis absolutionem evadat Sacramentalis. Aut si denique hæc dici nequeat Sacramenti Pœnitentiæ materia: pari jure prærogativa eadem neganda erit actibus pœnitentis.

Resp. Fuisse omnino Theologos, qui manus impositionem contenderent esse materiam proximam, eamque essentialem hujus Sacramenti: ut nominatim Marianus Victorius L. de Sacram. Confess. C. 13. & quidam ætate S. Thomæ, quos Opusc. 22. C. 4. refellit. At sententia hæc omni caret probabilitate; nec recte arguitur ab actibus pœnitentis. Etenim imo, Florent. & Trident. Concilia minutim enumerant ea, quæ partium instar & materiæ ad hoc Sacramentum requiruntur, atque inter hæc referunt actus pœnitentis: manus autem impositionis ne meminerunt quidem. 2do, uso & praxi Ecclesiæ constat, sine pœnitentis actibus non ministrari Pœnit. Sacramentum: ministrari contra sine manuum impositione. Adhibebatur illa quidem primis Ecclesiæ Seculis, at (ut in Baptismo) non nisi per modum cæremoniæ accidentalis: quia interim eadem cum absolutione sacramentali con-

conjugebatur: ipsum Pœnitentiæ Sacramentum *manus impositionis* nomine PP. quidam cum Augustino compellarunt.

Sciendum est porro, hanc manuum impositionem olim fuisse duplicem; una fiebat in ipsa Pœnit. Sacramenti administratione; extra illam altera, eaque tantum super publicos pœnitentes. Universim autem illam non fuisse sacramentalem vel inde patet: quod teste Cypriano Ep. 10. & 12. non Presbyteri tantum, sed & inferiores Clerici manus imponebant; eademque cæremonia etiam post perceptam a pœnitentibus Eucharistiam adhiberetur, ut constat ex laud. Concilio Carthaginensi. Inde cum in eo dicitur, *pœnitentes non esse absolutos sine manus impositione, si convalescant*, sensus Canonis est: eos pœnitentes publicos, qui nondum expleta pœnitentia, ob periculum mortis, a Sacerdote sacramentaliter absoluti remissionem culpæ obtinuerunt, ac propterea etiam sacro Eucharistiæ viatico refecti sunt, restituta sanitate, oportere pœnitentiam publicam continuare, & cum pœnitentibus reliquis accipere manus impositionem, quæ durante Pœnitentiæ tempore sæpius repetebatur juxta ejusd. Concilii Carthag. Can. 80. At de hoc manuum impositionis ritu per decursum adhuc recurret sermo; præsertim Dissert. V.

Objicitur II. speciatim adversus Contritionem. Univer-<sup>23</sup>sim materiam Sacramenti oportet esse sensibilem; cum ergo contritio, quæ in actu interno consistit, sensibilitate careat, nequit esse materia hujus Sacramenti.

Resp. ad rationem materiæ satis esse, seu ea sit per se, seu per aliud sensibilis; contritio autem actu interno perfecta sufficienter redditur sensibilis per confessionem, aut quodvis aliud signum externum. Certe & Corpus Christi in Eucharistia per species duntaxat est sensibile: ex Theologorum sententia nihilominus est materia Sacramenti Eucharistiæ jam existentis.

- 24 Objic. III. contra Confessionem. Cum juxta Concil. Florentinum Sacramenta perficiantur *rebus, tanquam materia, & verbis, tanquam forma*, Confessio autem peragatur verbis, videtur ea potius habere rationem formæ, quam materiæ.

Resp. Ex mente Florentini Sacramenta *verbis tanquam forma* perfici dicuntur propterea, quod sine verbis proprie talibus non habeatur Sacramentorum forma, nisi forte Matrimonium excipias; quanquam & hujus formam multi in solis verbis reponant. Jam vero Confessio, etsi ut plurimum fiat per verba, eadem nihilominus etiam aliis signis peragi potest, ut fit a mutis, vel moribundis linguæ usu destitutis. Præterea in Sacramentis universim nomine materiæ venit illud sensibile signum, quod ex se indifferens est ad rationem Sacramenti; dubitari autem nequit, Confessionem ita esse indifferentem, neque eam reddi sacramentalem nisi per absolutionis verba; vero igitur sensu dici potest hujus Sacramenti materia. Verum

- 25 Instabis: generatim saltem dici non potest, Confessionem peccatorum a baptizato admissorum esse materiam proximam Sacram. Pœnitentiæ; nam nec finalis impœnitentia baptizati est materia remota hujus Sacramenti: non etiam peccatum ipso Baptismi actualis tempore commissum, cum juxta Trident. Sess. 6. C. 14. Sacramentum hoc institutum sit *pro iis, qui post Baptismum in peccata labuntur*, hoc vero peccatum (ut casus fert) non esset hominis *post Baptismum lapsi*; quomodo igitur confessio eorum sit materia proxima?

Resp. N. Assertum. Quod enim impœnitentia finalis sacramentali confessione expiari nequeat, propterea duntaxat est, quod ut talis importet exclusionem temporis ad agendam Pœnitentiam requisiti. Quod vero ad alterum attinet, dicendum existimo: peccatum eo ipso temporis momento, quo complete perficitur Baptismus, admissum, omnino esse materiam



riam remotam Sacramenti Pœnitentiæ. Etenim peccata a *fidelibus Christi commissa* sunt id genus materia, cum aperte doceat Tridentin. Sess. 14. Cap. 5. *Christum - - Sacerdotes sui ipsius Vicarios reliquisse, tanquam præsidēs & iudices, ad quos omnia mortalia crimina deferantur, in quæ Christi fideles ceciderunt*; at peccatum hoc temporis momento admissum esset utique *Christi fidelis*, quia nunc baptizati, ergo &c. Ac vel ideo verba ex ejusd. Tridentini Sess. 6. objecta sensu (ut dicimus) *positivo* duntaxat, non autem *exclusivo* accipienda sunt. Aliis videtur hoc loco assignari tantum materia certa, uti sunt peccata post Baptismum commissa: relinqui autem Theologorum disceptationi, num & peccata, in quæ quis sub actuali susceptione Baptismi labitur, subiecta sint Clavibus Ecclesiæ.

Objicitur IV. contra Satisfactionem. Si Satisfactio sit 26 materia Sacramenti Pœnitentiæ, sequitur: eam non integram tantum, sed essentialem illius esse materiam, atque ad ipsum ejus præcipuum fructum, remissionem videlicet culpæ, omnino necessariam. Nisi enim istud ita se habeat, cur Trident. Sess. 14. Cap. 8. declarat, Sacerdotes teneri Satisfactionem imponere? cur item PP. dicunt Satisfactione purgari peccata? cur denique ex ritu veteris Ecclesiæ satisfactio a Sacerdote injecta præmittebatur absolutioni? Quid quod Sacramentum hoc ex institutione Christi sit iudicium vindictivum, quod ex genere suo satisfactionem includit.

Resp. N. Illation. Quod autem imponi debeat Satisfactio, in causa est Sacramenti integritas, quæ a Sacerdote (cum fieri potest) procurari debet; non habetur autem sine satisfactione. Absque illa nihilominus ratum esse quoad substantiam Pœnitentiæ Sacramentum, constat ex N. 20. Ex mente dein Patrum per Satisfactionem purgantur solum peccata venialia quoad culpam: mortalia autem quoad reliquias,

N n 2

seu

seu poenam temporalem, inclinationes pravas ex illis reli-  
ctas &c. aut certe ipsa etiam mortalia quoad culpam, si satis-  
factio cum perfecta contritione conjungatur. Quod autem  
de veteris Ecclesiæ ritu adfertur, spectato Historiæ Eccl. &  
Conciliorum testimonio, distinctione opus habet. Quamvis  
enim veteres absolutionem a gravioribus peccatis publicis, ante  
expletam poenitentiam fere non concederent pro foro exter-  
no: ac etiam nonnunquam pro interno, quod & nunc in cer-  
tis casibus ad cautelam & probationem poenitentis usitatum  
novimus; ut plurimum attamen eam pro foro interno conce-  
debant, quin moribundis etiam pro externo, cum eos sacri  
Eucharistiæ viatici participes reddiderint, ut certum est ex  
supra laud. Concil. Carthaginensi, patebitque amplius ex hu-  
jus Dissert. §. IV. & Dissert. V. Demum (quod postremo  
opponitur) Sacram. Poenitentiae solum quoad integritatem spe-  
ctatum habet judicii vindicativi rationem: quoad substantiam  
autem & essentiam est reconcillationis duntaxat judicium, quod  
sine satisfactione peragi potest.

27 At ex adverso forte argues: cum Sacramenti Poenitentiae  
substantia sine satisfactione haberi, hæcque illam consequi  
possit: videtur satisfactionem ne integram quidem materiam  
esse hujus Sacramenti. Numquid enim quælibet Sacramen-  
ti materia partialiter saltem, significare & causare debet effe-  
ctum sacramentalem? numquid eadem per formam determi-  
nanda est ad rationem Sacramenti? in hac autem sententia  
neutrum horum satisfactioni convenire potest, ergo &c.

Resp. Cur, & quo sensu satisfactio sit materia integralis,  
fatis constat ex jam dictis N. 20. quæ ipsa proinde ad expedi-  
endam Adversarii dubitationem suffecerint. Nimirum, cum  
Sacramento Poenitentiae suus quoad substantiam constet valor  
sine satisfactione, absque hac illud perfecte significat & cau-  
sat effectum Sacramenti præcipuum; hoc est, remissionem  
culpæ

culpæ & poenæ æternæ; at cum idem finē satisfactione integritatem suam non habeat; nec sit proinde signum practicum, perfecte significans & causans etiam poenæ temporalis remissionem, plane consequitur, ipsam etiam Satisfactionem in partem venire hujus sacramentalis significationis & efficientiæ. Nec magis urget alterum vel ideo, quod Sacramentum Poenitentiae ad modum iudicii sit institutum. An non enim in humano iudicio vindicativo vindicta, quamvis sequatur iudicis sententiam, per hanc tamen sensu morali sufficienter determinatur ad rationem vindictæ judicariæ? cur non igitur perinde satisfactio per absolutionem moraliter determinetur ad id, ut sacramentalis evadat? præsertim, cum Sacerdos, cœu Iudex, absolutionem impertiat cum respectu ad satisfactionem cum tempore implendam, imo & præsens ejus implendæ propositum. Moralis porro hæc determinatio in præsentī sufficit, cum & ipsum Poenit. Sacramentum sit morale duntaxat compositum: quin & satisfactio, licet re ipsa absolutionem consequatur, eandem nihilominus etiam moraliter antecedit, in ipso videlicet satisfaciendi proposito.

Obijcitur V. contra 2<sup>am</sup> Assertionis partem. Sola Sa- 28  
cerdotis absolutio causat gratiam Sacramento Poenitentiae propriam; sola igitur illa perficitur totum Sacramentum: quodque hinc consequitur, non forma duntaxat, sed & materia est hujus Sacramenti. Est autem Asserti ratio triplex. 1<sup>mo</sup>, nam sola absolutio significat gratiam peccati remissionem, ut patet ex ejus verbis, *absolve te a peccatis*; universim autem in Sacramentis id, quod significat, etiam causat gratiam, cum sint signa practica gratiæ. 2<sup>do</sup>, quia in Sacramento Poenitentiae solus Sacerdos est iudex; at in omni iudicio sola iudicis sententia significat & causat liberationem rei a delicto; ergo etiam in hoc sacramentali iudicio. 3<sup>tio</sup>,

solus enim Sacerdos conficit Sacramentum Pœnitentiæ; atqui is non aliud ponit, quam absolutionem; hæc igitur sola est Sacramentum: sola proinde etiam causat gratiam.

Resp. N. Ant. Ad rationem *1am* dicendum: solam quidem absolutionem spectata hominum institutione significare memoratam gratiam, cum voces illæ, *absolvo te a peccatis*, ab hominibus institutæ sint ad significandam peccati remissionem; ex institutione attamen Christi, qui actus pœnitentis ad rationem Sacramenti evexit, his etiam practica ejusdem remissionis significatio convenit. Responsio hæc fundatur in Tridentini verbis supra N. 18. Versu *Doctrinam hanc Ec.* relatis, præsertim in addita ibid. a Concilio particula *præcipue*. Ad rationem *2dam*, D. Maj. solus Sacerdos est iudex, sic tamen, ut Christus simul actus pœnitentis esse voluerit signum practicum gratiæ sacramentalis C. secus N. admissa dein Min. negatur Illatio. Nimirum, quamvis Pœnitentiæ Sacramentum ad modum judicii sit institutum: non eadem attamen est ejus in omnibus, quæ humani, ratio. Ad *3tiam* ration. admissa Maj. Dist. Min. Sacerdos ponit solum absolutionem, per hanc ipsam attamen actus pœnitentis determinat ad rationem materiæ sacramentalis C. secus N. Min. cum Illat. Atque hinc patet, cur solus Sacerdos conficiat Sacramentum: universim enim is causare censetur compositum, qui forma in ejus materiam inducta determinat compositi speciem. Obvia in hanc rem se offerunt vel in artefactis exempla.

## §. II.

*Quæ contritio sit sufficiens ad Sacramentum  
Pœnitentiæ?*

**A**Ntequam de proposita quæstione statuamus, compendio præmittamus ea, quæ pertinent ad contritionis naturam, efficaciam, conditiones, & Doctorum in præsentī controversia opiniones.

## Definitio &amp; divisio contritionis.

**I.** **C**ontritio generatim sumpta ex mente Tridentini Sess. 14. 29  
C. 4. *est animi dolor ac detestatio de peccato commisso, cum proposito non peccandi de cætero; eademque ibid. dividitur in perfectam & imperfectam. Perfecta, quæ simpliciter vocatur Contritio, est dolor ex motivo charitatis procedens; cum juxta Trident. sit charitate perfecta. Talis porro ut sit, non requiritur dolorem conjungi cum expresso Dei amore: verum satis est eum procedere ex charitatis motivo, propter offensum videlicet Deum, in se bonum; hoc solo enim actus ejusmodi pertinet ad Virtutem Charitatis, fitque charitate perfectus. Imperfecta contritio, seu Attritio, ex eod. Trid. est, quæ vel ex turpitudinis peccati consideratione, vel ex gehenna, & pœnarum metu communiter concipitur, cum spe veniæ, ita ut voluntatem peccandi excludat. Hinc vero ultro consequitur, cum turpitudine peccati elucescat ex ejusdem oppositione cum virtute, dolorem, ex cujuslibet etiam moralis virtutis motivo conceptum, esse veram attritionem. Præterea, cum loco cit. gehennæ & pœnarum nominatim meminerit Concilium, quidni ex sensu illius vera sit attritio; quæ vel ex metu temporalis alicu-*

alicujus poenæ procedat: modo attamen hic ipse metus referatur ad poenam, prout a Deo malorum vindice infligendam. Est nimirum attritioni (de qua agimus) necessaria quædam ad Deum relatio; tum quod per eam detestari oporteat peccatum theologice acceptum, seu, ut est legis divinæ transgressio; tum quod per eandem creatura convertatur ad Deum, conversio autem hujusmodi sine aliqua ad Deum relatione haberi nequeat.

30

II. Quamvis de attritionis, ex turpitudinis peccati consideratione procedentis, honestate facile consentiant omnes: eundem nihilominus quidam abjudicant attritioni ex poenarum metu conceptæ; quin Lutherus, Baïus, Jansenius, ac post hos Carolus ab Assumptione in suo sub nomine *Germani Philalethis* Opusculo de Contrit. C. 1. §. 4. docent, ex solo poenæ timore operari, esse peccatum hypocrisis. Ego non diffiteor, converti ad Deum ex timore poenæ, esse timorem *servilem*: uti ex adverso *filialis* est, cum conversio fit ex timore culpæ. At enim cum D. Thoma 2. 2. qu. 19. Art. 4. inter ipsum servilem metum discrimen faciendum est.

Alius quippe est (ut dicitur) *serviliter servilis*; cum videlicet quis de peccato dolet ex solo poenæ metu in sensu exclusivo ita, ut implicate saltem hoc modo tendat: *doleo me peccasse, quia Deus peccatum punit*; non *dolerem, nec peccare desinerem, si non puniret*. Atque hic dolor omnino non est honestus, ut qui affectum ad peccatum includit sub ea conditione, quæ peccati malitiam non removet.

Alius timor dicitur *non serviliter servilis*; ut si de peccato, abstracta nunc quidem ab aliis motivis mente, ex poenæ metu doleas, nec tamen alia motiva excludas, huncque fere tendendi modum attritio habeat: *doleo me peccasse, nec deinceps peccabo, quia Deus peccatum punit*. Hanc jam vero attritionem actum esse honestum ajo, quin & salutarem, si  
moti-

motivum ejus per lumen supernaturale cognoscatur. Nimirum, attritionis hujusmodi motivum est timor Dei, ut malorum vindicis, idemque omnem peccandi voluntatem excludens: sicut igitur hic rectæ rationi conformis est, proinde honestus, sic & actus ex eo procedens. Ac revera nisi istud ita se habeat, qui fieri poterat, ut S. Literæ & SS. PP. sæpe sola poenarum comminatione ad bene operandum nos excitarent? *Omnis arbor*, ait Christus Matth. 7. *quæ non facit fructum bonum, excidetur & in ignem mittetur*. Similia legere est Gen. 2. Matth. 10. Luc. 13. & alibi. Ex Patribus autem vel Augustinum audire suffecerit. *Timor* (inquit ille Serm. 13. de verb. Apost.) *servus est, charitas libera est; & ut sic dicamus, timor est servus charitatis. Ne possideat diabolus cor tuum, præcedat servus in corde tuo, & servet Domina ventura locum. Fac. vel timore pænæ, si nondum potes amore justitiæ*. Atque inde est, quod Trid. cit. C. 4. attritionem hujusmodi declaret, *non solum non facere hominem hypocritam & magis peccatorem: verum etiam donum Dei esse, & Spiritus S. impulsus*; imo etiam contrarium sentientes anathemate feriat tam Sess. 6. Can. 8. quam Sess. 14. Can. 5. Huc faciunt etiam ab Alex. VIII. damnatæ Propos. 14. & 15.

### Efficacia contritionis extra Sacramentum.

I. **C**ERTA est contra Bajum sententia, vi contritionis perfectæ, extra ipsum Sacramentum, remitti peccata etiam 31  
 gravia. Contritio hæc videlicet includit charitatem, hæc vero operit multitudinem peccatorum 1. Pet. 4. & universim dicit Deus, *ego diligentes me diligo*. Prov. 8. unde Augustinus Tract. 5. in Epist. Joan. *per hanc, inquit, dilectionem peccata solvuntur*. Plura in hanc rem tam Scripturæ quam Patrum  
 R. P. Muszka Tom. II. de Sacram. Oo testi-

testimonia passim apud alios leges; nobis præcipuum momentum sit Tridentin. quod Sess. 14. C. 4. docet, contritionem charitate perfectam *hominem Deo reconciliare, priusquam hoc Sacramentum (Pœnitentiæ) actu suscipiat: ipsum nihilominus reconciliationem ipsi contritioni sine Sacramenti voto, quod in illa includitur, non esse adscribendam.* Inde contraria doctrina a Pio V. & Gregorio XIII. damnata est in Baji Propos. 31. 32. 66. & 68.

At, quæres fortasse, num contritio perfecta quælibet hac efficacia polleat? quælibet omnino, modo ea sit *appretiative* summa, hoc est ejusmodi, vi cujus contritus peccatum detestetur super omnia alia mala, deque illo admissio super omnia doleat, atque ita comparatus sit, ut quodvis malum aliud pati velit potius, quam peccare. Fundatur hæc doctrina in pluribus Scripturæ locis, quibus videlicet ad justificationem peccatoris requiritur conversio ad Deum ex toto corde & anima tota, ut Deut. 4. *Cum quaesieris Dominum Deum tuum, invenies eum: si tamen toto corde quaesieris, & tota tribulatione animæ tuæ.* Eadem habentur 3. Reg. 8. item Joel 2. & alibi. Id interim universum verum est: si contritio charitate perfecta sit, eam hoc ipso esse *appretiative* summam. Fieri etenim nequit, ut Deus (quod contritionis perfectæ est) diligatur super omnia; nec tamen quibuslibet creaturis præferatur; quod si fiat, necesse est contritionem esse *appretiative* summam. Ex his autem ultro colligitur, ad hunc remissionis obtinendum effectum, non requiri in contritione certum aliquem intensiōis gradum, aut longiorem ejus durationem. Quod enim hæc exigendi fundamentum? neutrum certe Scriptura aut PP. commemorant, cum contritioni peccatoris reconciliationem attribuunt.

- 32 II. Quod attinet ad efficaciam Attritionis, tametsi per eam extra Sacramentum non fiat culparum mortalium remissio, sit nihilominus venialium. Eruiatur autem istud ex Trident.



dent. quod Sess. 14. Cap. 5. docet, *venialia in Confessione citra culpam taceri, multisque aliis remediis expiari posse*; non igitur sola contritio est hujusmodi remedium, sed & attritio a justo elicitæ. Quomodo enim alias plura forent remedia? hæc inter profecto censeri non possunt bona opera justî secundum se spectata; cum enim in hac providentiæ lege nusquam fiat peccati remissio sine pœnitentia, cum hac utique conjungi necesse est ipsum opus bonum, quo remissionis efficaciam habeat. Aut si denique ex se ipso opus bonum justî hac efficacia polleat, potiori jure eadem attritioni attribuenda erit.

Si porro quæras: num attritio quælibet sufficiat ad remissionem venialium? affirmandum censeo relate ad eas veniales culpas, ad quas vi motivi sui attritio se extendit. Quo enim fundamento prærogativa hæc attritioni concedatur uni, negetur contra alteri? At enim, inquires, hinc consequi *imo*, quamvis attritionem habere vim remissivam venialium æqualem cum contritione perfecta; *2do*, venialia per Sacramentum Pœnitentiæ nunquam expiari, cum id jam antea præstet attritio Sacramento præmissa. Neutrum ajo consequi. Non *1um*: nam contritio perfecta est venialium remissiva etiam tum, dum ea cum mortalibus conjungitur, quod attritioni non convenit. Non etiam *2dum*: quamvis enim in Confessione, qua justus se accusat de solis venialibus, hæc omnino vi attritionis præmissæ jam ante sacramentalem absolutionem condonentur: at eadem remitti virtute Sacramenti tum saltem certum est, dum ab homine attrito simul cum mortalibus subjiuntur Clavibus Ecclesiæ.

### Conditiones contritionis Sacramentalis.

- I. **C**ontritionem, seu demum *perfecta* seu *imperfecta* sit, dum ea cum Pœnitentiæ Sacramento conjungitur, certis

conditionibus instructam esse oportet. Sunt vero illæ ex communiore Theologorum sententiâ sequentes.

1<sup>mo</sup>, Ut præcedat aut saltem concomitetur absolutionem; sequi certe eam non sufficit, cum indignus sit absolvi a peccatis, qui ea nondum detestatus est. Eadem nihilominus contritio sufficiens videtur ad Pœnitentiæ Sacramentum, tametsi Confessionem non antecedit, modo illam subsequatur, ipsaque confessio ad absolutionem ordinetur; id quod vel sensus fidelium & praxis Confessariorum satis docet. Expedit interim, ac omnino in praxi curandum est, ut dolor ipsi etiam confessioni præmittatur; periculum quippe est in mora illa modica, quæ confessionem inter & absolutionem intercedit, ne pœnitentis doloris obliviscatur; aut non doleat serio.

2<sup>do</sup>, Ut contritio sit dolor *formalis*; unde non sufficit *virtualis*, is videlicet, qui includitur in actu charitatis, aut alio pio motu voluntatem peccandi excludente. Nimirum Florent. & Trident. jam alias cit. pro materia hujus Sacramenti requirunt contritionem; hoc nomine autem absolute prolato intelligitur dolor *formalis*: eumque nominatim intellexisse laud. Concilia patet ex contextu, in quo expressis verbis dicitur, ad contritionem hanc pertinere, *ut doleat de peccato, eam esse dolorem ac detestationem*, &c.

3<sup>io</sup>, Ut, hic dolor sit re ipsa talis, ac etiam supernaturalis. Quod si enim existimatus duntaxat sit dolor, existimatio hæc quidem excusat pœnitentem a peccato: non supplet attamen defectum materiæ ad Sacramentum necessario requisitæ, hoc est, veræ contritionis. Hæc eadem si niere naturalis sit, uti conducere nequit ad vitam æternam, sic nec ad justificationem per Sacramentum obtinendam. Inde Trident. Sess. 6. Can. 3. anathema pronuntiat in eos, qui dixerint, sine Spiritus S. inspiratione atque ejus adiutorio hominem posse pœnitere, sicut oportet, ut ei justificationis gratia conferatur.

4to demum, Contritionem oportet esse universalem hoc sensu, ut ad omnia mortalia se extendat; cum enim unum mortale non remittatur sine alio, nec ullum vi hujus Sacramenti sine dolore, ultro consequitur, contritionem cum Sacramento Poenitentiae conjunctam extendi debere ad omnia mortalia saltem nondum remissa. Mortalia inquam: de venialibus enim res aliter se habet; cum unum veniale sine altero remitti possit.

II. Quod si jam vero contritio his conditionibus instructa sit, fieri nequit, ut eadem non jungatur cum emendandæ vitæ proposito, eoque efficaci & universali, sine quo pariter hujus Sacramenti valor constare non potest. At num propositum hoc perinde, ac de dolore dictum est, *formale* esse oporteat? inter DD. controversatur. Mihi cum Suarez probabilius videtur sufficere propositum *virtuale*, inclusum videlicet in efficaci peccatorum detestatione ac dolore. Evnire nimirum potest, ut quis detestationi peccatorum ita sit intentus, ut nihil omnino cogitet de futura vitæ emendatione; quod si jam vero hic serio ac efficaciter de peccatis doleat, hocque suo dolore excludat omnem peccandi voluntatem, cur non possit per Poenitentiae Sacramentum justificationis gratiam obtinere? Sane virtuale hoc propositum sufficit ad explicandum Concilium Trident. indefinite requirens emendationis propositum; neque ullo argumento certo probari potest propositi formalis necessitas.

## Doctorum Opiniones

### de Contritione ad Pœnit. Sacramentum sufficiente.

Quod §. hoc ex proposito discutiendum suscepimus, argumentum est hodie etiam inter DD. orthodoxos controversum, 35

sum, ac in eo versatur : quæ nominatim contritio sufficiat ad valorem Sacramenti Pœnitentiæ ? an eam videlicet ex motivo charitatis procedere, ac proinde *perfectam* esse oporteat ? an potius *imperfecta* etiam, seu attritio sufficiat ? Varias de hoc sententias legere est apud Viva in Propos. 15. ab Alexandro VII. damnatam, quas omnes ad quatuor classes commode reduxeris.

*1ma* est antiquorum quorundam, cum Magistro sent. S. Bonaventura, & Occamo ad Sacramenti Pœnitentiæ valorem requirentium contritionem perfectam. Atque hi (ut observat Suarez) existimabant, per absolutionem Sacerdotis non remitti peccata, verum declarari duntaxat jam antea per contritionem remissa. At enim istud jam post Trident. sustineri nequit; inde veterum horum auctoritate frustra sibi blandiuntur Recentiores, qui pariter contritionem perfectam requirunt.

*2da* cum Sotto & Navarro requirit contritionem saltem existimatam; horum proin opinione in eo solum pœnitente attritio sufficit, qui bona fide se putat esse contritum.

*3ta* admittit quidem contritionem perfectam non esse necessariam, ipsamque etiam attritionem sufficere: at eam solum, quæ conjuncta sit cum aliqua benevolentiae Dei dilectione, quæ nimirum cum Sacramento tantum, non vero extra illud, sit sufficiens ad justificationem. In hac ipsa interim benevolentiae Dei dilectione explicanda mirum variant opiniones: aliqui eam volunt esse initialem Dei amorem, quo videlicet peccator Deum, tanquam omnis justitiæ fontem, diligere incipiat; alii dicunt esse dilectionem debilem, nec ex toto corde profectam, quæ proinde sine adjuncto metus gehennæ motivo consistere nequeat; alii in alio constituunt. Nec pauci sunt, qui hanc propugnant sententiam; pro ea (præter Esthium, Molan. & Jansenium) lau-

laudantur e Thomistis Cajetanus, Victoria, Contenson. Auct. Rei sacramentariæ: e Schola Societatis Toletus, Comitulus, & Pallavicinus: e DD. Lovaniensibus Lupus, Farfaquez, ac ex modernis complures.

4<sup>a</sup> sententia docet attritionem (secluso quovis charitatis theologicæ motivo, etiam existimato) ad Pœnit. Sacramentum sufficere: modo ea cum proposito non peccandi & spe veniæ conjungatur. Atque hæc sententia post Trident. communiter a Doctoribus recepta est, ut testatur Viva, Gormaz, & Platellius in Synop. Cursus Theol. de Pœnit. C. 6. §. 2. N. 654. cum quibus & nobis erit

## ASSERTIO.

**A**D valorem & fructum Sacramenti Pœnitentiæ non requiritur contritio perfecta: non etiam Dei dilectio, quæ diversa sit a spe obtinendæ veniæ; sufficit proinde attritio, etiam ut talis cognita.

**Pro Parte I. Assertionis pugnat imo auctoritas Tridentini.** 36  
Ut enim jam alias commemoravimus, Concilium hoc Sess. 14. Cap. 3. generatim dicit contritionem esse quasi materiam & partem Pœnit. Sacramenti, dein vero Cap. 4. contritionem dividit in *perfectam*, quæ concipitur ex motivo charitatis, & in *imperfectam*, quæ attritio dicitur, quoniam vel ex turpitudinis peccati consideratione, vel ex gehennæ & pœnarum metu communiter concipitur; ex mente igitur Concilii utraque contritio est materia & pars hujus Sacramenti: quod enim convenit generi, speciei pariter convenire necesse est. Præterea eod. Cap. docet, *contritionem charitate perfectam Deo reconciliare, priusquam hoc Sacramentum actu suscipiatur*: attritio autem (ut ibid. additur) *quamvis sine Sacramento Pœnitentiæ per se ad justificationem peccatorem perducere nequeat, ta-*  
men

*men cum ad Dei gratiam in Sacramento Pœnitentiæ impetrandam disponit.* Qua vero dispositione? proxima certe, & non mere remota, ut volunt Adversarii. Etenim hæc Concilii verba cohærenter debent accipi ad præsentem antithesim de contritione perfecta, quæ non tantum remote, sed & proxime reconciliat extra Sacramentum; ergo Cum id præstet attritio intra Sacramentum, quod contritio extra illud, etiam attritio cum Sacramento proxime disponit ad justificationem: secus attritioni non attribueretur major vis intra, quam extra Sacramentum, cum extra hoc etiam remote disponat ad justificationis gratiam.

Quid jam autem his conficitur? istud: ex mente Tridentini attritio est materia & pars Pœnit. Sacramenti: eadem proxime disponit ad gratiam in Sacramento obtinendam; ergo ad valorem & fructum Sacramenti Pœnit. non requiritur speciatim contritio perfecta. Ac rêvera nisi istud dicamus, fatendum erit, Tridentinum eo ipso loco, quo ex proposito dolorem ad Sacramentum Pœnitentiæ requisitum designare & explicare volebat, haud satis illum designasse: nec tam se in re adeo necessaria explicuisse, quam potius ejus notitiam implicatis suis verbis obscurare voluisse.

- 37 Pugnât 2do Patrum auctoritas. Certe Augustin. Ep. 180. salutem morientium ita quandoque a Sacerdotis absolutione pendere ait, *ut propter ejus defectum damnentur.* Et Julius Papa Can. *si Presbyter.* Cau. 26. Qu. 6. *si Presbyter,* inquit, *Pœnitentiâ morientibus abnegaverit, reus erit animarum;* ibidemque Cœlestinus Papa Can. sequ. *agnovimus Pœnitentiâ morientibus denegari &c.* Quid hoc, rogo, aliud est? quam morienti mortem addere, ejusque animam sua crudelitate, ne absoluta esse possit, occidere. Qui autem hæc ita se habeant, si ad Sacramentum Pœnit. necessaria sit perfecta contritio? Aut enim eam moriens habet, aut caret illa; si primum, etiam sine sa-

cramentali absolutione salutem consequitur, cum contritio perfecta extra ipsum Sacramentum juxta N. 31. sufficit; si alterum, inutilis erit absolutio, ut quæ destituitur dispositione ad valorem & fructum Sacramenti necessaria. Dicere autem, ad justificationem extra Sacramentum requiri certam contritionis intensiorem, prorsus arbitrarium est assertum, cujus omnino nullum fundamentum certum proferri potest, ut eod. N. 31. insinuavimus.

Addat his momentum auctoritas D. Thomæ in 4. dist. 22. qu. 2. Ar. 1. quæstiunc. 4. in ☉. dicentis: *quando aliquis accedit ad Confessionem attritus, non plene* (hoc est imperfecte) *contritus; si obicem non ponat, in ipsa Confessione & absolutione sibi gratia & remissio peccatorum datur.* Idem jam antea ibid. dist. 6. qu. 1. Ar. 3. quæstiunc. 1. ad 1. *ad hoc, inquit, quod præparet se homo ad gratiam in Baptismo percipiendam, præexigitur fides, sed non charitas, quia sufficit attritio præcedens; cum igitur Pœnitentia sit perinde mortuorum Sacramentum ac Baptismus, uti ad hunc, ita & ad Pœnitentiæ Sacramentum cum fructu percipiendum. ex mente D. Thomæ sufficit attritio.* Ac sane nisi hæc sententia obtineat, jure quis dixerit: in Lege gratiæ multo difficiliorem esse salutis viam, atque eadem fuerit in Lege naturæ; in hac quippe sola contritione perfecta obtineri potuit justificatio, cum ex adverso in illa præcipiatur præterea peccatorum Confessio.

Pugnat denique 3tio praxis & sensus fidelium communis. Constat nimirum fideles, sola quandoque attritione præmissa, 38  
sacrum Pœnitentiæ tribunal accedere, ac in eo a Confessariis absolvi; istud autem tuto fieri, docent omnes sententiæ hujus Patroni. Qui vero hi & quales? videre est apud Gormaz Part. 1. de Pœnit. N. 446. ubi adductis nominibus, locis, & verbis plures quam 140 laudat AA. & quidem nominatim eos, qui post Concil. Tridentinum floruerunt atque inter

R. P. Muszka Tom. II. de Sacr.

Pp

hos

hos Gregorium XIII. & XV. SS. PP. dein 7. Cardinales, 6. Episcopos, ipsamque etiam S. Carolum Borromæum, 6. Concilia particularia, 6. diversos Catechismos pro Parochorum & fidelium instructione, publica auctoritate editos, unam Inquisitionem Gener. Hispanicam, Definitionem Sorbonicam &c. nihil ut dicam de gravissimis aliis variarum nationum & statuum Theologis. Quis jam autem credat, Ecclesiam permisuram fuisse, ut sententia hæc, si ea falsa sit, cum tot animarum damno impune invalescat? præsertim cum eadem repetitis vicibus S. Sedi fuerit exhibita, ac etiam a nonnullis postulatum, ut anathemati subiceretur; quod tamen obtineri nequitam potuit, ne quidem sub Alexandro VII. & Innocentio XI. tametsi hi ad tollendas opiniones noxias summa cura evigilarent.

- 39 Pro Parte II. Assertionis rursus arguo ex Tridentino. Etenim hoc supra laud. Cap. declarans, contritionem generatim esse necessariam ad hoc Sacramentum, non plus in ea requirit, quam ut conjuncta sit *cum fiducia divinæ misericordiæ, & voto præstandi reliqua, quæ ad rite suscipiendum hoc Sacramentum requiruntur*: & mox contritionem in perfectam & imperfectam dividens, hanc, seu attritionem, *si voluntatem peccandi excludat, cum spe veniæ, docet, ad Dei gratiam; in Sacramento Pœnitentiæ impetrandam disponere*, nulla omnino facta mentione peculiaris alterius dilectionis Dei. Quidni igitur inferre liceat? ex mente Tridentini non requiri dilectionem quandam, a spe veniæ, & voluntate se Deo per Pœnit. Sacramentum reconciliandi diversam; cum præsertim hæc ipsa spes & voluntas sit quædam inchoata Dei dilectio. Silentium porro hoc eo urget amplius, quod alias sequatur, Concilium egisse minus fideliter nobiscum, si rem tantopere (ut volunt Adversarii) necessariam reticuit, & quidem eo loco, quo cumprimis exponenda erat.

Quid



Quid quod ipse Card. Pallavicinus, noster in præfenti Adversarius, in Hist. Trid. L. 12. C. 10. referat: post illa de attritione verba, *vel ex gehennæ & pœnarum metu concipitur*, principio quidem additum fuisse, *cum sine aliquo dilectionis in Deum motu esse vix queat*; at, Petro Guerrero Patriarcha & Archiep. Granatenſi reclamante, ac protestante falsum esse, quod dari vix possit vera attritio, sine motu dilectionis in Deum, auditis Theologorum sententiis, adjecta illa verba deinde jussu Concilii expuncta esse. An vero expungi illa voluisset, si agnovisset hanc nominatim etiam dilectionem ad Pœnit. Sacramentum esse necessariam?

Haud ignoro equidem, ipsos etiam adversarios ad laud. Historiam provocare. Narrat nimirum Emin. Scriptor loco cit. Decretum de attritione primitus conceptum fuisse in hunc modum: *Illam contritionem, quam Theologi attritionem vocant, quod imperfecta sit, & solum vel ex turpitudinis peccati consideratione, vel ex gehennæ & pœnarum metu, qui dicitur servilis timor, concipiatur, si voluntatem peccandi excludat, cum spe veniæ, -- sufficere ad Sacramenti hujus constitutionem, ac donum Dei esse &c.* Subinde attamen (ut prosequitur Pallavic.) judicio Patrum unanimi erasa sunt sequentia: primum quidem particula *solum*; deinde, *qui dicitur servilis timor*; demum verba illa, *sufficere ad Sacramenti hujus constitutionem*.

At enim nihil in his est, quod nos premat, si causæ mutati Decreti attendantur. Erasa nimirum est primum particula *solum*: nam attritio aliis etiam motivis niti potest; item verba, *qui dicitur servilis &c.* quia timor servilis sæpe sumitur pro *serviliter servili*, habente videlicet adnexum affectum ad peccatum: ad hunc proinde excludendum satis erat relinqui verba, *si voluntatem peccandi excludat*. Postrema demum verba, *sufficere &c.* expuncta esse censeo, vel ob impropriam eorum acceptionem, cum universim pars non dicatur pro-

prie sufficere ad constitutionem totius, aut ne videatur Concilium perstringere quosdam DD. cum Scoto totam hujus Sacramenti substantiam constituentes in sola Sacerdotis absolutione, ita ut poenitentis actus prævixæ instar dumtaxat dispositionis requirantur. Neque obest, mutationem hanc factam Joanne Æmiliano Ep. Tudet. intercedente, & Concilium admonente de variantibus Doctorum sententiis circa attritionis sufficientiam: istud enim evincit id unum, quod a Concilio nihil expressis verbis sit definitum de attritionis sufficientia; quod & nos ultro concedimus.

- 41 Assertionis Pars III. speciatim probari non debet, cum veritas ejus ex hætenus dictis consequatur, ut cuique, momenta jam adducta invicem conferenti, patebit. Consulto autem additum est, *etiam ut talis cognita*: quo videlicet indicarem: perperam a quibusdam exigi vel *existimata contritionis* necessitatem. Ac omnino, quid tandem illa contritionis existimatio prodesse possit ad valorem Sacramenti? nihil certe prodesse illam, si attritio ex se sufficiat, clarum est; quod si autem attritio ex se non sit sufficiens, perinde sufficiens non erit, accedente etiam existimatione, quando hæc attritionis naturam non mutat. Ex præcepto attamen, inquires, requiri contritionis existimationem; verum quod hujus præcepti fundamentum? imo præceptum hoc, ajo, fore contra Poenit. Sacramenti institutionem; cum enim Sacramentum hoc sit mortuorum, ad conferendam proinde primam gratiam institutum, exigi nequit a poenitente, ut accedens illud se esse in gratia existimet: id quod attamen exigeretur, si absolutioni sacramentali præmittenda esset contritio, quæ perfecta existimetur.

Respon-

## Respondetur Adversariis.

**Q**Uo contritionem perfectam ad valorem Sacramenti Pœnitentiæ esse necessariam, nec attritionem sufficere solam comprobent Adversarii, toti in eo sunt, ut evincant: sine charitate obtineri non posse justificationis gratiam. Arguunt vero istud

I. Ex S. Literis. Jam enim in Lege veteri Deut. 4. dictum est, *cum quaeseris Dominum Deum tuum, invenies eum, si tamen toto corde quaeseris*; ex Joel. 2. cohortans Deus ad pœnitentiam, *convertimini, inquit, ad me in toto corde vestro*. Quid autem est *toto corde* quærere Deum, & ad eum cum converti, nisi per charitatem eidem conjungi? Id ipsum clarius indicatur I Joan. 3. *qui non diligit, manet in morte*; item I Cor. 13. *Si tradidero corpus meum ita ut ardeam, charitatem autem non habuero, nihil mihi prodest*: ac rursus ibid. C. 16. *Si quis non amat Dom. N. J. Christum, anathema sit*.

II. Ex Patribus. Chrysost. Hom. 4. in 2. ad Cor. Ep. monet: *ingemisce, non quod pœnas daturus sis; nihil enim hoc est, sed quod Dominum tuum offenderis, tam benignum &c.* Augustin. L. 1. contra Crescon. C. 12. cum charitate ait omnia recte fieri, *si autem illa desit, omnia frustra fiunt*. Item serm. 7. de Temp. Pœnitentiam, inquit, *certam non facit nisi odium peccati, & amor Dei*. Demum L. de vera & falsa Pœnit. C. 17. *sine amore Dei nemo unquam gratiam invenit*. Huc facit & D. Thom. 3. p. qu. 84. Art. 10. in 3. dicens: *Cum ad veram pœnitentiam charitas requiratur, sine qua non delentur peccata &c.* & in 4. dist. 17. qu. 3. Art. 4. quæstiunc. 1. *Confessio non valet sine charitate*. His non absimilia legere est apud Gregorium M. L. 1. Moral. C. 27. Petrum Chrysol. serm. 94. Bernardum de Dilect. Dei C. 12.

III. Ex Tridentino, quod Sess. 6. Cap. 6. agens de *Mo-  
do præparationis* ad justificationem, tum ait justificari pecca-  
tores, dum a justitiæ divinæ timore utiliter concussi *in spem*  
*eriguntur*, *fidentes Deum sibi propitium fore, illumque, tanquam*  
*omnis justitiæ fontem*, diligere incipiunt &c. ubi vides præter  
spem requiri dilectionem. Ac rursus ibid. Cap. 7. statim prin-  
cipio declarat, justificationem esse renovationem interioris ho-  
minis, *per voluntariam susceptionem gratiæ & donorum*; dein sub  
medium, in justificatione fidem, spem, & charitatem infun-  
di docens, addit: *nam fides, nisi ad eam spes accedat & chari-  
tas, neque unit perfecte cum Christo &c.* Quod si autem ad ju-  
stificationem requiratur voluntaria susceptio gratiæ, utique  
peccator velle debet gratiam, seu amicitiam Dei: hoc ipsum  
autem quid aliud est, nisi amare Deum? Quod si item unio  
perfecta cum Christo haberi nequeat sine charitate, non igitur  
etiam justificatio. Denique Sess. 14. C. 4. attritionem,  
quam ait ad Dei gratiam in Sacramento Pœnit. impetrandam  
disponere, comparat cum Ninivitarum pœnitentia: *hoc enim*;  
inquit, *timore utiliter concussi Ninivitar, ad Jonæ prædicationem*  
*plenam terroribus pœnitentiam egerunt, & misericordiam a Do-*  
*mino impetrarunt*; at hæc in Lege veteri impetrari non po-  
tuit sine charitate, cum hac igitur conjunctus fuit Ninivita-  
rum timor, atque etiamnum universim apud pœnitentes con-  
jungi debet, quo justificationis gratiam in ipso etiam Pœni-  
tentiae Sacramento consequantur.

Resp. I. generatim. Quod contendunt adversarii, uni-  
versim videlicet peccatorem justificari non posse sine charita-  
te perfecta, id omnino sustineri nequit, ut a N. 36. jam com-  
probatum est. Inde cum Scriptura, Patres, & Concilium  
Tridentinum ad obtinendum justificationis effectum requi-  
runt charitatem, dicendum est: vel agi de charitate extra Sa-  
cramentum justificante; vel de charitate, odio contrarie op-  
posi-

posita, seu absentia odii: vel de charitate, quæ sit inchoata aliqua Dei dilectio, qualem in ipsa etiam attritione includi haud inficiamur. Sed nimirum, objecta nobis Scripturæ & Patrum ac Concilii loca speciatim explicanda sunt. Itaque

Resp. II. In particulari, & quidem ad I. verba hæc: *Querere Deum, & ad eum converti ex toto corde*, non significare ex se charitatem perfectam; congrue enim sumuntur pro conversione vera, qua videlicet quis sincere detestatur peccata cum proposito, ea deinceps non admittendi: qualis conversio est etiam attritio. Dixi, *non significare ex se*: nam in cit. locis apud Joel. & in Deut. ultro concedo significari conversionem cum charitate conjunctam, cum in veteri Lege nulla alia poenitentia fuerit sufficiens, ad gratiam justificationis obtinendam. At istud nos non urget, cum in Lege gratiæ aliud præterea etiam sit remedium, nempe Sacramentum Poenitentiae.

Sed nec reliqui textus quidquam conficiunt. Etenim D. Joannes cit. Cap. agit de dilectione fraterna, ac tò *non diligit*, sumit contrarie hoc sensu: *qui odit fratrem suum, manet in morte*; continuo enim subjungit: *omnis qui odit fratrem suum, homicida est &c.* Idem est de verbis Apostoli ex C. 13. relatis: ut enim ex prioribus Capitibus clarum est, dehortatur Corinthios a schismate & dissensionibus. Præterea eod. Cap. charitatem quandoque accipit pro habitu charitatis, nam in fine concludit: *nunc autem manent fides, spes, charitas, tria hæc; major autem horum est charitas.* Quocumque autem horum sensu loquatur, ad rem præsentem non facit. Quod demum C. 16. anathema dicat non amanti Christum, id solum ex eo consequitur: maledictum esse, qui Christum opere non amat, hoc est, Legem ejus & præcepta non sequitur; vel quod per vitam aliquando actus charitatis in Christum eliciendus sit, præsertim cum præceptum urget. Reliquum igitur habet Adversarius, ut præceptum hujusmodi dari comprobet etiam

etiam pro eo casu, quo per Sacramentum Pœnitentiæ expiari volumus.

Resp. ad II. Chrysostomus in laud. Hom. hortatur ad id, quod est perfectius, quodque etiam extra Sacramentum iustificet: verum de dolore, qui ad Sacramentum requiritur, nullam mentionem injicit. Augustinus autem, contra Cresconium Donatistam scribens, agit de charitate habituali: in contextu enim se explicans eam charitatem dicit, *quæ diffusa est in cordibus nostris, & quæ schisma excludit ab Ecclesia*, à qua Donatistæ per suum schisma se separarunt. In reliquis demum duobus locis, vel loquitur de justificatione extra Sacramentum consequenda: vel intelligit amorem inchoatum, qui includitur in proposito implendi omnia Dei præcepta, quale propositum non deest vere attritis. Præterea, L. de vera & falsa Pœnit. non est Augustini, sed Auctoris alterius incogniti, ut probat Bellarm. L. de Script. Eccl.

Quod atinet ad D. Thomam, ejusdem nobiscum eum esse opinionis patet ex N. 37. unde in adductis in Object. locis nec sibi, nec nobis adversatur. Non in 1<sup>mo</sup>; agit enim illic de charitate habituali, idque unum vult: quod per veram pœnitentiam hæc charitas causetur, per quam, utpote cum gratia conjunctam, remittuntur peccata. Certum istud fit ex contextu: cum Doct. Ang. cit. Art. in 3<sup>o</sup> pugnet contra eos, qui credebant, *quod charitas semel habita non possit amitti, & per consequens pœnitentia si sit vera, nunquam per peccatum tollatur, ut sic sit necesse eam iterari*. Nec adversatur in 2<sup>do</sup>: nam & hic charitatis nomine intelligit charitatem habitualem, sine qua (nisi ea videlicet in Pœnitentiæ Sacramento pœnitenti cum gratia infundatur) dicit Confessionem non valere ad obtinendam gloriam, ut rursus contextus docet.

Resp. ad III. Fateri & nos (quod Trid. docet cit. C. 6.) peccatores ad justificationis gratiam præparari, *cum in spem*  
eri-

eriguntur, & Deum diligere incipiunt; at enim cum ipsum Trident. non dicat *diligunt*, sed tantum *diligere incipiunt*, ex mente Concilii ad præparationem hanc sufficit initium dilectionis, seu amor inchoatus & initialis. Id genus porro amorem etiam cum contritione imperfecta conjungi contendimus. Ac primum quidem includitur is in proposito non peccandi de cætero, atque adeo servandi præcepta Dei, inter quæ est etiam præceptum charitatis; hinc propositum istud jure dixeris esse *dilectionem in causa*, seu initium & principium dilectionis. Includeitur item in poenitentis voluntate, qua intendit reconciliari Deo, ac in ejus gratiam & amicitiam redire. Demum includitur in ipsa spe: dum enim per hanc desideramus Deum ut nobis bonum, proxime disponimur ad amorem benevolentiae, quo Deus, ut in se super omnia bonus est, amatur.

Ac hæc quidem ad occurrendum positæ Objectioni sufficiunt. Quod si interim in eandem rem plura velis, non incongrue dici potest cum Hainoldo: nomine dilectionis isthic intelligi ipsam etiam attritionem, aut quemvis alium virtutis actum, quo peccandi voluntas excluditur; nam juxta S. Thom. in 3. dist. 26. qu. 2. *omnes aliæ virtutes participant aliquid a charitate, scilicet desiderium summi boni, propter quod operantur*; & Eccli. 25. dicitur: *Timor Dei dilectionis ejus initium*, ubi timorem servilem intelligit Doct. Ang. 2. 2. qu. 19. Art. 8. ad 1. inquires: *Timor, qui est initium dilectionis, est timor servilis*. Quin & cum Viva dici potest: attritionem vocari amorem Dei propterea, quod attritio non tantum poenæ reatum detestetur, verum etiam offensam, quæ est malum Dei, quod ipsum est aliqua ratione amare Deum; etenim nolle alteri malum, æquivalenter est illi velle bonum, saltem negativum: velle autem bonum, est amare. Ex his porro pronum est conjicere, cur Trident. hoc loco spem a dilectione Dei dividere videatur; nimirum vel ut explicet

proprietatem spei, nominatim inchoatam charitatem in se includentis; vel ut indicet, præter spem requiri aliud, quod ipsum sit hæc charitas inchoata, uti est voluntas reconciliationis, propositum non pecandi &c. Certe autem illis, *diligere incipiunt*, non significari charitatem perfectam, satis probat vel adjectum verbum, *incipiunt*; tum etiam colligitur ex subjectis ibid. pro confirmanda tradita doctrina Scripturæ textibus, quorum omnino nullus est, qui ad perfectam charitatem pertineat.

De altero, quod ex ejusdem Sess. 6. Cap. 7. objicitur, id habe: voluntariam susceptionem gratiæ, proinde & voluntatem obtinendæ Dei amicitiae, niti posse non tantum charitatis, sed & cujuslibet virtutis alterius motivo; hinc etiam attritus vult gratiam & amicitiam Dei, non quidem ut Deo bonam, cum ex charitatis motivo non operetur: verum ut sibi bonam & necessariam ad evitandas pœnas, ex quarum metu in præfenti positive detestatur peccatum. Sub medium autem ejusd. Cap. ubi ad perfectam cum Christo unionem requiritur charitas, intelligenda est habitualis, ut colligitur ex contextu, præsertim ex præcedentibus verbis illis: *In justificatione - - hæc omnia simul infusa accipit homo - - fidem, spem, & charitatem.*

Ad ultimum denique ex Sess. 14. Tridentini locum dico: attritionem sacramentalem cum Ninivitarum pœnitentia comparari solum in eo: quod sicut Ninivitæ plenam terroribus pœnitentiam agentes a Domino misericordiam impetrarunt, ne juxta prædictionem Jonæ subverteretur Ninive; ita per attritionem in Sacramento Pœnitentiæ impetretur gratia Dei reatus culpæ & pœnæ remissiva. Non est igitur illic sermo de Ninivitarum pœnitentia ad eorum justificationem sufficiente; quis enim credat Ninivitas omnes justitiæ gratiam fuisse consecutos? quod si tamen illorum aliqui eam consecuti sunt,

sunt,



sunt, indubie hi ab actu timoris & attritionis ad charitatem perfectam processerunt; hanc interim cit. loco Trident. non requirit ad justificationem in Sacramento obtinendam, cum de illa attritione loquatur, quæ *sine Sacramento Pœnitentiæ per se ad justificationem perducere peccatorem nequeat.*

Urgeri potest Argumentum ratione theologica. Nimirum I. Peccati malitia est in eo, quod peccator præ Deo amet creaturam; quo igitur rite pœniteat, seque in statum gratiæ reponat, malitia hæc sufferenda est per actum contrarium, quo Deum amet præ creaturis.

II. Hoc providentiæ statu non conferuntur habitus fidei & spei sine præviis harum virtutum actibus; ergo nec habitus charitatis, & cum eo semper conjuncta justificans gratia, nisi actus charitatis præcedat.

III. In Lege veteri ad obtinendam justificationis gratiam semper necessaria fuit contritio; potiori igitur jure in Lege nova. Quis enim sibi persuadeat, in Lege timoris requisitum fuisse amorem, non autem in Lege amoris? cum tamen juxta S. Augustinum contra Donat. differentia Legis & Evangelii, sit timor & amor; & Legis Evangelicæ suavitas non consistat in præceptorum imminutione, sed in abundantia gratiæ, quæ suavia & facilia reddit præcepta.

Resp. ad I. Conc. Ant. & N. Illat. si sermo sit generatim de pœnitentia & justificatione, etiam ea videlicet, quæ sit in & per Sacramentum; cujus ratio ex jam dictis petenda est. Quid quod memorata peccati malitia sufficienter revera tollatur per affectus illius pravi cessationem, ejusdemque detestationem vel ex motivo attritionis conceptam; tametsi verum sit, id præstari longe perfectius per dolorem cum charitate conjunctum.

Resp. ad II. Conc. Ant. ac rursum N. Illat. In iis nimirum, quæ a libera Dei voluntate dependent, attendendus est

providentiæ ordo ab eo constitutus; hoc jam autem rerum statu non voluisse Deum ulli conferre (quamquam id velle & facere potuerit) spei & fidei habitus sine præviis harum virtutum actibus, isthic aliunde suppono: non perinde autem rem se habere de charitatis habitu, qui in moderna providentiæ lege a gratia nunquam sejungitur, hoc ipsum illud est, quod toto hoc §. contendimus.

Resp. ad III. Conc. Ant. N. Illat. rursusque ad liberum Dei ita volentis ac disponentis arbitrium provoco. Quin si ipsa Legis utriusque conditio attendatur, plane congruum erat, ut in gratiæ Lege (cum in ea expeditior sit salutis via) etiam per solam attritionem cum Sacramento conjunctam obtineretur justificatio. Atque hinc patet, cur in Lege amoris, seu Evangelica, non semper requiratur amor ad justificationem: cum interim necessarius fuerit in Lege timoris, seu antiqui Testamenti. Non officit attamen istud, quo minus Lex nova dicatur Lex amoris: in hac quippe Deus per Christum pro salute nostra missum, & instituta ab eo Sacramenta, præbet se nobis magis amabilem, magisque propitium; reddit præterea salutis viam expeditiorem per ejusdem Christi gratiam, exempla, doctrinam &c. quæ omnia quid sunt, nisi immensi in nos divini amoris argumenta?

Quod autem ex Augustino additur: in Lege Evangelii non esse imminuta præcepta vetera; id non est accipiendum eo sensu, quasi re ipsa nullum eorum sublatum foret. Certe multa esse abolita constat, ac ipse August. Serm. 9. de Verb. Dom. ait, *quod homo antiquata Lege veteri sit exoneratus sarcinis innumerarum observationum.* Non sunt itaque imminuta hoc sensu: quod Legis veteris præcepta, quæ fuerunt figura præceptorum Evangelicorum, in his, ceu re præfigurata impleantur: uti universim Lex vetus impletur in Lege nova. Ita rursus Augustinus L. 18. contra Faust. *ea Christi-*  
*stia-*

*stiani, inquit, ex Lege & Prophetis non faciunt, quibus significata sunt ista, quæ faciunt; illa quippe erant figuræ futurorum, quas, rebus ipsis per Christum revelatis & præsentatis, auferri oportebat: ut eo quoque ipso, quo hæc ablata sunt, Lex & Prophetæ implerentur.*

## Corollarium

### De Sententiæ hujus securitate in praxi.

I. Solemne est nostris in præsentis Adversariis illud nobis 44  
 Soggerere: sententiam, quam tuemur, eo fere tantum pertinere, ut scholasticæ contentioni sit locus; tota interim contentione hac nihil ad usum & praxim fidelium conferri. Nimirum (ut illi quidem volunt) sententia, quæ ad Pœnit. Sacramentum attritionem sufficere asserit, est mere probabilis: sua proinde etiam est probabilitas oppositæ hanc attritionis sufficientiam neganti, quæ ipsa præterea est tutior; in iis autem, quæ ad Sacramenti valorem spectant, non licet uti opinione probabili, relicta tutiore, ut constat ex Propof. I. ab Innocentio XI. damnata.

Ac omnino tutiorem esse sententiam oppositam, dubitari nequit; eandem vero simul esse probabilem, arguitur tam ex multorum Doctorum, etiam post Trident. illam propugnantium, autoritate: quam ex Alexandri VII. Decreto 5. Maji An. 1667. edito, quo partes, circa attritionis sufficientiam dissidentes, prohibentur se invicem censuris, aut alterius injuriæ, vel contumeliæ nota laceßere. Verba Decreti huc facientia ita habent: *Sanctitas sua enixe cupiens pacis vinculum inter fideles servari, omnemque fomitem scissuræ extinguere, - in virtute S. Obedientiæ & sub pœna excommunicationis lata sententia huic S. Sedi reservata - - præcipit cunctis & singulis - - ut si deinceps de materia attritionis præfatæ scribent, vel libros*

*aut scripturas edant, vel docebunt, vel prædicabunt, - - non audeant alicujus theologicæ censuræ, alteriusve injuriæ, aut contumeliæ nota taxare alterutram sententiam, seu negantem necessitatem aliqualis dilectionis Dei in præfata attritione ex metu gehennæ concepta, quæ hodie inter scholasticos communior videtur: seu asserentem dictæ dilectionis necessitatem, donec ab hac S. Sede fuerit aliquid in hac re definitum. Hactenus pro se Adversarii.*

45 II. At nobis alia mens, propositum aliud est in præsententi hac, eaque longius producta disceptatione. Non ita quippe addicti sumus contentioni scholasticæ, ut uni huic litandum putemus; eo universim omnis lucubratio nostra spectat, ut vel fidei doctrinam contra Sectarios affirmemus: vel morum disciplinam pro informandis fidelibus explanemus. Et hanc proinde de attritionis in Pœnit. Sacramento sufficientia sententiam ita propugnamus, ut eandem simul in praxi tutam asseramus. Est nimirum ea non mere probabilis, quod volunt Adversarii: sed moraliter certa, aut saltem inter probabiles probabilissima; qui proinde eam sequuntur, non exponunt Sacramentum morali periculo frustrationis: si quod autem est remotum periculum, hoc universim conformiter ad prop. 3. ab Alexandro VIII. damnatam in actionibus humanis cavere non obligamur, imò nec possumus. Hanc porro probabilitatem summam, aut etiam moralem certitudinem satis (opinor) evincunt momenta ex sensu Tridentini deducta, & doctrina Theologorum communior satente ipso Alexandro VII. in Decret. supra laud. nihil ut dicam de rationibus aliis sparsim insinuat.

46 III. Sed nimirum paradoxum hoc videtur adversariis. Quomodo enim (inquiunt) sententia hæc moraliter certa, si opposita etiamnum sit probabilis? probabilem autem esse comprobatur multorum DD. etiam post Trident. eam docentium auctoritas: tum Alexandri cit, Decretum, quo prohibet illam affi-

affici censura, aut injuria, vel contumelia. Verum hæc non sunt ejusmodi, ut nos compellant fateri sententiæ nobis oppositæ *solidam* (ut dicimus) probabilitatem. Certe non desunt, qui his non obstantibus existiment eam dici posse improbabilem. Ego ne in Adversarios minus officiosus videar, aliquam (quæ per omnes componi potest cum oppositæ sententiæ morali certitudine) *tenuem* probabilitatem illi concedo, eamque non tam *intrinsecam*, quæ videlicet rationum momentis nitatur: quam *extrinsecam* potius ob quorundam Theologorum illi faventium auctoritatem; verum eandem esse *solide* probabilem, etiam atque etiam pernego.

Neque urget laud. Theologorum auctoritas: ad *solidam* quippe alicujus opinionis probabilitatem, quæ sententiæ alterius moralem elidat certitudinem, præter hoc, quod a non nullis AA. doceatur, requiritur insuper *solida ratio intrinseca*, qualem ab Adversariis adhucdum expectamus.

Nec urget Alexandri Decretum: dicere enim opinionem aliquam esse *tenuiter* duntaxat probabilem, non est *theologica censura, aut injuria, vel contumelia* afficere; quod tum solum fit, cum dicitur *in fide proxime erronea, scandalosa, temeraria* &c. Quid quod (ut observat Cardenas) Alexander hoc suo Decreto non declaraverit sententiam nobis oppositam *esse stricte loquendo probabilem, sed solum non esse aperte falsam*; censuras autem prohibuit, quod cuperet *inter fideles - - omnem fomitem scissuræ extinguere*, ut habent verba Decreti. Recte item notat Marin: non præcipi ab Alexandro, ne censura afficiatur opinio, docens *contritionem perfectam* esse necessariam; agit enim solum de sententia, *aliqualis dilectionis Dei in attritione, ex metu gehennæ concepta, necessitatem asserente vel negante*; Decretum proinde hoc uti *contritionem perfectam* requirentes a censura non eximit; ita nos vel ideo minus premit, quod in ipsa attritione *aliqualem Dei dilectionem*, hoc est,

in

in sensu jam alias exposito *inchoatam*; includi ultro admittamus.

- 47 IV. Ex his jam porro consequitur; sententiam a nobis propugnatam Scholis tuto egredi, suamque illi etiam pro sacro Pœnitentiæ tribunali securitatem esse; ut adeo eam pœnitentibus & Confessariis in praxi sequi liceat, quin admittant quidquam contra Decretum Innocentii XI. Prop. 1. damnantis. Hocque ipsum intelligi velim etiam pro articulo mortis, quantum quidem ad Pœnit. Sacramentum attinet; nam instante mortis periculo charitatis perfectæ actum in Sacramento aut extra illud eliciendum esse non nego vi peculiaris præcepti alterius, ut est contra Lugo hic Disp. 7. N. 262. communior sententia. Præterea (quod monet La Croix N. 881. de Attrit.) consultum esse fateor, ut, quoad fert tempus & occasio, Confessarii adnitantur in pœnitentibus procurare contritionem; cum id & pro valore Sacramenti sit securius, & pœnitenti utilius.

### §. III.

#### *Qualis Confessio requiratur ad Pœnit. Sacramentum?*

- **C**onfessionem pœnitentis esse *quasi materiam* hujus Sacramenti, jam alias dictum est; nunc definiendum habemus: qualem esse oporteat, ut illa perficiatur Sacramentum? ac nominatim: num secreta, & quovis signo sensibili expressa sufficiat? quid item ad ejus integritatem requiratur? Sed enim prius in memoriam revocanda est ipsius Confessionis sacramentalis notio, de ea item Novatorum sensa, tum Ecclesiæ disciplina.

#### Confessionis Sacramentalis definitio & varietas.

- 48 **C**onfessio Sacramentalis est accusatio externa de peccatis propriis Sacerdoti facta, ad obtinendam ab eo virtute  
Cla-

Clavium Ecclesiæ absolutionem. Fieri eam debere aliquo signo externo & sensibili, indubitatum est: tum quod sit materia hujus Sacramenti; tum quia a Sacerdote intelligi de. et. Signum porro hoc sensibile haberi potest quidem etiam per Scripturam, gestum, aut nutum: ad certius tamen & distinctius explicanda animi sensa accommodatissimum est vox, seu oris locutio.

Quocumque interim signo peragatur, esse potest vel *publica*, si nempe fiat coram pluribus: vel *secreta*, si fiat soli Sacerdoti sine ullo teste, quæ etiam passim *auricularis* dicitur. Utraque præterea, si spectetur Confessionis materia, dividitur in *materialiter* integram, & *formaliter* integram. Materialiter integra dicitur, dum pœnitens omnia peccata mortalia, nondum Clavibus subjecta, quoad speciem & numerum ita cōfiteatur, ut nullum omnino omitat, ne quidem per ignorantiam aut oblivionem inculpabilem. Contra formaliter integra, si modo pœnitens confiteatur ea omnia mortalia nondum confessa, quæ post diligens examen occurrunt: aut saltem ea, quæ in his circumstantiis detegere obligatur; tametsi interim omitat aliquod ex ignorantia, vel oblivione inculpabili: aut tale, quod nunc ex legitima causa confiteri non tenetur.

Novatorum sensa,

de Confessione auriculari, voce expressa; ejusque integritate.

**L**uthero & Calvino non satis erat Sacramentum Pœnitentiae sublatum ire; errorem hunc suum ultro protulerunt, ipsam Confessionem, qualis ad Sacramentum a nobis requiritur, mirum cavillantes. Lapis porro, ad quem cumprimis

R. P. Muszka Tom. II. de Sacr.

R r

offen-

offenderunt, est: Confessionis secretum, seu Confessio auricularis; quod eandem item nominatim voce fieri, ac potissimum quod integrum esse oporteat.

Certe Lutherus (ut constat ex ejus Ariculis Tridentino oblatis, teste Pallavic. in Hist. Trid. L. 12. C. 10.) ausus docere: *Confessionem secretam non esse juris divini; ante Concil. Lateranense nullum fuisse ejus usum, sed solum publicæ pœnitentiæ; enumerationem peccatorum non esse necessariam, imo esse impossibile* &c. Calvinus autem in Antid. Concilii Trid. ait: nullum fuisse per annos mille in Ecclesia Confessionis usum, donec Innocent. III. laqueum hunc populo Christiano induxit, quem Tridentini Patres adstringunt. Fateor equidem, in his sibi neuter constat: nam & Lutherus L. de Capt. Bab. C. de Pœnit. occultam Confessionem sibi placere, esse utilem, imo necessariam ait; & Calvinus L. 3. Instit. C. 4. fatetur, antiquum esse auricularis confessionis usum. At prior sensus denique apud utrumque prævaluit; inde illa in Confessionem, qualem Catholici requirimus, scommata; cum eam videlicet nunc carnificinam, & conscientiæ laqueum, alias tyrannidem, traditionem humanam, tormentum Innocentianum compellant, ut passim videre est in eorum Libris. Hæc eadem declamitari non raro audias a quibusdam eorum sectatoribus; quibus aut ea solum probatur confessio, qua quis coram Deo peccatum suum agnoscit: aut ea tandem, qua pœnitens in cœtu fidelium communiter cum reliquis, vel (ut quidam concedunt) etiam coram solo Ministro generatim se peccatorem profiteatur; idque seu voce, seu quocumque tandem signo alio.

Ac nos quidem, ut horum præcipuo errori occurramus, confessionem sacramentalem esse juris divini ex proposito Dissert. III. §. III. comprobabimus; isthic, ad reliquos Novatorum errores & cavillos convellendos, satis fuerit ex veteris Ecclesiæ disciplina ostendere: Confessionis, qualis nunc

a no-



a nobis fit, nempe Sacerdoti in aurem, voce, & cum integra peccatorum enumeratione, usum non esse novitium, sed antiquum, & primævis etiam fidelibus usitatum.

### Vetus Ecclesiæ disciplina de eadem Confessione.

I. **N**On nego veteris Ecclesiæ morem fuisse, ut peccato-  
res delicta sua quandoque palam in cætu fidelium  
etiam confiterentur, & publicam agerent pœnitentiam, de  
quo ritu speciatim Dissert. V. agemus: at præterea auricula-  
rem confessionem, soli videlicet Sacerdoti, & quidem secreto  
factam in usu iustitæ contendo.

Momentum in hanc rem primum est ex iis Patribus, qui  
docent, secretam Confessionem Sacerdotibus deservisse pro  
regula imponendæ peccatoribus pœnitentiæ, seu privatæ,  
seu publicæ. Audiatur ante alios Origenes, qui tam II.  
quam III. Seculo floruit. Ita autem is Hom. 2. in Psal. 37.  
*Circumspice diligentius, cui debeas confiteri peccatum tuum.  
Proba prius Medicum, cui debeas causam languoris exponere:  
- si quid ille dixerit, - si quid consilii dederit, facias  
& sequaris. Si intellexerit & præviderit talem esse languorem  
tuum, qui in conventu totius Ecclesiæ exponi debeat & curari,  
ex quo fortasse & cæteri adficari poterunt, & tu ipse facile  
sanari: multa hoc deliberatione, satis perito Medici illius consi-  
lio procurandum est.* Adde Augustinum, qui Serm. 331.  
alias Hom. 50. Cap. 4. postquam dixit, peccatori veniendum  
essè ad Sacramentorum Præpositum pro accipiendâ ab eo  
pœnitentiâ, ita sermonem prosequitur: *id agat, quod non so-  
lum illi profit ad recipiendam salutem, sed etiam cæteris ad ex-  
emplum; ut si peccatum ejus non solum in gravi ejus malo,  
sed etiam in tanto scandalo est aliorum, atque hoc exp. dire utili-  
tati Ecclesiæ videtur Antistiti, in notitia multorum, vel etiam to-  
tius*

*tius plebis agere pœnitentiam non recuset* &c. Non agebatur itaque pœnitentia publica, nisi ad arbitrium Sacerdotis, cui prius secreto detegebantur peccata.

Alterum momentum suggerunt ea Patrum loca, quibus agitur de Sacerdotum sacramentali silentio: aut expressis verbis dicitur sufficere confessio secreta. Pro 1mo habe Basilium in Ep. Can. ad Amphilocho. Can. 34. ubi ait: *adulterio pollutas mulieres, & confitentes, - - publicare quidem Patres nostri prohibuerunt, ne convictis mortis causam præbeamus.* Et Gregor. Nyssen. Homil. in eos, qui alios judicant, de Ministro Ecclesiæ loquens, *audacter, inquit, ostende illi, quæ sunt recondita: ipse honoris tui (utique silendo) rationem habebit.* Atque id re ipsa fecit S. Ambrosius; ut enim in ejus Vita refert Paulinus Sec. V. Scriptor, *quotiescunque illi aliquis ob percipiendam pœnitentiam lapsus suos confessus esset, ita fiebat, ut illum flere compelleret; - - causas autem criminum, quas illi confitebantur, nulli nisi Domino soli, apud quem intercedebat, loquebatur.* Pro 2do autem satis fuerit nominasse Leonem M. Seculi V. Pontificem, qui Ep. 80. ad Epp. Camp. *reatus conscientiarum, inquit, sufficiat solis Sacerdotibus indicari confessione secreta; & infra ibid. sufficit illa confessio, quæ primum Deo offertur, tum etiam Sacerdoti, a quo pro delictis peccator pœnitentiam accipit.*

- 51 II. Hanc vero peccatorum coram Sacerdote accusationem, primis etiam Seculis, fuisse nominatim voce & verbis expressis factam, discimus vel ex eo, quod eam PP. passim *Confessionis* nomine compellent. Ex usu autem loquendi communiter recepto, quid est coniteri? nisi locutione ipsa animi sensum testari & explicare. Habes in hanc rem ex paulo ante laud. Patribus Basilium, Paulinum, Leonem M. imo pene omnes, qui de hoc argumento scripserunt. Cum primis autem huc facit Hieronymus & Augustinus; ille quidem, cum  
in

in C. 16. Matth. dicit de Presbytero, *cum peccatorum audierit varietates, scit, qui ligandus sit &c.* alter dum in Pf. 66. exhortans ad Confessionem, *damnaberis tacitus*, inquit, *qui posses liberari confessus &c.* Quidni autem *auditio* supponat locutionem, eidemque *taciturnitas* opponatur? uterque igitur eam intelligit confessionem, quæ locutione peragitur. Multo adhuc certius hujus moris testimonium perhibent PP. sequi. N. laudandi; quando exacta peccatorum enarratio verbis quidem commode fieri potest: at ex confessione, signis duntaxat aliis, e. g. gestu vel nutu instituta, vix ac ne vix quidem sperari potest.

III. Quod demum in Confessione sacramentali offendit 52  
Novatores, est ejus integritas, seu exacta peccatorum, etiam occultorum, quoad speciem & numerum enarratio. Hoc certe illud est, propter quod eam dicunt esse *impossibilem*, esse *carnificinam*, *tormentum &c.* At enim mitius (opinor) sentient, aut sentire saltem poterunt, si animum veri studiosum ad ea advertant, quæ mox Assert. III. de Confessionis integritate ex sensu Catholicorum dicturi sumus. Nunc, quo præjudiciis eorum occurramus, id agemus, ut pro comperto habeant Confessionis integritatem non esse rem novam in Ecclesia, verum jam inde a primis Seculis usitatam.

Unde autem istud rursus certius, atque ex Patribus antiquis, confici potest? Quid vero isti? Tertullianus, qui Sec. II. & III. vixit, L. de Poenit. C. 4. ait: *omnibus ergo delictis, seu carne, seu spiritu, seu voluntate commissis, qui pœnum per judicium destinavit, idem & veniam per pœnitentiam sponondit*; hujus vero pœnitentiæ modum explicans C. 9. peccatorem dicit debere *Presbyteris adolvi*: quomodo autem? per confessionem, in qua nihil dissimuletur; ut enim ibid. prosequitur: *tantum relaxat Confessio delictorum, quantum dissimulatio exaggerat*; Confessio enim satisfactionis Consilium est, dissimulatio con-

tumacia &c. Origenes Hom. 3. in Levit. etenim omni genere pronuntianda sunt, & in publicum proferenda cuncta, quæ gerimus: si quod in occulto gerimus, si quod in sermone solo, vel etiam intra cogitationum secreta commisimus, cuncta necesse est publicari, cuncta proferri. Cyprianus in Tract. de lapsis laudans sincere confitentes, quanto, inquit, & fide majores, & timore meliores sunt, quamvis nullo Sacrificii aut libelli facinore constricti, quoniam tamen de hoc vel cogitaverunt, hoc ipsum apud Sacerdotes Dei dolenter & simpliciter confitentes, exomologesim conscientia faciunt, - - - scientes scriptum esse: Deus non irridetur.

Infinitus sim, si singulorum testimonia proferre velim; consule Bellarminum L. 3. de Confess. a C. 6. usque ad 9. Multum autem certe his momenti accedit ex iis Patribus, qui (ut passim est legere) Confessionem Sacerdoti faciendam esse docent, non solum ad obtinendam veniam; sed ad congruam etiam imponendam poenitentiam, & debitam peccatoris curationem. Quod si jam autem ex mente veterum Patrum confitenda erant peccata omnia, occulta, etiam tantum cogitata, nihil dissimulandum: si a Sacerdotibus imponenda satisfactio congrua, imo & curatio præstanda, quod utique præstari non potest, non cognito integre peccatoris statu: ultro utique (ut vides) consequitur, in veteri Ecclesia requisitam fuisse Confessionis integritatem. Ac sane illius complura etiam exempla habemus, notata a Scriptoribus Ecclesiasticis, ut Irenæo L. 1. C. 13. Cypriano in Tract. de lapsis, Eusebio Hist. Eccl. L. 6. C. 9. 34. & 43. Unum referre libet ex Socrate L. 5. C. 19. *Mulier quædam, inquit, nobilis ad Pœnitentiarium Presbyterum accedens, delicta post Baptismum a se perpetrata singillatim confessæ erat; quod ipsum narrans Sozomenus L. 7. C. 16. de eodem Presbytero, alios quoque audiente,* addit:

addit: *ille vero pro cuiusque delicto, quid aut facere singulos, aut luere oporteret, pœnæ loco indicens, absolvebat confitentes.*

Atque hæc (nisi fallor) satis superque sunt ad comprobandum, Confessionis sacramentalis, qualis hodie a nobis fit, morem fuisse etiam in veteri Ecclesia usitatum. Desinant proinde Sectarii novitatis labe illum aspergere: antiquumque esse, ac jam a primævis fidelibus receptum, fateantur oportet. Nobis id jam est reliquum, ut ad mentem Ecclesiæ explanemus, qualem nominatim hanc Confessionem esse necesse sit, quo suus constet Sacramento Pœnitentiæ valor. Istud vero tribus Assertionibus præstabimus.

## ASSERTIO I.

**A**D valide perficiendum Pœnitentiæ Sacramentum perinde est, seu Confessio sit secreta, seu publica; regulariter quatenus secreta fieri debet.

Vel secretam Confessionem sufficere ex ipsa hujus Sa- 53  
cramenti institutione docemur. Cum enim ad modum iudicii institutum sit, quidni sufficiat ea confessio, ex qua Sacerdos de statu peccatoris recte judicare possit? potest autem certe ex sola Confessione secreta, ut clarum est. Quid quod sæpe nec pœnitenti nec aliis expediat publica Confessio, juxta mox dicenda; inde Leo M. in Ep. 80. supra cit. ad Epp. Campan. reprehendit eos, qui peccatores ad publice confitendum compellebant. Huc facit item constans Ecclesiæ traditio, & a veteri usus Confessionis secretæ, qui ex Patribus N. 50. laudatis nobis innotescit.

Aperta demum in hanc rem est doctrina Concilii Trident. Sess. 14. Cap. 5. ubi hæc habet. *Caterum, quoad modum confitendi secreto apud solum Sacerdotem, etsi Christus non vetuerit, quin aliquis in vindictam suorum scelerum & sui humiliatio-*

liationem, cum ob aliorum exemplum, tum ob Ecclesiæ offensæ adificationem delicta sua publice confiteri possit: non est tamen hoc divino præcepto mandatum, nec satis consulte humana aliqua lege præciperetur, ut delicta præsertim secreta, publica essent Confessione aperienda. Unde cum a SS. & antiquissimis PP. magno unanimitque consensu, Confessio sacramentalis, qua initio Ecclesiæ sancta usa est, & modo etiam utitur, fuerit semper commendata, manifeste refellitur inanis eorum calumnia, qui eam a divino mandato alienam, & inventum humanum esse, atque a Patribus in Concilio Lateran. congregatis initium habuisse, docere non verentur. En! Concilii sensum pro Assertionem, simulque ex eo pro illa tuenda rationes. Porro

Publicam etiam Confessionem sufficere, patet parim ex ratione supra adducta pro Confessione secreta: nam & ex publica Confessione status pœnitentis innotescere potest Sacerdoti; partim ex Ecclesiæ usu: cum fideles per interpretem confitentes, aut alias etiam, dum Confessio a circumstantibus exauditur, absolvantur; tum denique ex laud. Trident. quod diserte dicit, Christum non vetuisse publicam Confessionem. Interim,

Regulariter (ut in Assertionem additur) secreto sunt confitenda peccata: quin sæpe nec convenit publicam eorum fieri accusationem. Quid enim, si ea publice fiat, pronius? quam ut quædam reticeantur peccata, atque ita sua desit Confessioni integritas; aut si ex adverso palam enarrentur omnia, sæpe evenire necesse est, ut in fidelibus enascatur scandalum, & gravia damna tam pœnitentem quam alios consequantur. Accedit, quod vel propter morem ab antiquo & communiter ubique in Ecclesia receptum usus, Confessionis publicæ illicitus sit redditus, absque gravi saltem eausa & legitima facultate.

ASSER-

## ASSERTIO II.

**R**ata ac valida est sacramentalis Confessio gestu, nutu, aut scripto facta, si loquendi moralis impotentia adsit; hæc contra si absit, voce fieri debet, idque adeo, ut, si secus fiat, Confessio evadat graviter illicita, proinde & invalida.

Ratio 1<sup>æ</sup> partis est: nam etiam per hæc signa poenitens potest facere peccatorum accusationem integram *formali* 54 saltem integritate, quæ ad hoc Sacramentum sufficit, ut dicitur Assert. sequ. neque constat præterea de ullo seu divino seu Ecclesiastico præcepto, quo sola oris Confessio ad valorem Sacramenti Poenitentiae requiratur. Imo solam hanc non esse necessariam docet Ecclesiae praxis, secundum quam (monente ipso rituali Rom.) muti & moribundi per id genus signa confitentes absolvuntur; idem est de absolutione militum ante pugnam, ut & naufragorum. Inde certum est, urgente Confessionis præcepto eos, qui loqui non possunt, obligari ad confitendum scripto, vel aliis externis signis.

Ratio 2<sup>dæ</sup> partis petitur ex antiqua & recepta per Ecclesiam consuetudine: tametsi enim nullo divino aut humano præcepto adstringamur ad Confessionem voce faciendam, ipsa nihilominus hæc consuetudo graviter obligat; tum quia est in re gravi: utpote pertinens ad certius procurandam Confessionis integritatem, ac proinde ad modum convenientiorem perficiendi Sacramentum; tum quia hic est post D. Thomam communis Doctorum sensus. Quod si itaque aliquis, extracatum physicæ aut moralis impotentiae confitendi per verba, aliter confiteatur, indubie peccat graviter: quodque hinc consequitur, ipsa Confessio est irrita. Pluribus ista hic Suarez, & Viva in Append. ad Propof. damn.

## ASSERTIO. III.

**A**D valorem Sacramenti Pœnitentia necessaria est confessio saltem formaliter integra: eadem quandoque sufficit, ut adeo materialis integritas non semper requiratur.

55 Pars I. fundatur 1<sup>mo</sup> in Traditione, qua docemur omnia mortalia esse integre confitenda. Hæc autem Traditio habetur tam ex Patribus N. 52. citatis, aliisque apud Bellarm. L. 3. de Confess. a C. 6. quam œcumenicis Conciliis ( præter particularia apud Bellarm. ibid. C. 5.) Lateranensi IV. & Florentino pro fronte hujus L. laudatis, ac etiam Tridentino, cujus verba mox recitabimus.

Fundatur 2<sup>do</sup> in sensu fidelium, agnoscentium universim obligationem aperiendi in confessione omnia quoad numerum & speciem peccata mortalia.

Fundatur 3<sup>tio</sup> in ipsa Sacramenti hujus institutione, secundum quam Confessarii munus est Judicis & Medici; neutrum enim rite exerceri potest, si desit confessionis integritas, ut rem expendenti patet.

Fundatur demum 4<sup>to</sup> in aperta Tridentini doctrina, quam Sess. 14. Cap. 5. ita proponit. *Christus - - Sacerdotes sui ipsius Vicarios reliquit, tanquam præsides & judices, ad quos omnia mortalia crimina deferantur, in quæ Christi fideles ceciderint &c. Constat enim Sacerdotes judicium hoc, incognita causa, exercere non potuisse, neque æquitatem illos in panis injungendis servare potuisse, si in genere duntaxat & non potius in specie ac sigillatim, ipsi sua peccata declarassent. Ex his colligitur, oportere a pœnitentibus omnia peccata mortalia, quorum post diligentem sui discussionem conscientiam habent, in confessione recenseri, etiamsi occultissima illa sint &c.* Idem porro, quod hic declaravit, dein ejusd. Sess. Can. 7. sub anathemate definit, videlicet: in Pœnitent. Sacramento ad remissionem peccato-

*tum*



*rum necessarium esse Jure Divino, confiteri omnia, & singula peccata mortalia, quorum memoria cum debita & diligenti præmeditatione habeatur, etiam occulta, - - & circumstantias, quæ peccati speciem mutant.*

His jam igitur fundamenti instar præmissis, certum est: ad Pœnit. Sacramenti valorem requiri confessionis integritatem; at semper non requiritur materialis, quod paulo post probabimus; ergo saltem formalis. Ex hoc autem, attenta simul confessionis *formaliter* integræ definitione N. 48. descripta, ultro consequitur: ad valorem Sacramenti Pœnitentiæ omnino necessarium esse, ut pœnitens de omnibus mortalibus quoad numerum & speciem, quæ nondum directe subjecit Clavibus Ecclesiæ juxta Prop. 11. ab Alexandro VII. damnatam, & quæ ei post diligens examen occurrunt, se accuset: nisi tamen adsit causa legitima aliquod ex iis reticendi.

Pars II. Perinde certa est ex Trident. quod cit. Cap. 5. 56 constare ait, *nihil aliud in Ecclesia a pœnitentibus exigi, quam ut postquam quisque diligentius se excusserit, & conscientia suâ sinus omnes & latebras exploraverit, ea peccata confiteatur, quibus se Dominum & Deum suum mortaliter offendisse meminerit; reliqua autem peccata, quæ diligenter cogitanti non occurrunt, in universum eadem confessione inclusa esse intelliguntur &c.* Ex sensu Tridentini igitur confessio ex oblivione inculpabili diminuta, proinde tantum *formaliter* integra, non modo valida, sed utilis etiam est, atque adeo ad Pœnitent. Sacramentum sufficiens.

Quod vero isthic dictum de oblivione, idem intelligi velim de casu quovis, quo pœnitens peccatum aliquod mortale declarare omittit ex impotentia physica, aut etiam morali tantum. Nimirum confessionis integritas a Christo requisita pœnitenti debet esse possibilis; causa igitur quælibet, quæ *materiam* integritatem reddit impossibilem, simul efficit,

ut pro casu ejusmodi impotentiae ea integritas non requiratur. Id genus porro causae, praesertim quae moralem impotentiam fundant, ex circumstantiis aestimandae, & prudentis Confessarii judicio determinandae sunt: notanda cum primis Prop. 59. ab Innocentio XI. damnata. Caeterum de his causis copiose ac singillatim agunt Theologi morales, qui proinde consulendi.

### Resolvuntur Objecta.

57 **C**ONtra assertion. I. opponi potest I. de Confessione secreta: qui enim ea, inquires, sufficiat ad Poenit. Sacramentum? cum hoc ad modum iudicii sit institutum, iudicium autem natura sua testes requirat; atque hinc est, quod olim confessionis publicae usus fuerit, & quidem ex praeepto.

II. De Confessionis autem publicae sufficientia controversi potest ex Concilio Lateranensi IV. quod cum Can. 21. his verbis statuat: *Omniſ utriusque ſexus fidelis, - - omnia ſua ſolus peccata - - confeſſeatur proprio Sacerdoti &c.* per particulam *ſolus* ſatis declarat, praecipere ſe nominatim confessionem eam, quae ſine teſte fiat, proinde ſecretam; igitur praeepto hoc excludit publicam.

Reſp. ad I. univerſim a iudicio fori externi non recte argui ad iudicium Sacramenti Poenitentiae, cum ſpectata Chriſti institutione hoc inter & illud discriminis multum intercedat. Illud nimirum ad ſolum externum forum pertinet, finisque ejus praecipuus eſt punitio rei, non voluntarie, ſed coacte iudicium ſubeuntis; Sacramentum Poenitentiae contra ex fine ſuo principali eſt reconciliativum ad forum internum pertinens, & poenitenti voluntarium, ut adeo idem ſit reus, ſimulque ſui accuſator: quid igitur hic opus teſtibus & accuſatoribus aliis? Fuit equidem olim in uſu confeſſio publica, eaque non raro etiam praecipiebatur: at haec non erat ſacramentalis,

lis, verum pars duntaxat satisfactionis, quæ in præmissa jam ante confessione sacramentali in vindictam peccatorum poenitenti a Sacerdote imponebatur. Id ipsum interim nec fiebat semper: neque unquam præceptum erat, ut omnia peccata integre, etiam occulta videlicet, palam enarrarentur. At de hoc plura Dissert. V.

Resp. ad II. particulam *solus* in cit. Concilii exemplaribus omnibus non legi: imo in plurimis omisam reperiens; inde & nos sine illa textum hujus Can. principio Libri recitavimus. Quod si interim a Concilio addita sit, id factum ajo propterea, ut declararetur: confessionem secretam sufficere, eamque etiam regulariter fieri oportere, nec poenitentem cogendum esse ad publicam. Certe, non esse præceptam absolute & in sensu exclusivo confessionis publicæ, vel ex eo patet, quod certum sit, cum confessione per interpretem facta ratum esse Poenit. Sacramentum.

Contra Assertion. II. opponitur I. de confessione, quæ 58 fit signo a verbis diverso: videtur nimirum hæc non esse sufficiens, cum Concil. Florent. in Decret. Instruct. pro Sacramenti Poenit. materiâ nominatim *confessionem oris* assignet; ratum autem ac validum Sacramentum esse nequit sine materia necessario requisita, qualis est confessio.

II. De confessione oris controvertitur: num ea vel *regulariter*, extra casum videlicet impotentiae physicae aut moralis requiratur? Etenim valere videtur confessio, si poenitens (tametsi omnia peccata possit voce explicare) Confessario exhibeat scriptum exactam peccatorum enumerationem continens, ac dein oretenus dicat: *accuso me de his, quæ in hoc scripto contenta legisti*; cur non igitur etiam perinde valeat, si verborum loco aliis æquivalentibus signis, ad hanc ipsam sui accusationem indicandam, utatur?

Resp. ad I. a Concilio isthic nominari id, quod regulariter est materia necessario requisita, uti omnino est Confessio oris. Loquitur itaque positive, non autem sensu exclusivo, excludente videlicet universim omnem confessionem aliam, quæ confessioni oris æquivalet. Ita id. Concilium pro forma hujus Sacramenti assignat verba: *Ego te absolvo* &c. cum interim per omnes certum sit, his etiam æquivalentia sufficere.

Resp. ad II. N. Ant. nam hic confitendi modus extracausam impotentiae physicae aut moralis (quarum neutra adesse supponitur in praesenti) est contra Ecclesiae consuetudinem, quam, tum ob ipsius rei gravitatem, tum ob auctoritatem Doctorum istud sentientium, fideles observare graviter obligantur. Ipsi certe, qui hic nobis adversantur, gravem ajunt esse obligationem hæc saltem verba ore proferendi, *accusor me* &c. & istud quidem propter Ecclesiae consuetudinem; propter eandem igitur jure requirimus, ut omnia & singula peccata verbis expressis declarentur, cum non adest impotentia physica aut moralis. Ex proposito istud pluribus propugnat Viva in Append. ad propos. damn. ubi pro ead. sententia laudat D. Thomam Quodlib. 1. Art. 10. Cæterum etsi Ant. admitteretur, Illatio non esset legitima: prior quippe confessio esset vero sensu confessio oris, non item altera.

59 Contra Assertionis III. partem alteram pugnat duplex Theologica ratio. I. Concil. Tridentinum ad valorem & effectum Pœnit. Sacramenti requirit universim dolorem de peccatis perinde, ac eorum confessionem; at dolorem hunc semper necesse est esse materialiter integrum, hoc est, ad omnia mortalia se extendentem; igitur & confessionem semper oportet esse materialiter integram.

.II Si Sacramentum Pœnit. sit validum, per effectum gratiae illi proprium omnia mortalia remittuntur; at in eo casu, quo confessio non est materialiter integra, omnia mortalia

lia non remittuntur; ergo, si confessio non sit materialiter integra, non est validum Pœnitent. Sacramentum. Min. prob. nam Sacramenti hujus virtute ea solum remittuntur peccata, quæ subjiciuntur Ecclesiæ Clavibus: quod si autem confessio non sit materialiter integra, omnia peccata Clavibus Ecclesiæ non subjiciuntur, ut clarum est; ergo nec remittuntur omnia.

Resp. ad I. N. Ant. propter particulam *perinde* adjectam. Etenim Trident. Sess. 14. Cap. 4. eam universim, nulla restrictione facta, requirit contritionem, quæ sit *animi dolor ac detestatio de peccato commisso, cum proposito non peccandi de cætero*; item, quæ *cessationem a peccato, vitæ novæ propositum & inchoationem, & veteris odium contineat juxta illud: projicite a vobis omnes iniquitates vestras &c.* hæc autem convenire nequeunt contritioni, nisi ea vi motivi sui, saltem implicite, extendatur ad omnia universim peccata gravia. Præterea: eam esse vult contritionem, *cujus motus quovis tempore* (proinde etiam ante institutum hoc Sacramentum) *fuit necessarius ad impetrandam veniam peccatorum*; certe autem ad effectum hunc obtinendum in Lege veteri necessaria fuit contritio universalis. Quid quod nisi talis sit, nec verus dolor esse possit: cum idem motivum, quod inclinat ad detestandum mortale unum, inclinet perinde ad detestationem reliquorum. Cæterum nec contritionem esse oportet *materialiter universalem* hoc sensu, quasi vero ea singillatim ac explicite attingere debeat quodvis peccatum mortale, quod jam alias dictum est §. super. N. 33. Alia ex adverso doctrina est Concilii de confessionis integritate, ut constat ex N. 56. ubi recitatus ex Tridentino textus expressis verbis restrictionem continet.

Resp. ad II. D. Maj. Omnia remittuntur, vel directe, vel saltem indirecte C. Maj. semper directe N. Maj. Etiam Min. D. eo casu non remittuntur omnia directe C. nec indirecte N. Min.

Min. & Conf. Eadem Distinct. explicanda est probatio ulterior, nempe: ea solum in Sacramento remittuntur, quæ Clavibus subjiuntur vel directe, vel saltem indirecte C. quæ subjiuntur tantum directe N. Fatemur igitur in casu, quo Confessio non est materialiter integra, aliqua peccata non subjiungi directe Clavibus Ecclesiæ: omnia interim subjiuntur partim directe, ea videlicet, quæ pœnitens explicite declarat; partim indirecte, qualia sunt, quæ ex impotentia physica aut morali reticentur, hæc ipsa enim Trident. Sess. 14. Cap. 5. docet *in universum eadem Confessione inclusa esse.* Confer hæc cum iis, quæ in simili diximus L. II. de Bap. N. 71.

Corollarium de Confessionis integritate  
quoad peccata dubia, circumstantias, & alieni peccati  
manifestationem.

**I**Nter Theologos controvertitur: num ad Confessionis sacramentalis integritatem nominatim requiratur, ut pœnitens se accuset de peccatis etiam dubiis? declaret item peccati circumstantias? ac denique illud etiam confiteatur peccatum, quod manifestare non potest, quin prodat alienum? Singula hæc gravis omnino controversiæ sunt argumentum: quod quia prolixius, ut res posceret, tractare non vacat, compendio saltem de propositis quæsitis ita sensum meum aperiam, ut hic ipse principii instar deservire possit ad uberiores notitiam, quæ deinde ex citandis Auctoribus repetenda erit. Itaque

- 60 I. Cum de peccato esse possit dubium vel positivum vel negativum, ante omnia discernere oportet, ad quam dubii classem peccatum pertineat. Tum autem est peccatum *positive dubium*, dum habetur ratio probabilis iudicandi peccatum

tum esse commissum, vel ex adverso non esse commissum. Si contra pro utraque parte adsint rationes probabiles, at tenues admodum, ac ita se mutuo elidentes, ut neutri parti prudens assensus præstari possit, necesse sit proinde suspendere iudicium, dicitur peccatum *negative dubium*: nam si iudicii suspensio proveniat ex eo, quod pro neutra parte habeatur probabilis ratio, non est dubium, sed ignorantia, quæ in quæstionem non vocatur.

Quod si jam igitur peccatum sit *positive dubium* hoc sensu, quod probabile sit non esse commissum, aut saltem non fuisse mortale, nec detur in oppositum solida probabilitas, censeo reticere posse salva Confessionis integritate. Ratio est: quia poenitens ex ratione probabili iudicans se non peccasse, prudens dictamen practicum habet de non commissio peccato: unde, si se perinde gerat, ac si non peccasset, prudenter & honeste agit; eo ipso autem certe, salva Confessionis integritate, reticere potest id genus dubium peccatum: quo enim titulo obligetur ad confitendum peccatum, quod prudenter iudicat se non admisisse, quodque non nisi imprudenter iudicare potest esse admissum? Atque hinc ex adverso sequitur dari obligationem confitendi, cum peccatum ita est positive dubium, ut probabile sit esse commissum, nec in oppositum detur solida probabilitas: cum enim in moralibus raro admodum habeatur certitudo, tenemur nos conformare iudicio probabili, seu prudenti; tale igitur in præsentia cum adsit de peccato commissio, iudicium hoc habens gerere se debet pro peccatore, proinde & confiteri. Universim nimirum huiusmodi probabilitas, quæ videlicet excludit probabilitatem in oppositum, respectu operantis est quædam quasi moralis evidentiæ respectiva; hæc vero ad obligandum sufficit. Utrumque istud communem esse Theologorum sententiam testatur Viva in Curfu Theol. hic Disp. 4. qu. 3. N. 8. & 9.

R. P. Muszka Tom. II. de Sacra.

T t

Sed

Sed demus peccatum esse *negative dubium*: ad confitendum illud obligationem dari affirmant cum D. Thoma Dicaftillo, Sanchez, Gormaz, & multi alii apud La Croix L. 6. de Pœnit. Parte 2. N. 606. negant ex adverso D. Antoninus, Paludanus, Lessius, Layman, Viva, compluresque alii apud eumd. La Croix N. cit. Mihi videtur sentiendum cum postremis. Etenim obligatio gravis adstruenda non est, nisi constet de illa, & lege eam imponente: quamdiu enim dubitatur de his, libertas est in possessione; at non constat de Lege & obligatione confitendi peccata negative dubia, cum eam tot DD. sapientia non minus quam vitæ integritate conspicui (tametsi re utrinque diligenter ac ex proposito discussa) non agnoscant; obligatio igitur hæc adstruenda non est. Quid quod, attenta Concilii Trident. doctrina, multo probabilius sit non dari id genus obligationem: Trident. quippe Sess. 14. Cap. 5. ex proposito agens de confitendi obligatione, *oportere*, ait, *a pœnitentibus omnia peccata mortalia, quorum - - conscientiam habent, in Confessione recenseri*: & infra, *nihil aliud a pœnitentibus exigere, quam ut quisque - - ea peccata confiteatur*, quibus *se Dom. & Deum suum mortaliter offendisse meminerit*; ergo ex mente Tridentini solum datur obligatio ea confitendi peccata, quorum habetur *conscientia & memoria*: quæ voces absolute prolatae (uti eas profert Trident.) in sensu proprio accipiendæ sunt, sic autem acceptæ significant aliquam scientiam vel saltem iudicium prudens; cum igitur neutrum horum dubio negativo conveniat, ultro consequitur, peccata negative dubia obligatione hac non comprehendi. Non nego interim (quæ ipsa est communis Theologorum sententia) dari obligationem confitendi peccatum, quod quis scit se commisisse, ac solum dubitat, num illud sit confessus: idque tam pro eo casu, quo dubitat positive hoc sensu, quod probabiliter iudicet se non esse confessum, nec habet solidam probabilitatem in oppositum; quam pro casu



casu dubii negativi, cum videlicet ob rationes utrinque probabiles se mutuo elidentes pro neutra parte prudens iudicium ferri potest. Ratio hujus ex jam dictis facile colligitur, ac præcipue ex eo, quod in utroque hoc casu præceptum Confessionis sit in possessione.

II. Circumstantiæ peccati vel illius speciem mutant, vel 61 illud intra eandem speciem solum notabiliter aggravant. Ita rei, quæ ad Ecclesiam pertineat, furto sublata circumstantia est *speciem mutans*: hæc quippe facit, ut jam furtum non iustitiæ tantum, sed & religionis virtuti opponatur, atque sic duplex specie peccatum evadat. Circumstantia autem furti, quo major summa e. g. centum aurei sufferuntur, est tantum *notabiliter aggravans*, remanente eadem peccati specie, nempe solius furti contra iustitiam admissi. Atque hujusmodi mere aggravantes circumstantiæ fere reducuntur ad has quatuor: longiorem videlicet actus durationem, actus intensiorem, modum actionis peccaminosæ, & majorem damni illati quantitatem. Hoc jam f. cto discrimine,

Si quæstio sit de circumstantiis *speciem mutantibus*: certum est eas esse explicandas, quo sua sit Confessionis integritas, ut constat ex Trident. Sess. 14. Cap. 5. ubi expressis verbis dicitur, *etiam eas circumstantias in Confessione explicandas esse, quæ speciem peccati mutant &c.* quod ipsum deinde ejusd. Sess. Can. 7. definitur, anathemate etiam in oppositum sentientes *evibrato*.

Aliter res habet quoad circumstantias *mere aggravantes*. Earum expositionem ad Confessionis integritatem requiri affirmant Alensis, Cajetanus, Major, Gonet cum plerisque RR. Thomistis, & e Schola Societ. Suarez, Thom. Sanchez, Henriquez &c. negant vero D. Thomas, Scotus, D. Antoninus, S. Bonaventura, Medina, Diana, Vasquez, Lessius, Moya &c. omnes hos, & his plures alios citatos repe-

ries apud Marin Tract. 22. de Sacram. Pœnit. Disp. 4. Sect. 1. ubi ipse negantibus accedit, quod & ego faciendum censeo. Ratio ita sentiendi est 1<sup>mo</sup>, quia non est imponenda gravis obligatio, nisi de ea certo constet, ut docet S. Thom. Quodlib. 9. qu. 7. Art. 5. de obligatione autem circumstantias mere aggravantes confitendi non constat certo: cum eam tot graves DD. non agnoscant. Ac vel ideo 2<sup>do</sup>, dubium est de hac obligatione; in dubio autem Legis in possessione est libertas. Imo 3<sup>io</sup>, si non certo, saltem probabilius est ex Trident. non dari huiusmodi obligationem: nam Sess. 14. Cap. 5. nominatim agens de circumstantiis dicit, dari obligationem confitendi *circumstantias, quæ speciem peccati mutant*, nulla penitus facta mentione de mere aggravantibus; imo post recensita ea, de quibus ait esse obligationem confitendi, subjungit: *constat enim nihil aliud a pœnitentibus in Ecclesia exigere*. sicut igitur ex eo, quod Trident. ibid. doceat, dari obligationem confitendi *semel in anno*, recte infertur, non dari obligationem confitendi bis aut pluries in anno: ita etiam in præsentī recte arguitur, non dari obligationem explicandi circumstantias mere aggravantes. Demum 4<sup>to</sup>, ex opposita sententia sequuntur multa inconvenientia, ac pene moraliter impossibilis redditur Confessionis integritas, uti hæc pluribus declarat laud. Marin loco cit. N. 11. & 12.

62

III. Peccatum, quod pœnitens manifestare nequeat, quin prodat alienum, in duplici classe collocari potest. Nempe

Primo esse potest peccatum ejusmodi, cujus alter sit complex, ut esset e. g. incestus cum matre. Ac de hoc certum est 1<sup>mo</sup>; si Confessio fiat apud Sacerdotem, cui complex sit ignotus, manifestandum esse peccatum; hoc casu enim non infamatur proximus. Certum item 2<sup>do</sup>: si pœnitens sine gravi incommodo confiteri possit Sacerdoti, qui complicem non noscat, apud hunc omnino Confessionem esse faciendam,

REC

nec fieri eam posse apud alium, qui notitiam complicitis habeat; secus vel sine necessitate infamaretur complex, vel absque justa causa reticeretur species peccati, quorum tamen neutrum licite fieri potest. Controvertitur igitur solum de eo casu, quo is tantum adest Confessarius, qui complicem novit; communior interim est cum D. Thoma & S. Bernardo, Ostiensis, Navarro, Valentia, & Bannezio, affirmantium DD. sententia. Nimirum, constat ex Trident. in Sacramento Poenit. integram esse debere peccatorum, quoad speciem & numerum, Confessionem; non excusatur ergo poenitens ab illa propter onus aliquod aut incommodum, quod ex natura Confessionis ad hoc Sacramentum requisitæ oritur; uti esset complicitis infamia, quando ejus declaratio necessaria est ad speciem peccati explicandam. Pluribus hæc Platellius in Synop. Theol. C. 6. §. 6. a N. 779. & passim salii.

Potest item esse peccatum, cujus alter non sit complex; ut si quis e. g. occiderit sororem gravidam, quam Confessarius novit non fuisse conjugatam. In hoc jam casu non posse explicari integre peccatum, quin manifestetur fornicatio sororis, certum est: anigitur nihilominus manifestandum est hoc peccatum non complicitis? Card. Lugo cum quibusdam affirmat; probabilius tamen negandum est cum Suarezio Disp. 34. de Sac. Poenit. dect. 2. Assert. 2. N. 14. ubi hunc inter & priorem casum Si discriminis assignat: quod complex, patrando simul crimen cum altero, videatur cessisse juri suo, ne infametur, cum nosset præceptam esse Confessionis integritatem: secus sentiendum est de non complice.

IV. E. sententiis, quas in hoc Corollario amplectimur, 63 aliquæ sunt tantum probabiles, earumque oppositæ sunt præterea tutiores; quæres itaque fortassis: num eas propter Prop. 1. ab Innocentio XI. damnatam tuto in praxi sequi liceat? Ego vero indubitanter affirmo: quia nulla earum sen-

tentiarum impedire potest valorem Sacramenti. Certum quippe est ex Assert. III. ad valorem Sacramenti Pœnitentiæ sufficere Confessionis formalem integritatem: hæc vero toties habetur; quoties pœnitens bona fide de omnibus mortalibus peccatis eo se accusat modo, quo prudenter judicat se esse obligatum; cum igitur ex rationibus, quibus hæc sententiæ nituntur, prudenter judicare possit se non obligari e. g. ad confitendum peccatum, positive vel negative dubium in sensu exposito, ad explicandas circumstantias mere aggravantes &c. hoc dictamen secutus satisfacit obligationi, tametsi nec has explicet, nec illud confiteatur: atque ita sicut sua erit Confessione sacramentali integritas, sic & suus Sacramento valor. Consuli potest de hoc argumento Viva in Tract. Theol. ad Prop. I. ab Innoc. XI. damn. item in Cursu Theol. Disp. 4. Qu. 3. N. 6. & Cardenas in Crisi Theol. Dissert. 2. a N. 107.

#### §. IV.

*An in Sacramento Pœnitentiæ imponi debeat Satisfactio, eademque a pœnitente impleri, & quando?*

**S**atisfactio isthic sumitur pro actione, per quam Deo pro peccatis satisfit: estque voluntaria sui ipsius punitio, ad illatam Deo per peccatum injuriam, quoad fieri potest, compensandam. Sicut autem in peccato est tam reatus culpæ, quam reatus pœnæ: ita pariter Satisfactio alia est pro culpa, alia pro pœna; & cum pœna peccato debita esse possit non æterna tantum, sed & temporalis: rursum alia est Satisfactio pro pœna æterna, alia pro temporali. Quia interim hac providentiæ lege pœna æterna semper remittitur cum culpa, indubium est, eodem contritionis & confessionis ope.

opere; quo satisfit pro culpa, simul satisfieri pro pœna æterna. Atque hinc proposita quæstio procedit solum de satisfactione pro pœnis temporalibus præstanda: nec qualibet illa, verum ea duntaxat, quæ in Sacramento Pœnitentiæ a Sacerdote, tanquam Judice, pœnitenti injungitur, quamque hujus Sacramenti *materiam integram* jam alias diximus.

## ASSERTIO I.

*Confessarius regulariter obligatur ad imponendam pœnitenti  
Satisfactionem, statui ejus convenientem.*

**V**eritas Assertionis constat tum ex eo, quod Sacramentum Pœnitentiæ habeat rationem judicii vindicativi, in quo a reo exigitur satisfactio; tum quod satisfactio pertineat ad ejusd. Sacramenti integritatem, quam ejus Minister (dum potest) ex officio procurare tenetur. Certum idem est ex constanti usu & praxi Ecclesiæ; ac ex clara Tridentini doctrina Sess. 14. Cap. 8. ubi ait: *debent ergo Sacerdotes Domini - - salutare & convenientes satisfactiones injungere &c.* Quanta interim hæc sit obligatio, non conveniunt DD. Quidam cum Diana & Lugo putant, non peccaturum graviter Sacerdotem, si pro venialibus aut mortalibus jam ante confessis pœnitentiam non imponat; quia (ut illi inquirunt) hoc casu levis duntaxat imponenda esset: obligatio autem procurandi integritatem Sacramenti non videtur esse universim tanta, ut parvitatem materiæ non admittat. Communius atamen existimant DD. hanc Confessarii obligationem esse gravem pro omni casu, quo pœnitenti satisfactio imponi potest; ac id omnino probant rationes pro Assertionem allatæ.

Sunt autem in Assertionem consulto addita duo. Primum, *64*  
*regulariter*: nam ex usu & praxi Ecclesiæ certum est, mori-  
bun-

bundum sensibus destitutum (si cætera absolutionis est causa) omnino absolvendum esse, tametsi in hoc statu nullam satisfactionem acceptare, minus exequi possit. Alterum, *statui convenientem*: quo significatur, poenitentiam injungi oportere eam, quæ proportionem habeat ad peccata, sitque accommodata circumstantiis, in quibus versatur poenitens. Nimirum (verba sunt Tridentini loco supra cit.) *debent Sacerdotes, quantum spiritus & prudentia suggererit, pro qualitate criminum & poenitentium facultate, salutare & convenientes satisfactiones injungere; ne, si forte peccatis conniveant, & indulgentius cum poenitentibus agant, levissima quædam opera pro gravissimis delictis injungendo, alienorum peccatorum participes efficiantur.*

Quamvis autem aliquando in satisfactionem imponi possint opera mere interna, vel aliunde præcepta, ut e. g. moribundo, voce, non tamen sensu omni destituto, actus contritionis &c. regulariter attamen imponenda sunt opera externa, nec aliunde præcepta: cum rimis autem ea, quibus poenitentis emendatio opportunius procuratur. Præclarum in rem hanc est Ritualis Rom. monitum ad Confessarium: *contrarias peccatis poenitentias injungat, velut avaris eleemosynas, libidinosis jejunia vel alias carnis afflictiones &c.* In his (quod res docet ipsa, & insinuat Trident.) spiritus discretionem & prudentiam singulari opus est; subsidio nihilominus etiam esse possunt ea, quæ de satisfactionibus imponendis adnotant DD. præsertim Tamburin. in Meth. expedit. Conf. & Platell. in Synop. Theol. C. 6. §. 9. a N. 934.

## ASSERTIO II.

*Poenitens injunctam sibi a Confessario satisfactionem tenetur acceptare, eandemque implere.*

- 66 **A**SSERTIO hæc ex priore deducitur, pugnantque pro ea momenta complura. Imo, quia universim reus tenetur obe-

obedire Judici justam sententiam ferenti. 2do, quia Sacerdos, ut Pœnit. Sacramenti Minister, potest pœnitentem ligare impositione satisfactionis, ut declarat Trident. Sess. 14. Cap. 8. ubi postquam dixit: *Sacerdotes debere satisfactiones injungere* - - etiam ad præteritorum peccatorum vindictam, pro causa id reddit: *nam Claves Sacerdotum non ad solvendum duntaxat, sed & ad ligandum concessas, etiam antiqui PP. & credunt & docent*; quomodo autem Sacerdos habebit potestatem ligandi per impositionem pœnitentiæ, si in pœnitentis arbitrio sit eam acceptare vel recusare? 3tio, nam Concil. Lateran. IV. Can. *Omnis*. aperte statuit, ut quisque fidelium *injunctam sibi pœnitentiam studeat pro viribus implere*. De obligationis porro hujus quantitate, in casu pro venialibus impositæ levis pœnitentiæ, rursus variant Doctorum sententiæ; communior interim etiam hoc casu docet, gravem esse obligationem, proinde graviter peccaturum pœnitentem, si vel levem pœnitentiam voluntarie non impleat. Istud vero dicendi ratio est: quia si satisfactio sit levis, eo facilius impleri potest; ergo voluntaria ejus omissio conjungitur cum aliquo contemp'u Sacramenti, quod per omissionem hanc necesse est deficere in integritate, quam pœnitens etiam procurare tenetur, cum potest. Jam vero

Ex Assertionem ultro consequitur; pœnitentem auctoritate propria non posse injunctam sibi satisfactionem mutare in aliam, etiam salubriorem: minus facere, ut per alium suppleatur. Ratio 1mi est: quia universim non est fas subdito mutare superioris præceptum, aut reo judicis sententiam; satisfactio præterea ejusmodi non esset sacramentalis, ut clarum est. Quodsi attamen pœnitentia imponatur nimis gravis, nec circumstantiis & statui pœnitentis accomodata, eamque Confessarius nolit mutare aut minuere, licet ad alium recurrere. Ratio 2di: fecus enim ageretur contra finem satisfactio-

nis præcipuum, qui est vindicta peccati; item satisfactio est hujus Sacramenti materia, saltem integralis: ex Tridentino autem Pœnit. Sacramenti materia sunt actus ipsius pœnitentis; huc denique facit Prop. 15. ab Alexandro VII. damnata.

### ASSERTIO III.

*Ad valorem & fructum Pœnit. Sacramenti necesse non est, ut satisfactio impleatur ante absolutionem.*

68 **Q**ui oppositum aliquando docuerunt, id pro fundamento suæ opinionis statuebant, quod sacramentalis absolutio non sit vero sensu remissiva peccati, sed remissionis hujus legitima duntaxat declaratio: quod si ita se habeat, prius utique que opus est satisfactione, qua obtineatur remissio, dein per absolutionem declaranda. Sed enim falsum istud esse vel ex jam alias dictis patet, patebitque ex §. sequ. unde & doctrinæ hinc deductæ falsitas innotescit. Ac omnino falsam illam & erroneam, satis constat ex hac Petri Oxonien. Propos. a Sixto IV. damnata: *quod non sunt absolvendi pœnitentes, nisi peracta prius pœnitentia eis injuncta*; item ex Propos. 16. 17. & 18. ab Alexandro VIII. proscriptis. Porro

69 Momentum, cui Assertio innititur est: quia nec ratio Sacramenti postulat, ut ante absolutionem impleatur satisfactio: cum enim sit tantum pars integralis, utique sine illa haberi potest substantia & valor Sacramenti; neque præterea constat de ullo Christi præcepto, quo is nominatim voluerit satisfactionem anticipari. Quin nullum esse hujusmodi præceptum, docemur ex usu in Ecclesia recepto absolvendi pœnitentes, ante peractam satisfactionem. Ac de moderno quidem usu, qui ipse diuturnus & a multis saltem sæculis receptus est, dubitari nequit; quamvis autem forte (ut quidam volunt) in primæva Ecclesia ut plurimum absolutioni præ-

mit-



mittenda fuerit satisfactio, de quo nos Dissert. V. ex proposito statuemus: certum tamen est etiam tum sæpe, ac aliquibus saltem casibus absolutos fuisse poenitentes, ante impletam satisfactionem, quod ipsum ead. Dissert. V. comprobabimus; universalis igitur Ecclesiæ sensus est, ratum esse Poenit. Sacramentum, tametsi satisfactio absolutionem consequatur.

Ex his vero legitima consecutione inferitur: ad valorem 70 & fructum hujus Sacramenti perinde esse, seu satisfactio poenitentis absolutionem consequatur, seu antecedit. Servanda interim est recepta Ecclesiæ praxis, ut regulariter imponatur poenitentia primum post absolutionem implenda; fas attamen est Confessario, quin etiam conveniens aliquando, satisfactionem exigere ante absolutionem, cum nempe id ad poenitentis correctionem necessarium aut proficuum esse censeatur, id quod præsertim quoad peccatores inveteratos observari potest, ut docet Suarez & Lugo hic Disp. 14. Sect. 10. At cautela in hoc magna & prudenti judicio opus: ne, cum vulneribus mederi cupimus, ea amplius exasperemus.

Haud leve isthic (fateor) Platellius obmovet dubium: 71 an vel aliquando imponi possit satisfactio, ante absolutionem peragenda? ac ipse quidem C. 6. §. 9. de Satisf. Sacr. N. 950. omnino asserit, id fieri nequiquam posse propterea, quod id genus satisfactio non foret sacramentalis, destituendum proinde sua integritate Sacramentum.

Mihi attamen cum Suarezio & Lugone videtur oppositum dici oportere. Ac eo quidem casu, quo, durante ipsa Sacramenti ministratio, ante absolutionem perageretur satisfactio, ut esse posset e. g. moribundo inchoata invocatio Nominis Jesu, vel alicujus virtutis actus &c. vix dubium esse potest futuram sacramentalem: imponitur quippe virtute Clavium Ecclesiæ, & quidem in ipso Sacramento. Sed & tum fore sacramentalem contendo, cum Sacerdos, audita poenitentis Con-

feffione, injungit pœnitentiam in longius tempus producendam, ac absolutionem differt: nec eam impertit nisi post expletam satisfactionem reduci, observatis attamen iis, quæ in casu hujusmodi observanda novimus. Quid enim rursum satisfactioni huic deerit, quo minus sacramentalem dicamus? Certe (ut casus fert) imposita est in Pœnit. Sacramento saltem inchoative tali: & quidem a Ministro Sacramenti, proinde virtute Clavium Ecclesiæ: eademque tam Sacerdotis quam pœnitentis intentione, ordinatur ad absolutionem; cur igitur non sit vero sensu sacramentalis, seu pars Sacramenti? Id profecto non officit, quod absolutionem antecedit: secus enim nec contritio esse posset pars Sacramenti. Neque obest, satisfactionem esse partem tantum integram: fieri enim potest, ut aliquid ad compositum pertinens prius existat, quam ejusdem compositi, substantia, hujus nihilominus integritatem deinde perficiat, ut clarum exemplum habes in composito domus, aliisque artefactis. Consultum interim est, ut hoc etiam casu pœnitenti reduci aliqua, levis saltem, imponatur pœnitentia, dein post absolutionem peragenda, quo videlicet praxis Ecclesiæ communiter recepta observetur.

### Respondetur Adversariis.

- 72 **C**ONTRA Assertionem I. argui potest: superfluum ac omnino inutile esse in Sacramento Pœnitentiæ imponere satisfactionem; ad eam igitur imponendam obligari nequit Confessarius. Ant. prob. ex duplici capite. Etenim 1<sup>mo</sup>, universim culpa (quod in hoc Sacramento fit per absolutionem) remissa, nullum amplius luendæ pœnæ, etiam temporalis, debitum remanet juxta illud Ezech. 33. *Impietas impiï non nocebit ei, in quacunque die conversus fuerit.* Quin 2<sup>do</sup>, tametsi hoc debitum remaneat, pro eo sufficienter satisfit Deo  
per

per merita & mortem Christi, qui *peccata nostra ipse pertulit in corpore suo super lignum* 1 Petri 2. Quæ igitur satisfactoris in hoc Sacramento imponendæ utilitas? quis finis?

Resp. N. Assertum, una cum ratione utraque ad comprobandum illud allata, eademque ex schola Lutheri & Calvini petita. Nimirum,

Quod ad *1am* rationem attinet, dimissa culpa non semper remitti omnem poenam temporalem, complura docent ex S. Literis exempla. Sit pro omnibus David, cui tametsi 2 Reg. 12. Nathan Propheta dixerit: *Dominus - transtulit peccatum tuum*, adjecit nihilominus continuo: *verumtamen, quoniam blasphemare fecisti inimicos Domini, propter verbum hoc filius, qui natus est tibi, morietur &c.* Idem fuit constans Ecclesiæ sensus: cur enim alias in Pœnit. Sacramento satisfactories imponeret? id quod tamen eam semper fecisse docemur ex Patribus, Conciliis, libris Pœnitentialibus & Ritualibus. Atque hinc est, quod Concil. Trid. oppositum sentientibus anathema dixerit Sess. 6. Can. 30. ac rursus Sess. 14. Can. 12. Neque doctrinæ huic adversatur Scriptura, cum apud Ezech. & alibi dicitur, post conversionem impii non nocituram ei impietatem, non imputanda illi peccata &c. hæc quippe omnia de reatu poenæ æternæ intelligenda esse colligitur, ex contextu, & collatis invicem aliis Scripturæ locis. Idem observandum est de Patrum verbis, quæ cum hac doctrina pugnare videntur. Ita cum Augustin. L. 2. de pecc. mer. & remis. C. 34. dicit: *hujus vitæ mala ante remissionem esse supplicia peccatorum, post remissionem autem certamina & exercitationes justorum*; id solum vult, quod vitæ hujus mala, ante remissionem sint nobis, ordinatione divina, principaliter in supplicium: post remissionem vero, simul in exercitationem ad meritum. Hoc nempe sensu locutum fuisse S. Patrem declarat ejusdem locus alius, nam in Psalm. 50. ait: *Veritatem dilexisti, id est,*

*impunita peccata etiam eorum, quibus ignoscis, non reliquisti.* At hæc nos tantum per occasionem; pluribus hanc fidei veritatem contra Novatores affirmatam passim apud Theologos Polemicos reperies, præsertim Bellarminum L. 4. de Sacram. Pœnitent. C. 2.

Rationem *adam* esse futilem, vel ex alias dictis jam patet. Credimus equidem, Christum pro peccatis nostris plene satisfecisse, quantum nempe requiritur ad satisfactionem ex se, & (ut Scholæ dicunt) *in actu primo* sufficientem: hæc interim ipsa satisfactio non prodest ad remissionem culpæ & pœnæ, re ipsa obtinendam, nisi eam nobis applicemus; applicamus autem, inter alia, per opera pœnitentiæ ultro susceptæ, aut in hoc Sacramento injectæ. Ac omnino nisi istud ita se habeat, cur Lucæ 3. monemur: *facite fructus dignos pœnitentiæ?* Cur ipse Apostolus de se, *adimpleo ea*, inquit, *quæ desunt Passionum Christi in carne mea?* Cur jam inde a primis seculis Ecclesia constanter imponit satisfactiones? Cur easdem PP. commendant, eisque pro effectu veniam peccati attribuunt? Audiatur vel Augustin, in Ps. 50. ita Deum alloquens: *Non, non erit impunitum peccatum meum; novi iustitiam ejus, cujus quaero misericordiam: non impunitum erit; sed ideo nolo, ut tu me punias, quia ego peccatum meum punio.* - - *Ignoscis; sed se ipsum punienti; ita servatur misericordia & veritas.* Consuli potest rursus Bellarminus, prolixè admodum de hoc argumento disputans supra laud. L. a C. 3. usque ad 16.

- 73 Contra Assertionem II, opponitur I. Non est obligatio, in hac vita satisfaciendi pro pœna temporali, quæ peccato quoad culpam remisso adhuc debetur: remissio præterea pœnæ hujus per satisfactionem sacramentalem obtinenda est in favorem pœnitentis; potest igitur illi renuntiare, seque ultro resolvere ad pœnas purgatorii sustinendas, atque  
ita

ita liberum est acceptare vel recusare poenitentiam, in sacro tribunali injunctam. Imo

II. Non videtur esse ullus finis, propter quem illa impleri debeat: quod enim Poenit. Sacramentum ex opere operato efficit, id obtinetur totum per absolutionem sacramentalem; quod autem satisfactio in Sacramento injuncta præstare potest ex opere operantis, idein præstat quævis satisfactio alia ulro suscepta, vel usus indulgentiarum &c. nam & his poenæ temporalis remissionem obtineri certum est.

Resp. ad I. Ut ut sit de hac obligatione, ac etiam de eo, quod memorata poenæ temporalis remissio sit in favorem poenitentis: obligari nihilominus illum ex alio capite ad satisfactionem in sacro Poenitentiae tribunali impositam, evincunt rationes pro Assertionem allatae, quæ isthic recolendæ sunt.

Resp. ad II. N. Assertum: falsum quippe est, totum effectum ex opere operato huic Sacramento respondentem haberi, per solam Sacerdotis absolutionem.

Fateor equidem controversum esse: num satisfactio sacramentalis ex opere operato, saltem partialiter, causet gratiam habitualement? Affirmant Cajetanus, Scotus, Suarezius, Gonnetus, & multi Thomistæ; negat ex adverso Præpositus, Vasquez, quin (teste Gormaz) pars Theologorum potior. Ac omnino negandum videtur: nam cum satisfactio sit pars tantum integralis, ante expletam illam habetur tota Sacramenti substantia, proinde & effectus gratiæ; estque etiam probabilius, gratiam sanctificantem non causari per sacramentum Poenit. nisi ut est culpæ remissivum, satisfactio autem non culpæ, sed poenæ duntaxat reatum eluit.

Non desunt interim alii effectus, qui satisfactioni sacramentali ex opere operato respondeant: gratiæ nimirum actuales tempore opportuno conferendæ ad cavendum relapsum, & remissio poenæ temporalis peccato remisso adhuc debitæ. Ratio imi effectus est: quia satisfactio, ex institutio-

tione Christi, imponitur etiam in remedium contra relapsum; hinc Trident Sess. 14. Cap. 8. Sacerdotes monet, ut id genus satisfactiones imponent, quæ sint etiam *ad novæ vitæ custodiam, & infirmitatis medicamentum*: ad id vero gratis actualibus opus est. Ratio *2di*: præterquam quod enim nunc laud. Cap. Tridentin. velit imponi satisfactiones, *ad præteritorum peccatorum vindictam & castigationem*; jam antea etiam Cap. 3. dixit contritionem, confessionem, & satisfactionem esse hujus Sacramenti partes, easdemque *ad plenam & perfectam peccatorum remissionem ex Dei institutione requiri*; igitur ex mente Concilii tres hi pœnitentis actus, ceu Sacramenti partes, ex institutione Dei, proinde ex opere operato conferunt ad remissionem peccati: at satisfactio non causat remissionem hanc quoad culpam, ergo saltem quoad pœnam.

Contra Assertionem III. pugnatur ratione fundata in ipsa  
 74 Pœnit. Sacramenti natura, item Patrum sensis, ac demum veteris Ecclesiæ disciplina. Nimirum

I. Sacramentum Pœnit. ad modum judicii a Christo est institutum; quid ni vero ipsa judicii natura postulet, ut reus ante absolutionem satisfaciat? Id quod eo amplius in hoc sacramentali judicio necessarium videtur, quod in eo satisfactio habeat rationem materiæ, absolutio autem sit forma; at materia præmitti debet formæ, non illam consequi, ergo &c. Ac omnino

II. Hunc in sacro Pœnitentiæ tribunali ordinem servari voluerunt Patres. Certe Innocentius I. Ep. 1. ad Decent. Sacerdotis est, inquit, *judicare, ut attendat ad Confessionem pœnitentis, & ad fletus atque lachrymas corrigentis, ac tunc jubere dimitti, cum viderit congruam satisfactionem*. Et Leo M. Ep. 91. docet, Præpositis Ecclesiæ eam esse a Christo datam potestatem, *ut & consuevitibus actionem pœnitentiæ darent, &*

*eosdem salubri satisfactione purgatos ad communionem Sacramentorum per januam reconciliationis admitterent.*

III. Patrum sensus consonat vetus Ecclesiæ disciplina. Constat enim ex Cypriani Ep. 52. ad Antonian. peccatores inveteratos, qui in articulo mortis expiari petebant, non fuisse admissos ad Pœnit. Sacramentum: quod ipsum a Concil. Arelat. I. Can. 22. statutum novimus de Apostatis, in fine vitæ ad gremium Ecclesiæ redire volentibus. Existimabat igitur vetus Ecclesia, sacramentalem absolutionem concedi non posse, nisi præmissa satisfactione, quæ in articulo mortis integre peragi non poterat.

IV. Ac licet hoc casu aliquando peccatores absolverentur, superato nihilominus mortis periculo & recepta valetudine, cogebantur ad implendam Satisfactionem publicam, hacque expiata rursus ab Episcopo cum aliis pœnitentibus absoluebantur; ergo veteres illi dubitarunt saltem de valore absolutionis, ante expletam Satisfactionem collatæ. Hocque ipsum dubium satis indicat Augustinus, cum Serm. 57. de Temp. ait: *Datur quidem in extremis pœnitentia, quia non potest denegari; sed auctores tamen esse non possumus, quod, qui sic petierit, mereatur absolvi. Pœnitentia, quæ ab infirmo petitur, infirma est: quæ a moriente tantum petitur, timeo, ne ipsa moriatur.*

Resp. ad I. Ut in hoc Sacramento natura iudicii quoad substantiam salva persistat, satis est absolutioni præmitti Satisfactionem pro reatu culpæ & pœnæ, qui unus duntaxat per absolutionem tollitur; id genus autem Satisfactio habetur per confessionem & contritionem. Nec obest, Satisfactionem etiam pro pœna temporali esse materiam Pœnit. Sacramenti: est quippe tantum materia & pars integralis; cur vero hæc consequi non possit formam ad substantiam compositi pertinentem, præsertim cum ea ipsa Satisfactio ratione aliqua ab-

solutioni præexistat, nempe in voto, hoc est, satisfaciendi proposito, quod contritio includit.

Resp. ad II. Neutrum e laud. Patribus contendere, ex Christi institutione eum requiri ordinem. Quod igitur volunt, id solum est: regulariter observandum esse ritum, ea ætate in compluribus Ecclesiis receptum, de non absolvendis poenitentibus publicis ante expletam satisfactionem. Dixi *regulariter*: uterque enim docet, aliquando saltem concedendam esse absolutionem, nondum peracta integre poenitentia. Ita Innocentius in cit. Ep. sermonem suum sic prosequitur: *sane, si quis in ægritudine inciderit, atque usque ad desperationem devenerit, ei est ante tempus Paschæ relaxandum, ne de sæculo absque communione discedat.* Leo item in ead. sua Ep. his autem, inquit, *qui in tempore necessitatis, in periculi urgentis instantia præsidium poenitiæ, & mox reconciliationis implorant, nec satisfactio interdicens est, nec reconciliatio deneganda; quia misericordiæ Dei nec mensuras possumus ponere, nec tempus definire.*

Resp. ad III. & IV. Fuit is omnino in quibusdam Ecclesiis apud veteres disciplinæ rigor, ut in mortis articulo poenitentiam exposcentibus reconciliationis remedium quandoque penitus negaretur: at id ea duntaxat factum causa, quod censerent recte præsumi, id genus conversionem seram non proficisci ex sincero dolore, & serio emendationis proposito. Sæpe interim hujusmodi etiam peccatores non tantum ad Poenit. Sacramentum, sed & ad participationem Eucharistiæ admissos, Ecclesiastica monumenta testantur. Quod autem illis, restituta valetudine, poenitentia publica integre persolvenda fuerit; istud non eo spectabat, quasi de absolutionis prius concessæ valore dubitarent: sed ut observaretur tum receptus disciplinæ rigor, quo cautum erat, ne quis e publicis poenitentibus publicam reconciliationem obtineret



nisi poenitentia integre peracta. Hinc ea absolutio publica, quæ illis rursus cum aliis publicis poenitentibus ab Episcopo conferebatur, non erat amplius sacramentalis, verum mere cæremonialis; qua videlicet pro foro externo integre reconciliabantur, & plenæ fidelium communioni restituebantur ad eum fere modum, quo etiamnum publici quidam poenitentes excommunicationis vinculo solemnî cærimonia exolvuntur. Augustinus quidem (fateor) in cit. Serm. non agit de hac mere cæremoniali absolutione: at metus ejus ex eo duntaxat proficiscitur, quod jure dubitandum censuerit de sincera eorum poenitentia, qui ad extremum vitæ illam differunt. Hanc ipsam nihilominus salutarem esse posse agnoscit Serm. 66. de Temp. ubi, *poenitentia vera*, inquit, *non annorum numero cessatur, sed amaritudine animi; - - poenitentia, quamvis sit exigui temporis, si intima cordis amaritudine agitur, non despicitur apud Judicem justum Deum, qui cordis secreta considerat* &c. Singula hæc expressius dabuntur Dissert. V. ad quam rursus Lectorem studiosum remittimus.

## §. V.

*In quò consistat, & quæ sit nominatim Absolutio.  
nis forma in Poenitentia Sacramento?*

**P**Ræfens §. multiplicis controversiæ argumentum completur. Ut enim ex hujus Dissert. §. II. certum sit Poenit. Sacramenti formam esse Sacerdotis absolutionem, disceptatur nihilominus: num ea exprimi debeat verbis propriè talibus? hæc ipsa rursum an deprecatoria esse sufficiat, nec requirantur necessario indicativa? quæ demum nominatim sint illa, sine quibus Sacramenti valor non habeatur? Ac pro

his quidem resolvendis prorsus necessarium est præmittere doctrinam fidei de potestate Clavium Ecclesiæ; tum & utile fuerit notasse Doctorum Orthodoxorum varias de forma absolutionis opiniones: quo videlicet jam in ipso disceptationis hujus limine discrimen appareat inter eas, quas invicem Catholici agitant in præsentī controversias, & illam, quæ Novatoribus adversum Catholicos est propria.

### Doctrina fidei

de potestate Clavium a Christo Ecclesiæ concessa.

- 75 I. **D**E ea solum potestate Clavium, quam Ecclesia in Pœnit. Sacramento exercendam a Christo accepit, isthic nobis sermo est. Ac de illa quidem Novatorum sensum jam supra Dissert. I. §. II. N. 4. insinuavimus. Nimirum, tamen si eorum aliqui Pœnitentiam in numero Sacramentorum reputant, nullus tamen est, qui ipsa sacramentali absolutione peccatorum remissionem conferri admittat. Inde, potestatem remittendi peccata cum prædicandi potestate confundentes, in universum docent: Clavium potestatem Ecclesiæ concessam consistere in nuda & mere concionali declaratione, qua Minister Ecclesiæ præconis instans annuntiet pœnitenti peccata ejus per fidem, qua sibi ea remitti credit, esse remissa. Quid jam vero de hac opinione sentiendum? erroneam & fidei orthodoxæ contrariam esse, satis evincunt vel Christi verba ad Apostolos Joan. 20. *quorum remisistis peccata, remittuntur eis* &c. quibus (nisi verborum sensum prorsus violente detorqueas) aperte significatur, Ecclesiæ datam potestatem, qua ejus Ministri peccata vere remittant, & quidem ceu Judices a Christo delegati: quando universim delicti condonatio est actus ad Judicis officium pertinens. Neque alia fuit unquam mens Patrum. Certe Chrysostom. L. 3. de Sacerd.

C. 4.

C. 4. inter veteris & novæ Legis Sacerdotes discrimen faciens, *nostris Sacerdotibus*, inquit, *non corporis lepram, sed animæ sordes, non dico, purgatas probare, sed purgare prorsus concessum est.* Vide in eandem sententiam loquentes Augustinum Ep. 180. Ambrosium L. 1. de Pœnit. C. 7. Hieronymum Ep. 1. ad Heliod. & passim alios. Inde a Pio V. & Gregorio XIII. merito proscripta est hæc Baji Propositio *peccator pœnitens non vivificatur ministerio Sacerdotis absolventis, sed a solo Deo.* Sed nimirum

II. Multo apertius hanc eandem fidei doctrinam tradit 76 Conc. Trident. Sess. 14. cum Cap. 1. recitatis Christi Joan. 20. verbis, subdit: *verbis tam perspicuis potestatem remittendi, & retinendi peccata, ad reconciliandos fideles post Baptismum lapsos, ~ Apostolis & eorum legitimis Successoribus fuisse communicatam, universorum Patrum consensus semper intellexit.* Et infra: *verissimum hunc illorum verborum Domini sensum S. hæc Synodus probans & recipiens, damnat eorum commentitias interpretationes, qui verba illa ad potestatem prædicandi verbum Dei, & Christi Evangelium annuntiandi, contra hujusmodi Sacramenti institutionem, falso detorquent.* Dein vero Cap. 6. quamvis autem, inquit, *absolutio Sacerdotis alieni beneficii sit dispensatio; tamen non est solum nudum ministerium vel annunciandi Evangelium, vel declarandi remissa esse peccata: sed ad instar actus judicialis, quo ab ipso, velut a iudice, sententia pronuntiatur &c.* Neque hic stitit S. Synodus; quo denique omnem dubitationem fidelibus eximeret, interposito anathemate ead. Sess. hæc ipsa expressis verbis definivit: & quidem Can. 3. verba illa, *quorum remisistis &c.* intelligenda esse *de potestate remittendi & retinendi peccata in Sacramento Pœnitentiæ, sicut Ecclesia Catholica ab initio semper intellexit; tum Can. 9. absolutionem sacramentalem Sacerdotis esse actum judicialem, & non nudum ministerium pronuntiandi & declarandi, remissu esse peccata &c.* Est ita-

que indubitatum fidei dogma, Sacerdotis absolutione peccata vere remitti, hancque ipsam absolutionem esse actum iudiciale.

- 77 . III. Ex his porro pronum est conjicere, quo loco habenda sit opinio quorundam veterum, cum Mag. Sent. L. 4. dist. 18. S. Bonavent. in 4. Art. 2. qu. 1. & Alensi ibid. qu. 21. docentium: ad Pœnit. Sacramentum requiri contritionem perfectam, per quam ipsam peccata remittantur: atque adeo Sacerdotis absolutionem non esse peccati remissivam, sed meram remissionis hujus declarationem. Scio equidem, Doctorum complures hanc inter & Sectariorum opinionem discrimen facere: tum quod in illa prædicandi potestas non confundatur cum potestate ligandi & solvendi; nec Sacerdotes dicantur agere Præcones duntaxat, sed Judices, peccata esse remissa juridice declarantes; quod item, ex sensu horum Theologorum, contritio cum Sacramento conjuncta non deleat peccata, nisi prout eadem ad Claves Ecclesiæ ordinatur; quod denique ipsi absolutioni, tametsi non prima gratia, ejusdem tamen augmentum, ceu proprius effectus, attribuatur. Neque ignoro, multos Theologos, ac inter hos etiam Tridentinos, scilicet Andream Vega, Dominicum Soto, & Alphonsum Salmeron, contendere: sententiam illam a Concilio Trident. non fuisse proscriptam, cum Patres (quod ipsum notat Pallavic. Hist. Trid. L. 10. C. 12.) intenderint solum damnare Sectarios, qui asseriebant, absolutionem esse nudum ministerium declarandi, peccata jam esse remissa. Ut ut interim sit de his vindiciis; fatendum est nihilominus, memoratam sententiam cum doctrina Tridentini non satis cohærere, eandemque passim rejici, ac pro temeraria & erronea haberi: quamquam venia digni sint veteres illi, ut qui ea ætate scripserint, qua dogma hoc nondum fuit decretorio Ecclesiæ iudicio satis declaratum.

DD.

DD. Orthodoxorum opiniones  
de Absolutionis sacramentalis forma.

**Q**Uamvis communiter recepta sit apud Theologos sententia: sacramentalis absolutionis formam consistere in verbis proprie talibus, iisque tantum indicativis, & quidem his aut similibus, *ego te absolvo* &c. interim

I. Sunt, qui existiment, olim saltem, videlicet ante Decretum Clementis VIII. 20. Julii An. 1602. datum, valuisse absolutionem etiam scripto tantum collatam. Atque istud omnium accerrime propugnat Morinus in Comment. Hist. de Sacr. Poenit. L. 8. C. 25. ubi pro opinione hac laudat S. Antoninum, Paludanum, Sylvestrum, Petrum & Dominicum Soto, Suarezium, compluresque alios, eandemque veterum quorundam exemplis confirmat, simul (nulla restrictione adjecta) asserens: *Decretum Pontificis invalidam reddere posse absolutionem, alias legitimam.*

II. Sunt item, quorum sententia ad sacramentalis absolutionis valorem (sola Christi institutione spectata) periinde est, seu ea indicativis, seu deprecativis verbis exprimatur. Ita opinandi jam ætate D. Thomæ initium factum est a quodam, quem Doctor Ang. Opusc. 22. ex proposito impugnat. Sed nimirum cum auctore suo tum quidem confespulta est hæc opinio, neque prius, quam per Clar. Morinum Seculo XVII. plenam lucem recepit; si qui enim interea illi favere visi sunt, ambiguis admodum, nec fat certis verbis sensum suum exprompserunt. Morinus igitur primum obsoletam opinionem integre revocare aggressus, multa ad affirmandam illam congescit argumenta in laud. Comment. L. 8. a C. 8. usque ad 23. id simul contendens: totis undecim primis Seculis ignotam fuisse universæ Ecclesiæ formam absolutam & indicativam, Orientales vero nunquam alia, quam deprecativa, usos, hac

hacque sola etiamnum uti. Morinum e RR. sequuntur Casp. Juenin, Witasse, Tournelyus, Card. Gotti, Ludov. Habert, Cabassutius, Auct. Rei Sacramentariæ &c. Deseritur contra a plurimis, & ex proposito impugnatur a Vincentio Baronio, Nicolai, Goneto, præsertim a Natale Alex. L. 2. Theol. Mor. C. 7. Art. 1. Simonetto in Instit. Theol. Tract. 15. de Pœnit. Disp. 8. Art. 1. usque ad 7. & Laurentio Berti Discipl. Theol. L. 34. Par. 2. C. 7.

- 80 III. Demum & illi, qui formæ indicativæ subscribunt, de verbis nihilominus ad eam necessario requisitis disceptant. Ad valorem nempe ejus hæc verba, *absolvo te a peccatis*, exprimi debere docent Gabr. Biel, Paludanus, Major, Gormaz &c. quin Durandus & Aurelius cum paucis aliis necessario addenda putant & illa, *in nomine Patris &c.* ex adverso plurimi, post D. Thom. & S. Antoninum cum Suarezio contendunt sufficere hæc sola, *absolvo te*.

Atque hæc sunt DD. orthodoxorum in præsentī controversia opiniones, de quibus pronuntiandum habemus: nam Novatorum error satis, ni fallor, confutatus est N. 75. ubi doctrinam fidei, de potestate Clavium Ecclesiæ concessa, explanavimus.

## ASSERTIO I.

*Absolutio sacramentalis exprimi necessario debet verbis propriis talibus: ut adeo nutu duntaxat vel scripto data sit irrita.*

- 81 **A**SSERTIO hujus probatio sensu & praxi Ecclesiæ conficitur. Præterquam quod enim in Concilii Florent. Decr. pro Arm. declaretur generatim, omnia Sacramenta perfici *verbis tanquam forma*: ibid. speciatim etiam de Pœnit. Sacramento additur: *formæ hujus Sacramenti sunt verba absolutionis, quæ Sacer-*

*Sacerdos profert, cum dicit: ego te absolvo &c.* quibus aperte significatur, absolutionis formam consistere in ejusmodi verbis, quæ Sacerdos loquens enuntiat, quæ ipsa sunt propria talia, seu ore prolata. Idem docet Trident. Sess. 14. Cap. 3. asserens, *Sacramenti Pœnit. formam - - in illis Ministri verbis positam esse: ego te absolvo &c.* ubi (ut patet ex contextu) cum agat de formæ essentia, ad eam utique nominatim requirit *Ministri verba*; qualia autem illa? certe non alia, quam quæ jam ante a Florentino requisita diximus, proinde verba ore prolata. Atque his plane consonat praxis Ecclesiæ: hujusmodi quippe verbis omni ætate collatam esse absolutionem sacramentalem, documento sunt tam veteres quam moderni LL. Rituales; eandem contra scripto, nutu, aut id genus signis aliis datam, ac etiam Ecclesiæ judicio pro rata habitam, nullo fundamento vel probabili evincit Morinus: quin semper fuisse invalidam, recte arguitur ex Clementis VIII. Decr. ut infra N. 89. comprobabimus.

## ASSERTIO II.

*Irrita pariter est sacramentalis absolutio, si ea concipiatur verbis mere deprecatoriis, e. g. oro Deum, ut tibi remittat peccata &c. quo igitur valeat, verbis indicativis exprimenda est, his videlicet, aut similibus: absolvo te, remitto tibi peccata, condono &c.*

**O**Mnium, ipsius etiam Morini consensione, in Latina Ecclesia graviter obligantur Sacerdotes ad Pœnit. Sacramenti formam verbis indicativis enuntiandam; idque tum ob praxim jam receptam: tum quod Florent. & Trident. Concilia istud requirant. Sed nimirum amplius est, quod volumus: de ipso Sacramenti valore agi existimamus, cum formæ indicativæ & deprecativæ usus in quæstionem vocatur. Ac ut

R. P. Muszka Tom. II. de Sacr.

Y y

in

in re, quam post Morinum quidam RR. nimis implexam & controversam reddiderunt, quod ut minimum dicendum videtur, asseramus: verba indicativa ad formam hujus Sacramenti ita requirimus, ut saltem verius sit, sine illis nec valuisse unquam, neque nunc in ulla Ecclesia valere sacramentalem absolutionem. Unde vero istud repetendum certius? atque ex iis Tridentini locis, quibus ex proposito agitur de forma absolutionis. Sane fons hic multo sincerius & certius de proposita controversia judicandi suggerit argumentum, quam ambigua quædam Patrum effata, & incerta Historiæ ac veterum LL. Ritualium monumenta, quibus niti-  
tur Morinus. Ita autem ex Tridentino

82 Arguitur I. Juxta declarationem Concilii Sess. 14. Cap. 1. factam, Christus Pœnit. Sacramentum instituit, cum diceret Joan. 20. *quorum remisistis peccata &c.* hisque verbis dedit Sacerdotibus potestatem remittendi peccata; ergo ex mente Concilii hoc Sacramentum ita institutum est, ut in ejus ministracione ipse Sacerdos, & quidem potestate sua, a Christo videlicet sibi communicata, remittat peccata: id quod utique non facit, si oret duntaxat pro peccati remissione, quod fit per formam deprecativam. Sane diversa sunt: orare Sacerdotem pro venia peccati, & ipsum Sacerdotem auctoritative dare peccati veniam; quod si igitur absolutionem conferat tantum deprecando, non confert illam juxta institutionem Christi, hoc est: non ministrat Sacramentum ea potestate, quam ad ministrandum illud a Christo accepit. Quid quod universim Minister per Sacramenti verba non aliud efficiat, quam quod per illa significat; ergo cum per verba deprecativa non significet se remittere, sed orare duntaxat pro remissione, re vera ipse non remittit.

83 Arguitur II. Eadem Sess. Cap. 3. hæc leguntur: *Docet præterea S. Synodus, Sacramenti Pœnit. formam, in qua præcipue ipsius vis sita est, in illis Ministri verbis positam esse, ego te absol.*



absolvo &c. quibus quidem de Ecclesiæ sanctæ more preces quædam laudabiliter adjunguntur: ad ipsius tamen formæ essentiam nequaquam spectant, neque ad ipsius Sacramenti administrationem sunt necessariae. Ex his jam quid ni ita inferre liceat? Hoc loco S. Synodus agit de forma absolutionis, quin imo discernat veterem inter & modernam Ecclesiam, aut Latinos & Græcos; agit 2do de formæ essentia, ut vel recitatus verborum contextus indicat; 3tio docet, in verbis indicativis formam esse ita positam, ut ad ejus essentiam non spectent preces, nec sint necessariae ad Sacramenti administrationem; 4to, precum in Pœnit. Sacramento usum, non ab institutione Christi, sed ab Ecclesiæ tantum more repetit; 5to, cum indefinite dicat, *de Ecclesiæ sanctæ more*, ex usu loquendi Conciliis usitato per hunc morem utique intelligit Ecclesiæ universalis consuetudinem, eamque perpetuam; ergo ex mente Concilii pro universa Ecclesia absolutionis sacramentalis essentia consistit in verbis indicativis; essentia ejus non habetur per preces: neque illæ sunt ex institutione Christi, sed ex more tantum Ecclesiæ, quæ formæ sacramentalis substantiam nec statuere, nec mutare potest juxta id. Concil. Sess. 21. Cap. 2.

Arguitur III. ex ejusd. Sess. 14. Cap. 6. ubi S. Synodus 84 ita se declarat: *Quamvis absolutio Sacerdotis alieni beneficii sit dispensatio, tamen non est solum nudum ministerium, - sed ad instar actus judicialis, quo ab ipso, velut a Judice, sententia pronuntiatur.* Rursum hic certe agitur de Pœnit. Sacramento, pro ut illud pro universa Ecclesia est institutum, & ab ea ex institutione Christi quovis tempore fuit ministrandum; ergo ex hac ipsa institutione Sacerdos Pœnit. Sacramentum ministrans exercet judicium, & ut Judex pronuntiat sententiam, eamque ejusmodi, quæ sit actus judicialis: id quod haberi per eam absolutionis formam, quæ solis deprecativis verbis concepta sit, ut concedam, adduci non possum. Quis enim dicat

cat eam sententiam esse vero sensu judicalem, quæ sola deprecatione absolvitur? sane uti inter judicem & deprecato-rem: sic & inter actum, quo reus Judicis sententia a delicto judicialiter absolvitur, & Orationem, qua rei absolutio peti-  
tur, multum discriminis intercedit.

His jam vero attentis, si de sensu & mente Concilii Tri-  
dentini statuere oporteat, quidni saltem verisimilius sit? cen-  
fuisse illud, non deprecativa, sed absoluta & indicativa forma  
universim in tota Ecclesia ministrandum esse, ac etiam semper  
ministratum fuisse Pœnitentiæ Sacramentum, secusque fore  
irritum. Quod si autem istud ita se habeat, quomodo asseri  
potest? totis undecim primis seculis Ecclesiam ignorasse for-  
mam indicativam: nuncque etiam Græcos sola deprecativa  
uti, approbante, & absolutionem id genus ratam habente Ec-  
clesia. Sed nimirum non desunt Cl. Morino, quibus opinionem  
suam propugnet, momenta; at his nos speciatim a N. 90. re-  
spondere adnitemur, robur una & pondus argumentis ex Tri-  
dentino nunc ductis addituri.

### ASSERTIO. III.

*Ad valorem absolutionis sacramentalis satis est a Sacerdote pro-  
ferri hæc, aut his æquivalentia verba: absolvo te.*

- 85 **N**imirum, solis his super peccata confessum, a Sacerdote  
prolatis verbis, non modo persona Ministri & Subjecti,  
sed & ipse præcipuus Sacramenti effectus exprimitur; quam-  
vis enim ex se indifferentia sint ad significandam absolutionem  
a peccatis, vel aliis vinculis, ut e. g. sunt censuræ: eadem  
nihilominus hoc casu, tam intentione Sacerdotis, quam a præ-  
missæ Confessionis circumstantia, sufficienter determinantur  
ad significandam nominatim peccati condonationem.

Istud

Istud vero, quo rata sit absolutionis forma, satis esse vel inde conjicias: quod ad ejus substantiam plura requiri verba nullo. Scripturæ, aut Patrum, vel Conciliorum testimonio evinci possit; quin, si Græcorum absolvendi morem ab Ecclesia probatum, ac etiam Catechismum Rom. consulas, nulla præterea requiri verba alia, comperies. Quid enim Græci? teste Arcudio L. 14. C. 3. item Menardo ad Sacram. Gregorii *Nota* 677. absolutionis formam his verbis enuntiant: *ἔγω σὶ συγχωρεῖν*, *habeo te venia donatum*, vel, *habeo te absolutum*, quod ex modo loquendi Græcorum idem est, ac apud Latinos, *absolvo te*. Et Catech. Rom. Par. 2. C. 2. §. 19. docet: *est autem forma*, ego te absolvo; *quam non solum ex illis Christi verbis licet colligere*, quæcumque solveritis &c. *sed ex eadem Christi doctrina ab Apostolis traditam accepimus. Ac quoniam Sacramenta id significant, quod efficiunt*; & illa, ego te absolvo, *ostendunt, peccatorum remissionem hujus Sacramenti administratione effici*: planum est, *hanc esse Pœnitentiæ perfectam formam*.

Ex his porro consequitur: reliqua, quæ ex more absolu- 86  
tioni sacramentali adjicimus, verba ad ejus essentiam non pertinere. Eadem nihilominus omittere arbitrarium non est. Et verba quidem, *a peccatis*, addenda esse sub obligatione gravi communiter DD. existimant: per eorum quippe omissionem Pœnit. Sacramentum exponitur frustrationis periculo, cum sententia, quam tuemur, non sit moraliter certa, sed probabilis tantum. De verbis etiam, *in nomine Patris & Filii &c.* plurimi contra Gonetum consentiunt, saltem venialiter peccaturum, qui ea omitteret; idque vel ideo, quod omissio hæc foret contra ritum ab Ecclesia receptum: hic ipse interim quia non est in re gravi, certumque habetur, non pertinere illum ad substantiam formæ, gravis obligatio adstrui nequit. Quo igitur Sacerdos, non valide tantum, sed licite etiam

Pœnit. Sacramentum ministret, recitanda est forma verbis in Rituali Rom. præscriptis, videlicet: *ego te absolvo a peccatis tuis, in nomine Patris, & Filii, & Spiritus sancti, Amen.* Est autem hujus formæ, spectata Christi institutione, juxta plurimos Theologos cum Suarezio hic Disp. 19. Sect. 2. sensus sequens: *confero tibi gratiam, quantum est de se, peccati post Baptismum commissi remissionem.* Quo quidem sensu admissio facile explicatur, quomodo absolutionis formæ sua constet veritas eo etiam casu, quo illa profertur super pœnitentem, cui peccata jam prius remissa sunt per contritionem, aut præcedentem absolutionem. Alii interim alio sensu eandem formam exponunt, ut videre est apud Platell. in Synop. Th. C. 6. §. 7. N. 811.

### Respondetur Adversariis.

- 87 **Q**uidam adversus Assertionem I. his fere momentis pugnant. I. Quamvis Concil. Florentin. in Decr. pro Arm. generatim dicat, *Sacramenta perfici verbis tanquam forma*, ratum nihilominus est Matrimonii Sacramentum, solo nutu aut scripto a contrahentibus celebratum: valida item est, saltem aliquo casu, pœnitentis Confessio iisdem signis facta, licet in eod. Decr. pro Pœnit. Sacramenti materia nominatim *Oris confessio* assignetur; cur non igitur item dici possit de absolutione sacramentali per nutum aut scriptum collata, quamvis tam Florent. quam Trident. Concilia formam hujus Sacramenti in verbis ore prolatis reponant?

II. Pœnitentiæ Sacramentum ad modum judicii est institutum; quis autem nesciat, salva judicii natura sententiam ferri posse scripto? Ac id quidem in ipso etiam Ecclesiæ tribunali quandoque usitatum novimus, cum constet, absolutionem a censuris vel scripto datam pro rata haberi.

Resp.

Resp. ad I. C. Ant. N. Illat. Etenim, si Matrimonium in ratione Sacramenti sine verbis proprie talibus (quod isthic nondum definimus) perfici queat, istud sententiæ hujus Patronis aliunde comprobandum est: oris autem confessionem non esse semper necessariam, ut ex N. 54. constat, vel praxis Ecclesiæ docet. Quo igitur (non obstante Florentini & Tridentini declaratione) idem dici possit de sacramentalis absolutionis forma, proferendum in hanc rem pariter foret argumentum, quod evincat, Conciliorum pro Assertionem a nobis laudatorum doctrinam cum restrictione accipi oportere: nihil autem ejusmodi ab adversa parte proferri, patebit ex seqq. Responsis.

Resp. ad II. Tametsi Pœnit. Sacramentum ex Christi institutione quamdam judicii rationem habeat, eam nihilominus ab humani & civilis judicii natura in multis diversam esse patet ex N. 57. haud recte igitur universum ab hoc ad illud illatio instituitur. Sed nec legitime argui potest ab absolutione a censuris: quamvis enim censura feratur propter peccatum, ipsa tamen peccatum non est, verum pœna duntaxat peccati; ergo ad absolutionem a censura non omne id requiritur, quod necessarium est ad absolutionem a culpa. Quid quod etiam defunctis impendi possit absolutio a censura: nemo tamen idem dixerit de sacramentali absolutione a culpa. Inter ipsa igitur Ecclesiæ tribunalia discrimen faciendum est. Atque hæc satis, opinor, expedita sunt; verum

Instari potest cum Cl. Morino, & quidem I. ab exemplis 88 eorum, quibus absolutio per literas collata legitur. Ita Sec. IX. Hildeboldus Ep. Sueffion. absolutus est ab Hincmaro Archiep. Rhem. ut constat ex ipsius Hincmari Epist. 40. Operum ejus Tom. 2. a Sirmondo editorum. Similiter Sec. XII. Alexander III. S. P. Thomæ Archiep. Cantuar. scripto absolutionem impendit, ut refert Baron. in Annal. Eccl. ad An. 1164. Plura id genus congerit Morinus. II.

II. Huc facit & auctoritas complurium Doctorum, absolutiones hujusmodi ante Decr. Clementis VIII. ratas fuisse existimantium, quorum aliquos a Morino laudatos supra N. 78. nominavimus. Atque his se quoque accedere profitetur Cl. Morinus; inde, postquam in hanc rem toto jam alias cit. C. 25. copiose non minus quam erudite disseruit, ibid. demum N. 18. de absolutione scripto data concludit: *post Pontificium Decretum plane invalida est, & validam esse nonnisi falso credi potest.*

Resp. ad I. incertum esse argumentum, quod ab hujusmodi exemplis ducitur: nullum quippe existimo proferri posse, quo certo doceamur absolutiones illas fuisse sacramentales. Etenim, si rite expendantur circumstantiæ omnes, absolutio id genus scripto missa vel fuit mera deprecatio pro remissione poenitenti a Deo obtinenda: vel absolutio a censuris aut poenitentia canonica: vel collatio *Indulgentiæ*, qua non culpam, sed reatum duntaxat temporalis poenæ remitti novimus. At, inquires, Gregorius VII. expressis verbis *absolutionem a peccatis* Episcopo Leodiensi per literas concessit; ita enim datam ad eum Ep. (quæ est 61. L. 2. Epistolarum Gregorii) concludit: *auctoritate B. Petri Apostolorum Principis absolvimus te a peccatis tuis &c.* Verum hæc non efficiunt, quo minus aliquo ex paulo ante memoratis sensu, hanc ipsam absolutionem congrue exponamus. Nimirum laud. Episcopus Leod. simoniacam labem contraxerat, ut in ead. Ep. Gregorius meminit: cur non igitur congrue dici possit, a censura simoniæ adnexa fuisse absolutum? Addit præterea Pontifex post nunc cit. verba, & *Dominum pro te exoramus, ut &c.* rursus itaque opinari licet, deprecatorie tantum, non autem judicialiter hanc absolutionem eum pronuntiasse. Denique, ipsa *Indulgentia* his nonnunquam concipitur verbis, *remissio tertie partis peccatorum*: neque tamen propterea ordinatur ad remif-

remissionem culpæ, verum pœnæ tantum temporalis; nihil igitur vetat illa Gregorî verba, *absolvimus a peccatis*, intelligi de *Indulgentia* ex plenitudine potestatis Apostolicæ concessa.

Atque his fundamenti instar præmissis, speciatim jam de duobus exemplis in Object. adductis: judicium ferendum est. In utroque autem absolutionis nomine intelligendam existimo meram a censuris solutionem, & potestatem concessam faciendæ apud alium Sacerdotem Confessionis sacramentalis. Ratio ita sentiendi desumitur ex ipsis Hincmari & Alexandri verbis. In cit. quippe Epist. Hincmarus sub finem nominatim Confessionem injungit Hildeboldo: *specialiter*, inquit, *ac singulatim Deo. & Sacerdoti satage confiteri &c.* quorsum autem hæc, si absolutio per litteras missa fuit sacramentalis? Idem legitur in Epist. Alexandri, ita enim ibid. S. Thomam affatur: *Si aliquid te recolis commississe, de quo propria te debeat conscientia remordere; quid quid sit, Sacerdoti, qui discretus & providus habeatur, tibi consulimus per pœnitentiam confiteri &c.* Nimirum (ut refert Surinus ad diem 29. Decemb. & Stapletonus in Libro, *Tres. Thomæ*) piissimus hic Cantuar. Præsul metuebat, ne forte censuram incurreret, quod fraude aliorum inductus Henrico II. Regi Angliæ aliquando adhæsisset; inde sibi ipse a sacris interdixerat, donec hoc vinculo a S. Pontifice exolveretur: quæ quidem cum paulo ante recitatis Alexandri verbis collata prudenti conjecturæ dant locum, absolutionem eam non fuisse sacramentalem.

Quid ni vero conformiter ad hæc de reliquis id genus exemplis statuere liceat? ut, cum Alcuinus Ep. 63. Hadrianum Papam rogavit, ut se *suberet salutifera pietatis verbo a peccatorum vinculis esse solutum*; cum Gregorius VII. repetitis vicibus absolutionem per litteras est elargitus, ut in ejus Epistolar. L. I. Ep. 34. L. 8. Ep. 2. L. 6. Ep. 14. legitur; &

1. R. P. Muszka Tom. II. de Sacr.

Z z

plura

plura his familia, quæ videre est sæpe laud. C. 25. apud Morinum. Illud vero, quod ibid. primo statim loco narrat de Serapione, in extremis ad Ecclesiæ communionem admissio, ad rem præsentem prorsus non facit, ut patebit expendenti veterem Ecclesiæ circa poenitentes publicos disciplinam, de qua nos Differt. V. acturi sumus: idemque colligitur ex tota facti hujus narratione apud Eusebium L. 6. C. 33. cujus nos ipsi jam supra L. IV. de SS. Euch. N. 76. meminimus.

Ac Denique, ut hanc nostram absolutionis per literas datæ acceptionem ipsius Cl. Morini sensu confirmemus: fateatur is L. 10. C. 22. hoc nomine non raro venire Indulgentiam, relaxationem, & commutationem poenæ. Vel et, quæ ibid. N. 6. habet, recitasse suffecerit. *Hoc sane modo*, inquit, *Pontifices in antiquissimis Indulgentiarum diplomatis dixerunt, se peccata omnia aut eorum partem remittere; absolvere, indulgere: quia revera eorum sola auctoritate ea relaxatio vel commutatio, quæ poenam remittit, & in culpam agit, eamque abstergit, conceditur. Merito igitur, licet absentes sint; licet peccatorum confessionem non audierint, peccata dicuntur absolvere, & remittere, cum Indulgentiam concesserint, cujus virtute Poenitentia canonica expungitur &c.* Expende hæc, & comperies, vel ipsius Morini suffragio nullam nos vim inferre verbis pro absolutione scripta objectis, cum ea sensu nostro exponimus.

Ita nimirum quidam Criticen professi dicant legant leges, quas, cum ad rem eorum faciunt, sequantur: sin vero, ab eis liberaliter recedant; id quod multis sparsim demonstrat in suis Animadv. in Reg. & usum Crit. Honoratus a S. Maria, cætus sane, & (si quis alius) moderatus Criticus: Inde opportune monuerim Theologiæ studiosum: caveat, ne in rebus ad fidei doctrinam pertinentibus speciosa RR. quorumdam



dam crisi nimium perstringatur. Critices suffragium ad eorum, quæ implexa sunt, explicationem juvare potest: at de his ipsis ferre sententiam Ecclesiæ est tribunalis, quod illa cumprimis per Concilia exercet.

Resp. ad II. Doctorum nobis adversantium auctoritas non est tanta, ut ei in præsentī controversia deferendum putemus. Inducti illi fuerint exemplis absolutionis per literas quandoque datæ: aut certe plus nimio tribuerint analogiæ, quam Pœnit. Sacramentum habet cum iudicio vulgari; at enim, cum evinci non possit absolutiones illas fuisse sacramentales: sitque præterea magnum inter duo hæc iudicia discrimen; ac denique pro nobis faciat Florentini & Tridentini doctrina, ipsaque praxis Ecclesiæ: ab eorum opinione omnino recedendum existimamus. Cæterum, neque omnes illi, quos pro se laudat Morinus, cum eo penitus consentiunt. Certe Suarezius, tametsi fateatur probabile visum non paucis, absolutionem scripto datam, absenti esse validam, addit nihilominus: *licet probabilius semper fuerit, & mihi quidem certum, esse nullam, & consequenter non esse exercendam.* Consule eumd. in 1. 2. Traët. 3. Disp. 12. Sect. 6. N. ult.

Sed nec illud isthic prætereundum censeo: absolutionem per literas concessam ante Decr. Clementis fuisse validam contendit Morinus, post illud autem penitus invalidam. Qui vero istud? Clemens hoc suo Decr. §. 1. damnavit propos. sequ. *Licet per Literas, seu internuncium Confessario absenti peccata sacramentaliter confiteri, & ab eodem absente absolutionem obtinere.* Certe, attentis Decreti verbis, agitur in eo solum de Confessione absenti Sacerdoti facta, & absolutione a Sacerdote absente collata; ergo, si sententia Morini ex se valida est, absolutio scripto data valida erit etiānum eadem saltem eo casu, quo pœnitenti præsentī a Sacerdote e. g. usu loquendi destituto impendetur. Istud utique admissum nolit

Morinus: igitur absolutionis scriptæ invaliditas a solo Clementis Decreto haud recte repetitur.

Deinde, si vel de sola absolutione per absentem Sacerdotem scripto collata fiat sermo, quæro: cur ea, prius valida, per cit. Decretum reddita sit penitus invalida? propterea inquit Morinus sæpe laud. C. 25. N. 18. quia per hoc Decretum Pontifex quoad hujusmodi absolutionem restrinxit aut etiam sustulit Sacerdotibus potestatem. At quam illam? non utique ordinis, sed jurisdictionis duntaxat: quod ipsum ibid. explicat exemplo reservationis casuum, & aliarum id genus restrictionum. Ex hoc autem quid ni ita jure arguam: post Clementinum Decretum absolutio absenti scripto data est invalida, defectu jurisdictionis; ergo eadem, si ante hoc Decr. fuit valida, valida pariter erit aliquo saltem casu, e.g. cum poenitens in articulo mortis versatur, nec ab ullo Sacerdote accedi potest. Ita, tametsi Sacerdos excommunicatus aut suspensus, defectu jurisdictionis regulariter invalide absolvat: in periculo nihilominus mortis, cum alias Sacerdos haberi nequit, rata est ejus absolutio: quia nimirum jurisdictionis sublatio non extenditur ad id genus necessitatis casum, idque ob bonum animarum; ergo etiam &c. Illatio, ut vides, est legitima; neque tamen id, quod ea continetur, sustineri potest, cum in laud. Decr. §. 2. disertis verbis præcipiat Pontifex: ne opinio de hujus absolutionis valore *unquam tanquam aliquo casu probabilis defendatur*. Vel ipsi igitur Cl. Morino, si ad Criticæ suæ leges principia etiam theologica adjungat, fatendum est: absolutionem scripto datam, quam nunc ait esse penitus invalidam, non vi præcise Clementini Decreti, verum ex se omnino & spectata Christi institutione, ac proinde semper fuisse invalidam.

Atque hæc paulo prolixius: quo videlicet Auditores nostros hoc exemplo doceremus, Criticorum de controversiis the-

theologicis pronuntiata non semper esse oracula, in quorum obsequium nos subijci continuo oporteat; ad Theologiæ tribunal prius deferenda sunt, non prius, quam hujus comprobentur suffragio, momentum habitura.

Ad tuendam Assertionis II. veritatem, longe plures expediendæ sunt difficultates, eæque cumprimis, quas Cl. Morinus in suo de Poenit. Comment. totis 15. Capitibus obmouet: nam, qui eum ex RR. sequuntur, vix novi quidquam proferunt. Et has quidem minutim, ac ex ordine dissolendas ex proposito suscepit Simonnetus Tract. 15. de Poenit. Disp. 8. ab Ar. 2. usque ad 7. nobis, quia compendio studendum est, satis fuerit summa earum capita discutere. Jam vero laud. Morinus

I. Pugnat auctoritate Scripturæ, illis videlicet ex Ep. Jacobi C. 5. V. 16. certis verbis: *confitemini ergo alterutrum peccata vestra, & orate pro invicem, ut salvemini*; cum igitur hic Apostolus agat de Poenit. Sacramento, quid ni in eo peccati fiat remissio per Sacerdotis orationem? quodque hinc consequitur, sufficiens hujus Sacramenti forma est oratio Sacerdotis. Certe ex ejusd. C. V. 14. *infirmatur quis in vobis? inducat Presbyteros Ecclesiæ, & orent super eum ungentes &c.* recte infertur, Extremæ Unctionis formam haberi per orationem; perinde igitur &c.

II. Pugnat auctoritate Patrum. Nimirum, Tertullian. L. de Pudicit. C. 2. inter peccata distinguens, de remissibili ex Joanne illud recitat: *si quis scit, fratrem suum delinquere delictum non ad mortem, petat, & dabitur ei vita &c.* ac dein subjungit: *ita ubi est (delictum) postulationis, illic etiam remissionis &c.* Et rursus C. 19. de eod. peccato, ejus *venia erit*, inquit, *per exoratorem Patris Christum*; quibus verbis Morinus designari putat orationem, quam Ecclesia per Sacerdotes vice Christi fundit pro peccatis.

His non absimilia legere est apud alios. Ita Ambrosius L. 3. de Spir. S. C. 8. ait: *homines in remissione peccatorum ministerium suum exhibent, non jus alicujus potestatis; - - isti rogant, divinitas donat.* Hieron. in Ps. 28. *Deus in uno quoque nostrum flammam libidinis per confessionem, & gratiam Spiritus S. intercidit, id est, per orationem Sacerdotis facit cessare.* Augustin. L. 15. de Trinit. C. 26. *effundere (Spiritus S.) super alios non utique possumus, sed ut hoc fiat, Deum, a quo hoc efficitur, super eos invocamus.* Demum Leo M. Ep. 80. ad Epp. Campan. *sufficit illa confessio, quæ primum Deo offertur, tum etiam Sacerdoti, qui pro delictis pœnitentium precator accedit; & Ep. 91. ad Theodorum, Deum ordinasse dicit, ut indulgentia Dei, nisi supplicationibus Sacerdotum nequeat obtineri.* Ex sensu itaque Patrum peccata iis remittuntur verbis, quibus Sacerdos orat pro venia.

Resp. ad I. non esse certum, verbis illis, *confitemini alterutrum peccata*, agi de Confessione sacramentali; tametsi autem de illa agatur, certe per verba seqq. *orate pro invicem*, intelligi non potest oratio, quæ sit forma Sacramenti. Ad hanc quippe orationem Apostolus illic requirit condiciones certas, quæ ad formas Sacramentorum non requiruntur: eidem præterea attribuit effectum duntaxat impetrationis, & quidem speciatim beneficii temporalis, ut patet ex iis, quæ continuo subjicit: *multum enim valet deprecatio iusti assidua. Elias oratione oravit, ut non plueret super terram, & non pluit, - - rursum oravit, & cælum dedit pluviam, & terra dedit fructum suum.* Atque hinc patet, non recte argui a prioribus eod. C. Verbis, *infirmatur quis &c.* ex his quippe Trident. in Doctr. de Sac. Unct. Cap. 1. profitetur Ecclesiam didicisse, formam Extremæ Unctionis esse Orationem: secus est de forma Sacram. Pœnitentiæ.

Resp,

Resp. ad II. Ne singulis Patrum dictis minutim explicandis immorer, duo in hanc rem generatim notasse suffecerit. Primum : Patres de Sacram. Pœnitentiæ agentes non raro meminerunt solius deprecationis, quam ex usu Ecclesiæ in hujus Sacramenti ministracione Sacerdotes adhibent, quæque ad ipsam sacramentalem peccatorum remissionem solum *dispositive* se habet, nec ad formæ substantiam, sed integritatem duntaxat pertinet; ipsam autem absolutionis proprie talis formam consulto, propter arcani disciplinam, reticuerunt. Vide, quæ in simili jam alias insinuavimus L. III. de Confirm. N. 50. in Resp. & L. IV. de SS. Euch. N. 121. in Resp. V. 2do, non infrequens &c. Alterum est: ipsa sacramentalis absolutio nonnunquam a Patribus vocatur *oratio*, at non alio sensu, quam quod ejus forma a legitimo Ministro prolata sit tacita quædam & implicita divinæ potentiæ invocatio. Recole in hanc rem dicta paulo ante cit. L. IV. & N. in Resp. V. 1mo, *Patribus* &c. Certe, ut isthic videbis, familiare fuit Patribus dicere: Eucharistiam precibus consecrari; ipsi nihilominus Doctores in præsentî nobis adversarii fatentur, precum nomine intelligendam esse duntaxat implicitam invocationem, quæ fit his verbis: *hoc est corpus meum* &c. aut certe commemorari preces eas, quæ solum *dispositive*, & non *formaliter*, ad consecrationem concurrant. Cur igitur eodem sensu exponendi non sint Patres, Sacerdotum deprecationi remissionem peccati attribuentes? Ac sane nisi ita exponantur, quæ ratione sibi constabunt? cum alibi doceant, Sacerdotes habere potestatem Clavium, judicium exercere, peccata dimittere &c. Conser hæc ipsa cum argumentis ex Tridentino ductis supra a N. 82.

Hac autem verborum phrasi in explicando Pœnit. Sacramento usi sunt PP. potissimum propterea; ut significarent, Deum esse causam principalem remissionis etiam tum, cum

ea

ea Sacerdotum ministerio & absolutione confertur; utque refellerent errorem quorundam, suæ probitati, vel certe potestati plus nimio tribuentium, quod ipsum jam L. II. de Bapt. N. 37. V. *Nec obest* &c. commemoravimus. Atque ex his invicem collatis habes in promptu responsum ad objecta Patrum loca; sola applicatione opus erit. Sed nimirum isthic non sistit laud. Morinus; cum eodem itaque

- 91 Instabis I. Etsi non semper, at aliquibus saltem locis PP. nomine orationis hujus sacerdotalis designant ipsam Pœnit. Sacramenti formam: nam *antiquitus ordinaria & vulgata absolutionis formula fuit deprecatoria: postcentum supra mille annos aliquâ indicativum formulæ deprecatoriæ addi cæpit: tandem formula indicativa in Occidente sola obtinuit*, ut Morinus L. 8. in argumento Capitis 8. præfatur. Id vero etiam ut evincat, seqq. CC. provocat ad Latinorum vetustissima MSS. Pontificalia, Sacramentaria, item LL. Rituales & Pœnitentiales, quin ipsum Gregorii M. Sacramentarium, & Ordinem Romanum; in his nimirum Ritus reconciliandi pœnitentes sola oratione definitur, nusquam autem vel vestigium reperias formæ indicativis verbis expressæ; res igitur pro confecta haberi debet; primis videlicet undecim Seculis in Ecclesia Latinâ solis deprecativis verbis absolutionem sacramentalem fuisse impensam.

Resp. I. Demus, in omnibus antiquis laud. LL. (nam de Sacram. Gregorii, Ordine Rom. & plurimis aliis certum est) pœnitentium reconciliationem sola Sacerdotis deprecatione definiri, nondum tamen rem confectam ajo.

Etenim, ritus his locis descripti fere non pertinent ad reconciliationem sacramentalem, sed *canonicam* duntaxat, *publicam*, ac *solemnem*: eam videlicet, quæ impendebatur publicis pœnitentibus eum in finem, ut (jam antea privatim a Sacer-

Sacerdote sacramentaliter absoluti) pro foro etiam externo reconciliarentur Ecclesiæ, restituerentur communioni fidelium, & ad Eucharistiæ participationem admitterentur. Ad istud asserendum inducor *1mo*: nam in plurimis his LL. describitur ea reconciliatio, quæ fiebat Feria V. Maj. hebdom. ut patet ex Ordine Rom. aliisque apud Alcuinum, Ratoldum, & Martene; certum autem est, hac Feria morem fuisse solemniter reconciliandi publicos pœnitentes. *2do*, quia omnes id genus Orationes plurali numero efferuntur; ritu igitur hoc omnes simul pœnitentes communiter reconciliabantur: qui cum sæpe magno numero fuerint, quis credat? integram omnium confessionem ab Episcopo exceptam, eosque simul sacramentaliter absolutos. *3tio*, ritus idem constabat Orationibus multis, quarum præterea complures eundem prorsus sensum faciebant: sacramentalem autem formam (ut in aliis Sacramentis) brevem esse convenit, nec eadem repeti potest non repetita materia. *4to*, quia in ipso Ordine Rom. ritus ille his verbis describitur: *tunc egreditur pœnitens, - - ut gremio præsentetur Ecclesiæ &c.* & infra: *ab Archidiacono reddantur (pœnitentes) Episcopo, & ab Episcopo restituantur Ecclesiæ gremio &c.* unde & Orat. 9. dicit: *Ecclesiæ tuæ purificatos restitue &c.* quæ omnia, ut vides, solam reconciliationem canonicam spectant. *5to*, nam etiam in Pontificali Rom. Clementis VIII. & Urbani VIII. Par. 3. in *Reconciliatione pœnitentium in Feria V. Cænæ Domini*, item in *Ordine ad reconciliandum apostatam, schismaticum vel hæreticum*, totus ritus, plane ut in antiquis Pontificalibus, deprecatione absolvitur: cum tamen vel Adversarii fateantur, ætate horum Pontificum in Ecclesia Latina solius formæ indicativæ usum fuisse. Neque officit: quibusdam Orationibus peti, ut *Deus absolvat a peccatis &c.* ex usu enim loquendi Ecclesiæ (ut constat ex N. 89. in Resp. ad I.) hujusmodi verbis sæpe designatur censuræ aut

alterius poenæ temporalis peccato debitæ remissio, quæ fieri potest extra Sacramentum.

Non diffiteor interim, in antiquis MSS. Sacramentarium & Pœnitentialium Codicibus, quorum partem Cl. Morinus suo de Pœnit. Commentario adiecit, solas Orationes contineri eo etiam loco, quo agitur de Confessione privata, & pœnitentis ad extrema deducti reconciliatione, proinde sacramentali; atque ideo statim principio præcedentis Responsionis particula *fere* consulto est apposita. An vero propterea causa cadimus? minime; omnes quippe Orationes has (plane ut hodiernus mos habet) ante vel post absolutionem sacramentalem recitatas fuisse existimo, ita ut illis ipsa Sacramenti forma verbis indicativis expressa interponeretur. At cur, inquires, Orationes Libris insertæ, forma autem prætermissa? insertæ illæ, quia prolixiores; hæc prætermissa, tum quia brevissima, facile proinde ex auditu & disci & memoria retineri poterat: tum etiam propter disciplinam arcani. Sed enim arcani hoc studium subinde desiit, nec tamen vel posterioribus Codicibus ea forma inserta est? ita equidem; at istud evenire primum erat, cum vetusti Codices a posteris integra fide & ad literam transcriberentur: neque ulla esset necessitas inferendæ hujus formæ, seu quod brevis foret, seu quod nihil de ea intercederet controversiæ. Recole loca N. 90. in Resp. ad II. in hanc rem laudata.

Resp. II. Hactenus liberaliter a nobis actum cum Adversariis; nunc, ut sensum nostrum de eorum argumento denique expromamus, omnino negandum videtur: nullum in tota retro antiquitate usque ad Seculum XII. apud Latinos extare vestigium formæ indicativæ. Quid ita vero? quia & nobis utique eadem, qua Adversariis, veterum MSS. Codicum fide pugnare integrum est. Jam vero

Menar-



Menardus in Notis & Observ. ad L. Sacramentorum Gregorii *Nota* 677. refert in Ordine Rom. & in Codice Tiliano MSS. extare hanc absolutionis formulam: *Nos etiam secundum auctoritatem, nobis indignis a Deo commissam, absolvimus vos ab omni vinculo delictorum vestrorum, ut mereamini &c.* ubi simul asserit, hæc verba satis convenire cum formula Codicis Ratoldi.

Apud Martenium in Pontificali Egberti hæc absolutio legitur: *Absolvimus vobis vice B. Petri &c.* item in Ordine Eccl. Aquisgranensis: *Absolvimus te vice B. Petri Apostoli, cui potestas ligandi atque solvendi a Deo concessa est &c.*

Complura alia hujusmodi absolutionum, quæ profecto indicativæ sunt, exempla reperies apud laud. Martenium & alios, quin etiam Menardum, cui Morinus multum desert. Sed enim liceat Cl. Morinum propius aggredi, & vel ipsius armis pugnam instaurare. Contendit is L. 8. sui Comment. C. 25. absolutionem scripto datam valere, atque in hanc rem ibid. N. 8. adfert exemplum Gregorii VII. Papæ, Leodiensem Episcopum absolventis per Epistolam, quæ est 61. L. 2. Epp. Greg. ex qua deinde hanc absolutionis formam recitat: *quia in extremo videris postus, fraterna compassione ducti, auctoritate B. Petri Apostolorum Principis, absolvimus te a peccatis tuis, & Dominum pro te exoramus &c.* Equidem miscetur isthic aliquid deprecationis; at verba, *absolvimus te*, quid nisi indicativa sunt? quod si igitur opinione Morini absolutio hæc fuit sacramentalis, fateatur necesse est: ante Sec. XII. formæ indicativæ apud Latinos usitatæ extare vestigium, cum Gregorius VII. Seculo XI. Ecclesiæ præfuerit.

Denique (quod nec Adversarii negant) a Concilio Londinensi An. 1263. & Neumacensi An. 1284. præscripta fuit indicativa forma; hoc eod. Sec. illam solam valere tam ex sua, quam DD. Parisiensium sententia acerrime propu-

gnavit D. Thomas alias jam laud. Opusc. 22. & Franc. Mayronius Seculi XIV. Scriptor in 4. dist. 18. affirmat, formam deprecativam, a quibusdam in Provincia usurpatam, ab omnibus improbatam fuisse; de sensu Conc. Florentini & Tridentini aliunde constat. Unde vero istud hi Theologi & laud. Concilia, nisi ex Majorum traditione acceperunt? quomodo ipso statim Sec. XIII. communi consensione improbari & pro illegitima haberi potuit forma deprecativa, si ea in Occidente totis undecim prioribus Seculis viguerit, si indicativa primum Seculi XII. nata? Atque hæc de Latina Ecclesia; deinceps, quid a Græca adversum nos petatur præsidii, videamus. Itaque

- 92 Instabis II. Græci non alia quam deprecativa absolutionis forma prioribus Seculis omnibus usi sunt, quin & postremis, ac hodie etiam hac una utuntur: neque tamen propterea Pœnitentiæ Sacramenti ab eis ministrati valor ab Ecclesia unquam in dubium vocatus est. Istud vero ut comprobent Adversarii, appellant ad Arcudii L. 4. de Concordia: ad Euchologium Allatii & Goarii, ac etiam alia tam vetera quam moderna Græcorum Euchologia: ad Libellos Pœnitentiales Joannis Jejunatoris, Germani Patriar. Constantinopolitani, Simeonis Thessalonicensis, Gabrielis Philadelphiensis, quos omnes ad calcem sui Comment. de Pœnit. describit Morinus. In his nimirum (ut volunt) omnibus solam deprecativam formam legere est: de indicativa ex adverso altum ubique silentium.

Resp. Hæc referentibus, cum rem discutere penitus nondum licuit, & ipse aliquando per occasionem sum assensus, ut videre potes L. II. de Bapt. N. 38. in Resp. II. sed enim nunc Græcorum sensus, ritibus, eorumque monumentis meliore cura ad examen vocatis, secus omnino pronuntiandum est. Ea igitur, quæ seu Morinus, seu cum eo sentientes alii pro-

proferunt, non esse ejusmodi existimo, quibus comprobetur : apud Græcos in administratione Pœnit. Sacramenti solius deprecativæ formæ usum fuisse olim, ac etiamnum esse. Quæ in hanc rem faciunt, tribus animadversionibus compendio perstringam : una objecti argumenti robur infringere adnitar. Itaque animadvertendum

I. Quod attinet ad vetustos Euchologiorum & Pœnitentialium Codices, nihil certi ex iis statui potest. Etenim *1mo* incorruptos esse non constat; quin merito fides eorum in suspicionem vocatur, tum quod complurium editionum exemplaria invicem non consentiant, tum etiam propter tot Græcorum schismata. *2do*, plurimis locis videtur agi de reconciliatione solum canonica, non autem sacramentali : cum Orationes multæ & prolixæ præscribantur, earumque complures eundem prorsus sensum faciant. *3tio*, quodsi non nunquam describatur ritus sacramentalis, congrue dixerim, formam indicativam consulto omissam ex iis causis, quas pro Latinorum Ritualibus supra adduximus N. 91. in Resp. I. V. *Non diffiteor &c.*

II. Quod generatim asseritur, in nullis Græcorum Libris extare vestigium formæ indicativæ, id omnino sustineri nequit. Certe

Gabriel Philadelphizæ Metropolita in L. de Sacr. Pœnit. C. 8. postquam præfatus est, formam Pœnitentiæ esse potestatem a Christo Sacerdotibus concessam, ac in hanc rem recitavit illa Christi verba, *quæcumque solveritis &c.* item *quorum remiseritis &c.* subjungit : *ideo sanctæ Confessionis Ministri peccatori ad eos accedenti dicunt : ἡ χάρις τῷ παναγίῳ πνεύματι διὰ τῆς ἡμῶν ταπεινότητος ἔχει σε συγχεχωρημένον καὶ λελομένον. gratia SS. Spiritus per meam humilitatem habet te condonatum & absolutum.* Hæc desumpta sunt ex illo Gabrielis Phil. Libro, quem ipse Cl. Morinus ad calcem sui Com-

ment. refert; ubi etiam in prævia *Adnotatione* ait Metropolitam hunc Græcum *Latinis æquo infensorem fuisse*; vel ideo proinde testimonium ejus est validius.

In Euchologio An. 1647. a Goario edito pag. 678. post preces hęc verba a Sacerdote super poenitentem dicenda leguntur: *insuper ego absolvo te ab omnibus peccatis tuis, quacumque confessus coram Deo, & coram indignitate mea. Et infra ead. pag. ego vero condono tibi omnia peccata tua.*

In Rituali Metropolitæ Chiovienfis, quod se legisse testatur Arcudius L. 4. Concordiæ C. 3. in ritu absolutionis post preces hęc adduntur: *ego quoque Pater tuus spiritualis, potestate mihi a Deo & a superioribus meis concessa, te absolvo ab omnibus peccatis tuis.*

Menardus in Saram. Gregorii *Nota* 677. licet, inquit, in quibusdam Græcorum Libris, Canones continentibus, repariatur forma deprecativa, tamen præter formulas illas deprecatorias dicunt: *ἔχω σὲ συγχωρησέναι, id est, habeo te venia donatum.*

III. Arcudius etiam in subsidium vocatur ab Adversariis, at quo commodo? audiatur de præsentī argumento differens paulo ante cit. L. & C. Principio statim insectatur formam absolutionis deprecativam, irritam esse omnino asserens illam propterea, quod hujus Sacramenti forma exprimere debeat sententiam judicalem. Dein contendit, aliquam saltem Orationum, quæ in Euchologiis reperiuntur, quoad sensum convenire cum Latinorum forma: cur enim alias (ut arguit) Sacerdotes Græci in his deprecationibus commemorent potestatem, sibi traditam per ea verba, *quacumque solveritis &c. quorum remiseritis &c.* ac dein particula illativa orationem prosequantur ad hunc modum, *obsecramus itaque & nunc &c.* Observat præterea: in his Orationibus verba, *remittat tibi, absolvas te Deus*, subintellecta particula, *per me*, facere sensum

sum imperativum, qui æquivalet indicativo. Demum, adductis Græcorum quorundam pro forma indicativa testimoniis, concludit: a nonnullis quidem Græcis adhiberi meram deprecationem, at hos a Majorum instituto esse degeneres; absolutionem eorum esse nullam; curandum, ut precibus addant verba, quæ sententiam judicalem exprimant, ut fit in forma Latinorum.

Hæc omnia invicem collata satis, opinor, produnt: Adversarios non habere tantum, quantum sibi blandiuntur, præsidii in Scriptoribus Græcis, & eorum Euchologiis, ac LL. Poenitentialibus. Inde mirum videri potest, doctiss. Tournelyum de Sacr. Poenit. Quæst. 9. Art. 1. Concl. 4. tantum illis tribuisse, ut fidenter diceret: *solis oculis opus est, ut hujusce argumenti deprehendatur veritas; lege Euchologium Græcorum, lege LL. Poenitenciales, - nec aliam, quam deprecatoriam formulam absolutionis deprehendes.* Attamen

Instabis III. Certum est, multos saltem Græcorum Sec. 93 XV. sola deprecativa forma Sacramentum Poenit. ministrasse; nec tamen iis propterea Concilium Florent. ullam obmovit litem, cum interim alios eorum ritus minutim in controversiam vocaret: ut clarum est ex Quæsitis, quæ Græcis proposita leguntur in Actis hujus Concilii græco-latinis in Collect. Conciliorum Labbei & Cossartii Tom. 18. Item Clementis VIII. in Instrucl. super aliquibus ritibus Græcorum An. 1595. edita §. 3. hæc habet: *In casu necessitatis Presbyteri Græci Catholici possint Latinos absolvere. Utantur forma absolutionis in Gen. Concil. Florentino præscripta; & postea, si voluerint, dicant orationem illam deprecativam, quam pro forma hujusmodi absolutionis dicere tantum consueverunt.* Igitur tam Conc. Florentini, quam Clementis P. judicio rata est absolutio solis deprecativis verbis expressa, qua aliqui saltem Græci utuntur.

Resp.

Resp. Ignotum istud equidem Florentino non fuisse: at imprimis fide certum non erat (uti nec nunc) formam deprecativam esse irritam; deinde, non constabat eos uti absolutione mere deprecativa, cum multorum opinione in illis Græcorum Orationibus contineatur etiam sensus indicativus, aut saltem imperativus, ut supra ex Arcudio insinuavimus; denique, tametsi in hoc erraverint Græci aliqui, non tamen tota eorum Ecclesia. Jam vero in hoc Concilio de iis duntaxat contra Græcos disceptatum est, quæ vel erant aperte contra fidem: ut de purgatorio, de primatu Romani Pontificis &c. vel certe de suspectis eorum ritibus, aliisque id genus erroribus, quos constabat toti Græcæ Ecclesiæ esse communes: ut de particularum consecratarum in certum ordinem dispositione, de inclinatione capitis super oblata ante consecrationem, de infusione aquæ ferventis in Calicem jam consecratum, de Matrimonii dissolutione &c. ut constat ex supra laud. Actis; nihil igitur mirum, non fuisse a Concilio interpellatos Græcos de forma Pœnit. Sacramenti.

Sed nec Clementis cit. *Instructio* patrocinator adversæ sententiæ: quin nostram potius confirmat. Etenim, cum dicat simpliciter & absolute, *Utantur forma &c.* vult adhiberi a Græcis formam indicativam pro omni casu, seu nimirum suos, seu Latinos absolvant: perperam quippe priora verba, *in casu necessitatis &c.* cum his posterioribus aliqui conjungunt, cum ea ab illis linea seorsim inchoata secernantur, uti reliqua, quæ diversum quid in laud. *Instruct.* præscribunt, quod videre est in Magno Bullario Rom. Laetii Cherubini Tom. 3. Num. XXXIV. Nec officit ibid. addere Pontificem: *quam pro forma &c.* his enim solum per occasionem insinuat, aliquos Græcos ex ignorantia formæ deprecativa sola uti consuevisse; at istud simul prohibet deinceps fieri. Ac sane, si  
Cle-

Clementi visa est rata Græcorum absolutio solis deprecativis verbis concepta, cur eis indicativam indixit? cur hanc ipsam permisit conjungi cum usitata Græcorum deprecatione? nemo certe dixerit ignorasse Pontificem, sub una eademque Sacramenti administratione formam sacramentalem repeti non posse.

Demum Instabis IV. opponendo quorundam Theologorum cum Morino sentientium auctoritatem: aut etiam absolutionem a censuris, quæ conferri potest per verba deprecativa. 94

Resp. His Theologis nos opponere D. Thomam, & Scholasticorum DD. tam veterum quam recentiorum longe plures, ac cum primis CC. Florent. & Trident. Nec recte arguitur ab absolutione a censuris: hæc quippe sacramentalis non est; eadem dari potest scripto vel nutu; quin ipsi etiam mortui ab excommunicatione absolvi possunt, ut hæc omnia constant ex sensu & praxi Ecclesiæ: unde certum est, de hac aliter, ac de absolutione sacramentali Christum constituisse.

Hactenus de controversia, quam RR. quidam cum erud. Morino animadversionibus suis criticis nimium implexam reddiderunt. Quod reliquum est, ad Lectoris benevoli judicium remitto. Conferat adversæ partis momenta cum Responsis nunc datis, & argumentis ex Tridentino pro Assertionem supra ductis: ac demum ipse de causæ æquitate arbitretur.

Quæ contra Assertion. III. opponuntur, hæc potissimum 95 sunt. I. Florentin. in Decr. pro Arm. & Trident. Sess. 14. Cap. 3. absolutionis formam reponunt in illis verbis, *ego te absolvo*, adjecta particula *Et*. ergo præter hæc verba requirunt & alia, nimirum, *a peccatis*. Certe cum Trident. ejusd. Sess. de Extr. Unct. Cap. 1. dicit, hujus Sacramenti *formam esse illa verba: Per istam unctionem Et*. per τὸ *Et*. satis indi-

cat, aliqua saltem ex verbis sequentibus ad formam Extremæ Unctionis pertinere ; perinde igitur &c.

II. Christus Joan. 20. instituens Pœnit. Sacramentum, nominatim facit mentionem peccatorum, *quorum*, inquit, *remiseritis peccata* &c. ergo sicut propter expressam particulam *quorum* recte infertur, personam pœnitentis in forma sacramentali esse enuntiandam, dicendumque, *absolvo te* : recte pariter intuleris addenda esse verba, *a peccatis*. Imo

III. Si absolutio sacramentalis valeat solis his a Sacerdote prolatis verbis, *absolvo te* : valebit eadem omissa particula *te*, solo absolvendi actu enuntiato per verbum *absolvo* ; tamen si enim verbum hoc ex se sit indifferens ad significandam absolutionem hujus aut alterius pœnitentis, per ipsam attamen e. g. Titii confitentis circumstantiam satis determinatur ad designandam ejus nominatim absolutionem. In judicio præterea ordinario ad absolvendum reum satis est Judicem dicere: *absolvo* ; præsertim si is prævie interrogetur, an reum præsentem absolvat ?

Resp. ad I. N. Illation. nam in laud. Conciliorum, locis ea tantum exprimuntur verba, quæ certum est requiri ad formæ valorem ; reliqua consulto expressa non sunt, quod de eorum necessitate ipsi DD. orthodoxi controverterent : inde, cum Patribus non esset propositum de hujusmodi opinionibus quidquam statuere, provide adjecta est particula &c. Eandem interim adjicendi vel ea fuit causa sufficiens, quod & verba reliqua, tamen si non Sacramenti, præcepti tamen, in usu & praxi Ecclesiæ fundati, necessitate pronuntianda sint. Demum : cum his locis ex proposito tradita sit doctrina de formæ substantia, nec tamen voces illæ *a peccatis* speciatim expressæ fuerint, prudenti conjecturæ fit locus, ipsa Concilia existimasse, non pertinere illas ad formæ substantiam ; id quod confirmatur ex verbis Catechismi ex Decr. Concilii Tri-

den-



dentini jussu Pii V. editi, ac a nobis supra pro Assertionem citati. Illud vero, quod ab Extr. Unctionis forma arguitur, nihil evincere res ipsa docet: quando verba hæc sola, *per istam unctionem*, nec sensum ullum faciunt, minus Sacramenti effectum exprimunt; omnium præterea Orthodoxorum sententia etiam reliqua, quæ in Rituali præscribuntur, ad valorem formæ sunt necessaria.

Resp. ad II. Non ea solum causa personam pœnitentis exprimi oportet, quod Christus dixerit, *quorum remisistis*: verum ex eo simul, quod Jaud. Concilia formam absolutionis dicant in his nominatim verbis, *ego te absolvo*, consistere; hinc ex sensu Ecclesiæ colligitur, Christum ita instituisse Pœnit. Sacramentum, ut in absolutione voluerit exprimi personam pœnitentis. Cæterum si quæras: cur Christus in cit. Joannis loco non contentus dicere, *quorum remisistis*, adjecerit etiam, *peccata*? adjecisse ajo propterea: quia nisi illud faceret, verba, *quorum remisistis*, non habuissent sensum completum; nec satis indicasset, Sacramentum Pœnit. speciatim institui in remissionem peccatorum.

Resp. ad III. Tametsi verbi *absolvo* indifferentia ad significandam hujus aut alterius pœnitentis absolutionem sufficienter tolleretur per circumstantiam hujus determinati e. g. Titii peccata confitentis: constat nihilominus ex Florent. & Trident. ad Pœnit. Sacramenti formam requiri particulam *te*, cum ab utroque Concilio exprimatur perinde ac verbum *absolvo*. Ex quibus omnibus facile intelliges: in præsentia controversia nisi nos potissimum Concilliorum doctrina, ex qua nobis institutæ a Christo absolutionis formæ ratio innoscit. Denique verba, *absolvo te*, ad formæ substantiam sufficere contendimus; quia, seclusis etiam aliis, totum id significant, quod per formam Pœnit. Sacramenti significandam

B b b 2

est,

est, nec aliunde evincitur plura requiri : secus est de illis a peccatis, aut etiam aliis, quæ nonnulli præterea requirunt.

## DISSERTATIO III. DE SACRAMENTI POENITENTIÆ EFFECTIBUS ET NECESSITATE.

### §. I.

*Qui sint Pœnit. Sacramenti effectus? & an  
eos semper operetur?*

**E**X hujus Sacramenti institutione Dissert. I. §. II. asserta, ejusdemque materia & forma Dissert. II. explicata satis liquet, quæ & quanta illi virtus sit a Christo indita. Ad eam nihilominus penitus pernoscendam juverit illius effectus singulatim percernere, ac etiam definire: num eorum saltem præcipuum, gratiam videlicet peccati remissivam, semper operetur? quæ inter Theologos quæstio est controversa, ac his fere verbis proponi solet: an Pœnit. Sacramentum possit esse validum & informe? Affirmat communiter Thomistarum Schola cum Suarez, Lugo, Viva &c. negant Scotistæ, quos sequitur Vasquez, Coninch, Amicus & plures alii.

### ASSERTIO I.

*Effectus Pœnit. Sacramenti sunt: gratia sanctificans peccatorum remissiva, & gratia actuales ad vitandum relapsus; condonatio item pœnæ peccatis debita, & meritorum, quæ per peccata, deperduntur, restitutio.*

Tres

**T**Res primos effectus ex hactenus dictis facile quisque deduxerit. Nimirum

I. Sacramentum hoc speciatim ordinatum est ad remittenda peccata; hinc autem ultro consequitur: gratiam sanctificantem, quam operatur, non supponere, sed inducere eorum remissionem. Et ad mortalia quidem quod attinet, omnia simul remitti certum est: nam habitualis gratia cum nullo gravi peccato componi potest, cum poenitentem reddat amicum Dei & cohæredem Christi, & per eam *nihil damnationis est iis, qui sunt in Christo JESU*, ad Rom. 8. Neque venialium remissionem in dubium vocare licet; generatim quippe a Christo dictum est: *quorum remisistis peccata, remittuntur eis*; & Trident. Sess. 14. Cap. 5. declaravit, *peccata venialia recte & utiliter in Confessione dici*: cur autem? utique ad expiationem; mox enim addit; *taceri tamen circa culpam, multisque aliis remediis expiari possunt*; ex mente igitur Concilii etiam hujus Sacramenti remedio expiantur. Istud nihilominus ut fiat ad ipsa venialia contritionem extendi necesse est: cum universim ad peccati cujuslibet remissionem, etiam in hoc Sacramento ex institutione Christi obtinendam, dolor ac retractatio cum proposito illud non admittendi requiratur, ut docet Trident.

Illud vero isthic cumprimis observandum, quod in Poenit. Sacramento non eadem sit remissionis venialium ratio, quæ mortalium. Etenim mortalia remittuntur (ut Scholæ dicunt) *formaliter* per ipsam sanctificantem gratiam, ut quæ componi nequeat cum ulla gravi culpa; secus est de venialibus. Inde dicendum existimo: peccata venialia, etiam in hoc Sacramento, *formaliter* deleri vel per condonationem mere extrinsecam, vel satisfactionem condignam a justo præstitam, vel demum per satisfactiones Christi in hunc speciatim finem per Sacramentum applicatas. Consuli potest Viva in Cursu Theol. Disp. 2. qu. 7.

97 II. Præter habitus Virtutum, qui cum sanctificante gratia semper infunduntur, conferri etiam jus ad peculiaari auxilia, quæ tempore opportuno dentur ad vitandum realpsum, inde certum est: quod Sacramenti hujus finis non tantum sit peccatorum remissio, sed etiam morum emendatio; quod constat vel ex contritione ad illud requisita, quæ per Trident. Sess. 14. Cap. 4. *cessationem a peccato, & vitæ novæ propositum & inchoationem* - - *continere debet*; item ex satisfactione sacramentali, quæ per idem Trid. Cap. 8. imponitur etiam *ad novæ vitæ custodiam*.

98 III. Nec dubitari potest de remissione poenæ peccatis debitæ. Ac æternam quidem cum ipsa culpa semper condonari sat aperte docet Apostolus, cum ad Rom. 6. ait, *nunc vero liberati a peccato* - - *habetis fructum vestrum in sanctificationem, finem vero vitam æternam*; & Cap. 8. *nihil ergo damnationis est iis, qui sunt in Christo JESU*. Sed & temporalem poenam remitti satis constat ex jam alias dictis, præsertim Dissert. II. §. IV. Remissio attamen hæc non semper est æqualis: verum pro ratione dispositionis ipsius poenitentis nunc major, alias minor; quin ea potest esse quandoque contritionis vehementia, ut etiam totus poenæ temporalis reatus eluatur.

De effectu ultimo, qui a nonnullis controversitur, sequi. §. Assertionem II. speciatim differendum erit.

## ASSERTIO II.

*Si Sacramentum Poenitentiae sit validum, semper operatur gratiam peccati remissivam: nunquam proinde esse potest validum & informe.*

99 **A**sserti hujus veritas inde conficitur, quod universim Sacramenta sint causæ necessariae: si igitur Poenit. Sacramen-

mentum valeat, effectum suum non potest non operari, modo ex parte subjecti illud recipientis debita adsit dispositio. Quid autem dispositionis hoc casu deesse possit? quando iidem poenitentis actus, qui eum ad recipiendam gratiam disponunt, simul ad Sacramenti valorem requiruntur. Idem paulo aliis verbis accipe. Eadem, quæ necessaria sunt ad valorem Poenit. Sacramenti, sufficiunt ad gratiam per illud efficiendam; ergo si validum sit, nihil erit, quod efficaciz ejus officiat. Illatio certa est, solumque Ant. in controversiam vocant Adversarii, existimantes: non hoc ipso contritionem, quod ad valorem Sacramenti sufficiat, etiam sufficere ad gratiam producendam. At quo istud fundamentum? nullum certe hujusmodi discrimen in Patribus aut Conciliis reperias. Imo Trident. Sess. 14. Cap. 3. tam ad valorem Poenit. Sacramenti, quam ad ejus effectum eandem plane contritionem requirit, cum ait: *sunt autem quasi materia hujus Sacramenti ipsius poenitentis actus, nempe, contritio, confessio, & satisfactio; qui quatenus in poenitente ad integritatem Sacramenti, ad plenamque & perfectam peccatorum remissionem ex Dei institutione requiruntur, hac ratione Poenitentia partes dicuntur.*

Qui nobis adversantur arguunt ab aliis Sacramentis. Sic, <sup>100</sup> ajunt, e. g. Baptismus esse potest ratus, quin tamen baptizato conferatur gratia; idem est de aliis. At discrimen est inter Poenitentiam, & alia Sacramenta. In reliquis videlicet valor Sacramenti quoad substantiam non perficitur omni eo, quod in subjecto dispositionis instar necessarium est, ad effectum gratiz percipiendum; nihil igitur mirum evenire posse, ut suus sit Sacramento e. g. Baptismi valor, nec tamen habeatur sufficiens subjecti dispositio, cujus dein defectu virtutem suam Baptismus, tametsi validus, exerere nequeat, ad producendam gratiam. Recole ea, quæ in hanc rem dicta sunt L. I. de Sac. in Gen. Diss. V. §. III.

Sed,

Sed, inquit, idem sentiendum est de Sacramento Pœnitentiæ. Ut enim fructus ejus percipiatur a pœnitente, prærequiritur in eo nominatim universalis contritio: sine hac nihilominus, saltem in aliquo casu, habetur valor Sacramenti. Verum hæc arbitrarie dici constat ex N. super. Quin ajo, contritionem, eo ipso quod vera sit, esse simul saltem implicite universalem; vera quippe esse nequit, nisi eadem juxta declarationem Tridentini conjungatur *cum proposito non peccandi de cætero*, ac voluntatem peccandi excludat: ita vero si affecta sit, fieri nequit, ut non ad omnia omnino peccata prius admissa saltem implicite referatur.

## §. II.

*An per Sacramentum Pœnitentiæ peccata quælibet, & quomodo remittantur?*

**P**ROPOSITA quæstio duplicem controversiam complectitur. Primæ occasionem dederunt Montanistæ & Novatiani, cum negarent, Ecclesiæ datam esse potestatem condonandi omnia universim peccata, a baptizatis commissa, ut jam Dissert. I. N. 3. & 4. commemoravimus. Altera inter ipsos DD. Catholicos agitur, disceptantibus videlicet: an per Sacramentum Pœnitentiæ in re vel voto susceptum ita expientur peccata, ut simul opera bona, quæ ante peccatum in statu gratiæ facta sunt, quoad vim suam meritoriam integre redeant, & rursus imputentur ad præmium? Et quia id genus opera per peccatum subsequens *mortificata* dicuntur, recepta in Scholis phrasi, quæstio hæc a DD. Scholasticis passim proponitur his verbis: an merita per peccatum mortificata reviviscant per Pœnitentiam? Ex quo vides, controversiam hanc pertinere non minus ad Virtutem, quam ad Sacramentum Pœnitentiæ.

Affer-

## ASSERTIO I.

*Per Sacramentum Pœnitentiæ remittuntur omnia peccata,  
quantumvis gravia, & sæpe commissa.*

**Q**uid enim est, quod restringendam suadeat Christi hoc 101  
Sacramentum instituentis beneficentiam? Universim  
certe ac indefinite dixit: *quacunque solveritis - - erunt solu-*  
*ta; &, quorum remiseritis peccata, remittuntur.* Ac omnino  
his verbis collatam Ecclesiæ omnia sine discrimine remittendi  
peccata potestatem satis indicarunt Patres, cum Montanista-  
rum & Novatianorum errorem acriter impugnarent, præfer-  
tim Pacianus, Athanasius, Ambrosius &c. Digna relatu  
sunt Cypriani verba, Ep. 54. ad Cornelium Papam scriben-  
tis: se communi Episcoporum consilio decrevisse, lapsos in  
persecutione & sacrificiis illicitis maculatos per Pœnitentiam  
esse reconciliandos Ecclesiæ; *nec enim, inquit, fas erat, aut*  
*permittebat paterna pietas, & divina clementia, Ecclesiam pulsun-*  
*tibus claudi, & dolentibus & deprecantibus spei salutaris subsi-*  
*dium denegari, - - cum permiserit ipse, qui legem tulit, ut ligata*  
*in terris, etiam in cælis ligata essent: solvi autem possent illic,*  
*quæ hic prius in Ecclesia solverentur.*

Id ipsum docet constans sensus & praxis Ecclesiæ, quos-  
libet, in quæcumque peccata, & quantumvis sæpius lapsos  
ad Pœnitentiæ Sacramentum admittentis. Neque id autem  
sine reconciliationis effectu; nam Concil. Lateranense IV.  
Can. 1. indefinite dicit: *si post susceptionem Baptismi quisquam*  
*prolapsus fuerit in peccatum, per veram potest Pœnitentiam sem-*  
*per reparari; & Trident. Sess. 14. Can. 1. pariter generatim*  
*definivit, hoc Sacramentum pro fidelibus, quoties post Baptis-*  
*imum in peccata labuntur, ipsi Deo reconciliandis a Christo Do-*  
*mino institutum.*

## ASSERTIO II.

*Ita remittuntur peccata in Sacramento Pœnitentiæ, ut simul opera bona, ante peccatum in statu gratiæ facta, in ratione meriti redeant, & rursus imputentur ad beatitudinis æternæ præmium.*

102 **A**Tque hic condonationis modus singulare prorsus est Dei in nos misericordiæ argumentum, ultro nimirum, ac ex liberalitate sua ita remittentis peccata, ut simul pœnitens recuperet jus ad salutem per merita prius facta acquisitum, at subinde deperditum. Sed quod, inquires, hanc Dei in nos beneficentiam asserendi fundamentum? innotescere eam ajo ex Scriptura & Patribus. Ac in LL. quidem Vet. Testamenti, *Convertimini*, ait Deus Joel. 2. *ad me in toto corde vestro - - & reddam vobis annos, quos comedit locusta, bruchus, & rubigo, & eruca*; quod Hieronymus interpretatur de meritis per Pœnitentiam recuperatis: *annos*, inquit, *quos perturbationibus ante regnantibus perdidideratis in vobis, quando opera vestra locusta, bruchus, rubigo, erucaque consumpserant, Deus vobis perire non passus est: tunc comedetis fructus iustitiæ &c.* Eodem sensu communiter PP. exponenda censent illa apud Ezech. C. 18. *si impius egerit pœnitentiam, - - omnium iniquitatum ejus non recordabor: in iustitia sua, quam operatus est, vivet*; & C. 33. *impietas impij non nocebit ei, in quacumque die conversus fuerit ab impietate sua.* Ac omnino nisi eo, quo contendimus, modo remittantur peccata, recordabitur Deus iniquitatum, & impietas impij, quamvis remissa, nocebit ei: privabitur quippe æternum præmio beatitudinis, quod prioribus operibus promeruit.

Sed & ex LL. Testamenti Novi complura in hanc rem sunt loca ex mente Patrum. Ita illud ad Hebr. 6. *non enim inju-*



*injustus est Deus, ut obliuiscatur operis vestri, & dilectionis, quam ostendistis in nomine ipsius &c. de meritis per peccatum deperditis intelligi volunt Ambrosius, Chrysostomus Anselmus, & alii. Item in illud ad Gal. 3. tanta passi estis sine causa, si tamen sine causa, præter Ambrosium & Chrysostomum, ita commentatur Hieronymus: quicumque ob Christi fidem laboraverit, postea lapsus fuerit in peccatum, sicut priora dicitur passus fuisse, dum peccat; sic rursus non perdet ea, si ad pristinam fidem & antiquum studium revertatur. Idem significari parabola filii prodigi, cum calceamentis & annulo stolam quoque primam a Patre recipientis, existimat Ambrosius de eod. Filio disserens: vide, inquit, quam bonus Deus, & facilis indulgere peccatis; non solum ablata restituit, sed etiam insperata concedit. Consonat demum Patrum sensus Conc. Tridentinum, cum Sess. 6. Cap. 16. & Can. 32. ad id, ut opera meritoria præmium vitæ æternæ consequantur, non plus requirat, quam ut operans decedat in gratia: quæ conditio impletur ab illis, qui a peccato merita subsequente expiati ex hac vita emigrant.*

Jam vero ex his ultro consequitur: cum opera bona 103  
per condonationem peccati quoad vim æternæ vitæ meritoriam redeant, restitui pariter gratiam sanctificantem, quæ operibus illis antea respondebat. Est quippe gratia sanctificans ipsum æternæ beatitudinis semen, jusque proximum ad illam; eo ipso igitur quod jus ad beatitudinis præmium restituitur, restitui & ipsam gratiam necesse est. Et quoniam infusi Virtutum habitus individui sunt gratiæ justificantis comites, hos quoque cum illa recuperari dicendum est.

Quæ hic præterea controvertunt Theologi: an videlicet merita hujusmodi per Poenitentiam integre redeant in priori sua perfectione? hoc est: num reviviscant ad totam gratiam per peccatum amissam, eique respondentem gloriam? an partem duntaxat gratiæ & gloriæ? istud, fateor, nec

Scriptura, nec Traditio dilucide definit; hinc variant DD. opiniones. Mihi si quid pronuntiandum foret, eorum mallem sequi partes, qui cum Scoto & Suarezio existimant: merita mortificata reviviscere ad totam gratiam & gloriam. Est nimirum istud magis conforme Scripturæ & Patrum verbis, quibus plena & absoluta peccatorum condonatio, & bonorum operum restitutio indefinite asseri videtur.

### Satisfit Objectionibus.

104 **C**ONTRA Assertionem I. opponitur Scripturæ testimonium. Videtur nimirum quibusdam locis asseri, aliqua peccata esse ejusmodi, ut venia illis concedatur nunquam. Sic enim 2. Machab. 9. de Antiocho dicitur: *orabat hic scelestus Dominum, a quo non esset misericordiam consecuturus.* Et Apostolus ad Hebr. 12. de Esau ait: *non enim invenit penitentiae locum, quamquam cum lachrymis inquisisset eam.* Apud Matth. C. 12. postquam dictum est: *quicumque dixerit verbum contra filium hominis, remittetur ei;* continuo additur: *qui autem dixerit contra Spiritum Sanctum, non remittetur ei neque in hoc saeculo, neque in futuro.* Denique 1. Joan. 5. *est peccatum ad mortem, non pro illo dico, ut roget quis.* Quod si jam vero id genus peccata sint aliqua, quomodo asseri potest, universim omnia per Pœnit. Sacramentum remitti?

Resp. Objectos textus non posse eo, quo Adversarius vult, sensu accipi certum est vel ideo, quod aliis Scripturæ locis generatim omnium peccatorum remissio promittatur, ut videre est supra N. 8. 31. & 101. Inde, cum aliquando in S. Literis dicitur peccatum non remitti, aut etiam remitti non posse, vel agitur de eo casu, quo deficit vera Pœnitentia: vel de difficultate remissionis: aut de peccato impœnitentiae finalis; aut denique non est sermo de pœnitentia peccatoris.

toris. Ita Antiochi poenitentia, ex solo sanitatis recuperandæ desiderio profecta, non fuit vera, sed fucata duntaxat, ut ex contextu colligitur. In reliquis autem ex Apostolo, Matthæo, & Joanne adductis locis ex mente Patrum insinuat solum difficultas nimia, ac proinde moralis quædam impotentia obtinendæ pro quibusdam peccatis veniæ, idque conformiter ad ea, quæ diximus N. 8. Quin etiam haud abs re existimaverim: Antiochum non potuisse consequi misericordiam solum quoad consecutionem sanitatis, quam unam & orabat & sperabat; verba autem Apostoli de Esau hunc unum facere sensum, quod Esau lachrymis suis obtinere non potuerit, ut Patrem suum Isaac poeniteret benedictionis datæ Jacob; demum per *peccatum ad mortem*, cujus meminit Joannes, intelligi peccatum impoenitentiae finalis. Singula hæc prorsus congruè dici, patebit expendenti Scripturæ verba & contextum.

Urgebit forsan aliquis: id genus Scripturæ loca ad literam fuisse intellecta a primis fidelibus, cum in veteri Ecclesia peccatoribus quibusdam negata fuerit venia. Quam in rem complura occurrunt testimonia. Ita

I. Tertullianus L. de pudicit. C. 5. scribit, ante Zephirinum Papam in Ecclesia Romana idololatriæ & homicidis denegatam omnino fuisse veniam: eandemque mœchis non nisi ex nova Zephirini constitutione indultam. Quam disciplinæ innovationem carpens, *quid agis*, inquit, *mollissima & humanissima disciplina?* - - *idololatram quidem & homicidam semel damnas, mœchum vero de medio excipis?*

II. S. Cyprianus Epist. 14. ad Cler. Rom. & 52. ad Antonian. testatur Affricanæ Ecclesiæ fuisse morem, ut lapsis in fide negaretur pax & reconciliatio; quamvis autem severitatem hanc parte aliqua ipse mitigaverit erga illos, quibus Martyres libellum dederant, erga reliquos tamen integre ser-

vatum voluit. Idem statutum legitur a Clero Romano, ut colligitur ex ejus Epist. ad Cyprianum, quæ est inter Cyprianicas 31.

III. Rigor idem, imo major, fuit in Ecclesia Hispanica: nam Concilium Eliberitanum, circa An. 350. celebratum, etiam in fine vitæ *communione* interdixit Can. 1. & 2. post Baptismum lapsos in idololatriam; & Can. 7. eos, qui per maleficiū hominem occiderunt; item Can. 6. 73. & 75. prolapsos in alia gravia crimina.

Resp. I. generatim: nullo certo veterum testimonio evinci, peccatoribus quibuscumque, si modo vere poenituerint, negatam fuisse aliquando, præsertim in mortis articulo, reconciliationem pro foro interno, seu absolutionem sacramentalem. Inde, si quando aliqui admissi non sunt ad pacem & communionem Ecclesiæ, veniaque illis negata: aut de poenitiæ sinceritate & sufficienti proposito suspecti fuerunt; aut certe ad tempus duntaxat reconciliationis beneficio privabantur, dum videlicet Canonicam poenitentiam integre explerent. Quod si autem ipsa etiam poenitentia quibusdam concessa non est, tametsi eam expeterent, dilatio hæc spectabat ad futuram cautelam & probationem: non vero ad denegandum penitus remissionis & salutis remedium. Hac animadversione generatim facta,

Resp. II. in particulari, & quidem ad I. Adductum ex Tertulliano testimonium vel ideo minoris est ponderis, quod Liberum de pudic. jam Montanista scripserit, ac in eo ex more hæreticorum complura falso appingat Romanæ Ecclesiæ. Ac omnino, si loquatur de reconciliatione interna, aperte hallucinatur; hæc quippe nulli unquam negata fuit, ut jam sparsim alias insinuavimus: nec oppositum ullo argumento certo comprobatur. Sed nec de externa & Canonica sustineri potest, quod asserit: ipse quippe in L. de Poenit. quem ante  
defe-

defectionem conscripserat, ex sensu Ecclesiæ loquens C. 4. ait, *omnibus delictis, seu carne, seu spiritu, seu facto, seu voluntate commissis, Deum veniam per pœnitentiam spondisse*; hinc C. 8. idololatrias & mœchos ad pœnitentiam invitans, *offendisti, inquit, sed reconciliari adhuc potes: habes cui satisfacias, - id si dubitas, evolve, quæ Spiritus Ecclesiis dicat &c.* Inde, cum Zephirinus Papa in suo Decreto ait: *ego & mæchiæ & fornicationis delicta pœnitentia functis dimitto, nihil novi statuit, sed veterem disciplinam confirmat contra quosdam Africanos, qui teste Cypriano Ep. 52. mæchis in totum pœnitentiæ* (intellige, ad reconciliationem publicam) *locum clauserunt*; de idololatriis autem & homicidis nullam injicit mentionem, quia de his nulla tum quæstio mota fuerat a Romanis.

Resp. ad II. Rigor ille Africanorum pertinebat solum ad reconciliationem canonicam; fuerunt quippe eorum aliqui, qui lapsos in fide ne in mortis quidem articulo ad communionem Ecclesiæ admissos voluerunt. At diversam ab his disciplinam secutus est Cyprianus; in cit. enim Ep. 52. scribit a se constitutum, *ut nec in totum spes communicationis & pacis lapsis denegaretur: nec tamen rursus censura Evangelica solveretur, ut ad communicationem temere profluerent, sed traheretur diu pœnitentia &c.* Cum igitur noluerit lapsis in totum spem communicationis denegari, eam utique in articulo mortis concessit, tametsi tum pœnitentia integre expleri non potuerit; extra hunc casum autem regulariter concedi illam non voluit, nisi post peractam diuturnam pœnitentiam. In hoc ipso attamen rigore dispensandum censuit cum illis, qui a Martyribus *libellum pacis* obtinuerant: his quippe ex more tum recepto in gratiam Martyrum, si non integre, ex parte saltem relaxabatur pœnitentia. Quanquam cum indulgentia hac videret multum dissolvi disciplinam Ecclesiasticam, datis ad Martyres

lite-

literis, eos graviter commonuit, ut cautiore deinceps forent in concedendis libellis. Quod si demum in cit. locis aliquando Cyprianus agat de reconciliatione interna, hancque ipsam a quibusdam Affricanis negatam fuisse asserat: indubium est designari ab eo Novatianos, aut paucos duntaxat aliquos e Catholicis; at ab his certe diversum sentiebat, ut clarum fit ex ejus verbis supra N. 101. recitatis. Atque ad hæc conformiter dicendum est de statuto Cleri Romani, ut qui in præsentī controversia cum Cypriano ejusdem fuerit sententiæ.

Resp. ad III. Rursum & Eliberitani Canones intelligendi sunt de sola cæremionali & canonica reconciliatione: vel certe de Eucharistiæ participatione tantum; nec dubium est, utroque hoc sensu apud veteres *Communio* nomen fuisse usurpatum. Ac nisi istud dicatur, quomodo sibi constabunt PP. Eliberitani? cum iidem Can. 21. statuerint: *si quis de Ecclesia Catholica transitum fecerit ad hæresim, rursusque recurrit, placuit huic pœnitentiam non esse denegandam, eo quod cognoverit peccatum suum* &c. quod si autem non denegarunt pœnitentiam, utique nec veniam. Præclara est in hos Canones Cabassutii in *Notitia Conciliorum* Tom. 1. Cap. 7. animadversio, quæ tum hoc, tum priora duo Responsta multum confirmat; utile proinde fuerit eam consulere.

- 106 Contra Assertionem II. arguitur a Sacramentis, & peccatis. Etenim Sacramenta cum obice suscepta penitus amittunt virtutem operandi gratiam, ita ut illam sublato etiam obice non amplius efficiant: peccata item semel remissa nunquam deinceps imputantur ad pœnam, tametsi gratia pœnitentiæ remedio acquisita per relapsum deperdatur; perinde igitur etiam operis boni vis meritoria per peccatum subsequens extinguitur, ut ea non amplius redeat, obtenta etiam peccati remissione in Pœnit. Sacramento.

Resp.

Resp. C. Ant. N. Illat. Et quoad Sacramenta quidem ratio discriminis est: quia hanc illis attribuendi virtutem nullum habetur fundamentum, ut constat ex L. II. de Bapt. Dissert. II. §. II. meritorum contra per poenitentiam restitutio colligitur ex Scriptura & Patribus. Quod vero ad peccata attinet, testimonio Scripturæ certum est, ea semel remissa penitus aboleri, atque adeo ita remitti, ut Deus integre cedat iuri suo, quod habebat ad plestenda illa æternis poenis. Quid enim illo apud Ezech. C. 18. clarius? *Si impius egerit poenitentiam, - - omnium iniquitatum ejus non recordabor; & C. 33. impietas impij non nocebit ei, in quacumque die conversus fuerit &c.* Sane locutiones hæ sunt absolutæ & indefinitæ; non igitur restringendæ: præsertim cum istud prorsus consentaneum sit clementiæ Dei, multo pronioris ad miserendum & remunerandum, quam puniendum. Inde, cum in Scriptura aut Patribus leguntur peccata præterita redire, sermo est vel de poena peccatorum non remissorum; vel de jam remissorum poena temporali; vel denique, quod relapsus propter circumstantiam ingratiitudinis, aut similem aliam, gravius evadat peccatum, majoreque propterea supplicio sit plestendus. Confule D. Thomam hic qu. 88. Art. 1. ad 3. & in 4. dist. 22. qu. 1. Art. 1. ad 5. Cæterum hanc de peccatorum jam remissorum plena & absoluta abolitione sententiam isthic aliunde suppono. Sed nimirum quamvis istud ita se habeat, nihilominus

Instari potest I. Apud eumd. Ezechielem C. 18. V. 24. <sup>107</sup> dicitur: *si averterit se justus a justitia sua, & fecerit iniquitatem - - numquid vivet? omnes justitiæ ejus, quas fecerat, non recordabuntur;* ergo etiam opera justî post admissum ab eo peccatum penitus abolentur, jusque ad gloriam per illa prius acquisitum omnino extinguitur. Dubitari certe nequit, peccatorem

R. P. Muszka Tom. II. de Sacr.

D d d

torem

torem reddi indignum, qui gratiam prioribus meritis respondentem recuperet cum jure ad gloriam, perinde ac si non peccasset.

Resp. laudata ex Ezechiele verba intelligenda esse hoc sensu: *justitiæ ejus non recordabuntur*, hoc est, non proderunt in statu peccati, ac nisi resurgat; secus est, si resurgat: tum enim rursus prodesse incipient, & ad præmium imputabuntur. Expositio autem hæc fundatur in aliis apud ipsum Ezechielem verbis, de quibus dictum paulo ante, ac etiam supra N. 102. ubi & alia tam Scripturæ quam Patrum testimonia in rem nostram commemoravimus. Atque ita explicato Ant. neganda est Illatio. Quamvis enim merita justi per peccatum subsequens, si in eo decedat, penitus extinguantur: eadem nihilominus, quamdiu vivit & poenitere potest, perseverant conditionate, visque eorum suspensa est duntaxat ac impedita per peccatum; si hoc proinde per poenitentiam tollatur, redire illa necesse est. Inde, id quod de peccatoris indignitate additur, distinctione explico: hoc restitutionis beneficio peccator indignus est, quamdiu in peccato perseverat C. post ejus remissionem etiam, iterum Dist. independenter a misericordia Dei, & liberali hac ejus ordinatione C. admissa illa, ut admitti debet, N. Nimirum hanc meritorum restitutionem non fundamus in sola peccatorum remissione: fieri quippe hæc possit sine illa; fundamentum igitur totum eam adstruendi est misericordia Dei, in hac providentiæ lege ita gratuito peccata remittentis, ut simul comparata prius in statu justitiæ merita rursus ad præmium imputari velit. Atamen

- 108 Instabis II. Videntur hæc arbitrarie dici, nec conformia esse Tridentino: nam Sess. 6. Can. 26. definiens, justos expectare debere pro bonis operibus æternam retributionem, hanc ibid. conditionem adjungit; *si bene agendo, & divina mandata custodi-*



*custodiendo usque in finem perseveraverint*; ergo ex mente Concilii pro eo opere, cujus perseverantia per peccatum abrumpitur, retributio æterna amplius expectari non potest etiam remisso peccato.

Resp. N. Illat. Concilium enim hoc loco nomine *perseverantia usque in finem* non intelligit continuam in statu gratiæ perseverantiam: sed decessum duntaxat in statu gratiæ. Patet istud ex ejusd. Sess. Can. 32. ubi expressis verbis dicitur: *justificatum bonis operibus mereri vitam æternam, & ipsius vitæ æternæ consecutionem, atque etiam gloriæ augmentum, si tamen in gratia decesserit.* At saltem, inquires, totum jus prioribus meritis debitum non redit, ead. quippe Sess. Cap. 7. Concilium declarat, recipi a nobis *justitiam secundum propriam cujusque dispositionem & cooperationem.* Verum non officit istud; toto enim illo Cap. agitur solum de nova gratia, quæ infunditur ratione dispositionis ad justificationem: non autem de gratia jam prius habita, quæ propter merita præcedentia restituitur, cujus proinde mensura sunt hæc ipsa merita, ita ut contritio pœnitentis ad illam sit mera obicis remotio, non autem dispositio.

### §. III.

*Quæ sit Pœnitentiæ Sacramenti necessitas?*

CUM peccatum æstimatione morali perseveret, usque dum peccator illud per pœnitentiam retractet: & Apoc. 21. *non intrabit in eam* (patriam videlicet cælestem) *aliquod coinquinatum*; cumque Christus Lucæ 13. repetitis vicibus, nimirum V. 3. & 5. edixerit: *dico vobis, nisi pœnitentiam habueritis, omnes similiter peribitis*, dubitari nequit, Pœnitentiam pro contritione & retractione sumptam jure divino, & quidem

D d d 2

dem

dem necessitate medii, esse necessariam adultis in peccatum lapsis: quod ipsum insinuat Trident. Sess. 14. Cap. 4. At, num etiam ipsius Pœnitentiæ Sacramenti par sit necessitas? controvertunt Sectarii, præsertim quoad Confessionem, sine qua illud juxta doctrinam Ecclesiæ constare non potest. Errorem quoad hoc eorum supra N. 49. retulimus; nunc reliquum est, ut ad refellendum illum definiamus: an Pœnit. Sacramentum, etiam ut includens Confessionem sacramentalem Dissert. II. §. III. descriptam, non tantum jure Ecclesiastico, sed & divino sit necessarium? qua item necessitate, an medii? an tantum præcepti?

### ASSERTIO I.

*Sacramentum Pœnitentiæ, etiam prout includit Confessionem sacramentalem, est a Christo præceptum: jure proinde non tantum Ecclesiastico, sed & divino necessarium omnibus post Baptismum graviter lapsis.*

109 **C**ONfessionis sacramentalis necessitatem ipso etiam jure Ecclesiastico stabilitam non diffitemur Catholici. Aperta in hanc rem est Ecclesiæ lex in Concilio Lateran. IV. lata Can. 21. *Omnis utriusque sexus &c.* eademque per Tridentinum confirmata Sess. 14. Cap. 5. & Can. 8. Verum (quod calumniantur Sectarii) omnino negamus, necessitatem hanc solo Ecclesiastico jure inductam: neque enim (ut cit. Cap. ait Tridentin.) *per Lateranense Concilium Ecclesia statuit, ut Christi fideles confiterentur, quod jure divino necessarium, & institutum esse intellexerat; sed ut præceptum Confessionis (nempe divinum) saltem semel in anno ab omnibus & singulis, cum ad annos discretionis pervenissent, impleretur.* Neque hæc arbitrarie dicta putent Novatores; vel duo argumenta, quæ subijcio, hanc præcepti & juris divini necessitatem satis evincunt. Ita autem

Argu-

Argumentum I. ad mentem Concilii Tridentini instituo. 110  
 Christus verbis illis, *quorum remiseritis &c.* contulit Sacerdotibus potestatem judicalem, hacque eos uti voluit in ministrando Pœnitentiæ Sacramento in ordine ad remittenda vel retinenda peccata; atqui potestatem hanc exercere non possunt nisi probe ac integre cognito peccatoris statu, ut clarum est; hunc igitur etiam illis patere voluit: qui autem is patere potest, nisi peccator ipse intimos animi recessus per confessionem peccatorum exactam pandat? ergo Christus hoc Sacramentum non aliter ministrari voluit, quam præmissa peccatoris integra Confessione, hancque ipsam proinde præcepit.

Ita porro recte argui, res ipsa docet, si modo sua constet Asserto primo de judiciali Sacerdotum potestate veritas. Quid vero est, quo illa in dubium vocetur? Certe eam a Deo potestatem accipere, ut aliorum delicta remittere vel retinere possis auctoritate tibi peculiariter delegata, quid aliud est, quam delegatum Judicem fieri? Ac si istud forte generatim admissum nolis, hanc nominatim Sacerdotibus a Christo concessam potestatem esse judicalem edocebit te primævæ Ecclesiæ sensus, quem PP. aperte declarant. Audiatur pro aliis Chrysostomus L. 3. de Sacerdotio, ubi de Sacerdotibus ait: *iis datum est, ut potestatem habeant, quam Deus neque Angelis, neque Archangelis datam esse voluit.* - - *Quæcumque enim, ait, peccata remiseritis, remittuntur eis; & quorum retinueritis, retenta sunt.* Quænam, quaeso, potestas hac una major esse queat? Pater omne iudicium Filio dedit; ceterum video, ipsum omne iudicium a Deo Filio illis traditum. Audiatur Augustinus Hom. 49. *Nemo sibi dicat: occulte ago (pœnitentiam) apud Deum ago; novit Deus, qui mihi ignoscit, quia in corde ago.* Ergo sine causa dictum est: *quæ solveritis in terra &c.* Ergo frustra sunt Claves datæ Ecclesiæ Dei? certe autem Clavium nomine iudicium Ecclesiæ intelligitur. Item & Gre-

gorius M. Hom. 26. in Evang. verba illa, *quorum remiseritis &c.* exponens, *principatum*, inquit, *superni Judicii fortuntur* (Sacerdotes) *ut vice Dei quibusdam peccata retineant, quibusdam relaxent; - - ecce animarum Judices fiunt; & alios damnant, vel liberant &c.*

Atque hoc illud est argumentum, quo ipsum Concil. Tridentinum Sess. 14. Cap. 5. speciatim declarat, *institutam esse a Domino integram peccatorum Confessionem, & omnibus post Baptismum lapsis jure divino necessariam existere; quia* (ut ibid. prosequitur) *Dom. N. J. C. - - Sacerdotes sui ipsius Vicarios reliquit tanquam Præsides & Judices, ad quos omnia mortalia crimina deferantur, - - qui pro potestate Clavium remissionis aut retentionis peccatorum sententiam pronuntient. Constat enim Sacerdotes hoc judicium incognita causa exercere non potuisse, - - si in genere duntaxat, & non potius in specie, ac sigillatim ipsi sua peccata declarassent.*

- III Argumentum II. ducitur ex constanti Ecclesiæ universalis Traditione & praxi. Confessionem nimirum sacramentalem jam inde a principio Ecclesiæ in usu semper fuisse, eandemque Patres primævos ut necessariam commendasse constat vel ex iis, quæ supra Dissert. II. a N. 50. retulimus: copiosius præterea idem ex Conciliis & Patribus comprobatur Bellarm. L. 3. de Pœnit. præsertim a Cap. 5.

Ex hoc autem quid ni ita arguere liceat? Juxta S. Augustinum L. 4. contra Donat. C. 24. *quod universa tenet Ecclesia, nec Conciliis institutum, sed semper retentum est, non nisi auctoritate Apostolica traditum rectissime creditur: & Tertullianum de Præser. C. 21. de hoc sine dubio tenendum, quod Ecclesia ab Apostolis, Apostoli a Christo, Christus a Deo suscepit; ergo, cum Confessionis sacramentalis usus in Ecclesia semper fuerit, idemque judicatus sit necessarius, nec constet ab ullo Concilio fuisse institutum, rectissime creditur, doctrinam hanc*  
Apo-

Apostolos a Christo accepisse, eosque ipsos illam Ecclesiæ tradidisse. Quid vero istud est aliud? quam necessitatem hujus Sacramenti esse juris divini, in Christi videlicet præcepto fundati. Et profecto mos adeo difficilis omnia peccata, quantumvis occulta & gravia, manifestandi communi fidelium consensione invalescere & constanter perdurare non potuisset, nisi semper persuasum fuisset omnibus, onus hoc grave a Christo ipso esse institutum & præceptum.

## ASSERTIO II.

*Sacramentum Pœnitentiæ in re vel in voto est mediæ necessitate necessarium omnibus, qui a Baptismo in grave peccatum prolabuntur.*

**A**SSERTIO hæc continet doctrinam a Tridentino traditam<sup>112</sup> Sess. 14. Cap. 2. ubi ait: *Est autem hoc Sacramentum Pœnitentiæ lapsis post Baptismum ad salutem necessarium, -ut nondum regeneratis ipse Baptismus.* Est vero istud indubitatum, si sine hoc Sacramento in re vel voto suscepto obtineri nequeat remissio peccatorum a baptizato commissorum: quando absque hac remissione aditus ad salutem patere non potest; atqui, cum Christus Joan. 20. dederit Sacerdotibus potestatem remittendi vel retinendi peccata, ea utique remitti nequeunt sine absolutione sacramentali in re, aut saltem voto obtenta: quomodo enim alias retineri possent per Sacerdotes? Certe posse peccata retinere non aliud est, quam non remittendo posse facere, ut non sint remissa apud Deum. Ac profecto, nisi istud ita se habeat, frustranea erit potestas Sacerdotibus ad remittendum vel retinendum data, uti ipse Augustin. Hom. 49. arguit; postquam enim monuit: *age pœnitentiam, qualis agitur in Ecclesia; nemo sibi dicat, occulte ago* &c. continuo subjicit: *ergo frustra sunt Claves datæ Ecclesiæ Dei? frustramus verba Christi* &c.

Dictum

Dictum autem est, *in re vel voto*: tametsi enim peccata gravia baptisatorum remitti possint per contritionem charitate perfectam, ita ut per illam homo reconcilietur Deo, priusquam hoc Sacramentum actu suscipiatur; *ipsam nihilominus reconciliationem ipsi contritioni sine Sacramenti voto, quod in illa includitur, non esse adscribendam*, docet Trident. Sess. 14. Cap. 4. Quomodo porro votum hoc in contritione includatur, constat ex iis, quæ in simili sparsim dicta sunt, præfertim L. II. de Bapt. N. 79. unde etiam, quæ ibid. N. 81. de Baptismi voto notavimus, hic quoque notari oportet.

### Refelluntur Sectariorum argutiæ.

**V**ix erit, quo necessitas medii in controversiam vocetur, si jure divino necessarium sit Poenit. Sacramentum, etiam ut includens Confessionem sacramentalem. Atque hinc est, quod Novatores toti sint in hoc divino jure impugnando, depromptis potissimum ex Scriptura, Patrum sensu, Historia Ecclesiastica, & Orientalium disciplina argumentis; quorum proinde præcipua referre & refellere necessum fuerit. Ita autem

113 Arguunt ex S. Literis. I. Per verba, *quorum remisistis &c.* Christus Sacerdotibus contulit solum potestatem prædicandi verbum Dei, & annuntiandi remissionem peccatorum; haud recte igitur ex illis deducitur necessitas Confessionis jure divino imposita. Deinde

II. Quamvis detur potestatem factam remittendi etiam peccata, nondum tamen ea necessitas inferri potest: numquid enim potestas baptizandi est potestas remittendi peccata? neque tamen continuo sequitur, Catechumenum Ministro Baptismi confiteri debere peccata; ergo etiam &c. Imo

III.

III. Tametsi per verba, *quorum remisistis* &c. concessa fuerit Sacerdotibus nominatim potestas judicialis, frustra nihilominus adstruitur obligatio confitendi peccata mortalia. Eadem quippe verba, utpote generatim de peccatorum remissione enunttata, intelligi debent perinde de venialibus ac mortalibus, ut adeo Sacerdos vi potestatis sibi concessæ ab utrisque poenitentem possit solvere: neque tamen propterea infertur, etiam venialium confessionem jure divino esse præceptam; igitur nec de mortalibus confitendis præceptum inferri potest.

Resp. ad I. N. Ant. 'cujus falsitas ex sæpe jam alias dictis innotescere potuit. Aliud quippe est remittere peccata: aliud prædicare verbum Dei, aut peccata esse remissa annuntiare; cumque Christus eam Sacerdotibus remittendi peccata dederit potestatem, ut ea retinere etiam possint, satis indicavit, sine absolutione Sacerdotis peccata in Cœlo non remitti, alioqui non retinerentur. Denique: potestatem per hæc verba collatam esse judicialem, constanti Patrum & Ecclesiæ sensu docemur. Atque hinc

Resp. ad II. discrimen petendum esse a diversitate potestatis. Nimirum potestas baptizandi est quidem potestas ministerialis ad remissionem peccatorum ordinata: at non judicialis. Cujus ratio est 1<sup>mo</sup>: quia in eos, qui extra Ecclesiam sunt, uti sunt Catechumeni, Minister Ecclesiæ judicium exercere non potest. 2<sup>do</sup>, quia potestas baptizandi, tametsi sit potestas remittendi peccata, non tamen etiam (quod proprium est judicialis potestatis) eadem retinendi; nunquam enim potest ministrari Baptismus, quin (quantum est ex parte Ministri) sequatur remissio: contra Poenit. Sacramentum saltem inchoate ministrari potest cum retentione peccati, ut fit, dum Sacerdos, audita poenitentis Confessione, justis de causis absolutionem negat. 3<sup>tio</sup>, quia potestas judicialis

adnexum habet simul jus satisfactionem imponendi & exigendi; quo quidem jure potestas baptizandi est destituta. His omnibus adde doctrinam Patrum, in Ministro Pœnit. Sacramenti potestatem judicalem profitentium: cum ex adverso ne unus quidem proferri possit, qui eamdem in Baptismi Ministro agnoscat.

Resp. ad III. in hoc, quod a venialibus culpis ducitur, argumento majorem præ aliis videri posse difficultatem; hinc ad expediendam illam prævie animadvertendum est.

I. Cum Pœnit. Sacramentum, ex fine primario & per se, institutum sit ad peccatores Deo reconciliandos, proinde ad remissionem mortalium: indubium est, Christum verba illa, *quorum remisistis &c.* per se ac primario retulisse ad peccata mortalia. Quia interim magis congruum erat divinæ misericordiæ, per idem Sacramentum non graves tantum, sed & leviores culpas abolere, uti ipsum Pœnit. Sacramentum saltem ex fine secundario, institutum est ad remissionem venialium: sic & laudata verba, prout ea remissionis beneficium significant, secundario saltem a Christo relata sunt ad culpas veniales. Atque hæc conformiter ad doctrinam in Cone. Tridentino Sess. 14. Cap. 1. & 5. expositam. Unde

II. Fatendum est, per eadem Christi verba Sacerdotes constitutos esse Judices non tantum in mortalia, sed & venialia. At discrimen isthic observandum. In mortalia enim ita eos Christus Judices esse voluit, ut illa noluerit posse remitti citra Sacerdotum judicalem sententiam in re, vel saltem voto habitam, remanente proinde obligatione eam in re recipiendi: venialia ex adverso, tametsi Sacerdotum judicio aboleri posse constituerit, simul tamen eadem extra illorum etiam judicium remitti posse voluit. Rursum istud conforme est Tridentini doctrinæ, ut colligitur ex paulo ante cit. locis. Discrimen porro hoc fieri plane conveniens erat: cum enim mor-



mortalia sint graves, venialia leves duntaxat culpæ, ad divinam clementiam, imo & iustitiam pertinebat, ut hæc facilius illis expiari possent. Ex his jam vero

III. Ultro consequitur : verba, *quorum remisistis &c.* non eadem per omnia ratione pertinere ad mortalia & venialia; quod ipsum potiori jure dicendum est de sequentibus, *quorum retinueritis, retenta sunt.* Quamvis enim, aliquo saltem casu, etiam venialia possit Sacerdos retinere non remittendo illa : non potest tamen absolute & simpliciter retinere ita, ut perpetuo retenta maneant; expiari quippe etiam aliis remediis possunt: ac tametsi in hac vita contingat aliquando ea non remitti, in altera certe remittuntur, & quidem (ut cum D. Thoma docet Suarez) probabilius per actum charitatis & contritionis perfectæ, quem anima elicit in primo instanti separationis a corpore. Secus est de mortalibus, ut jam ex dictis constat.

Atque hac animadversione præmissa primum jam est ad Object. respondere. Nimirum negari potest Ant. propter particulam *perinde* adjectam; aut si mavis distinctione illud explica: verba illa perinde de venialibus ac mortalibus intelligenda sunt, hoc sensu, quod in utraque data sit potestas Sacerdotibus C. hoc sensu, quod in utraque sit data eadem per omnia potestas N. Distinctionis explicatio petenda est ex animadversionibus præmissis, quam ipsam confirmat Traditionis & Ecclesiæ sensus laud. verba sic exponentis.

Arguunt item Novatores ex Patribus: quasi vero eo-<sup>114</sup>rum aliqui non censuerint Confessionem sacramentalem ita esse necessariam, ut sine illa peccatorum remissio obtineri nequeat; ex quo inferunt, doctrinam de hac juris divini necessitate non fuisse in Ecclesia perpetuam. Nominatur autem in hanc rem

I. Ambrosius, qui L. 10. in Lucam ait: *lavant lachryma delictum, quod voce pudor est confiteri*; sine confessione igitur, per solum dolorem & lachrymas, existimavit posse deleri peccatum.

II. Chrysostomus pluribus locis eam solam confessionem, quæ fit Deo in secreto cordis, commendat. Ita Hom. 2. in Psal. 50. *si confunderis*, inquit, *alicui dicere, quæ peccasti, dicito quotidie in anima tua*; non dico, ut confitearis conseryo tuo, qui exprobet: *dicito Deo, qui curet ea*. Et Hom. 31. in Ep. ad Hebr. *non dico tibi, ut te prodas in publicum, neque ut te apud alios accuses*; sed *obedire te volo Propheta dicenti: revela Domino viam tuam. Ante Deum ergo confitere peccata tua, non lingua, sed conscientia tuæ memoria*. Item Hom. 21. ad populum Antioch. *nec cogit (Deus) in medium procedentes, quæ peccavimus, enumerare: sed sibi soli rationem reddere jubet, & sibi confiteri*. Plura id genus ex Chrysostomo congerunt Novatores cum Dallæo, qui postremum ejus locum commemorans adeo plaudit, ut exclamet: *Nihil disertius adversus necessariam istorum (Catholicorum) Confessionem dici potuit*.

III. Patres Concilii Cabillonensis II. An. 813. celebrati declararunt, Confessionem sacramentalem esse consilii duntaxat, non præcepti; sic enim habet eorum Can. 33. *Quidam Deo solummodo confiteri debere dicunt peccata, quidam vero Sacerdotibus confitendum esse percensent: quod utrumque non sine magno fructu sit intra S. Ecclesiam &c. Confessio itaque, quæ Deo fit, purgat peccata: ea vero, quæ Sacerdoti fit, docet qualiter ipsa purgentur peccata*. In hoc Can. rursus mirum plaudit Dallæus.

Resp. I. generatim. Si apud PP. subjecta materia & Sermonis contextus attendatur, ac etiam ea, quæ alibi docent, invicem conferantur, patebit, nihil ex iis a doctrina Ecclesiæ diversum proferri posse. Unde negandum est omni-

omnino Assertum in sensu a Novatoribus intento. Ad ejus autem probationem

Resp. II. in particulari, & quidem quod ad I. attinet: laud. ex Ambrosio locus ad rem præsentem non facit, cum ibi agatur de remissione Petro facta, nondum instituto Pœnitentiæ Sacramento; hæc enim ibid. præmissa legas: *Petrus doluit & flevit, quia erravit ut homo* &c. Cæterum alibi Ambrosius aperte docet necessitatem Confessionis, ac nominatim L. 2. de Pœnit. C. 6. ubi ait: *si vis justificari, fateri delictum tuum; solvit enim criminum nexus verecunda Confessio peccatorum.* Si verecunda: ergo facta homini, & non tantum Deo; coram hominibus enim verecundamur delicta confiteri.

Resp. ad II. mala fide a Novatoribus, præsertim Dalæo, hæc & id genus plura ex Chrysostomo congeri. Numquid enim S. Doctor secum ipso pugnat? cum multis aliis locis aperte doceat necessitatem Confessionis apud Sacerdotem faciendæ.

Ita, postquam L. 2 de Sacerdotio C. 3. dixit: *Nihil eorum relinquendum est, quod probe non excutiat atque examinet Episcopus; quin omnia studiose perscrutatum, tum demum oportet illum sua remedia congrue, accommodateque asferre;* dein ibid. examinis hujus coram Ecclesiæ Præposito subeundi necessitatem exponens, *insania manifesta est, inquit, despicere tantum principatum, sine quo nec salutis, nec promissorum bonorum compotes esse possumus.* Clarius id ipsum asserit Hom. 33. in Joan. in peccatis, quæ commissimus, confitendis neminem vereamur; - - etsi nemo opera nostra videat, singuli suam conscientiam ingrediantur, & judicem sibi rationem constituent; errata sua in medium adducant, nisi velint in die illa horrenda universo orbi ea manifeste patere. Item in Hom. de Muliere Samarit. qui enim homini detegere peccata erubescit, Deo vero cernente facere non erubescit, neque confiteri vult, neque pœnitentiam

E e e 3

agere:

*agere: in die illa non uno, aut duobus, sed universo orbe spectante traducetur. Esse autem singillatim, & non in genere duntaxat, confitenda peccata declarat Hom. 9. in Ep. ad Hebr. ubi primum ait; pro peccatore medicamentum poenitentiae confici ex peccatorum condemnatione & declaratione; dein sic prosequitur: sin autem dicit, sum peccator; ea autem per species non cogitat ac supputat, & non dicit: hoc & illud peccatum admisi; nunquam cessabit, semper quidem confitens, nullam autem curam gerens correptionis. Sane vel hæc argumento sunt, existimasse Chrysostomum, singulorum omnino peccatorum confessionem non Deo tantum, sed & Sacerdoti esse necessario faciendam, & quidem necessitate salutis.*

Inde, cum alibi contrarium dicere videtur, ne secum ipso pugnet, conciliandus est. Ac revera in omnibus id genus locis vel imo loquitur solum de confessione publica, quæ fiebat coram testibus, & occasionem dabat exprobrationi, quæque jam per Nestarium Chrysostomi antecessorem in Ecclesia Constantinopol. sublata fuit; ut adeo non excluderet privatam, quæ fieret coram Sacerdote, seu Dei vicario, ipso proinde Deo: præsertim cum & aliis Patribus familiare fuerit dicere, confessionem id genus secretam non fieri homini, sed Deo propter potestatem videlicet divinam, qua Sacerdos iudicium sacramentale exercet. Istud dicendi fundamentum præbet ipse Chrysostomus in Hom. 4. de Lazaro, ubi ait: *cur igitur, te quaeso, pudefcis & erubescis dicere peccata tua? non enim homini dicis, ut te probro afficiat. Num enim confervo confueris, ut in publicum proferat? - non, inquam, cogo te in medium prodire theatrum, ac multos adhibere testes; mihi soli dic peccatum privatum, ut sanem ulcus &c.* Vel certe adeo, poenitentiae frequentis, imo & quotidianæ usum commendans, non plus ad eam exigit, quam peccatorum coram Deo agnitionem & cordis contritionem, quod utrumque qui-  
vis

vis quotidie facile præstare potest; cum ex adverso non perinde facilis sit Confessio sacramentalis, tum propter verecundiam, tum quod non semper pateat ad Sacerdotem accessus, hincque ipse, si frequentior sit, molestia non vacet: neque tamen propterea S. Doctor negat, ita privatim pœnitentibus incumbere obligationem confitendi sacramentaliter opportuna occasione. Rursus in hanc rem fundamentum est ex verbis Chrysostomi Hom. 2. in Ps. 50. quotidianam hanc pœnitentiam ita commendantis: *Peccata tua ipse commemora, ut deleas. At pudet te peccata tua confiteri? dic ea quotidie in oratione; - - Dic cordi tuo atque animæ tuæ: exegimus hodiernum diem anima! quid boni fecimus, aut quid mali admisimus? - - Si in lecto sis, atque tibi peccata tua in memoriam venerint, collachryma, atque hac ratione in lecto dolere potes. Deum tuum roga atque obsecra, sicque corpus trade, posteaquam prius confessus peccata fueris.*

Conformiter jam ad hæc duo prima ex Chrysostomo obiecta loca, hisque similia alia, explicanda sunt. Quod vero ad tertium attinet, videlicet Hom. ad pop. Antioch. frustra plaudit Dallæus; solos quippe Catechumenos illic alloquitur S. Doctor, quod patet tum ex hoc Homiliæ Titulo, *Catechesis ad illuminandos*: tum ex contextu, in quo, *prius dixi*, inquit, *Et nunc dico, Et dicere non desinam, si quis morum vitia non correxit, - - ne baptizetur.* Sed neque nos sacramentaliter confitendi necessitatem ad Catechumenos extendimus.

Resp. ad III. Ante triumphum, quem canit Dallæus, advertere eum oportebat ad ejusdem Concilii Can. 32. in quo statuitur: *sed Et hoc emendatione indigere perspicimus, quod quidam, cum confitentur peccata sua Sacerdotibus, non plene id faciunt. Quia ergo constat hominem ex duabus esse substantiis, anima videlicet Et corpore, - - solerti indagatione debent inquiri ipsa peccata, ut ex utrisque plena sit confessio, scilicet: ut ea confi-*  
tean-

teantur, quæ per corpus gesta sunt, & ea, quibus in sola cogitatione delinquitur &c. quæ profecto verba non consilium, sed præceptum indicant. An igitur Concilium altero statim Can. 33. qui objicitur, in se ipsum pugnavit? nec Dallæus istud volet. Igitur dicendum: postquam Concilium Can. priore stabilivit Confessionis sacramentalis necessitatem, dein altero refert privatorum quorundam opinionem; quamvis autem isthic adversus eam nihil definiat, nec tamen illam approbat, ut ex ipsis object. verbis clarum est. Nimirum, cum jam præced. Can. memoratam necessitatem asseruit, hic satis habet eam, relata Ecclesiæ praxi, confirmare; inde ait: *quod utrumque non sine magno fructu fit intra S. Ecclesiam, ita duntaxat, ut & Deo, qui remissor est peccatorum, confiteamur peccata nostra; & secundum constitutionem Apostoli confiteamur alterutrum peccata nostra.*

115- Arguunt demum ex Historia Ecclesiastica, & Orientalium disciplina. Nimirum

I. Historia primævæ Ecclesiæ non commemorat usum Confessionis sacramentalis; nusquam certe leguntur PP. ut Ignatius, Justinus, Irenæus, aliique, tametsi sanctimonia conspicui, apud Sacerdotem de peccatis se accusasse. An vero istud credibile? si jam tum Ecclesia censuisset Confessionem ex præcepto Christi esse necessariam.

II. Nectarius Ecclesiæ Constantinop. Sec. IV. Episcopus munus Pœnitentiarii, ipsumque proinde Confessionis morem abrogavit, facta potestate, ut pro sua quisque conscientia ad Mysteria Eucharistiæ participanda accederet: cui constitutioni adeo reclamatum non est, ut potius Nectarii exemplum plurimi in Oriente Episcopi sequerentur; ergo Confessio non est juris divini, hoc enim abrogari non potest. Ant. desumitur ex narratione Sozomeni. L. 7. Hist. C. 16. ejusque  
coævi

coævi Socratis L. 5. C. 19. Tantum autem isthic Sozomeno tribuit Calvinus L. 3. Inst. C. 4. ut recensitis ejus verbis ita invehatur : *hic hic aures asini isti arrigant!* pro sua, scilicet, modestia orthodoxos Theologos compellans.

III. Denique, quis credat? ex jure divino promanare necessitatem Confessionis, quam plerique Orientales aut non admittunt, aut res inter adiaphoras numerant. Et apud Græcos quidem Presbyteri fere nunquam, nobiles admodum raro, plebeji nullo penitus tempore sui accusationem apud Sacerdotes faciunt, ut Scriptores quidam testantur. Orientales cæteri, præsertim Coptitæ & Jacobitæ Alexandrini, eandemne cognitam quidem habent, quod refert Gabr. Sionita L. de Moribus Oriental. item Thomas a Jesu L. 7. de Convers. Gent. Constat præterea ex Hist. Eccl. Seculi XII. Alexandriæ a Joanne & Marco, Patriarchis Jacobitis, decretorio judicio Confessionem subatam, declaratumque ab illis: satis esse cordis confessione peccata coram Deo plangere.

Resp. ad I. Tametsi in primævæ Ecclesiæ Historia non legatur peccatorum Confessio nominatim a Patribus facta: eadem nihilominus legitur ipso statim Seculo II. & III. commendata ab Origene, Tertulliano, Cypriano & aliis, ut jam supra dictum est N. 50. & 52. Quin ibid. ex Paulino retulimus, ab Ambrosio Sec. IV. exceptas poenitentium Confessiones; idem autem etiam ab aliis Episcopis & Sacerdotibus præstitum, dubitari non potest: cum ex Patribus sæpe jam laudatis constet, ipsis Ecclesiæ primis Seculis judicatum fuisse, omnium peccatorum gravium Confessionem esse necessariam. Cæterum quod in Vitis Patrum expiationis hujus sacramentalis ab iis frequentatæ non fiat mentio, multiplex ratio reddi potest. Est quippe jure divino necessaria confessio peccatorum duntaxat mortalium, a quibus illi, uti & primævi fideles, fere immunes erant: venialia autem in sacro hoc tribunali expiare

R. P. Muszka Tom. II. de Sacr.

F f f

minus

minus tum erat frequens ob paucitatem Sacerdotum. Deinde: in Sanctorum Vitis ea ut plurimum referuntur, quæ illis fuere peculiaria; cum interim Confessio communis sit omnibus, magisque propria peccatoribus.

Resp. ad II. Qua fronte Calvinus audet ex hoc Socratis & Sozomeni loco arguere, a Nectario sublatam esse Confessionem sacramentalem? quam tamen in Antid. Concilii Trident. primum ab Innocentio III. inductam asserit, ac idcirco *laqueum Innocentianum* compellat. Si primum Seculo XII. ab Innocentio inducta Confessio, quomodo ejusdem usus jam ante a Nectario Seculo IV. sublatus? enectus est scilicet Innocentii partus octo Seculis prius, quam ab eo in lucem ederetur. En ex eodem Calvini ore frigidum & calidum! Advertit ad istud Dallæus, ac idcirco, deserta Magistri sui sententia, fatetur L. 4. de Pœnit. C. 24. & 32. non esse per Nectarium abolitam Confessionem, ne quidem publicam. Sed missis his Calvini male contextis argutiis,

Quid attamen, inquires, de Nectarii facto sentiendum? Expeditam rem esse ajo, si modo ad veteris Ecclesiæ, ac nominatim Constantinopolitanæ disciplinam, ad ipsa etiam deinde laud. Scriptorum verba mentem atque animum advertas. Ac de disciplina quidem ita res habet: Novatianis Ecclesiæ in peccatores indulgentiam incusantibus, jam Sec. III. statutum fuit, ut in graviora quædam peccata publice lapsi publicam agerent pœnitentiam, nec ad sacrum Eucharistiæ epulum admitterentur priusquam in cœtu fidelium palam de iis peccatis se accusarent. In hunc finem constitutus erat Presbyter Pœnitentiarius, qui publice lapsorum omnia peccata privatim audiret primum; ex his, quæ occulta erant, secreto subiacebant: publica vero pro arbitrio jubebat rursus coram se, & in cœtu fidelium palam declarari, quæ ipsa declaratio pars erat pœnitentiæ & satisfactionis publicæ. De hac



hac jam disciplina in sua Hist. Eccl. agens Socrates L. 3. C. 19. *quamvis, inquit, ad longinquum temporis spatium hoc tene- ret institutum, tamen temporibus Nectarii Episcopi immutarunt propter ejusmodi facinus, quod tum forte fortuna in Ecclesia admissum fuit. Mulier quædam nobilis ad Presbyterum Pœni- tentiarium accedit; peccata, quæ post Baptismum commiserat, particulatim confuetur. Presbyter mulieri mandatum dat, ut je- juniis & precibus se dederet, quo &c. Mulier longius in confi- tendo progressa, alterius culpæ se insinuat: docet Diaconum Ec- clesiæ cum ipsa dormivisse, - - ex quo cum magna populi offensio & clericalis ordinis infamia secuta fuisset, - - Eudamon quidam Ecclesiæ Presbyter - - Nectario dedit consilium, ut Presbyterum Pœnitentiarium tolleretur, & liberam daret potestatem, ut pro sua quisque conscientia ad Mysteria participanda accederet. Id quod & præstitit Nectarius, aliis etiam subinde Episcopis ejus ex- emplum secutis. Fere eadem narrat Sozomenus; Socrati au- tem eo plus deferendum, quod hæc omnia se ab ipso Eudæ- mone accepisse testetur.*

Quibus quidem attentis, quid est, quod a Nectario abo- litum esse cenferi debeat? id utique, ex quo *populi offensio & clericalis ordinis infamia secuta est*; at istud erat Confessio publica: hanc igitur solum cum Pœnitentiarium publici munere abrogavit. Certe autem Confessionem secretam eum non ab- rogasse vel illud argumento est, quod deinceps etiam illa apud Græcos viguerit, ut constat ex Chrysostomi, Nectarii in Sede Constantinop. Successoris, pluribus locis supra N. 114. in Resp. ad II. laudatis, aliisque Patribus. Quin eadem vel apud Schismaticos Græcos hodieum viget: nec tamen ejus usus legitur ab ullo Episcopo aut Concilio restitutus. Inde, cum cit. Scriptores narrant concessum esse a Nectario, *ut pro sua quisque conscientia ad Mysteria participanda accede- ret*, id eo sensu intelligendum est: permissum fuisse, ut pœ-

tens accederet Eucharistiam sine prævio publici Pœnitentiarii & fidelium aliorum iudicio, quo velut testimonium perhiberetur, eum pœnitentiæ legibus satisfecisse, riteque jam ad participandam Eucharistiam comparatum esse: modo tamen nullius gravis peccati conscientia eum remorderet, aut illud jam ante confessione privata expiasset.

Resp. ad III. miserum esse Novatorum ad Orientales refugium, a quibus in ipso statim sectæ suæ exordio repulsam tulerunt, scriptis etiam Libris deinde ab illis confutati, & decretoria complurium Synodorum sententia damnati, quod jam sæpe alias commemoravimus.

Græcos certe frustra appellant; de eorum quippe doctrina arbitrari oportet non ex incertis privatorum Scriptorum testimoniis, aut abusibus, qui post tot scissiones apud aliquos Græcorum irrepserunt: verum ex græcæ Ecclesiæ Patribus, Euchologiis, Libris Pœnitentialibus, Synodis priore Seculo celebratis &c. in quibus omnibus de Pœnit. Sacramento doctrinam nobis plane consentientem reperias. Atque ex his fontibus complura jam a nobis in hanc rem testimonia sparsim desumpta sunt: eademque copiosius videri possunt apud Auct. Perp. Fidei Tom. 5. L. 3. a Cap. 1. ad 5. Quibus demum ut momenti accedat amplius; ipsi per regiones nostras sparsi Ritus græci sectatores consulantur; & professione ne ab his quidem diversum quidquam extundetur.

Sed apud Orientales forte reliquos plus erit Novatoribus præsidii? neque istud; quando fidenter nobis provocare licet ad Canonum Orientalium collectores. Quid, obsecro, vel illo clarius? quod *Ebnassal* in Collect. princip. Fidæi C. 55. scribit: *Confessio*, inquit, *est declaratio peccatorum*, - - *quam pœnitens Sacerdoti potestatem habenti facit; peccata omnia accurate & diligenter enumeranda*, - - *nec quidquam eorum Sacerdoti occultare fas est: qui contra faciunt in animi & corporis*

ris

*ris certissimam perniciem ruunt* &c. His similia legere est C. 96. apud Auctorem *Traëtatus de scientia Ecclesiastica secundum Ecclesiam Jacobitarum Alexandrin.* item Michaellem Jacobitarum Patriarcham Antioch. in *Traët. de Præparat. ad sacram Communion.* apud celebrem Canonistam *Ehmini* n. Collect. Can. §. de Pœnit. apud Barfalibium, Albulfaragium, & alios. Rursus vide Auctorem *Perp. Fid. ex Orientalium sensu & disciplina contra Novatores prolixè & erudite differentem* Tom. 5. L. 3. a C. 5. & toto L. 4.

Equidem Joannis & Marci Patriarcharum factum, quod obijcitur, negari non potest; at reclamatum est continuo, impiam Constitutionem compluribus Orientalium impugnantibus, quorum præcipui fuere: Marcus Monach. & Presbyt. uterque Ebnassal, Echmini, Michael Patriarcha Antioch. Ex proposito istud discutit laud. Auct. *Perp. Fid. cit. L. 3. C. 8.* Atque hinc pronum est respondere ad Gabrielis Sionitæ & Thomæ a JESU testimonium. Quod si enim Coptitis & Jacobitis Alexandrinis, ac quibusdam etiam Orientalibus aliis incognitus est Confessionis sacramentalis usus, repeti istud potest a memoratorum Pseudo-Patriarcharum errore, ita apud quosdam radicato, ut evelli denique non potuerit. At istud profecto ad ferendum de totius Ecclesiæ Orient. doctrina judicium non sufficit. Quid quod constet laud. Scriptores complura de Orientalium moribus in LL. suos congestisse, quæ rudis popelli relatione & falsis rumoribus acceperunt; ut adeo ex eorum testimoniis nihil statupossit, præsertim cum in oppositum certiora alia suppetant.

## Corollarium

de obligatione Confessionis sacramentalis, spectato  
jure tam Divino, quam Ecclesiastico,

**A**sserta Sacramenti hujus necessitate, paucis exponenda est obligatio, quæ ex utroque jure oritur: uti enim inter hæc, ita & inter obligationem ex illis promanantem discrimen facere oportet.

116 I. Quod igitur ad jus divinum attinet: obligari illo omnes post Baptismum graviter lapsos, constat ex Trident. Sess. 14. Cap. 5. ubi declaratur, *integram peccatorum confessionem omnibus post Baptismum lapsis jure Divino necessariam existere.* Cum autem in articulo præsertim mortis & præfenti ejus periculo teneamur adhibere media ad salutem necessaria, indubium est, his saltem casibus præceptum Confessionis in jure divino fundatum urgere. Sed neque tum solum: quo illi satisfiat, in longius tempus differri non potest poenitentia sacramentalis. Dilatio certe hujusmodi cederet in contemptum divinæ amicitiae, nec vacaret proinde salutis periculo; inde communis est Doctorum sententia, eum, qui in plures annos differret, graviter peccaturum contra divinum Confessionis præceptum. At quo, inquires, præcise tempore ejus implendi urget obligatio? censeo, istud generatim designari non posse; unde passim DD. existimant, de hoc arbitrandum esse ex circumstantiis & statu peccatoris. Induci autem non possum, ut eorum accedam sententiæ, qui cum Cajetano, Sylvestro, & Cardenas opinantur, statim ab admissio peccato mortali præceptum hoc divinum graviter obligare ad poenitendum. Certe post D. Thomam oppositum communius docent Theologi cum Suarez, Vasquez & aliis.

II.

II. Si porro de juris Ecclesiastici præcepto sit quæstio, 117  
ex Conc. Lateranensis IV. Can. 21. & Trident. Sess. 14. Cap.  
5. certum est, omnes Christi fideles, cum ad annos discre-  
tionis pervenerint, omnia sua peccata saltem semel in anno  
confiteri debere. Omnes inquam, si tamen gravis alicujus  
culpæ sibi sint conscii: sicut enim præceptum Divinum est  
tantum de mortalibus confitendis, sic & Ecclesiasticum, cum  
hoc non aliud, quam illius quoad tempus determinationem  
contineat. Inde, si quis intra annum nulla gravi noxa se ob-  
strinxit, *per se* loquendo anno illo præcepti obligatione  
non urgetur. Dixi *per se*: fieri quippe potest, ut obligetur  
ad vitandum scandalum, vel propter particularia suæ Eccle-  
siæ statuta. Quamvis autem huic præcepto regulariter sa-  
tisfiat, quocumque intra annum tempore peragatur Confessio:  
si tamen quis paschali tempore gravis peccati sibi sit conscius,  
ratione S. Communionis tum præceptæ confiteri obligatur;  
nisi forte desit Confessarius, & Communio differri non possit  
e. g. sine scandalo: tum enim suffecerit contritionem præ-  
mittere, ut colligitur ex Trident. Sess. 13. Cap. 7. Demum:  
præcepto huic Ecclesiastico non satisfieri per Confessionem  
voluntarie nullam, constat ex Prop. 14. ab Alexandro VII.  
damnata: idque ipsum satis indicat præcepti finis, qui est pec-  
catoris cum Deo reconciliatio.



DISSER-

# DISSERTATIO IV.

## DE MINISTRO ET SUBJECTO SACRAMENTI POENITENTIÆ.

### §. I.

#### *Quis sit Minister Pœnit. Sacramenti ?*

**V**aldenses & Wicleffitæ docuerunt a solis Sacerdotibus probis, imo probis etiam laicis ministrari posse hoc Sacramentum, ut dictum est supra N. 3. Eandem potestatem Flagellantes Seculi XIII. sectarios solis laicis attribuisse testatur Baluzius in Miscellan. L. 3. C. 9. Lutherus omnium liberalissimus, extendit illam ad omnes non modo homines, sed & diabolos; id quod patet ex ejus verbis L. I. de Sacr. in gen. Diff. IV. §. I. N. 105. & 106. recitatis. Atque his delictis opponenda nobis est Ecclesiæ doctrina.

### ASSERTIO.

#### *Solus Sacerdos est Minister Sacramenti Pœnitentiæ.*

118 **I**ndubitatum hoc esse fidei dogma constat ex Trident. Sess. 14. Cap. 5. & Can. 10. ac jam ante in Concilio Constant. Sess. 8. damnatis Wicleffi propositionibus, quas pro fronte hujus Libri retulimus; inde in eod. Conc. per Bullam Martini V. cautum est, ut de Wicleffi erroribus suspecti interrogentur: num credant, quod Christianus - - soli Sacerdoti de necessitate salutis confiteri teneatur, & non laico, seu laicis quantumcumque bonis & devotis? Fundatur autem hæc doctrina in illis Christi verbis, quorum remiseritis &c. per quæ  
pote-

potestatem sacramentaliter absolvendi solis Apostolis, eorumque in Sacerdotio successoribus, esse collatam docemur ex sensu Patrum, & perpetua Ecclesiæ praxi. Certe Ambrosius L. 1. de Poenitentia C. 2. *jus hoc, inquit, solis permissum Sacerdotibus est*; & Chrysostomus L. 3. de Sacerd. C. 5. ita propriam esse ait Sacerdotibus judicii sacramentalis potestatem, ut ea nulli alteri conveniat. In eandem sententiam conspirant Pacianus, Hieronymus, Augustinus, Innocentius I. Leo M. alique PP. sæpe jam a nobis per decursum laudati. Quibus demum si Sacramentaria & Ritualia addas, plane consentientem Patrum doctrinæ praxim reperiēs: a nemine videlicet unquam alio, quam Sacerdote, Sacramentum hoc in Ecclesia fuisse ministratum.

Neque interim existimandum, per solum Sacerdotii<sup>119</sup> Ordinem plene expeditam haberi ad valide ministrandum Poenitentiae Sacramentum potestatem: requiri quippe ad id præterea tam approbationem quam jurisdictionem ex Tridentino certum est.

Ac de approbatione quidem Sess. 23. Cap. 15. ita statuitur: *Quamvis Presbyteri in sua ordinatione a peccatis absolventi potestatem accipiant, decernit tamen S. Synodus, nullum, etiam Regularem, posse Confessiones secularium, etiam Sacerdotum, audire; nec ad id idoneum reputari; nisi aut parochiale beneficium, aut ab Episcopis per examen, si illis videbitur esse necessarium, aut alias idoneus judicetur, & approbationem, quæ gratis detur, obtineat.* Tametsi autem hic nulla fiat mentio de Confessionibus Regularium, Monialium attamen Confessiones excipi non posse sine prævia approbatione, declaravit Gregorius XV. in Bulla *Inscrutabilis*.

De jurisdictione vero id. Trident. Sess. 14. C. 7. ita habet: *Quoniam igitur natura & ratio judicii illud exposcit, ut*

R. P. Muszka Tom. II. de Sacr.

Ggg

sen-

*sententia in subditos duntaxat feratur, persuasum semper in Ecclesia Dei fuit, & verissimum esse hæc Synodus confirmat, nullius momenti absolutionem eam esse debere, quam Sacerdos in eum profert, in quem ordinariam, aut subdelegatam non habeat jurisdictionem.* Quibus quidem verbis clare significatur, sine jurisdictione absolutionem esse invalidam, & non illicitam tantum. Sed num idem, quæres, etiam de approbatione intelligendum? ita plane; quamvis enim istud expressis verbis in Tridentino non decernatur, recte tamen ex illis deducitur: ac ne dubitari possit, Clemens X. aperte declaravit in Constitut. *Superna* &c. De jurisdictione demum illud ex communi & certa Doctorum sententia addo: delegatæ jurisdictionis potestatem in quoslibet & quæcumque peccata, in articulo vel periculo mortis, habere quemvis Sacerdotem, etiam excommunicatum & degradatum, si alius desit. At de his pluribus passim Theologi Morales.

### Resolvitur Objectio.

120 **A**ssertionis veritas in dubium vocari potest propterea, quod aliquando in Ecclesia existimatum fuisse videatur etiam laicos, aut Diaconos saltem, ministrare posse Pœnit. Sacramentum. Et quidem

I. Pro Laicis pugnant Religiosarum quarundam Familiarum Regulæ; sic enim Regula S. Donati C. 23. præcipit, ut sanctimoniales suis Abbatissis frequentissime confiteantur: idemque ut Fratres apud Seniores suos præstent, præscribit S. Isidorus in Regula C. 15. Cassianus C. 29. & plures alii. Quin Doct. Ang. in 4. dist. 17. qu. 3. Ar. 2. ad 2. cuilibet indiscriminatim laico, in casu saltem necessitatis, Confessiones excipiendi potestatem concedit; postquam enim dixit, Sacerdotem ex officio esse Ministrum Pœnitentiæ, continuo subjungit: *sed in necessitate etiam laicus vicem Sacerdotis supplet,*



plet, ut ei confessio fieri possit. Nec omnino contrarium videtur istud S. Literis, cum S. Jacobus in Ep. sua Cath. C. 5. generatim hortetur: *Confitemini ergo alterutrum peccata vestra.*

II. Pro Diaconis laudatur auctoritas S. Cypriani Ep. 12. concedentis, ut Diaconi absente Sacerdote absolvant poenitentes: *qui libellos, inquit, a Martyribus acceperunt, si incommodo aliquo, aut infirmitatis periculo occupati fuerint, non expectent praesentiam nostram; quin apud Presbyterum praesentem quemcunque, vel, si Presbyter repertus non fuerit, & urgere exitus cæperit, apud Diaconum quoque Exomologesim facere delicti sui possint; ut, manu eis in poenitentiam imposita, veniant ad Dominum cum pace, quam dari Martyres literis ad nos factis desideraverunt.* Addi potest Concil. Eliberitanum Can. 32. Toletanum I. Can. 2. & Londinense Can. 3. a quibus pariter Diaconis facultas permessa est manus imponendi supra poenitentes, eisque dandi communionem imminente mortis periculo. Huc denique facit Cap. *Fures*, de Furtis, ubi statuitur: *Fures & latrones, si in furando & depraedando occiduntur, visum est pro eis non esse orandum; sed si comprehensi aut vulnerati Presbytero vel Diacono confessi fuerint, communionem eis non negamus.*

Resp. I. generatim: nullo Patrum, aut Conciliorum, vel Historiæ testimonio evinci, aliquando in Ecclesia quempiam alium, præter Sacerdotem ministerio hujus Sacramenti fuisse perfunctum. Si quando proinde Confessiones Diaconis aut etiam laicis factæ leguntur, eæ omnino pro sacramentalibus habendæ non sunt. Ac ne istud arbitrarie dictum existimes,

Resp. II. in particulari ad I. Confessiones, quæ in Regulis quorundam sacrorum Ordinum præscribuntur fieri Abbatissis, ac universim Superiori etiam non Presbytero, non aliud sunt, quam suimet de culpis quibusdam accusatio eum in

finem ordinata, ut a subdito Religioso humilitas exerceatur, promptiusque idem a Superiore adjuvetur ad prosequenda illa, quæ Instituti sunt propria. Finis hic porro ex ipsis Regulis facile colligitur; in nulla autem certe earum absolutio-  
nis sacramentalis vel vestigium reperias. Quid quod hodie etiam apud complures sacras Familias id genus confessiones usitatas esse noverimus, cum videlicet Religiosi coram Præposito, aut in ipso Fratrum reliquorum cætu errata sua candide enuntiant; at has profecto accusationes nemini unquam in mentem venit sacramentales dicere.

De mente S. Thomæ ex ejusdem verbis iudicium ferendum est. Ita autem de confessione laico facta se explicat ibid. dist. 20. qu. un. Art. 1. ad 3. *ille, qui laico confuetur, quamvis impleat quod ex parte sua est de sacramentali confessione, tamen sacramentalem absolutionem non consequitur.* Et in Supplem. qu. 8. Cap. 2. ad 1. *Confessio, inquit, ex defectu Sacerdotis laico facta, sacramentalis est quodammodo* (videlicet quoad materiam Sacramenti) *quamvis non sit Sacramentum perfectum, quia deest ei, quod est ex parte Sacerdotis, nimirum absolutio.* Igitur in obj. loco S. Doctor id unum vult: fideles in periculo mortis, absente Sacerdote, ad sui humiliationem & significandum Sacramenti desiderium delicta sua manifestare posse etiam laico, id quod olim fervor Christianorum in morem verterat.

Nec argui potest oppositum ex illis D. Jacobi verbis, *confitemini ergo alterutrum &c.* Quod si enim hic agit de confessione sacramentali, sensus est: *confitemini alterutrum*, hoc est, homines hominibus, at non quibuslibet, sed Presbyteris, de quibus præmiserat; *infirmatur quis in vobis? inducat Presbyteros &c.* ex his enim dein inferat, *confitemini ergo alterutrum &c.* quæ illatio non foret legitima, nisi facienda esset confessio Presbyteris, quorum prius meminerat. Cæterum  
non

non constat hoc loco agi de confessione sacramentali; multorum quippe DD. est opinio, id solum ibi monere Apostolum: ut peccata nostra coram aliis non excusemus, sed potius humili eorum confessione alios ad orandum pro nobis provocemus.

Resp. ad II. Cyprianus indulto hoc suo Diaconis potestatem dedit solum pro foro externo reconciliandi, quod ipsum jure ordinario solis Episcopis tum competebat. Colligitur vero id ex eo: quod loquatur de poenitentibus Martyrum libello provisus, quibus in gratiam Martyrum poenitentia publica relaxabatur; aut etiam instante mortis periculo integre condonabatur ita, ut, tametsi non expleta illa, Ecclesiae reconciliarentur, atque ad ipsam Eucharistiae participationem admitterentur. Nec offendaris voce *Exomologeseos* a Cypriano isthic usurpata: quamvis enim vox hæc sæpe pro Confessione sacramentali sumatur; eadem nihilominus quandoque, ab ipso etiam Cypriano, addibetur ad significandum poenitentiae exercitium, præsertim tertii gradus, seu *substructionis*, sic dictæ, quod poenitentiam agentes imponentibus sibi manum substernerentur. Atque istud omnino jam alias a pluribus observatum est, signanter a Pamelio in Cyprianum delapsis *Nota 99.* Baluzio in Ep. Cyprianicam c. 13. Petavio in Diatriba de poenit. & reconciliat. veteris Ecclesiae C. 2. idemque clarum fit ex Tertulliano L. de Poenit. C. 9. dicente: *Exomologesis prosterneendi & humiliificandi disciplina est &c.* Hoc eodem sensu intelligenda est potestas a laud. in Object. Conciliis concessa Diacono.

At saltem, inquires, cit. Cap. *Fures*, pro Diaconis pugnat? minus imo, quam quæ ex Cypriano & Conciliis objecta sunt. Nimirum hoc Cap. desumptum est ex Concilii Triburiensis An. 895. Can. 31. hic vero non habet *Presbytero vel Diacono*, sed *Presbytero & Deo confessi fuerint*, ut

præter alios advertit Sylvius in qu. 8. Suppl. Art. 2. qua quidem lectione restituta, cessat difficultas. Sed demus legendum esse *vel Diacono*. Ac tum quidem congrue dixeris *imo*; hoc Capitulo fieri potestatem Diaconis ad dandam Eucharistiam furibus lethaliter vulneratis aut mox morte multandis, si modo contritionis signum præbeant, quale esset confessio *vel Diacono* facta. Aut verius dixerim *2do*; de ita confessis, ob præsumptam eorum contritionem, statui: ut illis post mortem non negetur communio in orationibus & suffragiis Ecclesiæ. Primum fundatur in præmissa Capitulo Rubrica, quæ ita habet: *Furibus & latronibus in peccato obuentibus Sacramenta Ecclesiastica deneganda sunt; secus si in morte eos pœnituit*. Alterum in primis Capituli verbis: *si in furando & depradando occiduntur, visum est pro iis non esse orandum*.

### Corollarium

de Ministri Pœnit. obligatione quoad Sigillum Confessionis,

121 **C**UM Minister hujus Sacramenti ex officio agat pœnitentis Judicem, Medicum, & Doctorem, primum est statuere, quales in particulari obligationes muneri huic respondeant. Præter has porro peculiaris est illa, quæ ad *Confessionis sigillum* pertinet. Vi hujus nimirum tenetur ad servandum secretum circa pœnitentis peccata: imo universim circa ea, quæ pœnitens ad plenioris suæ conscientiæ & peccatorum declarationem in Confessione sacramentali manifestat. Nominem autem hujus Confessionis venit omnis illa, quæ fit animo se accusandi in foro conscientiæ in ordine ad obtinendam sacramentalem absolutionem: tametsi hæc dein ex aliquo defectu

fectu sit invalida, aut plane non sequatur. Nec dubitandum est, obligationem hujus secreti esse rigoris summi; fundatur enim non tantum in jure naturali & Ecclesiastico: sed etiam in divino, quod ex ipsa Sacramenti institutione deducitur, ne videlicet revelatione secreti in odium adducatur Confessio. Inde nullus omnino casus evenire potest, quo, absque poenitentis indulto vel levissimum peccatum in Confessione auditum manifestare liceat. Sed de argumento hoc rursus plura a Theologis Moralibus repetenda sunt.

## §. II.

### *Quibus ministrari possit Pœnit. Sacramentum?*

**Q**Uæstio hæc pene jam resoluta est Dissert. III. ubi de Sacramenti hujus effectibus & necessitate disceptavimus. Ex his nimirum ultro consequitur

## A S S E R T I O.

*Omnes post Baptismum lapsi, quantumvis proinde graves & inveterati peccatores, aut etiam ad extremum vitæ poenitentiam disferentes, capaces sunt valide & cum fructu percipiendi absolutionem sacramentalem a Ministro præsentie.*

**I**Ta porro generatim statuta Assertio de iis duntaxat intelligenda est, qui ad mentem Concilii Trid. rite comparati sint ad obtinendam sacramentalem absolutionem, hoc est; de contritis, confessis, ac satisfacere volentibus, cum id integrum illis fuerit. Cum enim actus hi instar materiæ Sacramentum perficiant, defectu illorum necesse est reddi infructuosum, imo invalidum. Hæc contra si non desint, nihil erit, quo

quo minus valide & cum fructu ministretur cuilibet fidei in peccatum lapsa.

Est nimirum hoc Sacramentum a Christo institutum ad remissionem peccatorum, eorumque quorumlibet, cum generatim data sit Sacerdotibus potestas, quorum *remiseritis* &c. eamque ad omnia omnino peccata extendi semper existimavit Ecclesia, id quod ex illius sensu Dissert. III. §. II. satis, ut opinor, declarato constat. Sed nec poenitentiae ad exitum vitae dilatio valorem & fructum sacramentalem impedire potest, quod ipsum laud. §. comprobavimus. Quibus ut amplius accedat momenti, audiat Trident. Sess. 14. Cap. 7. ubi, *ne hac ipsa, inquit, occasione aliquis pereat, in eadem Ecclesia Dei custoditum semper fuit, ut nulla sit reservatio in articulo mortis; atque ideo omnes Sacerdotes quoslibet poenitentes a quibuslibet peccatis & censuris absolvere possint.*

- 123 Quæ quidem Concilii declaratio eo amplius ad rem præsentem facit, quod istud dicatur in Ecclesia *custoditum semper* fuisse; ut adeo ab hac doctrina & praxi nullum Ecclesiae Seculum possit eximi. Ac revera si veteris Ecclesiae Concilia & Patres consulamus, ita rem se habere comperiemus. Libet ex multis pauca in medium proferre testimonia.

Ex Conciliis Nicaenum I. An. 325. Can. 13. *de his, inquit, qui ad exitum veniunt, etiam nunc lex antiqua regularis-que servabitur: ita ut si quis egreditur e corpore, ultimo & maxime necessario viatico minime privetur.* - - Generaliter autem omni cuilibet in exitu posito, & poscenti sibi communionis gratiam tribui, Episcopus probabiliter (hoc est, postquam probaverit poenitentem) dare debet. Et Carthaginense IV. An. 398. Can. 76. & 77. statuit, morituro poenitenti dandam esse reconciliationem, & infundendam ori ejus Eucharistiam.

Ex

Ex Patribus suffecerit nominasse Innocentium I. & Cœlestinum I. utrumque sub initium Seculi V. S. Pontificem. Prior ab Exuperio consultus de peccatoribus in extremo vitæ reconciliationem petentibus, data ad eum Epistola respondet: *de his observatio prior durior, interveniente (Ecclesiæ) misericordia, inclinatio est; nam consuetudo prior tenuit, ut concederetur eis pœnitentia, sed communio negaretur.* En! prius etiam concessa pœnitentia, ergo & venia; sine hac enim frustra esset illa. Cœlestinus vero in Ep. 2. ad Episcopos Gallicæ C. 2. abusum quorundam, moribundis absolutionem negantium, redarguens, ait. *se tantam impietatem exhorrescere, qua morienti mors additur, ejusque anima occiditur.*

Quod in Assertionem additum est, a Ministro præsentem, eo<sup>124</sup> pertinet, ut indicetur: pœnitentem, quamvis cætera rite dispositum, non esse capacem absolutionis percipiendæ a Sacerdote absente. Ac hæc quidem sententia hodie certa est ex Clementis VIII. Decreto An. 1602. die 20. Julii edito, in quo §. 1. damnatur hæc prop. *Licet per literas, seu internuncium Confessario absenti peccata sacramentaliter confiteri, & ab eodem absente absolutionem accipere;* quam Propos. non tantum in sensu copulativo, sed etiam divisivo esse damnatam, declaravit Congregatio S. Inquisit. sub eod. Clemente, & rursum Paulus V. An. 1605. Neque autem existimandum est, agi hic solum de licita absolutione; nam in eod. Decr. §. 2. Pontifex statuit, ne Propos. illa *unquam tanquam aliquo casu probabilis defendatur:* quod si autem illicitam tantum, & non invalidam etiam voluisset id genus absolutionem, laudatæ Propositionis probabilitas defendi posset saltem pro aliquo casu, e. g. dum moribundus absolvi nequit nisi a Sacerdote absente, ergo &c. Juerit isthic recollere ea, quæ in consimili argumento contra Cl. Morinum ex eod. Decr. supra N. 89. V. Deinde &c. disputavimus.

R. P. Muszka Tom. II. de Sacr.

H h h

Quæ

125 Quæ contra Assertionem opponi possunt, fere ex veteris Ecclesiæ disciplina petuntur. Constat videlicet primitus negatam quandoque fuisse reconciliationem quibusdam peccatoribus, ut idololatriis, mœchis &c. item non nisi in extremo vitæ articulo poenitentibus. Ac id genus complura jam alias sparsim hoc L. commemoravimus, unaque, quo sensu accipienda sint, exposuimus. Inde, ne eadem rursus repetantur, ad hujusmodi Objecta resolvenda principii instar sit: reconciliationis illius nomine aut cæremonialem tantum intelligi; aut si sacramentalis etiam negata fuit, id factum propterea, quod peccatores ejusmodi ex conjecturis non obscuris existimarentur non esse sincere contriti, nec satis proinde dispositi ad percipiendam Sacramenti gratiam.

### Corollarium

de moribundi sensibus destituti capacitare ad percipiendam absolutionem sacramentalem.

**H**Aud infrequens est, ut Sacerdos evocetur ad moribundum sensibus destitutum; num is igitur etiam absolutionis sit capax? celebris apud Theólogos Morales est controversia. Certe in definienda illa duos eumprimis scopulos cavendos esse facile quisque intelligit; nihil quippe pronius, atque ut vel nimio opinionis rigore moribundi salus in discrimen adducatur: vel contra sentiendi libertate peccetur in reverentiam Sacramento debitam. Ego, quo utrumque declinem certius, nihil de in eo pronuntiabo, contentus gravium aliorum Doctórum sensa referre; liberum deinde cuique erit de propòsita controversia statuere. Atque ut certa a contròversis discernam;



I. Ex communi DD. sententia (ut testatur Viva in Ap-<sup>126</sup> pend. ad damnatas §. II.) certum est, moribundum sensibus destitutum, tametsi confessionem oris facere nequeat, si tamen contriti animi signum edat in ordine ad obtinendam absolutionem sacramentalem, eam illi non modo posse, sed & debere impendi; & quidem *absolute*, si signa sint certa: *conditionate* contra duntaxat, si sint dubia. Cum enim signum ejusmodi sit ipsa sensibilis confessio, qualis videlicet hoc casu fieri potest: cumque eodem signo dolor evadat sensibilis; habendus est utique moribundus pro rite disposito: tali autem absolutio negari nequit.

At quæ, inquires, signa sunt certa, quæ dubia? id universim prudentis arbitrio definiendum ajo. Pro certis interim communiter habentur, si e. g. illud ipsum signum detur, quod petitur; ut si monente Sacerdote manum ejus moribundus vel leviter comprimât, capite annuat, osculetur Christi effigiem &c. Inter dubia referuntur, motus e. g. alicujus partis corporis, oculorum, manus &c. præsertim si non statim sequantur, dum signum aliquod in genere petitur. Nec dubium est, vel motus hujusmodi prudenter posse pro signis accipi: nam cum ægri sæpe illa speciatim signa, quæ petuntur, dare non possint, tametsi connitantur, per eundem nihilominus nifum alius aliquis in corpore motus sequitur, qui ipse proinde est signum doloris.

II. Certum item est, id genus moribundum absolutionis<sup>127</sup> esse capacem, si coram adstantibus poenitentiae signa dederit, ac de his illi dein advenienti Sacerdoti testentur; quo casu rursus absolutio pro ratione signi certi vel dubii impendenda est, absoluta nempe vel tantum conditionata. Fundatur istud in Rescripto Leonis M. qui de hoc casu consultus a Theodoro Ep. Foro-Julienfi Epist. 91. ita respondit: *si moribundus subito obmutescat, potest Pœnitentiam accipere & consequi, si voluntas*

*tatis praviæ testimonium aliorum verbis habeat.* Quod ipsum statutum est a Conc. Carthagenensi IV. Cap. 76. & Arausicano I. Can. 11. ac etiam in Rituali Romano Pauli V. de Sacr. Pœnit. his verbis præscribitur : *si confitendi desiderium seu per se, seu per alios ostenderit, absolvendus est.* Accedit gravissimorum DD. idem sentientium auctoritas, ut D. Thomæ, S. Antonini, Sylvestri, Paludani, Suarez, Vasquezii, Lugonis, & plurimorum aliorum contra Dominicum Sotto, Canum &c. Neque sententia hæc (ut quidam volunt) adversatur Decreto Clementis VIII. supra N. 322. relato : testimonium enim hujusmodi esset Confessio moribundi per adstantes interpretes præsentī Sacerdoti facta; quin Clemens ipse de hoc casu interrogatus respondit, se non intendisse illum Decreto suo comprehendere, seque ipsum ejusmodi moribundum absoluturum, id quod Card. Bellarmini & Petri Lombardi Archiep. testimonio confirmat Platellius in Syn. Theol. C. 6. §. 6. N. 769.

- 128 III. Quod jam controversum est, reducitur ad eum casum, quo moribundus nec antea, nec coram Sacerdote ullum doloris signum dederit, præter respirationem moribundis omnibus consuetam. Moribundo hujusmodi negandam penitus absolutionem docent maximam partem DD. tam antiqui quam receniores apud Diana 3. p. Tract. 3. sequ. 8. Complures contra conditionate absolvi posse putant, si modo Catholicus, & vitæ communiter probæ fuerit; pro qua sententia P. Schild. Tract. 6. de Princip. form. consc. laudat 40. Doctores, a hos inter etiam S. Antoninum: eandem amplectuntur Lugo, Haunoldus, Cardenas, Tamburinus, Moya, Gormaz, La Croix, Leonardelli, & ex recentissimis Nicolaus Mazzotta in Theol. Morali Bononiæ An. 1750. edita, antea vero ab eodem Neapoli prælecta in publica Societatis nostræ Academia.

Neque

Neque interim omnes benignioris hujus sententiæ Patroni eodem nituntur fundamento. Alii quippe signum doloris sensibile, quod ad Pœnit. Sacramenti valorem requiritur, reponunt in ipsa vita christiane prius acta: alii (ac forte verius) ex vita sic transacta prudenter præsumi putant datum fuisse vel nunc dari a moribundo aliquod signum ex se sensibile, tametsi ad illud nec Sacerdos, nec adstantes alii advertunt. Partis utriusque fundamentum refert Leonardelli P. 2. Decision. pract. in Casu 39. ubi demum N. 229. postremis accedit: quos etiam sequitur laud. Mazzotta Tract. 6. disp. 1. qu. 4. de Oris confess. C. 7. §. 2.

Uterque autem pro signo hoc præsumpto ita fere arguit. Vita probe transacta sufficiens præbet fundamentum prudenter præsumendi a moribundo hoc datum fuisse vel actu dari aliquod signum doloris ex se sensibile in ordine ad absolutionem, licet illud non observetur: eo ipso enim quod christiane vixerit, prudenter præsumitur in extremis adhibere media sibi maxime proficua; hoc casu igitur prudenter præsumitur dari materiam ad valorem sacramentalis absolutionis requisitam; atqui hoc ipso potest conferri saltem sub conditione absolutio, ut constat ex collatione Baptismi per materiam dubiam in casu necessitatis, ergo &c. Antec. porro confirmant inde, quod moribundi communiter, cum possunt, dent clara & distincta doloris signa, idque salutis consequendæ gratia; prudenter itaque etiam hic moribundus ex eadem causa præsumitur dare aliquod signum, quod potest, tametsi ad illud non advertatur propterea, quod in debili motu consistat: uti istud complures ab agone sibi redditi professi sunt, ac inter alios Petrus Marchantius in suo Tribunali Sacram. Tom. 1. Tit. 4. dub. 7. de se ipso testatur. Huc facit illa Juris Regula: *quod plerumque fit, prudenter præsumitur factum.* L. in obscuris ff. de R. I.

His jam vero si opponantur Concilia ad absolutionem signum sensibile requirentia; respondent: requiri omnino signum sensibile, quod sit tale, ut vel actu re ipsa percipiat, vel saltem præsumatur dari Conc. quod semper actu percipiat, iterum Distingui, in ordine ad absolutionem conferendam absolute, Conc. conditionate tantum conferendam, Neg. Addunt *1mo*: universim Concilia de absolutione agentia intelligi debere de absoluta; sicut cum eadem loquuntur de peccatis, certa duntaxat & absolute talia intelligunt. *2do*, conditionata hac absolutione evitari omne frustrationis & irreverentiæ Sacramenti periculum, uti istud omnibus indubitatum est. *3tio*, satis receptam esse praxim absolvendi naufragos, aut ex alto præcipites; certe Mazzota cit. §. memorat, ipsum Clementem VIII. cuidam decidenti e fabrica D. Petri absolutionem contulisse his verbis: *si capax es, absolvo te* &c. quibus quidem casibus, saltem communiter, non aliud quam præsumptum doloris signum haberi potest.

- 129 IV. Sed quid, inquires, de benignioris hujus opinionis in praxi securitate existimandum? expeditum ajo ex nunc dictis esse responsum; hoc ipsum nihilominus malim alienis verbis accipias. Audi igitur Cl. Moya hic Quæst. 4. ita arguentem: propter tot A.A. sententiæ hujus Patronos, ac etiam rationes pro ea pugnantes, etsi certum non sit hujusmodi moribundum capacem esse absolutionis sacramentalis, est tamen saltem dubium; atqui ex communi Doctorum, sensu in dubio de capacitate subjecti vel materiæ ministrari potest conditionate Sacramentum; ergo etiam in præsentī casu. Quin ibid. Moya non tantum posse, sed & debere ex charitate ministrari contendit: eo quod ex charitate proximus in necessitate gravi positus juvandus sit modo, quo juvari potest: hic juvari potest conditionata absolutione, ergo &c. Idem censet Gormaz, Leonardelli, Mazzotta, & plures alii

ab his laudati. Ac ne meo (si denique & illud quis velit) desim suffragio, profiteor: me non minus esse benignum in moribundos, ac in parvulos nondum ex utero materno natos fuerim L. II. §. II. a Num. 124. inde malim iis benigniore hac sententia (qua licet) succurri: quam rigore quorundam eodem in salutis discrimen adducere.

V. Si demum quis ex his inferat: licebit igitur perinde <sup>130</sup> conditionate absolvere moribundum hujusmodi, tametsi vitæ non fuerit probæ, aut inter peccandum destituatur sensibus, vel etiam hæreticum? Ne a proposito discedam, de hoc ipso rursus aliorum duntaxat sensa referre libet. Igitur laud. Mazzotta sub finem cit. §. 2. ita sermonem prosequitur de moribundo sensibus destituto. *Idem dicunt* (posse videlicet conditionate absolvi) Poncius, Gormaz, & alii multi contra Bosco, etiamsi is antehac male vixisset; quia sufficit, si conslet, fuisse Catholicum, ut habeatur aliqua saltem tenuis probabilitas accipiendi motus, quos facit, in signum doloris. Unde etiam insert Gormaz Num. 226. quod, licet quis actualiter peccando subito destitueretur sensibus, regulariter sine absolutione dimitti non deberet; & Tamburin. Carden. aliique addunt, Catholicum in duello vel adulterio confossum, si supersit aliquid temporis ante mortem, vix dimittendum sine absolutione sub conditione. Secus vero si sit infidelis, vel hæreticus; quia ille omnino est incapax: hic certo indispositus, nisi serio antea dixerit, se velle mori ritu catholico.

Quia vero Vir perspicax probe advertit opponi posse a recens mortuo, continuo subjicit. Denique, si quis adveniente Sacerdote sit mortuus, certum est, non posse sacramentaliter absolvi, quamvis antea dedisset signa pœnitentiæ, Cap. Multiplex 49. de Pœnit. d. 1. quia non est amplius in statu viæ. Neque citetur in oppositum Opusc. 65. D. Thomæ, nam hoc falso

falso ei adscribitur, Moya Num. 16. Neque citentur aliqui Medici dicentes : animam rationalem manere etiam uno, vel altero quadrante post mortem vulgariter existimatam ; nam ea opinio est communiter improbabilis. Si autem auctoritate vel ratione fieret alicui saltem dubie probabilis, posset is absolvere sub conditione. Hæc totidem verbis Cl. Mazzotta loc. cit.

## DISSERTATIO V.

### DE CÆREMONIIS POENIT. SACRAMENTI SECUNDUM VETEREM ET MODERNAM ECCLESIAE DISCIPLINAM.

#### §. I.

*Quæ fuerit vetus disciplina in ministrando Pœnit.  
Sacramento, præsertim quoad absolutionem & satisfac-  
tionem?*

**Q**UOD in veteris Ecclesiæ disciplina ad Pœnit. Sacramentum pertinente potissimum explanandum venit, est Satisfactio pœnitentibus imposita. Inde, postquam isthic compendio in memoriâ revocaverimus Ritus confitendi & absolvendi sacramentalem etiam primitus usitatum, pluribus deinde differemus de absolutionis dilatione ; ac etiam de satisfactionis rigore & varietate ; speciatim duobus §§. seqq. acturi de ritu pœnitentiæ publicæ, & de solempni illa cæremonia, qua publici pœnitentes reconciliabantur.

Ritus

## Ritus confitendi &amp; absolvendi.

**V**etus Ecclesiæ disciplina nihil a nobis diversum habebat<sup>131</sup> quoad Confessionem & Absolutionem, prout hæc ad Pœnit. Sacramenti substantiam pertinent. Ipsis nimirum etiam primis Seculis secreto, & quidem omnia sigillatim peccata Sacerdoti confessos fuisse pœnitentes docemur ex Patribus Dissert. II. §. III. a N. 50. laudatis; hinc illa peccatorum enarratio, quæ palam in cœtu fidelium quandoque fiebat, non erat Confessio sacramentalis, sed pars duntaxat satisfactionis in sacro Pœnitentiæ tribunali impositæ. Idem de absolutione sacramentali sentiendum est; perinde enim illam veteres, ac nos, verbis indicativis contulisse constat ex iis, quibus supra Dissert. II. §. V. a Num. 82, & rursum a N. 90. pro forma indicativa pugnavimus. Quod igitur in Ritu hoc peculiare occurrit, est confitentium situs. Ut enim ex Ordine Rom. & LL. Ritualibus a Martenio & Morino editis constat, primis Ecclesiæ Seculis pœnitentes, cum peccata confiterentur, Sacerdoti assidebant: nec tamen in sella, sed humi duntaxat, & habitu corporis humili; qui tamen ipsi deinde pœnitentiam & reconciliationem flexis genibus, & in terram prostrati excipiebant.

## De Absolutionis dilatione controversia.

**Q**uod in conferenda absolutione nos inter & veteres diversum videri potest, est absolutionis tempus. Sunt quippe complures, qui existiment, in primæva Ecclesia absolutionem sacramentalem *lege communi* & *ordinaria* non fuisse datam ante satisfactionis tempus integre expletum. Atque istud inter alios ex proposito propugnat Tournelyus de Sac. Pœnit. Quæst. 7. Art. 3. Concl. 2. & Ludov. Habert de Pœnit. C. 10. §. 5. qu. 4.

R. P. Muszka Tom. II. de Sacr.

III

I. Ego,

132 I. Ego, ut opinioni huic assentiar, adduci non possum: Patrum enim & Conciliorum sententia, quæ pro ea laudantur, congruè exponuntur, imo exponenda etiam videntur de sola absolutione canonica, qua publici peccatores pro foro externo reconciliabantur Ecclesiæ. Ita illud Ambrosii L. 2. de Pœnit. C. 9. *nonnulli ideo possunt pœnitentiam, ut statim sibi reddi communionem velint; hi non tam se solvi cupiunt, quam Sacerdotem ligare: suam conscientiam culpa non exuunt, & Sacerdotis induunt.* Item illud Paciani Ep. 1. ad Sympronianum Novatianum, cum ait, *hanc ipsam pœnitentiam veniam non passim omnibus dari; - - post multos gemitus, effusionemque lachrymarum, post Ecclesiæ totius preces venia veræ pœnitentiæ non negatur.* Hæc, inquam, ac his plane consimilia, quæ ex Tertulliano, Cypriano, Innocentio I. & aliis Patribus vel Conciliis recitantur, quid ni congrue intelligamus de mera reconciliatione externa? hac quippe fiebat, ut pœnitentes publici communionis gratiam, & plenam etiam pro foro externo veniam consequerentur; eademque reconciliatio non prius impendebatur, quam post multos gemitus & lachrymas, ipsiusque etiam Ecclesiæ preces publicas, ut certum est ex veteribus LL. Ritualibus: cum ex adverso occulti peccatores, quorum delicta propter Confessionis secretum non innotescebant, ad publicum Ecclesiæ tribunal non deferrentur.

Sed, inquires, Ambrosius cit. loco docet: pœnitentes eos, qui *statim sibi communionem reddi velint, - - conscientiam culpa non exuere.* Recte id quidem ille, quin tamen nobis adversetur; volebant nimirum pœnitentes isti contra receptum Ecclesiæ ritum agi, quæ voluntas culpam involvit. Inde Cyprianus ipse Tract. de laps. de huiusmodi reconciliatione præpostera agens, dicit eam *dantibus periculosam, accipientibus nihil profuturam - - novum genus cladis, - - injuriam, impietatem, quæ salutem non tribuit, sed impedit.*

II. Ac



II. Ac omnino huic Patrum expositioni multum favet 133  
 Concilii Carthaginen. IV.º Can. 78. & Arausicani I. Can. 3.  
 Illo dicitur: *pœnitentes, qui in infirmitate Viaticum Eucharistiæ  
 accēperint, non se credant absolutos sine manus impositione, si  
 supervixerint; hoc vero de iisdem pœnitentibus: si supervixe-  
 rint, sient in ordine pœnitentium, & offensis necessariis pœniten-  
 tiæ fructibus, legitimam communionem cum reconciliatoria manus  
 impositione percipiant.* En! de pœnitentibus his statuitur:  
 ut, si supervixerint, nondum se credant absolutos; superesse  
 illis adhuc necesarios pœnitentiæ fructus; post hos ostensos  
 primum percipiendam esse legitimam communionem & recon-  
 ciliationem. At hæc profecto intelligenda sunt de fructibus  
 pœnitentiæ solum publicæ necessariis, & quidem in ordine  
 ad obtinendam duntaxat solemnem & canonicam absolutio-  
 nem, reconciliationem, & communionem: cum enim jam  
 ante in infirmitate Eucharistiæ participes sint redditi, etiam  
 utique reconciliationis internæ & sacramentalis gratiam acce-  
 perunt; ex hac igitur loquendi phrasi Patribus usitata haud  
 recte deducitur ipsius sacramentalis absolutionis dilatio.

Quid quod incredibile sit etiam veteres eam communi-  
 ter distulisse in longum adeo tempus, quo tum producebatur  
 pœnitentia: quando dilatione hac necesse erat multos in gran-  
 de salutis discrimen adduci propter non infrequentem rei entinæ  
 mortis casum, & exiguum ætate illa Sacerdotum numerum,  
 eorumque ob sævientes tyrannos magnam partem latentium.  
 Id quod eo urget amplius, quod ipsi fateantur Adversarii,  
 nunquam censuisse Ecclesiam, satisfactionem absolutioni sacra-  
 mentali esse necessario ex præcepto divino præmittendam.  
 Ut igitur de tota controversia concludam: tametsi in veteri  
 Ecclesia propter rigidiorē ejus temporis disciplinam, facile  
 concesserim, sæpius, ac nunc fiat, dilatam fuisse absolutionem

ad tempus impletæ poenitentiae; at istud *lege communi & ordinaria* factum, omnino inficior.

Atque hæc ad liberandam fidem, quam dedi Differt. II. §. IV. ubi N. 69. & 74. in Resp. ult. pollicitus sum, de hoc argumento me isthic paulo explicatius dicturum.

### Satisfactionis rigor & varietas.

134I. **S**Everiorem, ac nunc sit, fuisse antiquitus in satisfactionibus imponendis Ecclesiæ disciplinam, abunde docent Canones Poenitentiales. Leguntur autem hi passim in veteribus Conciliis, sæpeque a Patribus commemorantur; pleni demum sunt illis Libri Poenitentiales, ex quibus Canones 47. recenset Gratianus in fine sui Decreti, Ludov. autem Habert 60. juxta Decalogi ordinem digestos. Nobis, quo rigoris hujus aliquod isthic demus specimen, sat erit paucos retulisse.

*Qui sciens pejeraverit, 40. dies in pane & aqua, & 7. annos sequentes poeniteat; & nunquam sit sine poenitentia, & nunquam in testimonium recipiatur.*

*Qui opus aliquod servile die Dominico vel festo fecerit poenitentiam aget tres dies in pane & aqua.*

*Si quis in Ecclesia consabuletur, cum Divina fiunt, poenitens erit dies tres in pane & aqua.*

*Si quis furtum de re minori fecerit, poenitentiam aget annum unum.*

*Qui proximo detraxerit, poenitens erit dies septem in pane & aqua.*

*Falsarius in pane & aqua poenitentiam aget, quamdiu vivet.*

Si

*Si quis casu homicidium fecerit, pœnitens erit quadraginta dies in pane & aqua: quinquennio communione privabitur: a cibis abstinebit arbitrio Sacerdotis.*

Sane vel ex his pronum est conjicere, quanto majore severitate expianda fuerint graviora delicta, præsertim ea, quæ subijciebantur solemnî pœnitentiæ, quam ob diuturnitatem & operum pœnitentialium difficultatem multo rigidiorum fuisse a N. 141. patebit. Atque hæc satisfactionis severitas diu omnino in Ecclesia obtinuit; apud Occidentales quidem (ut communis fert opinio) ad Seculum XI. quo primum relaxari cœpit, ne aliquis ex magnitudine pœnæ desperet, & a pœnitentia totaliter recedat, ut notat D. Thom. in Supplem. qu. 18. Ar. 4. Orientales autem diutius in hoc rigore perseverarunt, quin & hodie in aliquibus Ecclesiis perseverant.

II. Ad varietatem porro hujus ipsius rigidæ satisfactio-<sup>135</sup> nis quod attinet, alia fuit *privata*, alia *publica*. Privata peragebatur secreto & sine arbitris, solo Sacerdote conscio: Publica ex adverso coram toto Ecclesiæ coetu, vel saltem pluribus testibus. Publica rursus alia fuit *solemnis*, alia *non solemn*; illa solemnî ritu, & certo graduum ac stationum ordine perficiebatur: hæc, rametsi & ipsa in conspectu aliorum fieret, memorata attamen ritus & graduum solemnitate carebat. Quin inter utramque illud quoque erat peculiare discrimen; quod satisfactio publica non solemnî sæpius, cuilibet, & a quovis Sacerdote imponi posset; cum interim solemnî nec iteraretur, neque ab alio nisi Episcopo indiceretur, ac majores saltem Clerici ab ea essent eximii. Cæterum, licet hæc satisfactionum genera in usu fuerint veteribus, ut plurimum nihilominus per pœnitentiam *humillimam*, imo etiam pœnitentiæ nomine absolute prolato designabant pœnitentiam publicam solemnem, ceu reliquis præstantiorem; quod ipsum de pœnitentium nomine observandum venit: id quod ad com-

plura Patrum & Conciliorum loca rite intelligenda haud parum confert. Præterea posteriores etiam Scriptores pœnitentiam publicam vel canonicam communiter pro solemnifumunt; quod & nos exemplo eorum crebro per decurfum hujus L. fecimus, ac deinceps facturi fumus.

## §. II.

### *Quid a veteribus observatum in ministranda solemnif pœnitentia?*

**A**D pernoscendam veterum in præfenti argumento disciplinam memoria repetere juverit: quæ fit origo pœnitentiæ publicæ? quis ejus Minister & Subjectum? quo ritu peracta?

### Origo pœnitentiæ publicæ.

- 136I. **I**nitium solemnif hujus pœnitentiæ repetendum videtur ab ipsis Apostolis, cum jam Paulus 1. Cor. 5. legatur incestuosum quemdam Corinthium tradidisse *Satanæ in carnis interitum*, quod excommunicationis quoddam & publicæ pœnitentiæ genus fuisse veteres existimant. De usu certe ejus Seculo II. & III. dubitari nequit; adeo clara sunt testimonia Irenæi L. 2. C. 9. Tertulliani L. de Pœnit. C. 9. & Cypriani Ep. 52. ad Antonianum.

Neque tamen statim a principio eadem, quæ deinceps invaluit, fuit disciplina, seu rigorem, seu diuturnitatem pœnitentiæ attendas. Etenim Sec. I. paulo ante memoratus Corinthius, vix anno pœnitentiæ evoluto, Ecclesiæ communioni est restitutus, ut constat ex C. 2 Ep. 2. ad Cor. quam post annum ab Epist. 1. elapsus Paulus scripsit. Et (Irenæo teste L. 3. C. 4) Cerdo hæresif archa

archa Sec. II. pluries a sua apostasia reconciliationem obtinuit. Nathalius etiam Episcopus, ab hæreticis ad defectionem inductus, ut primum sacco indutus & cinere conpersus ad pedes Zephyrini, sub initium Seculi III. Papæ, se provolvit, continuo pacem & communionem recepit, quod refert Eusebius L. 6. Hist. C. ult. Itaque

II. Severitatis hujus canonicæ disciplina non prius, <sup>137</sup> quam sub medium Seculi III. inducitur, ut colligitur ex Cypriani Ep. 52. in qua scribit, communi Episcoporum suffragio constitutum, *ut nec in totum spes communicationis & pacis lapsis denegaretur, - sed traheretur diu pœnitentia.* In hunc finem, cum antea pœnitentiæ tempus & modus Episcopi arbitrio definirentur, institutæ sunt solennes pœnitentium stationes, ac singulis attributa laboriosæ satisfactionis operæ; idque tum ad fideles in officio vitæ Christianæ continendos: tum ad occurrendum Montanistarum & Novatianorum criminationibus, quibus Catholicis de nimia in lapsos facilitate inculcabant.

Cæterum hæc ipsa pœnitentiæ solemnitas circa finem sequ. Seculi IV. primum quidem Constantinopoli a Nestario, hæud multo post dein in plerisque etiam aliis Orientalibus Ecclesiis, in Occidente vero non prius, quam Sec. VII. abrogata est; hinc sequentibus Seculis, tametsi quandoque pro publicis delictis publica imponeretur pœnitentia, prior tamen ille quoad temporis diuturnitatem & stationes canonicas rigor integre observatus non legitur.

### Minister & Subjectum ejusdem Pœnitentiæ.

**E**Rat solemnī huic pœnitentiæ illud peculiare, quod non a quolibet, nec quibusvis peccatoribus injungi posset. Nimirum

- 138 I. A solo Episcopo, vel Presbytero speciatim ad id muneris deputato imponebatur pœnitentia publica, & quidem solemnî ritu, neque nisi in *Capite Jejunii*, seu Feria Cinerum: unde & mos eo die cineres accipiendi profluxit. Rîtum hunc videre est apud Martene de antiqua Eccl. discipl. C. 17. uti ex complurium Ecclesiarum MSS. Codicibus varios ejus Ordines describit. Idem refertur in Pontificali Rom. Clementis VIII. Tit. de expuls. publice Pœnitentium.

Præcipua autem ejus capita hæc fere sunt. Pœnitentibus templum ingressis, & coram Episcopo prostratis ac peccatum suum palam confitentibus, primum imponebatur cinis cum dicto; *memento homo, quia pulvis es &c. age pœnitentiam, ut habeas vitam æternam.* Aspersi dein aqua lustrali, post manuum impositionem, ciliciis benedictis induebantur; tum, recitatis prius Psalmis Pœnitentialibus & compluribus aliis precibus, ad fores Ecclesiæ deductos ejiciebat Episcopus dicens: *Ecce ejicimini vos hodie a liminibus S. Matris Ecclesiæ &c.* respondente choro: *In sudore vultus tui vesceris pane &c.* Postremo, jam ejectos & extra Ecclesiam genibus flexis gementes commonuit Episcopus de pœnitentiæ operibus, de misericordia Dei, utque non prius, quam Feria V. in Coena Domini, ad Ecclesiam redirent; quo sermone finito, ac Episcopo cum reliquis fidelibus in Ecclesiam revertente, mox ejus valvæ ante oculos pœnitentium claudebantur.

- 139 Quod verò ad personas pœnitentiæ huic subjectas attinet: inprimis Clerici majores, (quales sunt Episcopi, Presbyteri & Diaconi) saltem a Seculo IV. ei non erant obnoxii, ut colligitur ex Conc. Carthaginensis V. An. 398. Can. 11. item Leonis M. Epist. ad Rusticum Narbon. & Isidoro L. 2. de Eccl. Offic. C. 16: Num autem antea subjecti fuerint, controversum est, nec certi quidquam statui potest. Perinde de Clericis minoribus aliqui controvertunt: tametsi eos Felix III. sub

sub finem Seculi V. Pontifex in Ep. 7. solemnī pœnitentiæ sub-  
jiciat; iisdem nihilominus a Conc. Toletano IV. An. 633.  
Can. 29. eadem cum Clericis majoribus pœna dictatur. Ego  
existimo, uti in aliis, sic & in hoc non eamdem fuisse in  
omnibus Ecclesiis disciplinam, hancque ipsam apud eosdem  
progressu temporis non raro variatam. Illud ex laud. Can.  
Toletano est certius: saltem sub initium Seculi VII. constitu-  
tum fuisse, ut quilibet Clericus a solemnī pœnitentia exem-  
ptus, in locum ejus *ab honore dignitatis depositus Monasterii  
pœnam excipiat, ibique perpetuæ pœnitentiæ deditus scelus ad-  
missum luat.*

III. Sed nec fidelibus reliquis omnia promiscue peccata,  
quantumvis graviâ, solemnī hac satisfactione expianda erant.<sup>149</sup>  
Non certe occulta; nam Innocentius I. in Ep. ad Exuperium  
diserte ait: *non habent latentia peccata vindictam*, intellige pu-  
blicam. Idem colligitur ex S. Cæsarii Hom. 1. in Quadrag.  
item Concilii Neocæsariensis An. 314. Can. 4. cum primis au-  
tem Augustino. Verba S. Doctoris sunt Serm. 16. de verb.  
Dom. *Novit nescio quem homicidam Episcopus, & alius illum  
nemo novit, - - profus non prodo, nec negligo, corripio in se-  
creto &c. & ibid. infra: sunt homines adulteri in domibus suis,  
in secreto peccant; aliquando nobis produntur, - - nos non pro-  
dimus malum, sed in secreto arguimus.* Unde Hom. ult. inter  
50. in peccatore publicæ pœnitentiæ subjiciendo requirit  
delictum, quod *non solum sit in gravi malo, sed etiam in scan-  
dalo aliorum*, proinde publicum. Nec tamen etiam gravia  
quælibet publica delicta solemnī hac pœnitentia castigaban-  
tur: verum, certa duntaxat, & quidem communiter idolola-  
tria, homicidium & adulterium; reliqua fere arbitrio Epi-  
scoporum designabantur, ut adeo in hoc quoque pro Ecclesia-  
rum varietate variam fuisse disciplinam fateri oporteat. Quod-  
cumque interim peccatum fuerit, propter quod pœnitentia

R. P. Muzka Tom. II. de Sac.

Kkk

publi-

publica acta est, poenitentes hujusmodi a Clericorum ordine in perpetuum arcebantur, ut constat ex Siricii Papæ Ep. 1. C. 14. cui poenæ num etiam illi, qui vel demissionis studio, aut ad vindicandas occultas culpas (quod legimus a quibusdam factum) publicis poenitentibus se sponte ac ultro adjunxerunt, subiecti fuerint? certi, quod dicam, nihil reperio.

### Ritus publicæ Poenitentiae.

**T**Ria in hoc Ritu potissimum observatu digna sunt: poenitentium Stationes, tempus singulis præfinitum, & poenæ intra hoc tempus usitatæ.

- 141 I. Ac Stationes quidem, seu gradus, poenitentia solemnibus complectebatur quatuor: sietum videlicet, auditionem, substrationem, & consistentiam; hinc pro varietate eorum poenitentes alii dicti sientes, audientes alii, vel substrati, aut demum consistentes.

Qui in prima Flentium statione versabantur, pro foribus Templi manebant prostrati, ibique, sacco induti & cinere conspersi, delictum suum coram Episcopo, vel alio Poenitentiario, imo & fidelibus omnibus palam confitebantur; quin etiam, Templum ingredientium pedibus multo cum gemitu advoluti, eorum preces & suffragia exposcebant. Isthinc vero colligas: Confessionem publicam (cujus sæpe meminimus) repetitis vicibus fieri consuevisse; primum videlicet in impositione poenitentiae: ac rursus in hoc Flentium gradu.

Audientium statio fuit in narthæce, seu Templi vestibulo, ubi cum Cathecumenis & infidelibus audiebant Psalmorum cantus, Scripturæ lectionem & Sermones Episcopi, quo per hæc ad veram poenitudinem disponderentur; Missæ autem Catechumenorum interesse non permittebantur.

Sub-



Substratis in ipso Templi ambitu a porta usque ad ambonem locus erat; hic inter gemitus & suspiria flectentes subiciebantur manuum impositioni, quam Episcopus cum Clero faciebat, orans simul pro illis, eisque benedicens: dum denique, peracta Catechumenorum Missa, ante Offertorium e Templo ejicerentur. Atque hic poenitentium gradus omnium erat laboriosissimus; in eo quippe plurima poenitentiae opera obeunda erant: unde etiam hujus gradus poenitentes potissimum absoluto Poenitentium nomine veniebant.

Consistentes demum intra ambonem & cancellos in Templo locum occupabant, ac integro Missae Sacrificio & reliquis communibus precibus intererant; a panis tamen & vini oblatione, ac etiam Eucharistiae participatione excludebantur, dum solemniter reconciliarentur. Jam vero

II. Uti universim toti poenitentiae sic & stationibus non<sup>142</sup> erat lege communi certum praefinitum tempus, ut constat ex Conc. Carthaginensi III. quod Can. 3. statuit: *ut poenitentibus, secundum peccatorum differentiam, Episcopi arbitrio poenitentiae tempora decernantur.* Inde non raro factum, ut alii uno, alii duobus, imo & pluribus annis in quavis statione detinerentur: aliquando autem ab una statione, praetermissa media, ad aliam transferrentur. Singulare severitatis exemplum est ex Basilio, qui in Ep. ad Amphilocho. Can. 76. de homicidae poenitentia ita decrevit: *Qui sua sponte interfecit, & post poenitentia ductus est, viginti annis Sacramento non communicabit. Viginti autem anni sic in eo dispensentur. Debet quatuor annis desere stans extra fores Oratorii, & fideles ingredientiés rogans, ut pro eo precentur, suam iniquitatem pronuntians. Post quatuor autem annos inter Auditores recipietur, & quinque annis cum ipsis egredietur. Septem annis cum iis, qui in Substratione orant, egredietur. In quatuor autem annis solum stabit cum fide-*  
K k k 2
libus,

*libus, sed non erit oblationis particeps; tum demum iis expletis, erit Sacramentorum particeps.*

- 143 III. Quodcumque interim hoc tempus fuerit, intra illud variis poenitentiae operibus vacandum erat. Præter peculiaris autem illas poenas, quæ singulis pro gravitate delicti ab Episcopo imponebantur, communes omnibus fuisse leguntur sequentes: Confessio publica; privatio Eucharistiæ; attonsis capitis & pullæ vestis ac cilicii gestatio; orationum, humiliationis, jejuniorum, & aliarum corporis afflictationum frequentatio; abstinencia a conviviiis & balneis; a Clero & Ordinibus in perpetuum exclusio. His imo in quibusdam Ecclesiis (præsertim Romana, Gallicana, & Africana) etiam aliæ adjugebantur poenæ: cum videlicet publice poenitentes a contrahendo matrimonio, aut jam conjugati ab ejus usu prohiberentur; arcerentur a militia seculari, quo magis Deo & Poenitentiae vacarent; agere Susceptores in Baptismo & Confirmatione vetarentur &c.

Atque hæc omnia, quæ de solemnibus hujus Poenitentiae Ritu dicta sunt, desumuntur ex sæpe laudatis Patribus, præsertim Cypriano, Gregorio, Basilio, Augustino, Innocentio I. Leone M. Gregorio Nysseno &c. item Conciliis Carthagenensi III. & IV. Arausicano I. Ancyrano, & aliis. Quorum ipsorum testimonia si attendantur, facile quisque conjiciet, non eandem fuisse semper & ubique (quod jam alias monui) Poenitentiae publicæ disciplinam: imo prorsus variam pro variis locis, circumstantiis, Ecclesiarum necessitate, & pro varia Episcoporum severitate aut indulgentia. Unde consequitur, de omni loco, & tempore non posse intelligi omnia, quæ antiqui Scriptores de solemnibus Poenitentia commemorant.

## §. III.

## §. III.

*Quo ritu sit impensa publice pœnitentibus solemnis reconciliatio?*

PŒnitentiam solemnem integre peractam sequebatur solemnis reconciliatio; cui ex veterum disciplina suus spectatum erat Minister, certumque præfinitum tempus, & peculiaris cæremonia: nec licebat eandem iterare. De his singulis nunc compendio dicendum habemus.

## De Ministro Reconciliationis &amp; tempore.

Quamvis urgente necessitate (hoc est, in articulo mortis)<sup>144</sup> Sacerdoti cuilibet fas fuerit publice pœnitentes reconciliare: regulariter attamen id a solo Episcopo præstabatur. Certe publica illa reconciliatio, quæ solemni ritu in Ecclesia fiebat, ita Episcopo fuit propria, ut a nemine alio, nisi forte ad id muneris peculiariter delegato unquam ministrari potuerit. 1. Cap. Sed nec tempus ejus erat arbitrium. In Ecclesia Romana ad id designatam fuisse Maj. hebdomadae V. constat ex Innocentii i. Ep. ad Decent. C. 7. Sacramentario Gregorii, & Ordine Rom. Eundem diem observatum in Gallia juxta præscriptum Conc. Cabillonensis Can. 47. item in Anglia, Germania, plurimisque Provinciis aliis docent Ordines Missalium, ab erud. Martene relati de ant. Eccl. discipl. C. 22. & passim Ritualia ac Pontificalia. Unde peculiare id erat Ecclesie Mediolanensi & Hispanicæ, quod Reconciliationem hanc in Parasceve Sabbati Sancti peragerent, ut ex S. Ambrosii Epist. 33. & Conc. Toletani IV. Can. 70. colligitur; quamquam & in hoc subinde variaverint.

## De Reconciliationis Cæremonia.

145 **S**olemnis hujus Reconciliationis ritus copiose describitur in Not. & Obsery. à Cl. Menardo factis ad Sacramentarium Gregorii Magni; item apud Cl. Martene L. 1. de ant. Eccl. Rit. C. 6. Art. 5. ac rursus apud eundem in Tract. de ant. Eccl. discipl. C. 22. §. 2. in compluribus Ordinibus de reconcil. Pœnit. Nos præcipua duntaxat ejus capita referemus ex Clementis VIII. Pontificali Romano, & quidem retentis, quoad licet ejusdem verbis. Juxta hoc igitur Tit. de Reconcil. Pœnit. in Feria V. Cænæ Domini.

I. Pontifice cum Clero coram altari Psalmos, Pœnit. & Litanias recitante, Pœnitentes ante fores Ecclesiæ nudis pedibus ad terram prostrati manent, tenentes in manibus cereos extinctos. Sub Litiis ipsis ad verba, *Omnes SS. Patriarchæ, &c. item Omnes SS. Martyres &c.* duo Subdiaconi cereos accensos deferentes egrediuntur ad Pœnitentes, ac primum dicunt: *Vivo ego, dicit Dominus: nolo mortem &c.* vice altera autem: *Dicit Dominus: Pœnitentiam agite, appropinquavit enim Regnum Cælorum;* hisque dictis extinguunt cereos, & revertuntur. Rursus ante verba, *Agnus Dei &c.* egreditur Diaconus cum majore cereo accenso, & in ostio Templi ad Pœnitentes conversus canit antiphonam: *Levate capita vestra: ecce appropinquabit redemptio vestra.* Tum ex Diaconi cereo accenduntur pœnitentium candelæ, Diaconoque cum illuminato cereo revertente dicitur: *Agnus Dei &c.*

II. Litiis terminatis, Episcopo in baldistorio considenti Archidiaconus ab ostio Templi præsentat & commendat Pœnitentes; quos subinde cum toto Clero accedens Episcopus primum exhortatur de divina clementia, de veniæ promissione &c. dein finito sermone canit antiphonam:

*Ve*

*Venite, venite filii &c.* Mox pœnitentes ostium Ecclesiæ ingressi prosternuntur ad pedes Episcopi, nec multo post ab eodem deducuntur in Ecclesiam, Archipresbytero interim nomine pœnitentium dicente: *iniquitates meas ego cognosco &c.* Episcopo autem concludente: *Dico vobis, gaudium est Angelis Dei super uno peccatore pœnitentiam agente.*

III. Ad medium Ecclesiæ deducti pœnitentes flectunt continuo genua, Episcopus vero ad illos conversus inchoat antiphonam: *Oportet te fili gaudere, quia frater tuus mortuus fuerat, & revixit, &c.* recitatisque dein Psalmis quibusdam & Orationibus compluribus, aspergit eos aqua lustrali, & incensat dicens: *exurgite qui dormitis, exurgite a mortuis, & illuminabit vos Christus.* Postremum, data singulis indulgentia, omnes simul solemni absolute recondiliat, & elevatis manibus benedicit. In quibusdam præterea Missalium Ordinibus a Cl. Martene relatis legitur, Episcopum singulis reconciliatis manum imposuisse, ac etiam pacis osculum dedisse cum dicto: *Pax tecum.*

IV. Peracta solemni hac cæremonia crines, & barbam, quam durante Pœnitentia nutrire moris erat, deposuerunt reconciliati: sacco item & cilicio dimisso, cultioribus & mundioribus vestibus induti sunt; quin etiam in quibusdam Ecclesiis hoc die apud Episcopum lautior cæna excipiebantur, ut notat Martene ex antiquo Pontificali Ecclesiæ Pictaviensis.

### De non iterata Reconciliatione.

I. **Q**UO Pœnitentiam publicam consecuta solemnis reconciliatio certius foret ad fideles in officio Christiano continendos remedium, semel duntaxat eidem in vita concedebatur. Inde Ambrosius L. 2. de Pœnit. C. 10. *sicut unum*

unum Baptisma, inquit, ita una Pœnitentia, quæ tamen publice agitur; & Augustin. Ep. 153. alias 54. caute, salubriterque provisum est, ut locus illius humillime semel in Ecclesia concedatur: ne medicina vilis minus utilis esset ægrotis, quæ tanto magis salubris est, quanto minus contemptibilis fuerit. Idem colligitur ex Origenis Hom. 15. in Levit. Tertulliani L. de Pœn. C. 5. & Siricii Ep. mox laudanda.

- 147 II. Quid igitur (inquires) de illis factum, quos post solemnem Pœnitentiam, & reconciliationem in grave aliquod publicum & canonicum delictum prolabi contigit? nullumne illis amplius salutis supererat remedium? Absit, ut eorum assentiar opinioni, qui de relapsis ejusmodi conclamatum putabant. Sane Augustin. in paulo ante cit. Ep. privatam relapsorum pœnitentiam commemorans, quis nostrum, inquit, ita desipit, ut huic homini dicat, nihil tibi ista proderunt in posterum? Ac nos jam antea Dissert. III. §. II. comprobavimus, nullum unquam in Ecclesia peccatum esse visum ejusmodi, quod Pœnitentia elui non posset. Hoc igitur etiam relapsus peccatum secreta pœnitentia & absolutione sacramentali expiabatur; quin ejusdem reis permisum, ut communibus orationibus & sacrificio cum fidelibus reliquis interessent: solumque excludebantur a participatione Eucharistiæ, quæ illis non nisi in articulo mortis concedebatur. Præclarum in hanc rem est testimonium ex Siricii Papæ Epist. ad Himerium Taracon. Ep. cui, quid de hujusmodi relapsis agendum sit? quærenti ita respondet: *Quia jam suffragium non habent (publice) pœnitendi, id duximus decernendum, ut sola intra Ecclesiam fidelibus oratione jungantur, sacra Mysteriorum celebritati (quamvis non mereantur) intersint; a Dominicæ autem mensæ convivio segregentur: ut, hac saltem districtione correpti, & ipsi in se*  
sua

*sua errata castigant, & aliis exemplum tribuant, quatenus ab obscenis cupiditatibus retrahantur. Quibus tamen (quoniam carnali fragilitate ceciderunt) Viatici munere, cum ad Dominum caperint proficisci, per communionis gratiam volumus subveniri.*

## §. IV.

*Quæ sit moderna Ecclesiæ disciplina in administrando Pœnitentiæ Sacramento?*

**P**Ræter ea, quæ ad Sacramenti hujus substantiam pertinere per decursum L. copiose indicavimus, notandi sunt accidentales Ritus, tam Latinis quam Græcis hodie etiam ex Ritualium præscripto usitati: communis item utrique Ecclesiæ disciplina circa Pœnitentiam publicam.

### Ritus Pœnit. Sacramenti apud Latinos.

**R**itus hi non aliunde innotescunt certius, atque ex Rituali Romano jussu Pauli V. edito; in hoc autem Tit. de Ord. ministr. Sacram. Pœnit. alia ex parte Ministri, alia ex parte Pœnitentis præscribuntur, quæ ipsa totidem verbis referemus. Et quidem

I. Quod ad Ministrum attinet, laud. Rituale requirit primum: ut in Ecclesia, non autem in privatis ædibus Confessiones audiat, nisi ex causa rationabili; quæ cum incidit, studeat tamen id decenti & patenti loco præstare. Hoc ipsum jam antea constitutum legitur in pluribus Conciliis, Sec. XIII. celebratis, scilicet Biterensi Can. 46. Nemaufensi Can. 51. & Colonienfi Can. 8. ubi simul excommunicationis poenam intentat contrarium facienti.

R. P. Muszka Tom. II. de Sacram.

LII

Al-

Alterum est: ut habeat in Ecclesia sedem Confessionalem, in qua sacras Confessiones excipiat; quæ sedes patenti, conspicua, & apto Ecclesiæ loco posita, cratæ perforata inter pœnitentem & Sacerdotem sit instructa. Concilium Avenense An. 1585. præterea voluit a parte Confessarii esse velum nigri coloris, ne a pœnitentibus videri posset: appensas item in sede confessionali tabellas casuum reservatorum, & Christi e cruce pendentis effigiem. Universim vero sedentis situm esse oportere Confessarii, tum requisita Confessionalis sedes satis indicat: tum etiam ipsum Judicis ministerium & auctoritas postulat.

Tertium: ut superpelliceo, & Stola violacei coloris utatur, prout tempus, vel locorum seret consuetudo. Idem præscribunt Concilia Mediolanensis S. Caroli Borromæi, Rituale Ecclesiæ Bononiensis, Mechliniensis &c. In quibusdam Ecclesiis Stola duntaxat utuntur Confessarii; ut nominatim Romæ Regulares, &c.

Postremo de Absolutionis forma hæc habet: cum pœnitentem absolvere volueris, - - primo dicit: Misereatur tui &c. deinde dextra versus pœnitentem elevata: Indulgentiam &c. Dominus N. J. C. te absolvat &c. Passio Domini N. J. Christi, &c. In Confessionibus autem frequentioribus & brevioribus omitti potest: Misereatur &c. satis erit dicere: Dominus N. J. C. te &c. usque ad illud Passio Domini &c. Urgente vero aliqua necessitate gravi in periculo mortis breviter dicere poterit: Ego te absolvo ab omnibus censuris & peccatis, in nomine Patris, & Filii &c. In quibusdam ad hæc particularium Ecclesiarum Ritualibus post absolutionem dicendum præscribitur Vade, & jam amplius noli peccare; vel, Ecce sanus factus es, jam noli peccare &c. vel saltém, Vade in pace.

Atque his partem maximam consentit Ecclesiæ hujus Viennensis Rituale An. 1730. editum, in quo Tit. de Sacr.

Pœ-



Pœnit. hæc legere est: *Sacerdos Confessiones audieturus, tanquam Iudex sedeat indutus superpelliceo & stola, idque in aperto loco; unde si tenebræ sint, etiam lumen habeat apud se ad tollendam omnem suspicionem.* Ea deinde, quæ ad formam absolutionis pertinent, plane conformiter ad Rituale Romanum præscribit. Ac omnino Rituale hoc Rom. regulariter norma esse debet omnibus in administrando Pœnit. Sacramento. Regulariter inquam; sicubi enim aliqua in desuetudinem abierunt, aut forte nunquam in usu fuerint, licebit se mori ibidem recepto accomodare: modo tamen ædificationis & decentiæ ratio semper habeatur.

II. De Pœnitente idem Rituale hæc solum notat: *149 ut, qua decet humilitate mentis & habitus, accedat; flexis genibus signo crucis se muniat; - - Confessionem generalem dicat, scilicet, Confiteor &c. vel saltem utatur his verbis: Confiteor Deo Omnipotenti, & tibi Pater.*

Ad hanc porro, quam in suo Rituali Paulus V. requirit, habitus humilitatem pertinet: ne pœnitens, cum se pro sacro tribunali sistit, arma aut baculum deferat, quod jam in Ordine Rom. vetitum, usuque ipso roboratum est. S. Carolus Borom. in Instruât. Confess. C. 2. præterea monet: ne confitentes utantur lascivo capillorum ornatu, aut palliis intextis auro; qu' in ibid. prohibet audire mulieres cerussatas & fucatas, quod ipsum statuerunt plures Synodi a Franc. Genetto in Theol. Mor. Tract. 6. C. 9. collectæ. Id universim a seculis jam compluribus, contra veterum morem, apud Latinos receptum novimus: ut pœnitentes flexis genibus non modo absolutionem excipiant, sed ipsa etiam peccata Sacerdoti enuntient. Indicatur istud in laud. Rituali; expressius autem præscribitur passim in Ritualibus particularium Ecclesiarum, ac nominatim in supra laud. Rituali Vienne'si, ubi hæc habentur: *Confessurus autem Sacerdotem ac-*

*cedens utrumque genu coram eo, tanquam Christi Vicario, flectat, - - & primum benedictionem petat.*

### Ritus ejusdem Sacramenti apud Græcos.

150 **Q**Uamvis eodem cum Latinis quoad substantiam ritu Poenit. Sacramentum ministrent Græci: ex veteri nihilominus disciplina hodie etiam retinent quædam peculiaria, ac a more Latinorum diversa.

Cum primis certe poenitentes totam sui accusationem pone Sacerdote.n confidendo perficiunt, ut testatur Leo Allatius L. 3. Consens. Eccl. Occid. & Orient. C. 9. & ex eo Auctor Perp. Fid. Tom. 5. L. 3. C. 9. ubi simul ex Abrahamo Echellenfi addit, Maronitas, ac reliquos fere Orientales quoad situm variare: alios videlicet eorum confiteri sedentes, stantes ac erectos alios, quosdam etiam genibus nixos. In ipsa dein absolutione sacramentali illud peculiare habent, quod eam ut plurimum deprecatione permisceant, eidemque ad veterum morem complures alias adjiciant orationes; atque id partem maximam Orientali Ecclesiæ cum Græcis commune est, ut docent Euchologia & LL. Poenitentiales. Sed cum primis in satisfactionis rigore Græci & plerique Orientales a nobis dissident: neque enim apud eos arbitrio Sacerdotis injungenda poenitentia permittitur, verum ad veteres Poenitentiales Canones illam exigere necesse habent. In eam rem Antoine in Theol. Mor. Traët. de Poenit. in Append. de Orient. Eccl. discipl. §. 1. complura testimonia refert ex Leone Allatio, Simeone Thessalon. Germano Amathuntis Episcopo, Neophyto Rodino Cyprio &c. Singulare est, quod ibid. de Græcis recitat his Goarii verbis: *publica poenitentia nulli licet amplius imponatur, aliquos tamen Confessione expiatis a sacra Communionem per annum vel plures quandoque arcenit.* Hi

non

*non ita plene reconciliati privationem Eucharistiæ panis Eulogici sumptione solantur : & Sanguinis Domini sumendi loco aquam in Theophaniis benedictam, Diacono eam porrigente, Communionis diebus - - summa cum religione hauriunt.*

### Communis utrique Ecclesiæ disciplina circa Pœnitentiam publicam.

**P**œnitentiam publicam, prout illa olim solemnitate statu-  
num, hisque nominatim attributa satisfactionis opera com-  
plectebatur, in tota Ecclesia jam dudum abrogatam alias me-  
minimus. Istud interim non prohibet, quo minus ex hodierna  
etiam utriusque Ecclesiæ disciplina publici peccatores publica  
pœnitentia (tametsi non perinde, ut vetus erat, quoad  
omnia solemniter) castigari possint, imo etiam quandoque debeant.  
Et quidem

I. De Græcis ac Orientalibus reliquis istud vel indecer-  
tum est: quod hodie etiam in sacro Pœnitentiæ tribunali satisfactionem imponant secundum Canones Pœnitentiales; horum quippe complures pro peccatis quibusdam præscribunt publicæ pœnitentiæ opera, ut sunt: a sacra Communione in plures annos segregari, in pane & aqua diu ac continuo jejunare, Missarum solemniter stantem & sine pallio vel calceamentis interesse, funem sub divinis Officiis de collo suspensum gestare &c. Imo Auct. Petp. Fidei Tom. 5. L. 3. C. 7. contendit, apud Orientales nonnullos manifestiora etiam veteris pœnitentiæ publicæ remansisse vestigia. In hanc rem porro recitat quosdam Canones, quorum unus ex MSS. Collect. Can. Arab. Bibliothecæ Reg. Colb. sic habet: *qui occiderit Christianum, præter alias pœnitentias, primo anno non ingreditur Ecclesiam, sed prostratus in terram (ante fores) destabit peccata; alter vero de parricidis: uno anno manebunt ad*

*portam Ecclesie, nec deinceps nisi posticam portam ingredientur. Ex Barsalibii autem Collect. Canonum Syriac. de apostatis hunc Can. refert: quadraginta diebus ad portam Ecclesie deplorabunt peccata, seque ingredientium & egredientium precibus commendabunt, & sub Officio divino gestabunt manu cereum accensum.*

- 132 II. Eadem apud Latinos quoad poenitentiam publicam disciplina in dubium vocari non potest. Certe Trident. Sess. 24. de Reform. Cap. 8. commemorato Apostoli monito de publice peccantibus palam corrigendis, ita statuit: *quando igitur ab aliquo publice & in multorum conspectu crimen commissum fuerit, unde alios scandalo offensos, commotosque fuisse, non sit dubitandum: huic condignam pro modo culpæ poenitentiam publice injungi oportet; - - Episcopus tamen publicæ hoc poenitentiae genus in aliud secretum poterit commutare, quando ita magis judicaverit expedire.* His consentit Rituale Rom. Tit. de Sacr. Poenit. passim item Synodorum Provincialium statuta. Peculiari hic dignus est memoria S. Carolus Borom. ut qui in tribus Synodis, videlicet I. III. & V. repetito decreto sanxit, ut juxta Tridentini præscriptum publice peccantibus publica poenitentia imponeretur. Id ipsum etiam in sua pro Confessar. Instruct. commendat, districtim Parocho præcipiens: *neminem peccatis publicis irretitum ad Communionem excipiet, nisi prius scandalo publico satisfecerit, etiam si absolutionis a Poenitentiariis, aut Confessoribus etiam Regularibus, acceptæ testimonium protulerit &c.* Quin in Synodo III. speciatim constituit: publicam correctionem promeritos Episcopo per Parochum deferri oportere ante Quadragesimæ initium, *ut primum ineunte Quadragesima illi poenitentia affici, tum die Cænæ Domini Ecclesie reconciliari possint solemniter ritu.* Atque istud omnino in usum revocari posse ab Episcopis dubitari nequit vel ideo, quod in Pontificali Rom. Clementis VIII. & Urbani

bani VIII. nominatim præscribatur Ritus tam imponendæ poenitentiae publicæ a Feria IV. Cinerum, quam etiam. solemnæ reconciliationis Feria V. Cænæ Domini. Ad hanc ipsam denique comprobandam disciplinam pertinet nunc quoque usitatus solemniter excommunicandi & absolvendi Ritus, cujus Ordo describitur in laud. Pontificali Romano.

## LIBER VI.

### *De Extrema Unctione.*

**P**oenitentiam sequitur Sacramentum Extremæ Unctionis, seu illius consummativum ; quod explanaturi differemus I. de ejus Existencia, Institutione & Natura. II. de Effectibus & Necessitate. III. de Ministro & Subiecto. IV. de Cæremoniis. Præcipua totius doctrinæ huc pertinentis capita continentur his, quæ jam subjecimus, Conciliorum Decretis.

### CANONES CONCILII TRIDENTINI.

*Ex Sess. XIV. de Sacramento Extremæ Unctionis.*

I. **S**I quis dixerit, Extremam Unctionem non esse vere, & proprie Sacramentum a Christo Domino nostro institutum, & a beato Jacobo Apostolo promulgatum; sed ritum tantum acceptum a Patribus, aut figmentum humanum; anathema sit.

II.

II. Si quis dixerit Sacram infirmorum Unctionem non conferre gratiam, nec remittere peccata, nec alleviare infirmos; sed jam cessasse, quasi olim tantum fuerit gratia curationum; anathema sit.

III. Si quis dixerit, Extremæ Unctionis ritum & usum, quem observat sancta Romana Ecclesia, repugnare sententiæ beati Jacobi Apostoli, ideoque eum mutandum, posseque a Christianis absque peccato contemni; anathema sit.

IV. Si quis dixerit Presbyteros Ecclesiæ, quos beatus Jacobus adducendos esse ad infirmum inungendum hortatur, non esse Sacerdotes ab Episcopo ordinatos, sed ætate Seniores in quavis communitate; ob idque proprium extremæ Unctionis ministrum non esse solum Sacerdotem; anathema sit.

## DECRETA ALIORUM CONCILIORUM.

**C**oncil. Constantiense Sess. 15. approbavit Decretum Martini V. constituentis: ab eo, qui de hæresi suspectus fuerit, præter cætera quærendum: an credat, quod Christianus contemnens susceptionem Sacramentorum Confirmationis, vel Extremæ Unctionis, peccet mortaliter?

*Florentinum in Decr. Eugenii IV. pro Instrucl. Armen. §. de Extr. Unct.* Quantum Sacramentum est Extrema Unctio, cujus materia est oleum olivæ per Episcopum benedictum. Hoc Sacramentum nisi infirmo, de cujus morte timetur, dari non debet; qui in his locis ungendus est: in oculis propter visum, in auribus propter auditum, in naribus propter odoratum, in ore propter gustum vel locutionem, in manibus propter tactum, in pedibus propter gressum, in renibus propter delectationem ibidem vigentem.

*Idem*

*Idem in eodem Decr.* Forma hujus Sacramenti est hæc : Per istam unctionem, & suam piissimam misericordiam indulgeat tibi Dominus, quidquid per visum &c. & similiter in aliis membris.

*Idem ibidem* Minister hujus Sacramenti est Sacerdos: effectus vero est mentis sanatio, & in quantum autem expedit, ipsius etiam corporis. *Demum concludit his verbis:* De hoc Sacramento inquit B. Jacobus Apostolus: Infirmatur quis in vobis? inducat Presbyteros.

*Propositiones, quæ in hac materia a summis Pontificibus damnata forent, occurrunt nulla.*

## DISSERTATIO I.

### DE EXISTENTIA, INSTITUTIONE, ET NATURA SACRAM. EXTREMÆ UNCTIONIS.

#### §. I.

*Quid Extremæ Unctionis nomine veniat? & an ea sit verum Legis novæ Sacramentum ab ipso Christo institutum?*

**E**xtrema Unctio sic dicta, quod in extremo vitæ periculo conferatur, sitque etiam inter sacras unctiones in Ecclesia usitata ordine postrema, teste Tridentino Sess. 14. in Doctr. de Sacr. Extr. Unct. est Sacramentum ejusmodi, quod non modo Pœnitentiæ, sed & totius Christianæ vitæ, quæ perpetua pœnitentia esse debet, consumativum Patres existimarunt. At diversum ab his Sectarii nonnulli (quos principio statim no-

R. P. Muzka Tom. II. de Sacr.

M m m

mina-

minabimus) sentiunt, cum Extremam Unctionem e Sacramentorum numero expungendam contendunt; qui quidem error nobis ante omnia convellendus erit, quæ deinde ad explananda reliqua præsentis doctrinæ capita expeditior sit via. Ac ne putent variantes DD. orthodoxorum de institutione hujus Sacramenti opiniones sibi patrocinari, eas quoque fide integra referemus, adjecto hos inter & illos discrimine.

### Sectariorum error de Sacramenti Extr. Unct. existentia.

I. **Q**ui e Sectariis primi Extremæ Unct. Sacramentum negaverint, non est primum statuere. Bellarminus L. un. de Extr. Unct. C. I. putat agmen hoc infaustum duxisse Waldenses Sec. XII. secutos dein Albigenes Sec. XIII. tum Wicleffum Sec. XIV. nonnulli Hussitas pro Sec. XV. addunt. Verum inficiatur istud erud. Bossuet Ep. Melden. in Histor. Variat. quem e RR. plurimi sequuntur. Nimirum (ut isti arguunt) Waldenses in Profess. Fid. Uladislao Hung. & Bohem. Regi oblata septem Sacramenta confessi sunt; Albigenes errores damnavit Conc. Lateranense IV. nec tamen hujus nominatim meminit; Wicleffi & Joannis Hufs errores pariter damnantur & recensentur in Conc. Constantiensi, quin tamen fiat mentio erroris, de quo agimus. Inde haud abs re existimari potest, errorem horum ad ritum duntaxat hujus Sacramenti, ejusque contemptum pertinuisse. Certe Innocentius III. L. I. Ep. 78. a Waldensibus ad gremium Ecclesiæ redeuntibus hanc solum fidei professionem requisivit: *Unctionem infirmorum cum oleo consecrato veneramur.* Et Concil. Constantiense Sess. ult. Wicleffitas & Hussitas ad Ecclesiam revertentes interrogari voluit: *an credant, quod Christianus contemnens susceptionem Sacramentorum Confirmationis vel Extremæ Unctio-*



*Unctionis* - peccet mortaliter ? Quæ quidem non leve argumentum præbent id, quod asserimus, opinandi : præsertim cum constet quosdam Seculi XIII. Presbyteros abusibus suis occasionem dedisse hujus contemptus ; cum videlicet divites tantum sacro oleo ungerent, nec nisi pretio, & luminaribus decem elucentibus, ut legere est in Statutis Synodali-  
bus An. 1294. Guilielmi Ep. Andegav. ubi morem hunc infestatur. Quia interim gravis quoque est auctoritas eorum, quibus nititur Bellarminus, forte non incongrue dixerim ; memoratos Sectarios doctrinam suam subinde variasse, aut quandoque dolo vel metu texisse, ac etiam ad speciem negasse. Utut attamen istud se habeat ;

II. Lutherum & Calvinum, quibus vel umbras errorum veterum captare libuit, apertis verbis negasse Extr. Unctionis Sacramentum, dubitari nequit. Lutherus certe L. de Capt. Babil. C. de Extr. Unct. docet, unctionem a Marco & Jacobo memoratam corporis duntaxat salutem contulisse, eandemque, cessante in Ecclesia miraculorum dono, exolevisse ; quin nec unquam nisi latiore sensu Sacramenti nomine compellendam, ad eum videlicet fere modum, ut sunt *salis & aquæ consecratio & aspersio*. Audacior Calvinus L. 4. Inst. C. 19. *scilicet*, inquit, *Sacramentum est Extrema unctio, histrionica hypocrisis, quam citra rationem & sine fructu ad Apostolos referre volunt*. Hos secuti sunt Kemnitius, Melancton, Brentius & Bellarmino citati : hodieque sequuntur universim Lutherani & Calviniani. Opinione videlicet eorum non alia fuit in Apostolis potestas, quam *ordinaria*, seu *potestas verbi* in annuntiando Evangelio sita : *extraordinaria* item, seu *virtus miraculorum*, ad quam referunt Unctionem ; hanc jam vero penitus in Ecclesia desuisse ajunt, sola potestate priore remanente. Atque hi sunt errores illi, quos compendio describit Trident. Sess. 14. de Extr. Unct. Cap. 3.

Variantes Orthodoxorum de Extr. Unctionis  
institutione opiniones.

3 I. **C**OMMUNIS DD. orthodoxorum est sententia, Extremam Unctionem ab ipso immediate Christo fuisse institutam: & quidem nominatim (ut plures volunt) post Resurrectionem, tum videlicet, cum Joan. 20. peccata remittendi & retinendi potestatem Apostolis contulit. Diversum interim, fateor, ab his veteres quidam opinati sunt. Magister sent. L. 4. dist. 23. institutionem hujus Sacramenti ad Apostolos refert: quod ipsum facit S. Bonaventura in eamd. dist. ac jam ante illos docuit Hugo a S. Victore. Ex iis etiam, qui Sacramenti hujus auctorem solum Christum dicunt, nonnulli existimant, institutum illud fuisse Marci 6. cum videlicet Christus ante mortem suam Apostolis potestatem daret ungendi & sanandi infirmos; pro qua sententia laudantur Victor Antioch. Beda, Theophylactus, & Oecumenius in Cap. 6. Marci commentantes: quibus ætate etiam nostra aliqui e Theologis accedunt cum Maldonato.

4 II. Atque hæc sunt illæ DD. orthodoxorum opiniones, quas in causæ suæ patrocinium appellant Novatores. At quo suo commodo? nullo sane, quod vel ipsos fateri oporteat, si laud. Auctorum Commentarios inspiciant, eorumque doctrinam attendant. Ac eos quidem, qui in solò institutionis tempore variant, nihil omnino cum Novatoribus commune habere certum est; cum aperte fateantur Sacramentum hoc dari, ejusque auctorem esse ipsum Christum: de institutionis autem tempore nihildum sit ab Ecclesia pronunciatum. Sed nec opinione priorum se tueri possunt: dum enim hi asserunt Extremam Unctionem, non a Christo, sed ab Apostolis institutam, intelligunt solum institutionem immediatam, non autem mediatam; agnoscunt quippe Apostolos istud egisse ex insin-

instinctu Spiritus sancti, & potestate a Christo accepta: fassentur proinde Sacramentum hoc a Christo saltem mediate institutum, contra quam opinionem pariter Ecclesia nondum decretorio suo judicio quidquam constituit. Quid jam vero in his omnibus, quod partium suarum esse velint, aut dicere possint Novatores? quando ipsi ex adverso, non institutionis tempus aut modum, sed institutionem ipsam, quæ ad Sacramenti rationem sufficiat, in controversiam vocant: imo aperte inficiantur Extr. Unctionem esse Sacramentum; id quod erroneum esse, nec minus S. Literis ac orthodoxæ doctrinæ adversari mox comprobabimus, præmissa prius ex sensu Ecclesiæ Extremæ Unctionis definitione.

### Definitio Extremæ Unctionis.

**E**Xtrema Unctio est Sacramentum a Christo institutum, quo Sacerdotis ministerio per unctionem olei & orationem baptizatis ægrotantibus confertur gratia sanctificans cum auxiliis peccati reliquias abstergentibus, confortantibusque animam adversus morbi molestias: quandoque etiam peccatorum remissio: imo & a corporis infirmitate liberatio, si id anima expediat.

Definitione hac, aut verius descriptione conformiter ad mentem Concilii Trident. exponuntur omnia, quæ Extr. Unctionis Sacramento sunt propria: ejus videlicet institutio, materia, forma, Minister, subjectum, & effectuum varietas; de quibus deinceps speciatim differendum erit. Atque ad hæc indubie respexerunt veteres tam Latini quam Græci, cum Sacramentum hoc variis designarent nominibus, nunc videlicet ab ejusdem materia vel forma, ab utraque nonnunquam, vel etiam effectū, aut subjecto petitis. Ita apud Latinos sæpe dicitur: *Unctio sacra olei, sacra unctio, extrema unctio, Sacramentum exeuntium*, ut legere est in L. Pœnitentiali Theo-

dori Archiep. Cantuar. Decreto Ivonis, & alibi; apud Græcos autem, præsertim in eorum Euchologiis, Arcudium, Allatium, Protosyncellum, & alios: ἅγιον ἔλαιον *sanctum oleum*, εὐσχήλαιον *oratio cum oleo*, ὑστέρα χρίσις *postrema unctio*. Sed jam de ipsa Sacramenti nunc definiti veritate & institutione pronuntiandum est. Sit itaque

## ASSERTIO I.

*Extrema Unctio est verum & proprie dictum novæ Legis Sacramentum.*

6 **A**rgumentum I. petitur ex Scriptura, illis videlicet Jacobi verbis in ejusd. Ep. C. 5. *infirmatur quis in vobis? inducat Presbyteros Ecclesiæ, & orent super eum, ungentes eum oleo in nomine Domini; & oratio fidei salvabit infirmum, & alleviabit eum Dominus, & si in peccatis sit, remittentur ei.*

Ex his jam quid ni ita invicte arguam? Vel per ipsos Novatores omne id est verum Legis novæ Sacramentum, quod constat ritu aliquo sensibili, institutione Christi, promissione gratiæ, mandato demum de hoc ritu observando; quid vero horum, attentis Jacobi verbis, desideres in Extrema Unctione a nobis definita? Certe unctio olei & oratio sunt ritus sensibilis, isque a Christo institutus, ut Assert. II. probabitur. Porro gratiæ promissio primum indicatur illo, *alleviabit eum Dominus*, scilicet per gratiam, qua æger adjutus contra timorem mortis & conscientiæ stimulos in Deo fiduciam collocet, & morbi incommoda levius ferat; item apertissime his verbis, *si in peccatis fuerit, remittentur ei*: neque enim peccati remissio fit sine gratia. Denique mandatum divinum satis prodit laud. Capitis ex Ep. Jacobi contextus: totus quippe hic loci in eo est Apostolus, ut doceat fide-

fideles, quid eos in variis eventis agere oporteat. *Tristatur*, inquit, *aliquis vestrum?* oret; - - *infirmatur quis in vobis?* inducat Presbyteros &c. *confitemini ergo alterutrum peccata vestra, & orate pro invicem, ut salvemini.* Quibus quidem verbis id saltem innuit, Unctionem hanc in remedium fidelium constanter esse in Ecclesia retinendam, uti re ipsa usque huc retenta est. Quid quod Unctionis hujus adeo utilis, imo non raro necessariae, potestatem in Presbyteris otiosam esse utique Christus non voluerit? quidquid de eo sit, an mandato hoc fideles ipsi ad percipiendum Extremæ Unct. Sacramentum stringantur, de quo speciatim statuemus Dissert. II. §. II.

Argumentum II. est ex Traditione, pro qua ex Patri-  
bus primum nominandi sunt Origenes & Chrysostomus. Hic  
nimirum L. 3. de Sacerdotio, ille vero Hom. 2. in Levitic.  
post Sacram. Pœnitentiæ continuo commemorant Ritus un-  
ctionis, eique pro effectu remissionem peccatorum attribuunt,  
recitatis in eam rem Jacobi verbis, *infirmatur quis &c.* Con-  
jungitur autem ab utroque Pœnitentia cum Unctione infir-  
morum, non quod unum idemque putaverint esse Sacramen-  
tum: verum quia hæc illius consumativa est, ac propterea a  
Græcis duo hæc Sacramenta simul conferri solent.

Sed enim ex his Patribus citata loca minus convincentia  
videri possunt; audiatur itaque Innocentius I. prorsus aper-  
te in rem nostram loquens in Epist. ad Decentium Ep. Eugu-  
bin. cui post relata Jacobi verba, *infirmatur quis &c.* ita ad  
propositas quæstiones respondet. *Quod non est dubium, de*  
*fidelibus ægrotantibus accipi vel intelligi* (verba scilicet illa Jaco-  
bi) *debere, qui sacro oleo chrysmatis perungi possunt; quo, ab*  
*Episcopo confecto, non solum Sacerdotibus, sed omnibus uti*  
*Christianis licet in sua aut suorum necessitate inungendo.* Cæterum  
illud superfluum videmus adjectum, *ut de Episcopo ambigatur,*  
quod

*quod Presbyteris licere non dubium est; nam idcirco de Presbyteris dictum est, quia Episcopi aliis occupationibus impediti ad omnes languidos ire non possunt. Caterum si Episcopus aut potest, aut dignum ducit aliquem a se visitandum & benedicere, & tangere chrismate, sine cunctatione potest, cujus est ipsum chrisma conficere. Nam pœnitentibus (publicis) istud infundi non potest, quia genus est Sacramenti; nam quibus reliqua Sacramenta negantur, quomodo unum genus putatur posse concedi?*

Ex hoc sane Responso clare elucet: ætate Innocentii I. & Decentii, qui sub finem Seculi IV.\* & initium Sec. V. floruerunt, pro certo habitum, Extremam Unct. esse verum Sacramentum; jam tum quippe controversiæ quædam enatæ sunt ad usum ejus, Ministrum, & Subjectum pertinentes, quas Decentius ad sedem Apostolicam detulit. Ad has vero Innocentius singillatim respondens, ita demum (quod ad rem præsentem cumprimis facit) concludit: sacram Unctionem non esse adhibendam pœnitentibus publicis nondum reconciliatis, quia est species eorum Sacramentorum, quæ non conferuntur id genus pœnitentibus. Ubi nomine Sacramenti verum & proprie tale intelligit: non autem late duntaxat sumptum, uti sunt sacramentalia, seu sacræ quædam cæremoniæ ab Ecclesia institutæ & usurpatæ; nam Sacramenta hujusmodi late sumpta nunquam negabantur his pœnitentibus, cum constet fuisse conspersos cinere benedicto, manuum impositioni subjectos &c. solis autem Sacramentis proprie dictis privabantur. Quod Innocentii testimonium eo est firmitus, quod Epistola hæc sit certa, nec ullus unquam veterum doctrinam in ea contentam reprehenderit; imo universim auctor hic inter sanctos & doctos Pontifices numeretur, ab ipsis etiam Augustino, Hieronymo, & Chrysostomo multum commendatus.

At

At inquires: in hac Ep. Pontifex agit de *oleo chrismatis*, cum tamen infirmorum oleum sit simplex, non chrisma; hoc item oleo ait ipsos fideles uti posse in sua aut suorum necessitate, cum interim Unctio, de qua est sermo, a Presbyteris ministrari debeat; hoc igitur loco non agitur de Extremæ Unctionis Sacramento. Ita equidem argutantur Novatores, at frustra. Etenim in veterum Scriptis non raro legere est, chrisma generatim sumi pro oleo quolibet sacro, ut patet vel ex Cypriani Ep. 70. ad Januar. & ex Augustini Tract. 33. in Joan. ubi generatim oleum olivarum vocat *unguentum* & *chrisma*. Licitum deinde fuit fidelibus etiam laicis ad curandos morbos oleo per Episcopum benedicto se ipsos inungere, ad eum videlicet modum, quo iidem aqua baptismali in eundem finem utebantur; at utrumque istud fuit sacramentale duntaxat, non vero Sacramentum.

Quod jam vero ad testimonia reliqua Traditionem hanc confirmantia attinet: hanc ipsam, quam tuemur, doctrinam legere est apud Augustinum in *Speculo*, uti & ejusdem (vel ut alii volunt S. Cæsarii, qui sub finem Sec. V. floruit) Serm. 215. de Tempore; item apud Gregorium M. in Sacramentario, ubi simul describit Ritum Extremæ Unctionis; demum apud jam supra cit. Bedam, Innocentium III. Bonaventuram, & alios. Huc faciunt etiam tria Concilia Sec. IX. celebrata, nempe Cabilonense II. Can. 48. Aquisgranense Can. 5. Regaticinum Can. 8. quibus addenda tria œcumenica pro fronte L. hujus cit. Constantiense, Florentinum, & Tridentinum. Demum hanc ipsam Traditionem confirmat Græcorum cum Latinis in eandem de Sacramento Extr. Unctionis doctrinam consensio, pro qua copiosis testimoniis pugnat Aust. Perp. Fid. Tom. 5. L. 5. C. 1. Ac si reliqua desint, vel illud eam evincit: quod, cum in Concilio Lugdunensi II. & Florentino ageretur de unione Græcorum, nulla unquam sit facta quæ-

ratio de hujus Sacramenti veritate; quodque Confessionem Augustanam, in qua Extr. Unctio e numero Sacramentorum expungitur, Jeremias Patriar. Constantinop. acri censura perstrinxerit, quam ipsam confirmavit Concil. Constantinopolitanum, Jassense, & Hierosolymitanum, de quibus jam alias dictum.

## ASSERTIO II.

*Sacramentum Extr. Unctionis est ab ipso Christo institutum, apud Marcum quidem C. 6. insinuatum, a Jacobo autem promulgatum.*

10 **A**SSERTIO hæc apprimè cohæret cum doctrina Tridentini, quod Sess. 14. de Extr. Unct. Cap. 1. declarat: *Instituta est autem sacra hæc Unctio infirmorum - - a Christo D. N. apud Marcum quidem insinuatum, per Jacobum autem Apostolum ac Domini fratrem fidelibus commendatum, ac promulgatum; infirmatur, inquit, quis in vobis &c.* In eamdem deinde sententiam loquitur ibid. Can. 1. Ac omnino de institutione divina dubitari nequit vel ideo, quod Apostolus tam fidenter promittat sacra hac Unctione alleviandum infirmum, eidemque peccata dimittenda; certum quippe est, virtute humana efficaciam tantam signo externo tribui non posse. Eamdem porro institutionem ad ipsum immediate Christum referendam, præter Tridentini nunc laud. verba, satis evincunt ea, quæ generatim de Institutione Sacramentorum dicta sunt L. I. Diss. II. §. III. a N. 57.

11 Consulto autem cum Tridentino addimus, *apud Marcum insinuatum; cum enim Marc. 6. Apostoli ad prædicandum a Christo missi ungebant oleo multos ægros & sanabant, unctione hac, ceu signo & symbolo, adumbrabatur saltem Extr. Unctio-*



tionis Sacramentum a Christo instituendum. Instituendum inquam; communior enim & verisimilior est contra Maldonatum sententia, hoc loco non fuisse institutum: tum quia Apostoli nondum erant Sacerdotes, quibus competit Sacramenti hujus ministerium: tum quia ungebant universim ægros etiam nondum baptizatos, imo necdum credentes, quo videlicet sanitatis restitutio illis esset credibilitatis motivum ad credendum in Christum, quod & in aliis curationibus id genus prodigiosis factum legimus Joan. 9. Act. 3. & alibi: tum denique, quia Unctio, cujus meminit Marcus, ad solam curationem morborum corporis pertinebat. Unde, si quid de institutionis hujus tempore pronuntiandum foret, mallem opinioni (nam certi nihil statui potest) eorum accedere, qui dicunt, Extr. Unctionem a Christo institutam primum post Resurrectionem, & quidem Joan. 20. cum Pœnitentiæ Sacramento, cujus consummativam Patres existimarunt, ut notat Trident. Quocumque interim tempore istud a Christo est præstitum, Jacobo promulgationem hujus Sacramenti esse attribuendam ipsa ejus verba in Ep. C. 5. evincunt; aperte enim illis docet usum Extremæ Unctionis, ejusdemque simul materiam, formam, Ministerium, subjectum, & effectus designat: id quod a nemine alio factum novimus.

### Respondetur Novatoribus.

**Q**Uæ contra Assertionem II. ex quorundam DD. opinationibus opponi possunt, peculiari animadversione opus non habent; ad dissolvenda certe illa suffecerit notasse vel momenta, quibus eandem Assert. affirmare conarsi sumus. Respondendum igitur superest Novatoribus, qui ad impugnandam Assertionis I. veritatem

12 Opponunt I. Verum Legis novæ Sacramentum non est, quod Christum auctorem non habet; quo jure autem Extr. Unctionis auctor dicatur Christus, qui nusquam in S. Literis legitur eam instituisse?

II. Veritas hujus Sacramenti potissimum fundatur in verbis Jacobi ex Epistola ejusdem desumptis; at Epistola hæc non est canonica, cum de auctoritate illius primis Seculis sit dubitatum: ductum igitur ex illa argumentum non est certum. Quid quod

III. Tametsi hæc Ep. foret canonica, nondum tamen res confecta est; etenim unctio, cujus meminit Jacobus, ex fine præcipuo ordinatur ad sanitatem corporis: cum interim Sacramenta *magis ad spem futurorum bonorum* (hoc est animæ salutem) *quam ad retentionem vel adoptionem præsentium pertineant*, ut ait Augustin. Enchir. C. 66. Quin

IV. Ipse hic sanitatis effectus non semper consequitur Extremam Unctionem, quod experientia docemur: cum tamen Sacramenta effectus suos infallibiliter operentur.

Resp. ad I. Extremæ Unctionis auctorem esse Christum satis probant rationes pro Assertionem II. allatæ, præsertim eæ, ad quas ex L. I. Dissert. II. provocamus. Nec obest Scripturæ silentium: teste enim Joanne Evang. omnia Christi dicta & facta non sunt in sacras tabulas relata, ut adeo complura ex Traditione repetenda sint, quod vel ipsi Novatores faciunt.

Resp. ad II. Epistolæ Jacobi auctoritatem elidere nequit quorundam veterum dubitatio: quando constat eam ab utraque Ecclesia pro sacra ac divina etiam primis Seculis agnitam. Quam in rem certum est testimonium ex Conc. Carthaginensi III. Sec. III. & Laodicensi Sec. IV. item ex Origene Hom. 7. in Josue, Athanasio in Synopsi, Epiphanio Hær. 76.

Hiero-

Hieronymo Ep. ad Paulin. qui omnes una cum Augustino L. 2. de doctr. Christ. & Innocentio I. Ep. ad Decent. hanc Jacobi Epistolam laudant. Demum Gelasius I. eandem in Concilio Romano Sec. V. consentientibus Patrum suffragiis in Librorum sacrorum Canonem retulit; nihil ut dicamus de Florent. & Trident. Conciliis. An jam vero tot Conciliorum & Patrum, etiam veterum, auctoritati paucorum quorundam dubitatio, aut Sectariorum protervia prævalebit?

Resp. ad III. falso asseri Unctionem hanc primario ordinari ad sanitatem corporis: hic quippe effectus est duntaxat secundarius, ut Dissert. II. §. I. probabimus.

Resp. ad IV. Extremam Unctionem effectum suum primarium, qui juxta dicenda paulo ante cit. §. est gratia sanctificans, in subiecto rite disposito semper ac infallibiliter operari. Quod autem corporis sanitatem non perinde semper operetur, mirum non est: cum effectus hic sit tantum secundarius, idemque simul conditionatus, si videlicet animæ expediat, ut notat Trident. & res ipsa docet.

Verum urgent adhuc Novatores a veterum silentio. Ni- 13  
mirum (quod ajunt 1<sup>mo</sup>) Extremæ Unctionis nulla sit mentio apud primorum Seculorum Patres; tametsi eorum aliqui Religionis Mysteria accurate exposuerint, ut Dionysius Areop. L. de Eccl. Hier. Clemens L. Constit. Justinus in Apolog. Cyrillus Hieros. in Catechesibus &c. Dein 2<sup>do</sup>, nullus e sex prioribus Seculis proferri potest Scriptor, qui commemoret aliquem ante obitum sacro oleo fuisse unctum; tametsi rursus complures in referenda sanctorum morte occupentur, ut Gregorius Naz. in Orat. de sorore Gorgonia & Basilio, Augustinus L. 9. Confess. de matre Monica &c. An vero hæc pertinaci adeo silentio involvi poterant, si jam primis Ecclesiæ temporibus creditum fuisset Extr. Unctionis Sacramentum?

Resp. I. Silentium, quod obtrudunt Novatores, est argumentum duntaxat negativum : hoc autem positivo, quali nos utimur, prævalere non potest juxta sanioris Criticæ regulas; hinc etiam apud *JCtos* duo testes affirmantes prævalent centum negativis. Silentii præterea hujus congrua potest reddi ratio; hinc

Resp. II. Quod ad *imum* attinet: Patribus illis non fuit propositum de omnibus Sacramentis agendi; verum de illis solum, quæ aut communiter omnibus & magis erant necessaria: aut a Sæctariis impugnata sunt: vel circa quæ dubitationes exortæ, inducti abusus &c. certe Dionysius Areop. in cit. L. ne Pœnitentiæ quidem meminit. Quid quod multa veterum monumenta ad nos usque non pervenerint? Cæterum de priorum Seculorum doctrina satis constat ex Origene, Chrysostomo, Innocentio I. aliisque jam supra laudatis. Sed nec urget, quod 2do loco adfertur: cum enim Gregorius Naz. & Augustinus non commemorent sacrum Eucharistiæ viaticum SS. Gorgoniæ & Monicæ datum, quid mirum si de Extr. Unctione pariter sileant? Nimirum res notissimæ & communiter usitatæ in Vitis Sanctorum referri non solent, nisi peculiaris circumstantia id suadeat; inde complures posterioris etiam ætatis Sanctorum vitas est legere, in quibus perinde de sacra hac Unctione ab iis suscepta altum filetur.

## §. II.

### *Quæ sit Sacramenti Extr. Unctionis materia?*

**A**D explicandam Extremæ Unctionis naturam necesse est statuere de ejus materia & forma. Non desunt autem de utraque complures Scholasticorum controversiæ; at nos  
(ne

(ne longius in differendo excurramus) satis habebimus pronuntiare de iis, quibus Sacramentum hoc quoad substantiam certo, aut ex communiore saltem Doctorum sententia perficitur: de magis controversis vero opinionibus quasi per occasionem tantum, paucisque duntaxat sensum nostrum insinua-  
bimus. Ac hoc quidem §. de sola materia, eaque tam remota quam proxima: altero dein de forma speciatim agendum erit.

## ASSERTIO I.

*Materia remota Extr. Unctionis est oleum olivarum: idque, saltem ex precepto Ecclesie, benedictum ab Episcopo, vel ex delegatione per Presbyterum.*

**P**ARS I. certa est ex ipsis Jacobi verbis, *ungentes cum oleo*, 14 quo nomine venit proprie solum oleum ex olivis expressum; sicut igitur aqua ex floribus aut herbis educta non est idonea Baptismi materia, nec alius panis quam triticeus Eucharistiæ: ita nec Extr. Unctionis materia esse potest alia quam oleum olivarum. Quod ipsum confirmat constans praxis Ecclesiæ utriusque, nunquam nisi hoc oleo Extr. Unctionem ministrantis. Inde Florent. in Decr. pro Arm. pro materia expressis verbis *oleum olivæ* assignat. Et Catech. Rom. Par. 2. de Extrema Unct. postquam ex Tridentino refert hujus Sacramenti materiam, esse oleum continuo subjicit: *liquor scilicet, non ex quavis pingui & crassa natura, sed ex olearum baccis tantummodo expressus*. Cujus rationem si petas, non alia est utique, quam institutio Christi, hac nominatim materia, & non alia Sacramentum hoc ministrari volentis. Cæterum & aliam a congruo rationem adfert laud. Catechismus: quia nimirum aptissime hæc materia illud significat, quod vi Sacramenti interius in anima efficitur; nam ut oleum sanat, dolorem lenit, robur

robur addit &c. sic & Extrema Unctio eosdem effectus in anima, quin sæpe in corpore etiam operatur, ut ibidem explicat Catechismus.

15 Pars II. pariter in dubium vocari non potest. Etenim veteres fere omnes, qui materiæ hujus Sacramenti meminerunt, eam esse docent oleum ab Episcopo consecratum; id quod legere est apud Innocentium I. in Ep. ad Decent. apud Gregorium M. in Sacramentario, ubi ritum hujus consecrationis describit, apud Bedam in Ep. Jacobi, item in Conc. Cabilonensi II. quod Can. 48. ait: infirmos *oleo, quod ab Episcopis benedicitur, ungi debere*. Idem expressis verbis traditur in Conc. Florentini Decr. pro Arm. & Trident. Sess. 14. de Extr. Unct. Cap. 1. ubi declarat hujus Sacramenti *materiam esse oleum ab Episcopo benedictum*.

Additur: *vel ex delegatione per Presbyterum*; nam certum est, apud Græcos oleum infirmorum per simplices etiam Sacerdotes benedici, ex tacita nimirum Episcoporum & Ecclesiæ concessione, ut videre est in Græcorum Euchologiis, & apud Goarium in Not. ad Eucholog. quod ipsum hodierna Græcorum praxis docet. Neque ritus hic eorum ab Ecclesia Latina unquam reprobatus legitur; quin approbatum etiam Goarius contendit ex Clementis VIII. Instr. super Rit. Græc. An. 1595. data, & auctoritate S. Congr. de prop. Fide. Clemens nimirum in cit. Instr. Tit. de oleo infirm. statuens, *non esse cogendos Presbyteros Græcos olea sancta, præter chrisma, ab Episcopis Latinis Diocesanis accipere, pro causa reddit: cum ejusmodi olea ab eis (Presbyteris) - ex veteri ritu conscribantur & benedicantur*. Congr. autem de prop. Fide approbavit, quin & suis impensis Romæ edidit Neophyti Rhodini *Synopsim vernaculam*, in qua hæc leguntur: *materia Sacramenti Extr. Unctionis est oleum olivæ expressum, a Pontifice, vel a Sacerdotibus, qui præsentibus fuerint, juxta Ecclesiæ morem benedictum*.

Ex

Ex his autem ultro deducitur, pro Extr. Unctionis materia, saltem ex præcepto Ecclesiæ, oleum benedictum esse adhibendum; præsertim cum vel communiter recepta Ecclesiæ disciplina, & constans usus vim præcepti obtineant. Num idem autem ad valorem etiam requiratur? controversitur; de quo nos in Corollario N. 18.

## ASSERTIO II.

*Materia proxima est unctio; vel unica autem ad valorem Sacramenti sufficit, tametsi ex præcepto Ecclesiæ multiplex adhibenda sit regulariter.*

**P**rimum deducitur tam ex communi principio: universim 16 quippe Sacramentorum, quæ in usu consistunt, materia proxima est remotæ applicatio, qualis in præsentī est unctio oleo facta; quam ex Jacobi verbis, *ungentes eum oleo &c.* quin ex ipsa forma, *per istam sanctam unctionem &c.* Alterum (tametsi controvertant aliqui pro se citantes D. Thomam in 4. dist. 23. qu. 2. Ar. 3.) videtur magis conforme sensui & præxi Ecclesiæ: ut quæ in casu necessitatis, si e. g. mors instet, vel morbus contagiosus Ministrum exponat evidenti periculo, permittit fieri unam duntaxat unctionem, ut Dissert. IV. §. II. ex LL. Ritualibus comprobabitur; censet igitur Ecclesia ratum esse Sacramentum, quamvis una tantum unctione ministretur. Quam in rem jure etiam arguitur ex ipsius Jacobi verbis, *orent super eum, & ungentes eum oleo in nomine Domini: quæ prorsus similia sunt illis de Baptismo Matth. 28. docete omnes gentes, baptizantes eos in nomine &c.* sicut igitur vel una ablutio ad Baptismum, sic & unica unctio ad hoc infirmorum Sacramentum sufficit. Regulariter interim (quod tertium Assertionis membrum est) plures unctiones apud

Latinos perinde ac Græcos adhibendas esse ex præscripto Ecclesiæ infra, paulo ante cit. Differt. & §. docebimus.

### Corollarium

de opinionibus circa Extr. Unctionis, per chrisma vel oleum non benedictum collatæ, valorem variantibus.

- 17 I. **C**erta est DD. omnium sententia, Sacramentum Extr. Unctionis ex præcepto Ecclesiæ ministrandum esse oleo simplici, non vero composito, seu chrismate; idque omnino evincit vel praxis Ecclesiæ: cum oleum, quod Feria V. Maj. hebd. pro infirmis benedicitur, sit simplex: hocque ipso ungendos infirmos præscribat Rituale Rom. Pauli V. ac etiam alia. At num perinde ratum foret hoc Sacramentum, si chrismate fieret unctio? controversum est: negantibus plurimis, quibusdam tamen cum Tournelyo affirmantibus.

Ego de controversia hac cum distinctione statuendum existimo. Vel enim in chrismate tantum balsami aut extraneæ alterius materiæ oleo admiscetur, ut natura olei muteatur; ac tum ajo chrismate id genus non perficiendum Extr. Unctionis Sacramentum: cum istud sine olivarum oleo proprie tali constare non possit. Inde, num Græcorum chrisma sufficiens sit Extr. Unctionis materia? jure dubitatur; in conficiendo enim illo, præter balsamum, triginta quinque fragrantium aromatum species vino incoctas oleo admiscunt: hac vero mixture vix fieri potest, ut oleum suam naturam integre retineat. Quod si contra mixtio hæc sit adeo modica, ut oleum usuale & proprie tale in æstimatione prudentum remaneat, uti remanet in Latinorum chrismate: probabile videtur, chrisma ejusmodi validam esse hujus Sacramenti materiam. Quid enim



enim illi ad valorem desit ? quando aliorum quoque Sacramentorum materiae non officit modica mixtio, ut alibi dictum est. Atque hæc potiori jure intelligenda sunt de oleo Catechumenorum. Recole in simili dicta L. III. de Confirm. Dissert. IV. N. 87. Quia interim opposita sententia non caret probabilitate, eademque simul est tutior, curandum omnino in praxi : ut, si per errorem chrismate aut catechumenorum oleo unctus sit æger, rursus fiat unctio simplici infirmorum oleo, ac etiam forma conditionate repetatur, id quod nominatim monet S. Carolus Borom. in Instr. de Extr. Unct.

II. Certum est rursus omnibus, oleum pro ungendis infirmis saltem ex præcepto Ecclesiæ benedictum esse oportere, quod ipsum jam supra Assert. I. ex proposito tuiti sumus ; verum, num benedictio hæc sit de necessitate Sacramenti ? variant Doctorum opiniones. Necessarium cum Bellarmino contendunt Estius, Suarez, Sylvius, Gotti &c. negant ex adverso Victoria, Cajetanus, Maldonatus, Sanbovius, Natalis Alex. & ex RR. plures cum Auct. de Re Sacram.

Meam si requiras sententiam : vel ipsam hanc gravissimorum Virorum dissensionem satis indicare ajo, nihildum certi de hac controversia statui posse. Quod igitur ad summum dici potest : non est certum ad valorem Extr. Unctionis pertinere olei benedictionem ; ut adeo probabilis sit opinio eorum, qui ratum existant hoc Sacramentum cum oleo non benedicto collatum. Nimirum (ut illi arguunt) tanta hujus benedictionis necessitas nullo certo Scripturæ aut Traditionis testimonio evincitur. Non Scripturæ : nam Jac. 5. dicitur æger ungendus oleo, quin benedictionis fiat mentio ; verba quippe ibid. addita, *in nomine Domini*, non ad oleum, sed ad ungendi actum congrue referuntur, ita ut sensus sit : unctionem fieri debere Dei nomine & auctoritate, quæ ipsa est Ven. Bedæ in hunc locum interpretatio. Non etiam Traditionis : tamen si

enim ex ea constet oleum benedictum adhiberi oportere, non est tamen certum, qua nominatim necessitate; quod ipsum de Conciliis Florentino & Tridentino intelligendum est. Perinde certe in Calice Eucharistico aquam vino miscendam Traditione & Conciliis docemur: quin tamen hinc inferre liceat, mixtionem hanc ad substantiam pertinere. Confer hæc cum iis, quæ L. III. de Confirm. Dissert. IV. N. 90. V. 2do pariter &c. de Chrismatis benedictione attulimus. At hic rursum notari velim id, quod super. N. de iteratione Extremæ Unctionis monui.

### §. III.

#### *Quæ sit Extremæ Unctionis forma?*

**U**T certa ab incertis rursus discernamus, de celebri, quæ hic occurrit, controversia in Corollario statuemus: nunc eam satis fuerit definire formam, quæ certo sufficiat ad valide ministrandum Extr. Unctionis Sacramentum. Et quia, ut fere in aliis, ita in præsentī quoque Græcos inter & Latinos discriminis aliquid intercedit, eorum cumprimis formæ conciliandæ sunt; ac vel ideo utramque prius referemus, adnotata simul præcipua inter eas differentia.

Latinorum & Græcorum formæ,  
earumque differentia.

- 19 **R** Ecepta apud Latinos Extremæ Unctionis forma in Rituali Rom. his verbis describitur: *Per istam sanctam Unctionem, & suam piissimam misericordiam indulgeat tibi Dominus, quidquid per visum deliquisti, Amen.* Idem est in aliis sensibus mutando duntaxat, *per auditum, per odoratum* &c. Græcis vero

vero usitata forma est: Πάτερ ἅγιε, ἰατρὲ τῶν ψυχῶν, καὶ τῶν σωμάτων, ἰάσαι τὸν δούλον σου τόνδε ἐκ τῆς περιεχέουσας αὐτὸν καὶ ψυχικῆς ἀσθενείας. *Pater sancte, medice animarum & corporum, sana servum tuum hunc ab illa, quæ ipsum detinet, corporis & animi infirmitate.* Ita Arcudius L. 5. Concord. ex Græcorum Eucholog. Huic formæ quidam inserunt & alia verba, nempe: *Pater sancte - - qui misisti filium tuum &c.* ac etiam adjiciunt sequentia: *Sana servum tuum - - & vivifica eum per gratiam Christi &c.* tum Deiparæ, Apostolorum, ac aliorum sanctorum invocatione concludunt.

Quæ jam has inter formas sit differentia, facile cuique eas invicem conferenti occurrit. Præcipua autem, & quæ nonnullis visa est substantialis eo continetur: quod Latini actum ministerialem, seu unctionem exprimant, solumque præterea designent spiritualem effectum remissionis peccati; cum ex adverso Græci unctionis penitus non meminerint, meminerint vero spiritualis simul & corporalis effectus, tam corporis quam animi sanitatem deprecantes. Hæc interim differentia neutram formarum reddit irritam, ut patebit partim ex Assert. partim ex Resp. ad Dubit. III. N. 22.

## ASSERTIO.

*Sacramentum Extr. unctionis valide ministratur forma mere deprecativa: eaque Græcorum non minus, quam Latinorum,*

**P**ARS I. in dubium vocari nequit, cum pro Extr. unctionis forma Latini perinde ac Græci utantur verbis mere deprecativis: ut adeo eorum usus Ecclesiæ totius, quæ in re tanti momenti errare non potest, iudicio approbetur. Iudicium porro hoc, imo & præceptum Ecclesiæ docemur ex

LL. Ritualibus, ipso Concil. Florentino in Decr. pro Arm. quin Tridentino etiam Sess. 14. de Extr. Unct. Cap. 1. ubi hujus Sacramenti declarat esse illa verba: *Per istam unctionem &c.* Ac omnino forma hujusmodi plane conformis est verbis Jacobi, *orens super eum, ungentes eum oleo in nomine Domini, & oratio fidei servabit infirmum &c.* Inde Trident. laud. Sess. Can. 3. non dubitavit anathemate ferire eum, *qui dixerit Extr. Unctionis ritum & usum, quem observat S. Rom. Ecclesia, repugnare sententiae B. Jacobi Apostoli, ideoque eum mutandum;* certe autem hic ritus formam deprecativam complectitur.

¶ Pars II. quæ Græcorum concernit formam, perinde indubitata est universæ Ecclesiæ suffragio. Quamvis enim hæc a forma Latinorum diversi quidpiam habeat, eam nihilominus sedes Apostolica nunquam existimavit irritam, imo nec dubiam; id quod satis indicatur ejusdem silentio, cum de Extr. Unctionis forma non legatur unquam Græcis litem movisse, seu dum cum illis de unione ineunda tractaret, seu cum initam conservaret. Quod silentium eo magis ad rem præsentem facit, quod Græcorum in Sacramentis ministrandis ritus tam in Conc. Florentino, quam etiam sub Leone X. Clemente VII. Gregorio XIII. & Clemente VIII. ex proposito in examen sit vocatus; ac de eo aliqua fuerint constituta: quin tamen de Extr. Unctionis materia aut forma quidpiam apud eos mutandum decerneretur. Ipse certe hodie feliciter regnans S. P. BENEDICTUS XIV. in Constit. *Æsi Pastoralis*, An. 1742. edita §. 5. id unum de Extr. Unctione Græco-Italica præcipit, *ut Sacerdos idem, qui ungit, formam respondentem pronuntiet, in nullo penitus correctæ forma iis usitata.*

Expe-

## Expediuntur Dubitationes.

**D**ubitari potest L. generatim de forma deprecativa: quia 22 Oratio in effectum sibi respondentem influit solum ex opere operantis; cum interim Sacramenti cujuslibet forma effectum sacramentalem ex opere operato efficiat.

II. Speciatim de forma Latinorum: nam Extrema Unctio ministranda est cum Oratione fidei, juxta illud Jac. 5. *orent super eum - - & oratio fidei salvabit infirmum*; Oratio autem apud Latinos recepta non est ejusmodi, cum nihil mysteriorum fidei exprimat. Atque hæc videtur causa, cur plures Græci suæ formæ hæc quoque inferant: *Pater sancte - - qui misisti Filium &c.* item: *vivifica eum per gratiam Christi &c.*

III. De forma Græcorum: hæc quippe a Latinorum multum diverſa est; si igitur hæc valeat, alteram oportet esse irritam. Diversitas porro hæc ex collatis invicem formis patet, eamque jam supra notavimus.

Resp. ad I. Quamvis orationi extra Sacramentum ex opere duntaxat operantis effectus respondeant: secus tamen est de Oratione, quæ formæ sacramentalis rationem habet; cum enim toti Sacramento efficacia ex opere operato agendi a Christo sit indita, eandem materiæ pariter & formæ convenire oportet.

Resp. ad II. formam Latinorum vero sensu dici *Orationem fidei*: nam & a fide profecta est, & fidei innititur Ecclesiæ, cujus Minister personam gerit; hac certe sola causa Augustin. Tract. 80. in Joan. formam quoque Baptismi vocat *verbum fidei*. Quid quod oratio quævis ad Deum fusa sit testimonii instar *orationis fidei*; nemo enim invocatur Deus, quem non credit

credit juxta illud Apost. ad Rom. 10. *quomodo ergo invocant, in quem non crediderunt?*

Resp. ad III. Cum totus sacramentalis formæ valor habeatur a Christi institutione, quæ, dum in S. Literis clare non exprimitur, ex sensu Ecclesiæ nobis innotescit: eo ipso, quod certum sit Græcorum perinde ac Latinorum Extr. Unctionis formam ab Ecclesia approbari, certum pariter est utramque perinde ex institutione Christi ratam ac validam esse, nihilque valori huic officere memoratam diversitatem. Ex quo ipso recte deduxeris: differentiam, quæ inter has duas formas intercedit, non esse theologicæ substantialem; atque adeo ad substantiam formæ Extr. Unctionis ex institutione Christi non requiri, ut in ea nominatim exprimatur actus ungendi ac etiam effectus uterque, nempe tam spiritualis quam corporalis sanitas. Ac revera communior est Doctorum sententia: in Latinorum forma de necessitate Sacramenti hæc sola esse verba, *indulgeat tibi Deus*; in Græcorum autem, *Pater sancte sana hunc servum tuum a spiritali infirmitate*; quæ quoad sensum idem sunt. Interim recitanda sunt ex præscripto Ritualium verba omnia: tam ut tutius ministretur Sacramentum; quam ne a recepto in Ecclesiâ ritu recedatur.

### Corollarium

de controversia ad formæ indicativæ valorem  
pertinente.

**O**Mnium facile princeps hujus loci controversia est: num formæ deprecative ad necessitatem & substantiam Extr. Unctionis Sacramenti ita pertineat, ut ratum ac validum esse non possit, si verbis mere indicativis ministretur? atque in hoc

hoc definiendo gravissimi DD. in duas scinduntur classes. Utriusque Patronos & momenta referam; tum, quam in partem conferendum sit suffragium, paucis insinuabo. Jam vero

I. Pro sola deprecativa forma pugnat communior opinio; eamque omrino, post D. Thomam in 4. dist. 23. qu. 1. Ar. 4. & S. Bonaventuram ead. dist. Ar. 1. qu. 4. amplectuntur passim Thomistæ, Scotistæ, plurimique alii Theologi cum Platellio, Simonetto, Ludov. Habert &c.

Est vero his momentum duplex. Primum repetunt ex Jacobi verbis, *orient super eum ungentes* - - *oratio fidei salvabit* &c. quibus docet hujus Sacramenti materiam & formam, ut declarat Trident. Sess. 14. de Extr. Unct. Cap. 1. hæc autem verba solam deprecationem indicant. Alterum ducunt ex sensu & praxi Ecclesiæ: sola quippe deprecativa forma a Conciliis Florent. & Trident. approbata legitur; sola hæc in usu est, ac semper fuit apud Latinos perinde ac Græcos, ut colligimus ex antiquis & modernis LL. Ritualibus; nec proferri potest ullum testimonium de usu formæ mere indicativis verbis expressæ. Quæ omnia (ut isti atguunt) certo sunt argumento: ita Christum instituisse Extr. Unctionis Sacramentum, ut illud ratum esse noluerit, nisi deprecativis verbis ministraretur.

II. Ex adverso etiam solam mere indicativam formam valere, aut olim saltem valuiffe, contendunt alii; ex antiquioribus quidem ante Concil. Tridentinum Albertus Magnus, Paludanus, Richardus: post Concilium vero Navarrus in summa C. 22. Becanus de Sacram. C. 27. ac dein post Morinum L. 8. de Pœnit. C. 16. Tournely, Auctor Rei Sacram. Berti &c.

Quo jam se tuentur isti, id unum est: quod olim etiam sola indicativa forma ministratum fuerit Extr. Unctionis Sacra-

mentum. Hujus porro formæ complura referunt exemplâ. Ita in Sacramentario S. Gregorii hæc legitur: *Inungo te de oleo sancto in nomine Patris &c. ut non lateat in te Spiritus immundus, - - sed in te habitet virtus Christi - - quatenus - - per hanc sacrati olei unctionem, atque nostram deprecationem - - recipere merearis sanitatem, per eundem &c.* Ecclesiæ Mediolanensis Sec. XIII. XIV. & XV. forma, quæ & Ambrosiana est dicta, his verbis describitur: *Ungo te oleo sanctificato in nomine Patris &c. ut more militis uncti præparatus ad certamen, aereas possis superare potestates.* His prorsus similes sunt reliquæ, quæ recitantur ex Codice Tiliano, Remigio-Rhemensi, Ratoldiano; item Rituali Sueffionensi, Catalaunensi, Ambianensi, Turonensi, Veneto, & antiquis Germaniæ LL. Ritualibus, quos Albertus Mag. commemorat. Vide Martene L. I. de ant. Eccl. rit. Menardum in Not. ad Gregorii Sacrament. & Morinum supracit. Cap. a N. 13.

Ex his jam Patroni hujus sententiæ ita cum Cl. Tournelyo de Extr. Unct. Quæst. 2. Ar. 2. ratiocinantur. Verisimile non videtur, eam in usu & praxi toleratam fuisse Sacramenti formam, quæ nulla foret, invalida, & illegitima; at patet ex cit. testimoniis, in pluribus Ecclesiis formam absolutam & indicativam obtinuisse; ergo (ut laud. Tournelyus concludit) consequens est, ut dicamus validam olim fuisse formam Unctionis extremæ modo absoluto & indicativo expressam: adeoque Christum institutione sua hoc unum voluisse, ut forma hujus Sacramenti idonea foret ad exprimendum ejus effectum, Ecclesiæ vero libertati permisisse determinare modum, sive indicativum, sive deprecatorium.

- 25 III. Collatis invicem opinionum harum momentis tota, ut nemo non videt, lis eo recidit: num aliquando in Ecclesia formæ mere indicativæ usus in conferendo Extr. Unctionis Sacramento receptus fuerit? aut verius: an formæ super. N.

memo-



memoratæ sint tantum indicativæ, nihilque penitus deprecationis contineant?

Ac istud quidem cum ex ipsis formarum verbis definiri debeat, attentis illis, prorsus verisimile mihi videtur: laud. formas esse indicativo - deprecativas. Etenim 1<sup>mo</sup>, in omnibus his formis post indicativa verba, *ungo te* &c. subjicitur, *ut non lateat in te* &c. vel, *ut possis superare* &c. quæ cum optativo modo efferantur, deprecationem significant: unde & plurimæ orationum more terminantur, *per Christum Dominum* &c. Deinde 2<sup>do</sup>, quæcumque ex laud. Ritualibus recitantur formæ plane similes sunt Gregorianæ, ex Gregorii videlicet Sacrament. depromptæ; at in hac expressis verbis dicitur, *per hanc unctionem - - atque nostram deprecationem - - recipere increaris* &c. ergo tam hæc quam reliquæ, præter verba indicativa, etiam deprecationem continent spectato verborum sensu & Ministri intentione. Demum 3<sup>io</sup>, ipse Cl. Tournelyus supra cit. Ar. ubi, memoratarum formarum auctoritate inductus, formæ etiam mere indicativæ valorem propugnat, speciatim Concl. 2. asserit: formam Gregorianam non esse mere indicativam, verum mixtam ex indicativa & deprecatoria; at profecto omnes reliquæ, quas seu Tournelyus, seu alii usque huc produxerunt, cum hac Gregoriana quoad substantialem verborum contextum & sensum conveniunt; de reliquis igitur etiam idem sentiendum est.

Atque hinc ultro patet: nihildum contra communiorem in præsentī sententiam prolatum esse ejusmodi, quod ab ea recedendum suadeat. Quod si vero aliquis subinde certiora proferat, ac nominatim edoceat: aliquando sola indicativa forma ministratam fuisse Extr. Unctionem, ritumque hunc Ecclesiæ judicio probatum; nihil dubitabo mutare opinionem, ac conformiter ad ea, quæ de materia & forma Confirmationis L. III. Dissert. I. §. III. & IV. tuitus sum, hic quoque asse-

rere: Extr. Unctionis formam a Christo disjunctive esse institutam, atque adeo substantiam & valorem illius perinde haberi, seu deprecatoria sit, seu mere indicativis verbis concipiatur.

## DISSERTATIO II.

### DE EFFECTIBUS ET PROPRIETATIBUS EXTREMÆ UNCTIONIS.

#### §. I.

#### *Quos effectus Sacramentum Extremæ Unctionis operetur?*

CUM Sacramentis omnibus commune sit operari gratiam sanctificantem cum jure ad peculiaria auxilia, quæ juvent ad finem cuilibet Sacramento proprium: effectum hunc etiam Extr. Unctioni respondere, indubitatum est. Quod igitur isthic in quæstionem vocari potest, eo solum spectat: ut designentur nominatim effectus, ad quos auxilia virtute hujus Sacramenti collata ordinantur; hos inter præterea statuatur discrimen: qui videlicet eorum sint primarii, qui secundarii tantum?

#### ASSERTIO I.

*Effectus Extr. Unctionis sunt: infirmi quoad animam alleviatio; peccatorum, si quæ supersint, remissio; corporis sanitas, si animæ expediat.*

26 **D**Educuntur hæc omnia ex Jacobi Ap. verbis, accedente Tridentini declaratione Sess. 14. de Extr. Unct. Cap. 2.  
Res

*Res porro (ait Concil.) & effectus hujus Sacramenti illis verbis (Apostoli) explicatur: & oratio fidei salvabit infirmum, & alleviabit eum Dominus, & si in peccatis sit, remittentur ei. Res etenim hæc gratia est Spiritus sancti, cujus unctio delicta, si quæ sint adhuc expianda, ac peccati reliquias abstergit, & ægroti animam alleviat & confirmat, magnam in eo divinæ misericordiæ fiduciam excitando: qua infirmus sublevatus, & morbi incommoda ac labores levius fert, & tentationibus ædemonis calcaneo insidiantis facilius resistit; & sanitatem corporis interdum, ubi animæ salutem expedierit, consequitur. Cui tam apertæ declarationi id solum videtur addendum: per reliquias peccati, quas Trident. ait abstergi, intelligendos cumprimis esse defectus ex peccatis contractos, ut sunt: propensio ad malum, torpor ad bonum, grævedo animam deprimens & a cælestibus abstrahens, mœror & anxietas, ex quibus facile oritur dissidentia &c. hæc igitur Extr. Unctionis virtute in ægro abstergantur secundum illud Jacobi, alleviabit eum Dominus.*

## ASSERTIO II.

*Primarius Extr. Unctionis effectus est, animæ alleviatio, seu reliquiarum peccati abstergio; reliqui sunt secundarii.*

**E**X institutione nimirum Christi (ut PP. existimarunt teste Tridentino) Sacramentum hoc est Pœnitentiæ *perfectivum* & *consummativum*; in quo autem illam præcipue perficit ac consummat? non quoad peccati remissionem: hanc enim jam ipsa præcedens Pœnitentia, si obex non adsit, primo & per se operatur; igitur quoad alleviationem memoratam, seu reliquiarum peccati in sensu supra exposito absterfionem. Quid quod effectus reliqui sint tantum conditionati: remissio vide-

licet peccati, si quod supersit; corporis item sanitas, si animæ expediat: hos igitur Extrema Unctio non semper operatur; cum ex adverso animi alleviatio effectus sit absolutus, idemque ægroto semper necessarius, qui proinde in illo rite disposito semper efficitur. Quæ omnia, opinor, satis indicant: Sacramentum hoc primo ac præcipue ordinari ad alleviandum ægrum per absterfas peccati reliquias; hic ipse nihilominus effectus non semper est æqualis, verum major aut minor pro recipientis dispositione. Momentum denique addat sensus S. Caroli Borrom. qui in Instrucl. de Extr. Unct. ait: *prima utilitas & effectus hujus Sacramenti est, quod peccati reliquias tollit, tanquam complementum Sacramenti Pœnitentiæ.*

### Occurritur Objectionibus.

28 **C**ONTRA Assert. I. opponitur I. Post susceptam Extrem. Unctionem in ægris, ac etiam cum convaluerunt, sæpe perseverat ad malum propensio, torpor in bene operando, pusillanimitas &c. igitur per Sacramentum hoc non abstergantur peccati reliquiae.

II. Sanitas corporis nunquam, aut raro saltem, conferitur, per hoc Sacramentum; ergo non est illi adnexa sanitatis corporalis divina promissio: proinde nec dici potest ejus esse effectus ex opere operato.

Resp. ad I. alleviationis gratiam, qua peccati reliquiae abstergantur, ægrotum rite dispositum semper obtinere; inde, si secus fiat, refundendum est in dispositionis defectum, ut jam alias universim de Sacramentorum effectibus dictum est. Quod autem torpor animi, mæror, aliæque peccati reliquiae post superatam ægritudinem sæpe redeant, mirum videri non debet: primum enim est, ut æger recuperata valetudine gratiis non respondeat, aut iis plane indignum se reddat. Sunt imo,

imo, qui existiment, auxilia hæc animam alleviantia virtute Extr. Unctionis solum pro ægritudinis statu concedi.

Resp. ad II. sanitatem corporis non conferri semper propterea, quia effectus hic sub conditione duntaxat est promissus, si animæ videlicet expediat. Inde Doct. Ang. in 4. dist. 23. qu. 1. Ar. 2. recte notat: *quia operans nunquam inducit secundarium effectum, nisi secundum quod expedit ad principalem, ideo ex hoc Sacramento non sequitur corporalis sanatio semper; sed quando expedit ad spiritualem sanationem, tunc semper eam inducit, dummodo non sit impedimentum ex parte recipientis.* Atque ad hæc conformiter omnino falsum est, quod Lutherus L. de Capl. Babil. asserit: in nullo videlicet hanc sanitatis promissionem impleri virtute Unctionis. Certe primis Ecclesiæ seculis id genus curationes evenisse certum est; nunc etiam non raro experimur extreme unctos melius habere, imo & restitui integre: unde autem Luthero certum, id soli medicinæ, aut aliis naturæ viribus, nunquam autem sacræ huic Unctioni esse attribuendum? Neque tamen restitutio hujusmodi miraculis proprie talibus continuo accensenda est; quamvis enim fiat virtute Sacramenti, atque adeo vires naturæ excedat, non tamen est præter ordinem a Deo constitutum: id quod tamen utrumque D. Thom. requirit ad veri miraculi rationem.

Contra Assert. II. opponitur I. Per ipsum Pœnitentiæ Sacramentum abstergantur peccati reliquiæ, & alleviatur anima: in eo quippe pœnitens acquirit jus ad auxilia, quibus possit tentationi obistere, concupiscentiam frangere, in bono proficere &c. ergo hæc animæ alleviatio non est Extr. Unctionis ita peculiaris effectus, ut Primarius dici debeat. Quin

II. Cum Jacobus, *salvabit infirmum*, inquit, primo loco & quidem absolute nominet sanitatem corporis, huic potiori jure

jure videtur attribuenda primarii effectus prærogativa. Aut verius

III. Prærogativa hæc tribuenda est soli peccatorum remissioni; solus enim hic effectus commemoratur in Latinorum forma, cum dicitur: *per istam S. Unctionem - - indulgeat tibi Deus, quidquid deliquisti &c.*

Resp. ad I. auxilia, ad quæ in Extr. Unctione jus acquiritur, in eo diversa sunt ab auxiliis virtute Sacramenti Pœnitentiæ collatis, quod ordinentur peculiariter ad statum extremæ ægritudinis, ac vel ideo sint multo copiosiora & validiora: cum status hic omnium sit periculosissimus ob instantem mortem, impendens judicium, acriores conscientiæ stimulos, periculum desperationis, vehementiores dæmonis impulsus &c. Id quod pluribus declarans Trident. Sess. 14. in Proëm. de Extr. Unct. docet, *quod clementissimus Redemptor noster, - - quemadmodum auxilia maxima in Sacramentis aliis præparavit, quibus Christiani conservare se integros, dum viverent, ab omni graviore spiritus incommodo possint; ita Extr. Unctionis Sacramento finem vitæ, tanquam firmissimo quodam præsidio, munivit: nam etsi adversarius noster occasiones per omnem vitam capiet, - - nullum tamen tempus est, quo vehementius ille omnes suæ versutiæ nervos intendat ad perdendos nos penitus, & a fiducia etiam, si possit, divinæ misericordiæ deturbandos, quam cum impendere nobis exitum vitæ conspiciat.*

Resp. ad II. Quod sanitatem corporis primo loco recenset Apostolus, id ea duntaxat factum causa, ut magis congruum oratio haberet contextum; cum enim præmiserit, *infirmatur quis in vobis?* consequens erat, ut continuo subjiceret sanitatis recuperandæ effectum. Ita ipse Christus Matth. 19. interroganti Petro, quid sperandum sit omnia relinquentibus? respondit: *omnis, qui reliquerit domum &c. centuplum accipiet, & vitam æternam possidebit.* Quod ipsum responsum legitur

Lucae

Lucæ 18. dicente Domino, neminem eorum futurum, qui non recipiat multo plura in hoc tempore, & in Seculo venturo vitam æternam. Quis vero hinc inferre audeat? mundi hujus bona propter Christum relinquentibus præmium temporale primario promitti; Dacta igitur ex verbis Jacobi illatio perinde non est legitima. Sed nec officit, absolutis verbis Apostolum sanitatem promittere: ex genere enim suo effectus hujus promissio conditionem involvit, si nempe animæ saluti expediât.

Resp. ad III. per verba, *indulgeat tibi Deus, quidquid deliquisti* &c. deprecationem fieri universim pro indulgentia reatus tam culpæ quam pœnæ, ac aliarum etiam peccati reliquiarum. Neque dixeris, expositione hac vim inferri verbis: ex recepta enim Ecclesiæ phrasi constat, per *indulgentiam* aut *remissionem peccati* non raro solam pœnæ peccato debitæ condonationem designari, ut e. g. cum conceditur *Indulgentia pro remissione tertiæ partis peccatorum*. At, inquires, obscure admodum hic alleviationis & abstersionis effectus significatur per laudatam formam. Sit ita; nec tamen paulo obscurior hæc significatio quidquam officit, quando eadem in aliorum etiam Sacramentorum formis reperitur. Ita certe in forma Baptismi non exprimuntur clare ejusdem Sacramenti effectus; idem est de forma, qua Græci communiter utuntur in ministrando Confirmationis Sacramento. Cæterum Extr. Unctionis forma apud Latinos recepta, etiam quoad primarium alleviationis effectum, sat clara est, si nimirum non nuda duntaxat ejus verba, sed & usitata Ecclesiæ phrasis, ac ipsius Sacramenti institutio attendantur.

## §. II.

*Quæ sint Extremæ Unctionis proprietates? quid-  
que de illis sentiendum?*

**E**ffectus Sacramenti indicant ejusdem proprietates. Ac spectatis quidem paulo ante recensitis Extr. Unctionis effectibus ultro videtur consequi, Sacramento huic id esse proprium: quod extremum decumbentibus sit necessarium, quodque in iisdem iterari non possit. Sed nempe utrumque istud controversiæ est obnoxium; nos certa discernemus ab incertis, ac de his quoque, quod verisimilius est, statuemus.

## De necessitate Extr. Unctionis.

30 I. **O**mnium sententia certum est, Extr. Unctionis Sacramentum non esse necessarium absolute, hoc est, necessitate medii: cum enim sit vivorum Sacramentum, & quidem Pœnitentiæ consummativum, utique ordinaria lege jam in infirmo supponit justitiæ gratiam, quæ ad salutem consequendam sufficit. Nec tamen propterea sine gravi scelere contemni potest, ut Trident. Sess. 14. de Extr. Unct. declarat Cap. 3. anathemate etiam in oppositum sentientes lato Can. 3. Inde jam antea in Concil. Constantiensi decretum est, ut de hæresi suspectus interrogetur: *num credat, quod Christianus contemnens susceptionem - - Extremæ Unctionis - - peccet mortaliter?* ac dein Concil. Colonienſe II. An. 1549. celebratum statuit: *ut si quis Sacramentum illud nobis ab Apost. Jacobo tantopere commendatum contempserit, Ecclesiastica careat sepultura.*

31 II. Quod igitur DD. controvertunt, ad præcepti Divini & Ecclesiastici necessitatem pertinet. Ac hujusmodi quidem  
de



de suscipienda Extr. Unctione præceptum dari contendunt Lud. Habert, le Droint, Tournely, Auctor Rei Sacram. & quidam e R<sup>l</sup>. alii pro se laudantes Magistrum sent. L. 4. dist. 23. item S. Bonavent. in eamd. dist. Contra præceptum hoc extare negant Suarez hic Disput. 44. Sect. 1. Estius, Sylvius, Sanbovius, Laymon, Coninck, imo (ut Suarez ait) Doctorum communior cum D. Thoma in 4. dist. 23. qu. 1.

Mihi in controversa hac quaestione sentiendum videtur cum postremis, conformiter ad ea videlicet, quæ L. III. Disfert. II. §. II. de Confirm. necessit. disceptata sunt. Etenim Extremæ Unctionis necessitas & gravis obligatio ex præcepto seu Divino seu Ecclesiastico repeti non potest, nisi constet id genus præceptum extare; quod vero illud? a quo & quando latum? Certe quidquid ab adversæ sententiæ Patronis in hanc rem profertur, prorsus congrue exponitur de consilio & convenientia; aut obligatione levi, ne nimirum per negligentiam omittatur: vel demum de obligatione ea, qua obstringuntur Ecclesiæ Ministri. Si quid enim omnium cumprimis favere videtur Adversariis, est illud Concil. Colonienfis I. An. 1536. habiti statutum: *sacra Unctio impendatur cum expositione mandati Apostolici*; at enim hoc utique mandatum non aliud est, quam, *Infirmatur quis in vobis? inducat &c.* verum cum hæc verba prorsus similiter efferantur, ac illa ibid. præmissa, *tristatur aliquis vestrum? oret; æquo animo est? psallat*: sicut ex his non recte infertur *mandatum Apostolicum* graviter obligans, sic nec ex prioribus. Non nego interim imo, negligentiam, qua Sacramenti hujus susceptio omittitur, esse peccatum veniale: cum sit quædam salutis incuria, & boni spiritualis prodigalitas eo præsertim tempore, quod periculi est plenum; 2do, aliquando infirmum *per accidens* graviter etiam obligari, e. g. si aliud Sacramentum suscipere nequeat, & de sua dispositione ac salute sit dubius: vel etiam

ratione secuturi gravis scandali &c. At in hanc rem plura deferri possunt ex supra laud. §. II. de Confirmat. necessitate.

### De iteratione Extremæ Uñctionis.

- 32 I. **V**eterum quidam circa Extr. Uñctionis iterationem variarunt tam in opinione, quam in ritu. Quamvis enim communis semper esset sententia, iterari posse hoc Sacramentum: negarunt id nihilominus aliqui Sec. XII. cum Goffrido Vindocin. L. 2. Ep. 19. ad Ivonem Carnot. ac hic ipse Ivo Ep. 20. ad eund. Goffridum, argumento a poenitentia publica & Confirmatione ducto. Quod vero ad iterationis ritum attinet: olim in aliquibus Ecclesiis præscriptum fuisse, ut eadem infirmitate æger per septem dies oleo infirmorum ungeretur, constat ex Sacramentario Gregorii apud Menard. & pluribus LL. Ritualibus antiquis, ut observat Cl. Martene L. 1. de antiq. Eccl. Rit. C. 7. Contra apud alios mos invaluerat, nemini intra ejusdem anni spatium sacrum hoc Uñctionis remedium bis applicandi: id quod nominatim de Clavallensium Ordine refert Petrus Cantor in Summa C. 132. & de Turonensi Ecclesia laud. Martene, ex ejusdem antiquissimo MSS. hoc carmen recitans:

*Non nisi mense semel tantum communicet æger;*

*Hic idem solo non bis ungatur in anno.*

- 33 II. Nunc jam a pluribus Seculis de iteratione hac nullus est controversiæ locus, communi videlicet Ecclesiarum omnium sensu & praxi docente: perinde ac Sacramenta alia, quæ characterem non imprimunt, hoc quoque iterationis esse capax; nec tamen nisi semel conferendum infirmo, in eadem ægritudine ac eodem statu constituto; unde si idem ab hac recreatus in aliam aut similem postea incidat, rursus ungi potest.

potest. Ita Trident. Sess. 14. de Extr. Unct. Cap. 3. *quod si*, inquit, *infirmi post susceptam hanc unctionem convaluerint, iterum Sacramenti hujus subsidio juvari poterunt, cum in aliud simile vitæ discrimen inciderint.* Idem legitur in Catech. Pir V. & Rituali Rom. Pauli V. ac plane consonat verbis Jacobi indefinite dicentis, *infirmatur quis in vobis? inducat Presbyteros &c.*

Nec oppositum argui potest a Pœnitentia publica; neque enim hæc erat Sacramentum: quodque non iteraretur, id solius erat Ecclesiasticæ disciplinæ. Non etiam a Baptismo, Confirmatione, & Ordine; hæc quippe Sacramenta, utpote ad consecrandum destinata, imprimunt characterem: non est igitur cur in eodem subjecto repetantur, imo nec repeti possunt, cum consecratio tamdiu perseverat, quamdiu extant res vel personæ consecratæ. At vero Extr. Unctionis alia est conditio: nam, ut S. Thom. L. 4. contra Gent. C. 73. notat, *hujus Sacramenti inunctio ordinatur ad sanandum; medicina autem sanativa toties iterari debet, quoties infirmitas iteratur.*

## DISSERTATIO III.

### DE MINISTRO ET SUBJECTO EXTR. UNCTIONIS.

#### §. I.

#### *Quis Extr. Unctionis sit Minister?*

**D**uplex de Ministro Extr. Unctionis controversia resolventa est; quarum cum altera ex Novatorum errore, altera simul ex varia Ecclesiæ disciplina originem ducat, de his præfari juverit.

## Novatorum error, &amp; varia Ecclesiæ disciplina.

34 I. **Q**uamvis Novatores non admittant sacram Unctionem, de qua agimus, esse Sacramentum : ne quid tamen in Ecclesiæ doctrina absque cavillis prætereant, insectantur Catholicos imo, quod per *Presbyteros* a Jacobo commemoratos intelligant Sacerdotes, & non potius *atate Seniores* ; 2do, quod putent Unctionem hanc posse perfici ab uno, cum tamen Jacobus voce *Presbyteros* pluralem numerum designet. In utroque autem hoc sequuntur duces suos Lutherum & Calvinum. Hic Instit. L. 4. C. 19. *Jacobus vult infirmum ungi a Senioribus Ecclesiæ: isti (Catholici) unctionem non admittunt nisi Sacrificorum.* - - *Quod apud Jacobum Presbyteros interpretantur Sacerdotes, & pluralem numerum ad decorem positum nungantur, frivolum est &c.* Prior vero L. de Cap. Babil. *neque hoc servant ibi, quod Apostolus jubet, Presbyteros Ecclesiæ induci, & super infirmum orari : vix unus Sacerdotulus mittitur, cum Apostolus velit multos adesse, - - quanquam incertum est mihi, an Sacerdotes velit intelligi, cum dicat Presbyteros, id est, Seniores.*

35 II. Jam inde a primordio Ecclesiæ creditum est, vel unum Sacerdotem sufficere ad perficiendum Extr. Unctionis Sacramentum. Varia nihilominus fuit circa hoc ministerium disciplina ; ut enim principio communiter apud Latinos unus duntaxat Sacerdos ad illud adhiberetur, subinde tamen pluralitas invaluit. Colligitur vero id ex Sacramentario Gregorii apud Menardum, Codicibus item Ratoldiano, Tiliano, Remigio-Rhemenfi &c. Idem probat Waldensium Sec. XII. criminatio, adversus pluralitatem Sacerdotum, pro ungendo infirmo convenientium, ut testatur Reynerus L. de Waldensibus. Eandem praxim Sec. XIII. viguisse constat ex D. Thoma L. 4. contra Gent. C. 73. ubi, *competit inquit, huic Sacramento, quod*

quod multi Sacerdotes interfint &c. Nunc, etsi plures interesse possint, usus tamen obtinuit, ut unius ministerio tota functio sacra peragatur. Græci contra etiamnum veterem morem retinent: certe eorum Euchologium apud Goarium septem nominatim Sacerdotes requirit; quod ipsum refert Arcudius L. 5. Concord. C. 3. Allatius de Consens. Eccl. C. 16. & constat ex Simeonis Thessalon. L. de Sacram. in quo de Extr. Unct. hæc habet: *quamvis non scriptus (numerus Sacerdotum) necessarium tamen est antiquam observare Traditionem; & sint quidem septem, ut veteris moris est: si vero necessitas fuerit, tres sint ad minus.*

Atque ex his duplex enascitur quæstio: primum, an Extr. Unctionis Minister sit tantum Sacerdos? deinde, an vel unus sufficiat ad valide ministrandam illam?

## ASSERTIO.

*Solus Sacerdos est Minister Extr. Unctionis; vel unus autem sufficit.*

**P**Ars I. fide certa est; præterquam quod enim doctrinam hanc Trident. Sess. 14. de Extr. Unct. Cap. 3. aperte declaraverit, eandem etiam deinde ibid. Can. 4. expressis verbis contra Novatores definivit. Fundatur autem in ipsis Jacobi verbis, *inducat Presbyteros Ecclesiæ &c.* quibus, non ætate Seniores, sed Sacerdotes tantum intelligi certum est tum ideo, quod dicatur nominatim *Ecclesiæ Presbyteros*: tum quod huic Presbyterorum ministerio attribuatur remissio peccatorum; quod utrumque solis Sacerdotibus est proprium. Sed cum primis hoc sensu accipienda esse Jacobi verba constat ex Origene, Chrysostomo, Innocentio I. aliisque Patribus jam Dissert. I. §. I. laudatis; item perpetua Ecclesiæ praxi, neque enim unquam aliis, quam Sacerdotibus, Sacramenti hujus

jus ministerium est permissum, ut claro in hanc rem testimonio sunt omnes LL. Rituales tam Orientalis, quam Occidentalis Ecclesiæ.

- 37 At num, inquires, Sacerdos quilibet hoc Sacramentum ministrare possit? valide equidem quilibet; nam ad id satis est habere potestatem Ordinis; non tamen licite; nisi habeat jurisdictionem ordinariam vel delegatam, ut constat ex Clementina I. *de Privilegiis*, in qua sub excommunicationis pœna vetantur Regulares Extr. Unctionem conferre sine licentia Parochi. Quanquam & istud non nisi de eo, quod *regulariter* fieri debet, intelligendum sit; nam communis & certa est (contra Navarrum in Manuali C. 27.) sententia: Clementina hac non comprehendit casum necessitatis, qualis esset, si infirmo in extremis posito abesset Parochus; secus enim lex a Clemente lata non esset ordinatio rationis in bonum commune, sed potius (ut dicitur) in destructionem.

- 38 Pars II. etiam controversi non potest vel ideo, quod nulum sit plures Ministros requirendi fundamentum, ut patebit ex Resp. ad Obj. N. 41. Quin non requiri plures, unumque etiam sufficere multa evincunt. Certe Innocent. I. in Ep. ad Decent. declarat, etiam Episcopum esse hujus Sacramenti Ministrum: nec tamen exigit, ut is alios in partem ministerii advocet; quod ipsum legere est in Concilio Bracarense Can. 51. & Pœnitentiali Theodori Ep. Cantuar. Non desunt etiam complura ab uno duntaxat Presbytero jam olim ministratæ Extr. Unctionis exempla; ut ex vita S. Eugendi, qui Sec. VI. floruit: ex vita S. Mauræ, quam solus Prudentius Tricastin. extremum unxit: hisque similia alia, quæ videri possunt apud erud. Martene L. 1. de ant. Ecc. Rit. C. 7. Invisissimum porro (nihil ut dicamus de moderna Ecclesiæ Latine disciplina) argumentum est ex antiquis LL. Ritualibus, ut *Baptismi* Viennensi, *Manuali* Laudunensi, *Catalaunensi*, *Ambianensi*,

nenſi, pluribusque aliis, quorum partem Launojus Oper. ſuo-  
rum Tom. I. edidit; in his nimirum uni duntaxat Sacerdoti  
ſacrum hoc Unctionis miniſterium committitur, nulla plurium  
mentionem injecta. Quibus denique omnibus accedunt clara  
duorum Rom. Pontificum effata. Alexander III. Cap. *Quaſi-  
vir.* de Verb. ſignif. *Sacerdos*, inquit, *uno praſente Clerico, &  
etiam ſolus poteſt infirmum ungere.* BENEDICTUS XIV. au-  
tem hodie regnans S. P. in Conſtit. *Eſt Paſtoralis*, ſuper riti-  
bus Græcorum §. 5. N. 3. declarat: *Nec reſert, utrum eadem  
Extr. Unctio per unum vel plures Presbyteros fiat, ubi hujus-  
modi viget conſuetudo; dummodo credant & aſſerant, illud Sa-  
cramentum ſervata debita materia & forma ab uno Presbytero  
valide & licite confici.*

Obſervandum eſt autem in Aſſert. dici, *ſufficit*: nam ex 39  
veteri Latinorum, ac hodierna etiam Græcorum diſciplina,  
quin & paulo ante recitatis BENEDICTI XIV. verbis cer-  
tum eſt, plures quoque Sacerdotes in hujus Sacramenti mini-  
ſterio poſſe concurrere. Quo caſu, ſi quæras, quomodo a  
pluribus Sacerdotibus confici poſſit Extr. Unctionis Sacramen-  
tum? expeditum eſt reſponſum ex communi DD. ſententia,  
& nunc laudati S. P. Conſtit. *Eſt Paſtoralis*, cit. §. 5. ubi  
N. 4. ait: *idem Sacerdos materiam adhibere, formamque pro-  
nuntiare reſpectively debet; ac propterea qui ungit idem dicat for-  
mam reſpondentem: nec alius ungat, & alius formam pro-  
nuntiet.*

Quod igitur eſt, inquires, in id genus caſu reliquorum  
Sacerdotum munus? ex more apud veteres ut plurimum re-  
cepto iſtud eſt: ut Miniſtrum principale, qui ungit videli-  
cet, & formam proſert, adjuvent in ritu accidentali, ut eſt  
Pſalmorum & Orationum recitatio, impoſitio manuum, abſter-  
ſio olei &c. Fateor interim apud veteres hac in re non unam  
fuiſſe diſciplinam, ut colligitur ex Gregoriani Sacramentarii

R. P. Muſzka Tom. II. de Sacr.

R r r

variis

variis Codicibus, Rodradiano, Ratoldiano, & Tiliano apud Menardum, ac alios. Aliquando nimirum leguntur singuli unxisse easdem omnes corporis partes, & ungendo formam protulisse: ac tum censendum est singulas unctiones fuisse sacramentales ita, ut ex omnibus unum coalésceret Sacramentum. Alias ab uno fiebat unctio cum forma illi respondente: reliquis urgentibus duntaxat sine enuntiatione sacramentalis formæ, quamvis & ipsi aliquas preces funderent; quo casu sola unctio prima fuit sacramentalis, cæteræ autem mere cæremoniales. Atque hoc postremo sensu accipiendum videtur illud, quod in Codice Rodradi & Tiliano legitur: *Et supplicando dum ungitur infirmus, dicat unus hanc orationem*; unde assentiri non possum Cl. Menardo, cum ex hoc loco in Sacram. Gregor. Nota 911. infert: *Notandum, ungente Sacerdote formam ab alio proferri*; minus vero illi, quod ibid. continuo subjicit: *quod favet eorum opinioni, qui dicunt hunc validum esse Baptismum, si uno verba proferente alter mergat, aut aquam infundat*. De Græorum ritu hodie etiam apud eos usitato dicetur Dif. fert. IV. §. II.

### Respondetur ad Objecta.

- 40 **Q**UO præcipue adversus I. partem Assertionis pugnant Novatores, est: quod Jacobus unctionem hanc fieri velit per *Presbyteros*, qua voce *Seniores atate* designari ajunt; item Innocentii I. ad Decent. Epistola, in qua declarat, omnes Christianos in sua aut suorum necessitate uti posse oleo benedicto ad ungendum. Verum ad hæc ex jam alias dictis expeditum est responsum; ad primum quidem ex N. 36. ad alterum vero ex N. 7. Versu, *At inquires &c.* eodemque plane sensu, quo hic Innocentii verba exposuimus, intelligendæ sunt unctiones, quibus Anachoretæ *Ægypti*, S. Genovefa, aliique  
Laici



Laici olim ægrotis sanitatem restituisse leguntur. Certe & hodie in eum finem Laicos novimus uti aqua benedicta aut sacro aliquo oleo, quin ullus tamen ritus hujusmodi Sacramentis accensendos putet. Sed nimirum præter hæc opponi potest;

I. Ven. Beda in Cap. 5. Jacobi Epist. monet infirmos, *ut Seniorum adjutorio curari se meminerint, neque ad juniores, minusque doctos causam suam imbecillitatis deferant*; censuit ergo nomine *Presbyteri* in laud. Ep. intelligi ætate provectionem. Certe

II. Hæc ipsa Bedæ verba Thomas Waldensis L. 2. de Sacram. C. 163. expendens, non dubitavit asserere: in defectu Sacerdotis quemlibet Christianum posse Extr. Unctionem ministrare non secus, ac in *extremæ necessitatis articulo* liceat *christiana vetula baptizare*. Jam vero

III. Thomæ Wald. auctoritas eo magis urget, quod opinionem hanc suam confirmet ex Augustino generatim dicente de ægroto: *corpusculum suum ungat, ut illud -- impleatur in eo, Infirmatur quis &c.* quodque Martinus V. laud. L. 2. de Sacram. examini subjecerit, ac dein approbaverit, ut constat ex ejus Ep. ad Thomam Wald. data apud Launonum Tom. 1.

Resp. ad I. Beda illud Jacobi, *infirmatur quis &c.* cum altero, *confitemini ergo &c.* conjungens, totum hunc contextum exponit de Extr. Unctione simul & Pœnit. Sacramento; inde recte monet, ad Sacramenta hæc simul ministrari solita advocandos esse Seniores, utpote magis expertos: quo nimirum æger in extremo vitæ periculo securius adjuvetur. Cæterum isthic ab eo *Seniorum* nomine intelligi Sacerdotes, satis declarat ipse, cum ibid. paulo post recitatis Jacobi verbis, *orent super eum ungentes &c.* adjiciat: *Hoc & Apostolos fecisse in Evangelio legimus, & nunc Ecclesiæ consuetudo te-*

net, ut infirmi oleo consecrato ungantur a Presbyteris &c. En! nominat Apostolos, qui erant Sacerdotes; laudat *Eccl: sic consuetudinem*: cerie autem ætate illius, hoc est Sec. VIII. soli Sacerdotes ad hoc ministerium adhibebantur, ut constat ex Ordine Rom.

Resp. ad II. Putant aliqui Waldensem isthic loqui de unctione, quæ non sit Sacramentum, sed mera cæremonia, qua infirmus testetur votum Sacramenti Extr. unctionis: ad eum videlicet modum, sicut olim in extremo vitæ fiebat Confessio Diaconis, aut etiam laicis; ut adeo comparatio, quam a Baptismo affert, non spectet rationem Sacramenti, sed quandam duntaxat ritus similitudinem. Quod si autem re ipsa eo sensu, quem habet Objectio, locutus est: fateri oportet, mentem Ven. Bedæ eum non fuisse assecutum, nec recte sensisse, deferendam proinde ejus opinionem. Unde

Resp. ad III. Augustinus non favet Waldensi, tum quod verba nomine ejus recitata sint desumpta ex L. de Rectitud. Cathol. conversat. qui passim pro supposito habetur; tum etiam, quod eo loci plures cum Estio ex emendationibus Codicibus legendum putent, *ungatur*: non autem, *ungat*. Non etiam patrocinator approbatio a Martino S. P. facta: approbatus quippe est laud. L. potissimum ob egregie in eo confutatos Wicleffitas & Hussitas; quod vero memorata opinio non sit expuncta, in causa esse potuit, quia mitiorem etiam expositionem patitur, de qua dictum in Resp. ad II.

41 Assertionis parti II. adversari videtur I. ipse D. Jacobus sæpe laud. C. 5. plures Sacerdotes requirens, cum ait: *Inducat Presbyteros*. Ac revera hac voce

II. Pluralem numerum eum intellexisse, argumento est vetus Ecclesiæ universæ, ac moderna etiam Græcorum disciplina, non in alio, quam Jacobi verbis fundata.

Resp.

Resp. ad I. Dist. assertum: Jacobus Sacerdotes plures requirit, idque ex necessitate Sacramenti N. ex quadam convenientia, Transf. sic tamen; ut hæc ipsa Ecclesiæ arbitrio subja-  
ceat C. fecus N. Nimirum summa auctoritas interpretandi Scripturas penes Ecclesiam est; hæc vero ex Jacobi verbis semper intellexit, pluralem Sacerdotum numerum in Sacramenti hujus ministerio non requiri jure divino, nec ad substantiam & valorem: sed rem esse meræ disciplinæ, quam, etsi convenientem, aliis ducta rationibus possit immutare, salva semper, quæ Sacramento debetur, reverentia. Illud vero, quod vocem *Presbyteros* obtrudant Novatores, frivolum est; quis enim nesciat, in S. Literis haud infrequenter pro singulari numero pluralem usurpari? Ita Matth. 27. latrones cum Christo crucifixi dicuntur ipsi improperasse: cum tamen id ab uno eorum duntaxat factum scribat Lucas in Evang. C. 23. Similiter Christus Luc. 17. leprosis dixit, *ostendite vos Sacerdotibus*: ex Lege interim satis erat, si leprosus se vel uni Sacerdoti ostenderet, ut constat ex Levit. C. 14. Plura id genus exempla vide apud Augustinum L. 3. de Consensu Evangelistarum C. 16.

Resp. ad II. tam veterem, quam hodiernam Græcorum disciplinam fundari quidem in Jacobi verbis, at non alio, quam paulo ante diximus, sensu intellectis; a nemine quippe recte credentium unquam existimatum est, propterea ad Extr. Unctionem ministrandam adhibendos esse plures Sacerdotes, quod fecus irritum fiat Sacramentum: ipsi certe moderni Græci non aliam ritus sui causam adferunt, quam convenientiam significationis mysticæ, quæ habetur in septenario Sacerdotum numero, ut constat ex Arcudio & Simeone Thessalon.

## §. II.

*Quibus ministrari possit Extr. Unctionis  
Sacramentum?*

**I**N Ecclesia Latina soli infirmi: in Græca etiam sani un-  
tur infirmorum oleo; hinc merito in quæstionem voca-  
tur hujus Sacramenti Subiectum.

## ASSERTIO.

*Soli infirmi sunt capaces suscipiendi Extr. Unctionis  
Sacramenti.*

- 42 **A**C infirmos quidem capaces esse hujus Sacramenti, satis  
aperte indicat Jacobus, cum dicit: *Infirmatur quis in  
vobis? inducat &c. & oratio fidei salvabit infirmum.* Ex iis-  
dem porro verbis simul deducitur solos infirmos esse capaces:  
nam hi duntaxat nominantur; nec constat aliunde ad sanos  
etiam hanc capacitatem extendi posse; imo unanimi (si Lu-  
dov. Habertum cum paucis excipiam) Doctorum sensu, &  
perpetua Ecclesiæ praxi valentes excluduntur a perceptione  
hujus Sacramenti. Quod si præterea ipsam Ecclesiæ de hoc  
argumento se declarantis mentem attendas penitus, plane in-  
dubitata evadit Assertio. Etenim Florent. in Decr. pro Ar-  
menis, *hoc Sacramentum*, inquit, *nisi infirmo, de cujus morte  
timetur, dari debet.* Et Trident. Sess. 14. de Extr. Unct.  
Cap. 1. hoc Sacramentum vocat *Unctionem infirmorum*; rur-  
sumque Cap. 3. *declaratur*, inquit, *esse hanc Unctionem infir-  
mis adhibendam, illis vero præsertim, qui tam periculose decum-  
bunt, ut in exitu viæ constituti videantur; unde & Sacramentum  
exeuntium nuncupatur.* Tridentini vero sensum pluribus ex-  
plicans ejusdem Catechismus jussu Pii V. editus, Tit. de Extr.  
Unct.

Unct. §. de Subjecto, ita habet. *Docendi sunt fideles, quamvis hoc Sacramentum ad omnes pertineat, quædam tamen hominum genera excipi, quibus administrandum non sit; ac primum excipiuntur, qui sano & firmo corpore sunt: iis enim Extr. Unctionem tribuendum non esse & Apostolus docet, cum inquit, Infirmatur quis in vobis? & ratio ostendit, siquidem ob eam rem instituta est, non modo ut animæ, sed etiam ut corpori medicinam afferat.* His consentiunt Occidentalis Ecclesiæ Ritualia omnia tam antiqua, quam moderna: de Orientalium sensu dicemus infra N. 44. & 45.

### Resolvitur Objectio.

**Q**ui fanos etiam hujus Sacramenti capaces esse opinantur, 43  
verba Jacobi de infirmis *positive* duntaxat, non *exclusive* intelligenda contendunt: præsertim cum ipsum Trident. nusquam aperte excludat fanos. At hæc profecto non urgent; nam

Resp. Jacobi verba exclusivo sensu accipi oportere satis probant ea, quæ pro Assertionem attulimus; certe Catech. Trident. hunc sensum ex Jacobi doctrina deducit. Idem dicendum de mente Tridentini: tum ob ejus apertam explicationem a laud. Catechismo factam; tum, quia Trident. intelligendum est conformiter ad Florentinum, quod in cit. Decr. fanos a perceptione hujus Sacramenti excludit. Denique sensus hic exclusivus vel ideo asserendus est: quod Jacobi verba ex se solos infirmos designent, nec aliunde ex sensu Ecclesiæ, vel ejus exemplo ostendi possit, etiam valentes esse subjectum capax. Sed nimirum adversus istud

Instant I. Verba Jacobi sensu duntaxat positivo accipiendi 44  
fundamentum præbent Græci, qui *non tantum infirmos, sed fanos quosque homines Extrema Unctione inungunt*, ut scribit  
Alla-

Allatius L. 3. de Consens. Eccl. C. 16. quod ipsum testatur Goarius in Not. ad Euchol. item Arcudius L. 5. de Extr. Unct. C. 4. & ult. addens: morem hunc non in aliquo tantum Græciæ angulo, sed ubique passim vigere. Urget vero hic Græcorum mos eo amplius, quod is a Latinis nunquam sit improbatus, ne quidem in Conc. Lugdunensi II. aut Florentino; imo Innocentius IV. videtur eum approbasse, cum in Epist. ad Episcopum Tusculanum id vetuerit tantum, *ne Sacerdotes Græcorum pro satisfactione pœnitentiæ unctionem aliquam solummodo injungant.*

Resp. Negari non posse hunc Græcorum morem; at num apud eos unctio sanis impensa pro vero habeatur Extr. Unctionis Sacramento, controversum est. Affirmat equidem Arcudius; at Goarius negat, cum quo & ipse existimo, unctiorem id genus pro sola duntaxat cæremonia a Græcis observari, ad eum videlicet modum, quo olim fideles se ipsos sacro infirmorum oleo ungebant, ac nunc quoque aqua benedicta utuntur. Estque in hanc rem grave argumentum, quod præcipui Græcorum Scriptores Extr. Unctionis Sacramentum pro infirmis institutum profiteantur: eidemque pro effectu sanitatem corporis attribuant: hanc ipsam imo pro suis unctis deprecantur expressis in forma sacramentali verbis. Scriptores vero hi sunt: Simeon Thessalon. Gregorius Proto-Syncellus, Meletius Syrigus, Gabriel Philadelph. alique apud Auctorem Rei Sacram. L. 7. Quæst. 5. §. 1. laudati, ex quibus ipse concludit, cum Goario esse in præsentī sentiendum. Atque hinc ultro consequitur responsum ad Ecclesiæ Latinæ silentium: cum enim huic semper fuerit persuasum, Extr. Unctionis Sacramentum solis infirmis esse conferendum, nec tamen memoratum Græcorum ritum unquam reprehenderit, & ipsa utique judicavit eum meram esse cæremoniam, ac pro tali duntaxat a Græcis adhiberi. Quod vero ad Innocentium attinet: in cit. Ep. id ei duntaxat erat propositum, ut

tolle.

tolleret abusum quorundam, solam unctionem in satisfactionem poenitentibus imponentium. Non nego interim fuisse Græcorum aliquos, qui, processu temporis invalescente Schismate, etiam valentium unctionem pro Sacramento haberent; at privatorum error Ecclesiæ appingi non debet. Nec officit, cum

Instant II. in hoc ritu Græcos universim observare materiam, formam, & Ministrum Sacramenti Extr. Unctionis; universim igitur in Græca Ecclesia ritus hic existimatur esse Sacramentum. Etenim

Resp. Vel ideo, quod Græci judicent (ut jam diximus) Extr. Unctionem esse institutam pro infirmis, sanorum unctionem nequeunt existimare esse Sacramentum defectu Subjecti capaxis. Cæterum nec formam sacramentalem eos in hoc ritu adhibere, mihi plane persuasum est: nam in Græca Ecclesia (teste Gabriele Philadelph. in Op. de Sacram.) *forma hujus Sacramenti sunt verba, quæ a Sacerdote super ægros annuntiantur, quæ quidem vim habent dimittendi peccata, sanandique morbos eorum &c.* per eandem formam fieri petitionem pro restitutione sanitatis constat ex forma a nobis jam alias relata; jam vero, quid nisi ridiculum foret? formam hujusmodi deprecatoriam supra valentem recitari.

### Corollarium.

de conditione infirmi, cui danda sit Extr.

Unctio.

Conditio hæc nobis abunde innotescit ex Florentino & Tridentino. Illud in Decr. pro Arm. ait: *subjectum hujus Sacramenti esse infirmum, de cujus morte timetur*; hoc vero Sess. 14. de Extr. Unct. Cap. 3. declarat, *hanc Unctionem infirmis*

R. P. Muszka Tom. II. de Sacr.

S s s

firms

*firmis adhibendam, illis vero præsertim, qui tam periculose decumbunt, ut in exitu vitæ constituti videantur. Certum igitur est, Extr. Unctionem ministrandam esse non tantum infirmis jam jam morituris: sed etiam ex gravi morbo decumbentibus, ita ut de morte eorum timeatur; etsi ea nondum sit proxima. Hinc Catech. Rom. & Ritualia passim monent, ne expectetur ultimum periculum: quin potius in eo Pastores evigilent, ut infirmis, integra adhuc mente & sensu præditis, Sacramentum hoc conferant. In censum porro id genus infirmorum veniunt etiam grandævi illi, qui præ senio (tametsi nulla accedat infirmitas) in dies morituri creduntur; ipsa enim hæc ingravescens ætas, eamque secuta virium defectio, infirmitas est morti proxima. Contra infantes nondum rationis capaces, licet gravi ægitudine affligantur, ungendi non sunt: cum nullæ in his supersint peccati reliquæ, quas sacra hæc unctio abstergat. Neque ungendi sunt adulti illi, qui cætera sano sunt corpore, quamvis probabile, aut etiam certum vitæ periculum adeant; ut sunt navigaturi, prælium commissuri, capite plebendi &c. cujus ratio ex jam dictis clara est.*

Copiosius hæc omnia notantur in Catech. Concilii Trident. & passim LL. Ritualibus omnibus. Totam autem doctrinam huc pertinentem S. Carolus Borom. in Conc. Mediolanensi IV. Tit. 6. hoc brevi Decreto est complexus: *Párochus Extr. Unctionis Sacramentum sicut his ministrare debet, adultis scilicet periculose agrotantibus, propeque moribundis, senio confectis etiam non agrotis, in diem morituris; ita istis ne ministret, nempe pueris rationis usu carentibus, mulieribus in partu laborantibus, ad bellum proficiscentibus, navigantibus, peregrinantibus, & iis, qui mox ultimo supplicio multandi sunt.*

DISSER-



## DISSERTATIO IV.

DE CÆREMONIIS EXTREMÆ  
UNCTIONIS.

## §. I.

*Qui sint ritus ad Extremæ Unctionis materiam  
pertinentes?*

JAM supra Dissert. I. §. II. dictum est, ex disciplina veteri, eaque constanter observata Sacramentum hoc ministrandum esse oleo olivarum benedicto; atque in hoc Græci etiam consentiunt, nisi quod circa benedictionem diversi quidpiam a Latinis habeant: quod ipsum nunc exponendum erit.

Ritus benedictionis olei apud Latinos.

I. Latini ungunt infirmos solum oleo per Episcopum consecrato, id quod satis constat ex Innocentii I. Ep. ad Decent. Sacramentario Gregorii, Ritualibus demum tam antiquis quam modernis omnibus. Est autem ritus hujus congrua ratio, quam reddit Estius in 4. dist. 23. §. 8. ubi ait: *Consecratur oleum, ad significandum, quod non suapte natura, sed Spiritus S. virtute morbis animæ medeatur; per Episcopum vero fit ea consecratio, ut significetur omnem virtutem Sacramentorum derivari ex meritis Christi, cujus personam precipue gerit Episcopus.*

Ad tempus porro consecrationis hujus quod attinet, peragitur ea Maj. hebdom. Feriæ V. sub ipso Missæ Sacrificio. Nimirum ante illa Canonis verba, *per quem hæc omnia, Domine,*

*semper bona creas* &c. ad mensam in Presbyterio paratam confidens Episcopus facie ad altare conversa, primum exorcizat oleum, tum illud benedicit per Orationem, qua petitur, ut hæc olivæ pinguedo Spiritus S. benedictione sit unctis tutamen mentis & corporis, ad evacuandos omnes dolores, omnes infirmitates, omnemque ægritudinem mentis & corporis. Ita Pontificale Rom. Clementis VIII. cui consonat Sacramentarium Gregorii apud Menardum, id solum diversitatis habens: quod in eo referatur benedictio fieri ab Episcopo simul & Sacerdotibus adstantibus, & quidem post Canonis verba, *accipit panem in sanctas ac venerabiles manus suas.*

- 48 II. Quia vero oleum hoc semel duntaxat intra annum benedicitur, ac facile evenit, ut propter frequentioresem usum deficiat, in id genus casu oleum non consecratum misceri potest cum consecrato: qua mixtione & illud consecrationem contrahit. Habetur istud Can. *quod in dubiis*, de Consecr. Eccl. non negamus, *quin oleum non consecratum consecrato possit oleo commisceri.* Imo mixtio hæc præscribitur nominatim in Rituali Rom. Pauli V. adjecta nihilominus cautela: *si aliud benedictum haberi nequeat*; item, ut modico oleo non benedicto minori quantitate superinfuso, quod ex benedicto est reliquum, reparetur. Idem totidem verbis legitur in Rituali Ecclesiæ nostræ Viennensis, & passim in aliis.

### Ejusdem benedictionis ritus apud Græcos.

- 49 **Q**uamvis Græci non rejiciant oleum ab Episcopo consecratum: ex ritu nihilominus eorum benedicitur illud a septem (si id commode fieri possit) simplicibus Presbyteris, iis ipsis nimirum, qui ad ungendum ægrum conveniunt. Atque hunc Ecclesiæ Græcæ morem esse prorsus antiquum, testimonio sunt vel Euchologia, ante mille & amplius annos con-

conscripta. Verum, quo hæc Græcorum disciplina, ejusdemque ratio innotescat certius, juverit ipsum Goarium audire differentem. Jam vero is in Notis ad Eucholog. sub Tit. *Officium olei sancti*, postquam retulit, ex ritu Græcorum Feria V. in Cæna Dom: ipsum Episcopum oleum benedicere, at totum illud eadem die consumi, ita deinde sermonem prosequitur. *Cuncti enim accessuri ad S. Synaxim in peccatorum expiationem se se ungendos offerunt: & Episcopus ipse primus omnium Oeconomi manu unctionem suscipit, quem deinde omnes alii sequuntur. Hac itaque unctione, quantumvis tantum ceremoniali, cum oleum totum consumitur, facultatem illud denuo consecrandi privato cuicumque Parocho Pontifices tacite ex antiquo more videntur remittere &c.* Ibidem præterea refert totum benedictionis hujus Officium; ex quo certum est, eam regulariter peragi a septem Sacerdotibus in Ecclesia, aut etiam ægroti domo: & quidem in ipso procinctu ad ministrandum Extr. Unctionis mysterium: ac demum multo longiore, ac apud nos fiat, precum apparatu.

Sed nec Orientales reliqui quoad benedictionis Ministerium a Græcis dissident; id vero iis præterea peculiare, quod oleum in lampade septem radiis & elychniis totidem instructa benedicant, singuli videlicet Sacerdotes singulos radios, qui sub ipsa consecratione accenduntur. Ritus, quo tota hæc sacra functio peragitur, admodum prolixus est, constans nimirum multarum Orationum, Psalmorum, Epistolarum & Evangeliorum recitatione. Vide Auctorem Perp. Fid. Tom. 5. L. 5. C. 2.

## §. II.

*Quo ritu ipsum Extr. Unctionis Sacramentum ministraretur?*

**E**T isthic rursus Latinam inter & Græcam Ecclesiam diversa est disciplina, ut ex ritu cuique proprio mox referendo patebit.

**Ritus Extr. Unctionis apud Latinos.**

50 I. **O**Lim in Ecclesia Latina post Sacramentum Pœnit. conferebatur Extr. Unctio, ac tum demum sacro Eucharistiæ Viatico æger reficiebatur, ut constat ex Sacrament. Gregorii, Libro Pœnitentiali Theodori Cantuar. Aquisgranensi & Moguntino Seculi IX. Conciliis. Disciplina hæc Sec. XIII. mutari cœpit, subindeque mos invaluit Eucharistiæ ministrationem præmittendi Extremæ Unctioni. Inde Rit. Rom. illud inprimis, inquit, ex generali Ecclesiæ consuetudine observandum est, ut si tempus & infirmi conditio permittat, ante Extr. Unctionem Pœnitentiæ & Eucharistiæ Sacramenta infirmis præbeantur. Neque tamen istud in legem universalem abiit; nam Card. de Noailles Archiep. Parisien. in suo L. Rituali commendat, ut prior disciplina restituatur, quod & a compluribus Galliarum Episcopis factum novimus. Regiones nostræ, ac etiam partem maximam aliæ Ritualis Romani præscripto insistant.

51 II. Quocunque interim ordine ministraretur Extr. Unctio, ex antiquissimo Ecclesiæ more (si tempus admittat) sacræ Unctioni præmittuntur septem de pœnitentia Psalmi, Lytaniæ, & preces quædam; id quod præscriptum legitur in plurimis  
Ritua-

Ritualibus LL. tam antiquis quam modernis. In plurimis inquam: nam licet omnes hunc precationum ritum commendent, in tempore nihilominus earum variant. Ita juxta Rituale Parisiense septem Psalmi recitari possunt eundo ad infirmum; juxta Narbonense & Tolosanum interferendi sunt unktionibus; juxta Sueffionense dicuntur post peractas unctiones &c. Neque hoc Majores nostri contenti erant: ad certius excitandum præterea pœnitentiæ motum ante S. Unctionem ægrotis imponebant cinerem & cilicium; vel eos jam unctos super cilicium cineribus conspersum collocabant; aut denique supra pectus eorum cinis in formam crucis spangebatur. Quam in rem testimonio sunt complures vel Seculo XVI. editi LL. Rituales, ut Anicensis, Noviomensis, Rotomagensis &c. Nunc jam triste hoc ac humile officium exolevit; at Pœnit. Psalmorum recitatio etiamnum (si per tempus liceat) observanda est: cum non tantum in Romano, sed & omnibus Ecclesiarum particularium Ritualibus præcipiatur, aut saltem commendetur.

III. Atque his ritus instar præparatorii præmissis, sequitur Unctio in modum crucis cum præscripta forma unctis partibus respondente, nempe: *Per istam S. Unctionem &c.* tum adjiciuntur Orationes quædam cum impositione manuum, ac demum infirmo datur benedictio. Circa partes porro ungendas jam inde a principio varia fuit disciplina: imo hodie etiam non una est Ecclesiarum praxis. In Sacramentario Greg. apud Menardum præscribuntur ungendi tantum quinque sensus; in Codice Rotaldi præterea collum, pectus, & Scapulæ; in Codice Remigio - Rhemensi etiam tempora; in Eugenii Decr. pro Arm. uti & Rituali Rom. Pauli V. oculi, aures, nares, os, manus, pedes, & renes. Atque hoc possumus in moderna praxi potissimum obtinet: nisi quod ex quarundam Ecclesiarum ritu in viris perinde ac foeminis  
loco

loco renum pectus ungatur; vide Rituale nostrum Viennense, Parisiense &c. in quibus simul ex Rituali Rom. additur: Presbyterorum manus non interius, sed exterius ungendas esse, idque ex causa, quam insinuat Anonymi carmen ex vetusto MSS. Codice a Cl. Martene relatum:

*Presbyteri palmas non intus, sed foris ungas;  
Dicunt Doctores, quod eas non ungere fas sit,  
Quas unxit Præsul, dum Presbyterum faciebat.*

- 53 IV. Quantumvis autem regulariter quinque saltem sensus ungendi sint, cum in hoc conspirent omnia Ritualia, antiqua non minus ac moderna: in certis attamen casibus permittitur ministrari hoc Sacramentum vel unius partis unctione. Id genus casus sunt: cum præ mortis instantis periculo omnes unctiones perfici nequeunt, vel cum justus est contagionis metus. De primo Rituale Parisiense ita statuit: *si non possit super infirmum fieri nisi unica unctio, ungatur oculus, vel aliud sensuum organum, & cæteris precibus prætermittis dicatur: Per istam sacri olei unctionem, & suam piissimam misericordiam indulgeat tibi Deus, quidquid peccasti per sensus.* De casu autem altero idem præscribitur, præter Ritualia alia, in nostro Viennensi his verbis: *In morbis contagiosis & peste grassante, ut periculum vitetur, sufficit inungi organum sensus magis ad unctionem expositum ac detestum dicendo: Per istam S. Unctionem - - indulgeat tibi Deus, quidquid deliquisti per visum, auditum, odoratum gustum, tactum & gressum, in nomine Patris &c.* Quæ quidem argumentum præbent cum sæpe nobis laud. BENEDICTO XIV. in Tract. de Synodo Dioecesana L. 7. judicandi: unctionem quinque sensuum, tametsi ea ad Extremæ Unctionis integritatem pertineat, ad ejusdem tamen substantiam & Sacramenti valorem non esse necessariam.

Ritus

## Ritus Extr. Unctionis apud Græcos.

**Q**Uæ nos inter & Græcos in administrando Extr. Unctionis Sacramento sit diversitas, magnam partem constat ex jam præmissis tribus Dissertationibus; inde isthic pauca duntaxat, quæ præterea illis peculiariora sunt, addenda habemus.

Ac I. quidem occurrit dicendum de loco: tametsi enim <sup>54</sup> communiter in domo infirmi privata, non raro tamen etiam in ipsa Ecclesia sacro Extr. Unctionis ministerio defunguntur. Utriusque hujus testem habemus Goarium in Notis ad Eucholog. Tit. *Officium S. olei*, ubi hæc scribit: *gravi afflicto agitudine, officio præsentis super eos recitato, unanimi cum Latinis consensu, in domibus Græci ungunt; mox vero addit, eam esse quorundam pietatem, ut aliorum ope & manibus ad Ecclesiam se deferri faciant, ibique plurium nonnunquam dierum spatio in Catechumenis jaceant, pernoctent, morentur, & sacra tandem unctione sibi remedium exposcant.* Id quod eo facilius a Græcis observari potest, quod Sacramentum hoc ministrent ægrotis, etiam non periculose decumbentibus.

II. Extremæ Unctioni non præmittunt Eucharistiæ Via-<sup>55</sup>ticum: verum post Pœnit. Sacramentum continuo procedunt ad ungendum ægrum, nec nisi unctione peracta sacro Viatice eum communiunt. Unctionis porro ritum antecedit proxima Psalmorum, Orationum & sacrarum lectionum recitatio, manuum, quin etiam Libri Evangeliorum super caput infirmi impositio. Ipsa vero demum S. Unctio regulariter a septem Sacerdotibus ita perficitur, ut, interposita Psalmorum & aliarum precum recitatione, singuli partes ungant singulas, formamque etiam singuli pronuntient: ut constet ex Euchologio, &

Notis Goarii loco supra cit. At, quæ nominatim ex ritu Græcorum ungendæ sint partes, teste eodem Goario, nusquam *Euchologium* aperit. Arcudius L. 5. de Extr. Unct. C. 7. ait, *Sacerdotes græcos ungere frontem, mentum, ambas genas, deinde pectus, tum manus, idque ex utraque parte, postremo pedes. Simeon Thessalonic. in L. de Sacram. ungit Sacerdos oleo ad modum crucis, inquit, ipsius (ægri scilicet) frontem ob contentas in ea cogitationes; faciem quoque inungit propter sensuum organa; postremo manus a pravis cogitationibus & operibus tum expians; sanctoque oleo & signo crucis muniens, & perfecte sanctificans;* ubi vides nullam fieri mentionem pectoris & pedum. Hunc locum Arcudius cit. C. recitans observat: per frontis, menti, genarum, & manuum unctionem liniri omnes sensus; quin etiam addit, hoc tempore non omitti pectoris & pedum unctionem.

Haud absimilis est Coptitarum, Jacobitarum, & aliorum Orientalium disciplina; ut legere est apud Aust. Perp. Fid. Tom. 5. L. 5. C. 2. ubi duo præterea illis peculiariora esse notat. Primum, quod ante S. unctionem cum benedicta olei lampade & cereis accensis in Ecclesia processionem ducant, quam infirmus ipse, vel alius ejus nomine comitatur; alterum, quod, post ministratum ægro unctionis Sacramentum, aliis etiam præsentibus una conferatur unctio, diverso atamen ritu, quique non sit sacramentalis.





# LIBER VII.

## *De Ordine.*

**Q**Uæ ad notitiam de Sacramento Ordinis Theologo necessariam pertinent, hæc sunt potissimum: I. Natura, Existentia, & Institutio hujus Sacramenti, II. ejusdem Materia & Forma, III. Effectus & Ordini adnexa Obligatio, IV. Minister & Subiectum, V. Ritus Ordinationis. Atque de his erunt Dissertationes totidem; quibus præmittemus Tridentinos Canones, & quædam ex aliis Conciliis Decreta. Propositio a Pontificibus damnata, quæ in rem nostram speciatim commemoranda foret, est nulla.

### CANONES CONCILII TRIDENTINI.

*Ex Sess. XXIII. de Sacramento Ordinis.*

I. **S**I quis dixerit non esse in novo testamento Sacerdotium visibile, & externum; vel non esse potestatem aliquam consecrandi, & offerendi verum corpus & Sanguinem Domini, & peccata remittendi, & retinendi; sed officium tantum, & nudum ministerium prædicandi Evangelium; vel eos, qui non prædicant, prorsus non esse Sacerdotes; anathema sit.

II. Si quis dixerit præter Sacerdotium non esse in Ecclesia Catholica alios Ordines, & majores, & minores, per quos, velut per gradus quosdam, in Sacerdotium tendatur; anathema sit.

III. Si quis dixerit, five sacram Ordinationem non esse vere, proprie Sacramentum, a Christo Domino institutum,

T t t 2

vel

vel esse figmentum quoddam humanum, excogitatum a viris rerum Ecclesiasticarum imperitis; aut esse tantum ritum quendam eligendi ministros verbi Dei, & Sacramentorum; anathema sit.

IV. Si quis dixerit, per sacram Ordinationem non dari Spiritum sanctum; ac proinde frustra Episcopos dicere: Accipite Spiritum sanctum; aut per eam non imprimi charactere; vel eum, qui Sacerdos semel fuit, laicum rursus fieri posse; anathema sit.

V. Si quis dixerit sacram Unctionem, qua Ecclesia in sancta Ordinatione utitur, non tantum non requiri, sed contemnendam, & perniciosam esse, similiter & alias Ordinis caeremonias; anathema sit.

VI. Si quis dixerit, in Ecclesia Catholica non esse hierarchiam Divina ordinatione institutam, quæ constat ex Episcopis, Presbyteris, & ministris; anathema sit.

VII. Si quis dixerit Episcopos non esse Presbyteris superiores, vel non habere potestatem confirmandi & ordinandi; vel eam, quam habent, illis esse cum Presbyteris communem; vel Ordines ab ipsis collatos sine populi, vel potestatis sæcularis consensu, aut vocatione irritos esse; aut eos, qui nec ab Ecclesiastica & canonica potestate rite ordinati, nec missi sunt, sed aliunde veniunt, legitimos esse verbi & Sacramentorum ministros; anathema sit.

VIII. Si quis dixerit, Episcopis, qui autoritate Romani Pontificis assumuntur, non esse legitimos, & veros Episcopos, sed figmentum humanum; anathema sit.

DE-

## DECRETA ALIORUM CONCILIORUM.

**N**icænum I. An. 325. Can. 4. de *Episcopi ordinatione ita discernit*: Episcopum convenit maxime quidem ab omnibus, qui sunt in Provincia, Episcopis ordinari; si autem hoc difficile fuerit, - - tribus tamen omnimodis in idipsum convenientibus - - tunc ordinatio celebretur.

*Idem Can. 9. Presbyteros - - contra Canones manuum impositionem affecutos rejicit; ordinationem proinde Presbyteri vocat manuum impositionem.*

*Idem Can. 19. Diaconissas Laicis annumerat, quia nullam habent manus impositionem.*

*Constantinopolitanum I. An. 381. Can. 1. Nicænos Canones confirmat; idem itaque ejus cum Nicænis Patribus fuit sensus de Ordinatione.*

*Chalcedonense An. 451. Can. 1. significat, Presbyterum ordinari per manus impositionem.*

*Idem Can. 6. vetat Clericos sine titulo aut beneficio ordinari.*

*Idem Can. 20. prohibens Episcopum, Presbyterum, vel Diaconum ordinari pro pecunia, causam reddit: quia gratiam Dei illi censentur vendere &c.*

*Nicænum II. An. 787. Can. 1. confirmat Canones priorum Conciliorum; speciatim autem Can. 1. Nicæni I. Can. 4.*

*Idem Can. 14. permittit Lectores a Chorepiscopis ex Episcopi mandato ordinari; id ipsum dein Abbatibus permittens, ait: Lectoris autem manus impositionem licentia est unicuique Abbati in proprio Monasterio solummodo faciendi &c.*

*Præter hæc, tam in nunc memoratis Conciliis, quam in Ephesino An. 431. Constantinopolitano II. An. 553. Constantinopolitano IV. Lateranensi I. II. III. & IV. ac seqq. occurrunt multi Canones, quibus decernitur de Ordinationibus, ordinandorum habilitate, ordinatorum obligatione, privilegiis &c. at hæc prolixum foret referre; commodius suis locis per decursum L. insinuabuntur. Nunc Florentini sensa adjecisse suffecerit. Jam vero*

*Concil. Florentinum in Decr. pro Armen. §. de Ordine declarat: Sextum Sacramentum est Ordinis, cujus materia est illud, per cujus traditionem confertur Ordo, sicut Presbyteratus traditur per calicis cum vino, & patenæ cum pane porrectionem. Diaconatus vero per libri Evangeliorum dationem. Subdiaconatus vero per calicis vacui cum patena vacua superposita traditionem: & similiter de aliis per rerum ad ministeria sua pertinentium assignationem.*

*Ibidem continuo addit: Forma Sacerdotii talis est: Accipe potestatem offerendi Sacrificium in Ecclesia pro vivis & mortuis, in nomine Patris, & Filii, & Spiritus sancti: & sic de aliorum Ordinum formis, prout in Pontificali Romano late continetur. Ordinarius minister hujus Sacramenti est Episcopus. Effectus, augmentum gratiæ, ut quis sit idoneus minister.*



## DISSERTATIO I.

## DE NATURA, EXISTENTIA, ET INSTITUTIONE SACRAMENTI ORDINIS.

## §. I.

*Quid sit Ordo, & quæ in Ecclesia Ordinum  
varietas?*

ORDINIS nomen latissime diffunditur; generatim quippe significat aptam rerum quarumvis dispositionem cum unius ad alteram relatione: unde factum ut varii in qualibet Republica hominum status ordinis nomen obtinerent, ut sunt ordo Ecclesiasticus, Religiosus, Politicus, Militaris, Civilis &c. Nobis de solo Ordine Ecclesiastico agendum erit: hunc unum proinde Ordinis nomine deinceps intelligemus. Sed enim hic ipse duplici sensu accipi potest; primum quidem pro sacro ritu, quo fit deputatio ad Altaris & Ecclesiæ ministerium: deinde pro Hierarchia Ecclesiæ, seu statu personarum, quæ ad hoc ministerium deputantur. Atque hoc utroque sensu accepti Ordinis ante omnia præmittenda est definitio: asserenda item Hierarchiæ sacrae existentia, ejusque designandi gradus, ac munia.

## Definitio Ordinis.

I. ORDO, prout sumitur pro sacro ritu, rectius *Ordinatio* dicitur: estque illa cæremonia, seu actio sacra transiens, qua quis Eucharistiam ministrandi, aut ministerio huic  
ex

ex officio serviendi stabilem accipit potestatem, unaque in statu Clericorum constituitur. Hoc sensu acceptus Ordo apud Græcos communiter dicitur χειροτονία *manus extensio*, *porrectio*: aut etiam χειροθεσία *manus impositio*; hac enim utuntur in ordinandis Sacerdotibus, aliisque sacris Ministris.

Illud vero hic cum primis observandum: solam hanc actionem sacram, seu cæremoniam esse Ordinis aut potius Ordinationis Sacramentum; hinc definitur, esse *novæ Legis Sacramentum*, quo sensibili signo aliquo stabiliter confertur potestas & gratia ad Corpus Christi consecrandum, vel exercenda cætera munia ad hoc ministerium pertinentia. Quibus verbis sufficienter designatur Sacramenti hujus natura, generatim quidem ratio signi sensibilis ad quodvis Sacramentum requisiti; speciatim vero effectus, finis, & officium: tametsi enim soli Sacerdotio sit proprium Eucharistiam consecrare, ad hanc nihilominus, tanquam finem præcipuum, etiam reliquorum Ordinum ministeria referuntur.

- 2 II. Ex nunc definito ordinationis ritu ultro profuit altero sensu acceptus Ordo, seu Hierarchia Ecclesiastica. Quo nomine intelligitur certus in Ecclesia hominum status, eorum videlicet, qui solemnī ordinationis cæremonia ad aliquod Altaris & Ecclesiæ ministerium deputantur. Atque hi omnes recepto in Ecclesia vocabulo dicuntur Clerici, hoc est, adlecti in Clerum, seu sortem ac hæreditatē Domini: nam græce κληρος, Latinis idem est, ac *fors*, *hæreditas*. Inde in Clericos per primam Tonsuram initiandi ex more profitentur: *Dominus pars hæreditatis meæ &c.* & Hieronymus in Ep. ad Nepotian. Clericus ergo, inquit, *qui Christi servit Ecclesiæ*, interpretetur vocabulum suum, & nominis definitione prolata nitatur esse quod dicitur; si enim κληρος latine fors appellatur, propterea Clerici dicuntur, quod de sorte Domini sint: vel quia Dominus fors, id est, pars Clericorum est.

In

In hac porro Ecclesiæ Hierarchia, seu Clericorum statu, distinguenda est potestas duplex: Ordinis videlicet, & jurisdictionis. Prima spectat ad Corpus Christi reale, seu ministerium Sacrificii Altaris; estque propria Presbyteris, Diaconis, Subdiaconis, Acolythis, Lectoribus &c. Altera ordinatur ad Corpus Christi mysticum, seu regimen fidelium; atque hæc cum primis Papæ competit, tum Patriarchis, Primatibus, Archiepiscopis, regulariter Episcopis, Archidiaconis, Parochis &c. Nobis, cum solum Ordinis Sacramentum explanandum habeamus, de primo duntaxat statu agendum erit, ut qui solus ex Sacramento Ordinis proxime profuit, suamque potestatem accipit; de altero consulendi sunt Canonistæ, quorum fori est de jurisdictione Ecclesiastica, ac potestatis hujus variis gradibus & prærogativis pertractare.

### Existentiâ Ordinis Ecclesiastici contra Sectarios asseritur.

**P**RO Ordine, qui Sacramentum sit, infra §. II. & III. pergnabimus; unde hic solum Ordinis, pro Hierarchia Ecclesiastica sumpti, existentia in sensu orthodoxo comprobanda est. Nimirum

I. Tertulliani jam ætate fuere hæretici, qui Clericorum & Laicorum ordinem confunderent; quorum is errorem perstringens *L. de Præscript. C. 14.* alius, inquit, *hodie Episcopus, cras alius: hodie Presbyter, qui cras Laicus; nam & Laicis Sacerdotalia munia injungunt*: hinc ibid. ordinationes eorum vocat temerarias, leves, & inconstantes. Atque hanc ipsam crambem post multa secula recoxerunt Lutherus & Calvinus, docentes; nihil esse Clericos inter & Laicos discriminis, omnesque perinde esse Sacerdotes, &

*R. P. Muszka Tom. II. de Sacra-*

**U u u**

**Evan-**

Evangelii Ministros. Id quod generatim dictum cum vel ipsis durius videretur, ita subinde se explicant: si quæ tandem (inquiunt) differentia est, ea non a jure divino, sed hominum duntaxat arbitrio repetitur. Non a jure divino: nam potestas & jurisdictio Ecclesiastica toti Ecclesiæ, quæ fideles omnes complectitur, concessa est; ab hominum arbitrio autem: quia a solo populi consensu dependet Ministrorum electio, & usus potestatis. Juxta Novatores igitur ministerii Ecclesiastici potestas non est stabilis: verum uti pro arbitrio populi huic aut illi conferri potest, ita pro arbitrio ejusdem rursus auferri; atque adeo, qui volente populo heri Sacerdos factus est, idem hodie in simplicem Laicorum ordinem redigi potest. Ita Lutherus L. de Capt. Babyl. item L. de abrog. Missæ priv. & Calvin. L. 4. Instit. C. 4. Sed enim

- 4 II. Errori huic oppositum semper fuit dogma orthodoxum, secundum quod fide certum est: dari in Ecclesia Ordinem, pro sacra Hierarchia sumptum, eumque a Laicorum statu omnino esse jure divino diversum. Quid enim illa Apostoli verba 1. Cor. 12. V. 17. *Si totum corpus oculus, ubi auditus? si totum auditus, ubi odoratus? nunc autem posuit Deus multa quidem membra, unumquodque eorum in corpore sicut voluit.* V. 19. *Numquid omnes Apostoli? numquid omnes Prophetæ &c.* V. 18. *Quosdam posuit Deus in Ecclesia primum quidem Apostolos, secundo Prophetas &c.* Et demum ad Ephes. 4. V. 11. *Ipse dedit quosdam quidem Apostolos, quosdam autem Prophetas, alios vero Evangelistas, alios autem Pastores & Doctores, ad consummationem Sanctorum in opus Ministerii in ædificationem Corporis Christi.* Quid inquam hæc, hisque plura in S. Literis similia indicant? nisi non omnibus fidelibus jure divino commune esse Ecclesiæ mi-



ministerium; hoc igitur eodem jure Ministri Ecclesiastici a cætero fidelium statu, seu Laicis discernuntur. Inde Hieronymus ad quemdam suum Levitam scribens, ut refertur C. 12. qu. 1. Cap. *Duo sunt*, apertis verbis Clericos inter & Laicos differentiam ab electione divina repetit: *Duo sunt*, inquit, *genera Christianorum. Est autem unum genus, quod mancipatum divino officio - - ab omni strepitu temporalium cessare convenit, ut sunt Clerici - - κληρικός, latine fors; inde hujusmodi homines vocantur Clerici, id est, sorte electi: omnes enim Deus in suos elegit. - - Aliud vero genus est Christianorum, ut sunt Laici; λαός enim Græce, est populus latine &c.*

Pluribus in hanc rem ex Scriptura Patribus, & Conciliis disputat Bellarminus Tract. de Clericis; nosque ipsi jam quædam isthuc facientia retulimus L. I. de Sacr. in gen. Dissert. IV. §. I. a N. 110. unde ad Novatorum Objecta responderi potest. Vide etiam Concil. Tridentinum Sess. 23. de Sacr. Ord. doctrinam hanc compluribus Capitibus ita declarans, ut demum Can. 6. anathemate feriat eum, *qui dixerit in Ecclesia Catholica non esse Hierarchiam divinæ ordinatione institutam, quæ constat ex Episcopis, Presbyteris, & Ministris.*

### Ordinum in Ecclesia varietas.

I. **S**eptem Ecclesiasticos Ordines enumerat Conc. Trid. S.

Sess. 23. Cap. 2. nimirum Sacerdotis, Diaconi, Subdiaconi, Acolythi, Exorcistæ, Lectoris, & Ostiarii. Episcopatus, tametsi & ipse sit Ordo, speciatim tamen inter Ordines non recensetur: quia includitur in Sacerdotio, estque quoddam majoris Sacerdotii genus. Idem est de Ordine Cantoris, seu Psalmistæ. Hinc Bellarm. L. 1. de Clericis

ricis C. II. *Et si enim, inquit, Episcopus & Presbyter distinguantur, tamen quantum ad Sacrificium (unde repetitur Ordinum diversitas) idem omnino ministerium exhibent; proinde unum Ordinem, non duos faciunt: sicut etiam Lector & Cantor, seu Psalmista.* Priores porro tres Ordines dicuntur maiores, & sacri: quia per illos plus potestatis confertur, estque illis adnexum castitatis votum, quo ordinati specialiter Deo consecrantur; reliqui quatuor minorum & non sacrorum, nomine veniunt ex ratione opposita.

Atque hos nunc ex Tridentino recensitos Ordines pro veris & proprie talibus tota recipit Latina Ecclesia; quod vero præterea quidam de eorum numero ac differentia anxie disputant, Scholasticæ duntaxat est controversiæ. Sunt nimirum, qui cum Cajetano Episcopatum ita adjiciendum putent, ut nominatim octo distinctos Ordines numerare sit necessum. Canonistæ etiam multi primam tonsuram (quæ ex communiore opinione est mera ad Ordines præparatio & dispositio) verum Ordinem esse contendunt; ut adeo his novenarius sit Ordinum numerus. Imo non desunt, qui ex Conc. Carthaginensis IV. Can. 2. decennarium statuunt, addito videlicet distincto *Cantorum* Ordine. Hæc interim opinionum varietas unitati doctrinæ Catholicæ non officit; quando omnes hi DD. in eo consentiunt, supra enumeratos septem Ordines esse veros, eosque in Ecclesia dari: quod unum Synodus Tridentina declarandum suscepit.

- 6 II. Major controversia est de Orientalibus: num & hi videlicet, præter Sacerdotis, Diaconi, Subdiaconi, & Lectoris Ordines, etiam tres reliquos cum Latinis admittant?

Ac de hoc quidem si veterum consulantur testimonia, vix certi aliquid statui potest. Equidem Ignatius M. in Ep.  
ad

ad Antioch. *Saluto*, inquit, *sanctum Presbyterium*, - - *Diaconos*, - - *Subdiaconos*, *Lectores*, *Cantores*, *Ostiarios*, *Laborantes*, *Exorcistas*, *Confessores*, - - *Janitricis*, - - *Virgines*, &c. Et Synodus Laodicensa Can. 24. hos Ordines recenset: *Presbyteros*, *Diaconos*, *Ministros*, *Lectores*, *Cantores*, *Exorcistas*, *Ostiarios*, & *Ascetas*. Demum ipse Epiphanius in Exposit. Fidei C. 21. postquam Ecclesiæ Ministros nominavit *Episcopos*, *Presbyteros*, *Subdiaconos*, & *Diaconistas*, addit: *postea sequuntur Exorcistæ & linguarum interpretes*, - - *sequuntur laborantes, qui mortuorum corpora curant, tum Janitores*, & *omnis series*. His inquam locis plures, quam memorati quatuor, numerari videntur Ordines; verum tam ab Ignatio M. (præterquam, quod ejus cit. Epist. multorum opinione sit supposititia) quam a Synod. Laodicensa & Epiphanio non sumitur isthic universim nomen Ordinis in sensu vero ac proprio: præter Episcopos enim, Presbyteros &c. nominantur etiam laborantes, seu Fossarii, Ascetæ, Interpretes linguarum, Janitricis, Virgines &c. qui omnes profecto non consecrabantur peculiari ordinatione. Ex eo itaque, quod laud. locis post Presbyteros & Diaconos fiat mentio Ostiariorum, & Exorcistarum, non continuo sequitur, hos etiam pro veris Ordinibus habitos in Orientali Ecclesia.

Quod si vero posteriora attendas tempora, videtur certum, Orientalibus quatuor duntaxat esse Ordines, Presbyteri scilicet, Diaconi, Subdiaconi, & Lectoris: non autem etiam Acolythi, Exorcistæ, & Ostiarii. Grave in hanc rem argumentum est ex Concilio Constantinopol. IV. An. 869. in hoc enim Act. 10. Can. 5. statutum legimus; ut ad Episcopatus honorem evehendus *per omnes gradus Ecclesiasticos definitis temporibus* - - *transisse reperiat*ur, - - sic

ut in *Lectoris munere annum*, in *Subdiaconi duos*, in *Diaconi tres*, in *Sacerdotii quatuor annos expleat*; ubi nulla fit mentio trium reliquorum minorum Ordinum. Nec dubium est, hanc ipsam Orientalium disciplinam agnovisse Innocentium IV. in Ep. ad Othonem Cardinalem, eundemque suum in Cypro Legatum An. 1254. data, in qua Græcos Latinis conformari volens hæc scribit: *Expresse præcipimus, quod Episcopi Græci septem Ordines secundum morem Ecclesiæ Romanæ de cætero conferant*; cum hucusque *tres de minoribus circa ordinandos neglexisse, vel prætermisisse dicantur*. Illi tamen, qui jam sunt taliter ordinati per eos, propter nimiam ipsorum multitudinem, in sic susceptis Ordinibus tolerantur. Hoc interim Pontificis Decretum a Græcis receptum non est, minus ab Orientalibus reliquis. Certe ætate etiam nostra Græcis, Jacobitis, Coptitis, Æthiopibus, Syriis, quin Orientalibus omnibus unum duntaxat *Lectoris & Cantoris* (nam hos in eodem gradu collocant) in usu esse Minorem Ordinem testatur Auſt. Perp. Fid. Tom. 5. L. 5. C. 6. ubi simul addit: ex eorum disciplina per *Lectorem* exerceri ministeria reliqua, quæ apud Latinos propria sunt *Acolythis, Exorcistis, & Ostiariis*. Ex quo colligas Orientales una eademque ordinatione *Lectori* conferre potestatem cæterorum etiam trium Ordinum: atque adeo unum *Lectoris Ordinem* quatuor distinctis nostris apud eos æquivalere. Quod quidem satis indicat, nos inter & illos non intercedere in substantia differentiam quoad ipsos Minores Ordines.

### Ordinum eorundem munia.

**N**ON aliunde hæc innotescunt certius, atque ex ipsa ordinatione: in hac quippe ordinati de Ordinis accepti po-

potestate, ejusque exercitio speciatim commonentur, ut videre est in Pontificali Romano. Juxta hoc igitur

I. Presbyteri munus est; *offerre Sacrificium Missæ, 7 benedicere, præesse, prædicare, & baptizare*; item fideles a peccatis absolvere, ad quod potestas ei confertur per verba, *accipe Spiritum Sanctum, quorum remisieris peccata &c.* In his attamen omnibus dependet ab Episcopo, cujus in Ecclesia adiutorem agit. Inde hæc ipsa munia potiori jure competunt Episcopo, ceu in eminentiore Sacerdotii gradu posito, eidemque Ecclesiæ Pastori & Præposito. Præter hæc interim & alia habet Ordini suo peculiaribus; ipsius enim est consecrare, ordinare, & confirmare. De singulis his eum in ordinatione moneri constat ex Pontificali. Ita ante impositionem manuum dicitur: *Episcopum oportet judicare, interpretari, consecrare, ordinare, offerre, baptizare, & confirmare*; deinde vero in Pastoralis Baculi, annuli, & Evangelii porrectione: *ut sit in corrigendis vitiis pie sapiens, judicium sine ira exercens &c. ut sanctam Ecclesiam illibate custodiat, Evangelium prædicet populo sibi commisso.* De his Episcopi muniis copiose agit Trident. Sess. 5. 6. 22. 23. 24.

II. E Ministris ad Altaris obsequium deputatis Sacer- 8  
doti proximi sunt Diaconus & Subdiaconus. Hinc *Diaconum* (ut notatur in Pontificali) *oportet ministrare ad Altare, baptizare & prædicare*; quo postremo speciatim designatur etiam *Evangelii in Ecclesia lectio*, ad quod potestatem accipit per porrectionem Libri Evangeliorum. In Ecclesia veteri præterea proprium Diaconi munus erat Eucharistiam ad absentes deferre, eandem absente Sacerdote Laicis porrigere, urgente mortis periculo poenitentes publicos

cos reconciliare Ecclesiæ, ejusdem bona administrare, & dispensare eleemosynas. Subdiaconi ex eodem Pontificali munus est, *aquam ad ministerium Altaris præparare, Diacono ministrare, pallas Altaris & corporalia abluere, Calicem & patenam in usum Sacrificii eidem offerre, ac denique sacras Epistolas in Ecclesia legere.* Ex quo patet, Subdiaconos ordinari in adjutorium Diaconi quoad ministerium Altaris: hinc Latinis (juxta Rabanum & Isidorum) Subdiaconi idem sunt, ac *Subministri*. Græcique eos propterea vocant ὑποδιακόνες, *hypodiaconos*, vel etiam ὑπηρέτας, *administratos*.

- 9 III. Quatuor Minorum Ordinum officia his in laud. Pontificali describuntur verbis. *Acolythum oportet cerosarium ferre; luminaria Ecclesiæ accendere; vinum & aquam ad Eucharistiam ministrare, Exorcistam oportet abjicere demones; & dicere populo, ut, qui non communicat, det locum; & aquam in ministerio fundere. Lestorem oportet legere ea, quæ (speciatim notatur hoc loco, vel, ei qui) prædicat, & Lestiones cantare; & benedicere panem, & omnes fructus novos. Ostiarium oportet percutere cymbalum & campanam; aperire Ecclesiam & Sacrarium; & librum aperire ei, qui prædicat.* Ad hæc omnia peculiaris potestas confertur in memoratis Ordinibus, tamen ex hodierno Ecclesiæ more complura eorum ab ordinatis non exercentur.

## §. II.

*An detur aliquod Ordinis Sacramentum a Christo institutum? & quod illud?*

**P**Ræcipua hoc L. nobis est cum Novatoribus controversia de Ordinis, vel potius Ordinationis Sacramento:  
num

num aliquod videlicet in Ecclesia detur, illudque tale, cuius institutio Christum habeat auctorem? de qua antequam pronuntiemus, notanda erit

Inter Novatorum errorem, & DD. Catholicorum opiniones differentia.

I. **L**utherus L. de Capt. Bab. C. de Ord. negat ullam <sup>10</sup> in Ecclesia Ordinationem esse verum legis novæ Sacramentum; quem secuti sunt Illyricus in Confess. Antverpiensi C. 11. & Chemnitius Par. 2. Examinis in Disp. de Sacram. Ordinis. Ejusdem sententiæ fuit Calvinus, cum (teste Bellarm. L. de Sacr. Ord. C. 1.) in plerisque locis duo tantum statuatur Sacramenta, Baptismum videlicet, & Cœnam; idem nihilominus L. 4. Instit. C. 14. §. 20. & C. 19. §. 31. agnoscit Ordinationem esse verum Sacramentum: duoque se tantum antea posuisse ait propterea, quod loqueretur de Sacramentis, quæ omnibus fidelibus sunt communia. De hodiernis Sæctariis universim statui nihil potest: quando eorum aliqui Antesignanorum vestigia presse insistant, alii magnam partem ab illis declinant. Ipse certe Philippus Melancthon, tametsi in Locis primo editis cum Luthero sentiret, in Locis tamen posterius editis, nempe sæculi XVI. Ann. 36. 52. & 58. Ordinationem contendit esse Sacramentum: idemque docet in Apolog. Conf. Augst. Ar. 13. ut refert. laud. Bellarminus.

II. Quod jam vero ad DD. Orthodoxos attinet, ne <sup>11</sup> mini unquam eorum in mentem venit de Ordinis Sacramento ambigere: dari illud ac tale esse saltem Sacerdotis ordinationem, omnes profitentur. Inde discordes illorum in præfenti opiniones eo duntaxat spectant: num, præter

Sacerdotii Ordinem, reliquis etiam ratio Sacramenti conveniat? Atque in hoc omnino variae sunt DD. sententiae. Episcopi ordinationem pars major cum Altissiodorensi, Scoto, & Cajetano verum esse Sacramentum admittit; negat contra Dominicus Soto cum quibusdam veteribus. Eadem praerogativa Diaconi, & Subdiaconi ordinationi communior Scholarum suffragio attribuitur; Durando interim & Cajetano cum paucis, praesertim de Subdiaconatu, oppositum videtur. Plus controversiae habet Minorum Ordinum collatio: Sacramentis eam accensent Albertus, Richardus, Valentia, Sylvius, Amicus &c. ex adverso e numero eorum expungendam volunt Durandus, Cajetanus, Navarrus, Vasquez, & e Recentioribus multi cum Ludov. Habert. Tournelyo &c. Sed nimirum haec opinionum varietas nihil commune habet cum Novatorum errore: aliud quippe est (quod illi ajunt) nullum dari Ordinis Sacramentum; aliud existentiam ejus admittere, simul unanimi consensu rationem Sacramenti in Sacerdotio profiteri, solumque de caeteris Ordinibus controvertere, quod unum fit a DD. Catholicis.

Atque hac Novatores inter & Orthodoxos observata in praesenti argumento differentia, id deinceps solum ex proposito disceptandum suscipimus, quod ex sensu Ecclesiae de Ordinis Sacramento fide certum est contra Sectarios; ea vero, quae ad Scholasticorum controversias pertinent, compendio expediemus in Corollario. Sit itaque

## ASSERTIO I.

*Ordinatio saltem aliqua est verum Legis novae Sacramentum a Christo institutum.*

**F**ide certum esse istud constat ex Trident. quod Sess. 23. de Sacr. Ord. Can. 3. anathemate interposito definit, *Or-*  
*di-*



*dinem, five sacram Ordinationem esse vere & proprie Sacramentum a Christo Dom. institutum. Est autem hæc definitio conformis Scripturæ & Traditioni, ut docebit argumentum duplex ex his fontibus ductum.*

Argumentum I. quod ex Scriptura petitur, suggerunt 12 loca sequentia. Act. 13. V. 3. de Ordinatione Pauli & Barnabæ dicitur: *tunc jejunantes & orantes, imponentesque eis manus dimiserunt illos.* Paulus monet Timotheum in 1. ad eum Ep. C. 4. *noli negligere gratiam, quæ in te est, quæ data est tibi per Prophetiam cum impositione manuum Presbyterii.* Et rursus in 2. ad eundem Ep. C. 1. *admoneo te, ut suscites gratiam Dei, quæ est in te per impositionem manuum mearum.* His jam vero locis agi de ritu, quo Paulus, Barnabas, & Timotheus in Ministros Ecclesiæ ordinati sunt, dubitari nequit; quid autem ritui huic desit, quo minus Sacramentum dicatur?

Certe vel Novatores ad rationem Sacramenti non plus requirunt, quam signum externum, promissionem gratiæ, institutionem Christi, seu mandatum divinum de usurpando id genus signo ad conferendam gratiam. An non autem oratio & manuum impositio sunt signum externum? An non huic signo annexa est gratia, quam Apostolus ait in Timotheo *esse per impositionem manuum?* gratiam porro hanc peculiarem fuisse, eam videlicet, quæ conjuncta fuerit cum potestate Ordinis, constat ex illo 1. ad Tim. 5. *nemini cito manus imposueris;* his quippe verbis aperte indicat Apostolus, Timotheum per impositionem manuum consecutum fuisse etiam potestatem aliis manus imponendi, five ordinandi. An denique signum hoc caruit institutione & mandato Christi? quando certum est Apostolos & eorum Suc-

cessores sacro Ordine initiandis manus imposuisse, utique autem non sine mandato Christi: neque enim alias per manus impositionem conferre potuissent gratiam & potestatem minister.i.

- 13 Argumentum II. in Traditione fundatum conficitur ex Patribus, Conciliis, & Consensione Occidentalis & Orientalis Ecclesiæ.

Et ex Patribus quidem in rem præsentem Bellarminus L. de Sacr. Ord. C. 3. multos laudat, nimirum Dionysium Areop. Cyprianum, Chrysostomum, Innocentium I. Ambrosium, Hieronymum &c. qui apud eum videri possunt; nobis sat erit duorum verba recitasse. Ac primum quidem audiendus est Augustinus L. 2. contra Epist. Parmen. Donatistas ita impugnans: *explicent, quomodo Sacramentum baptizati non possit amitti, & Sacramentum ordinati possit amitti; si enim utrumque Sacramentum est, quod nemo dubitat, cur illud non amittitur, & illud amittitur? neutri Sacramento injuria facienda est.* Altero loco sit Leo M. qui Ep. 81. ad Dioscorum Alexandr. jejunium esse Ordinationi præmittendum contendens, pro causa reddit: *ut intelligamus, quanta & dantium, & accipientium devotione curandum sit, ne tantæ benedictionis Sacramentum negligenter videatur impletum.* En! ab utroque Ordinatio dicitur Sacramentum: & ab Augustino quidem perinde ac Baptismus, idque tam fidenter, ut neminem de hoc dubitare asserat.

E Conciliis fateor, præter Florent. & Tridentinum, nullum est aliud, quod Ordinationem apertis verbis doceat esse Sacramentum; si tamen eorum Canones invicem conferantur, haud difficulter doctrina eadem ex iis deducitur.

Cum

Cum enim velint esse peculiares Ordinationis Ministros, eandem dicant conferri manus impositione, hac vero gratiam Dei &c. ultro consequitur, in Ordinationis ritu rationem Sacramenti agnovisse Concilia. Vide pro fronte hujus Libri cit. Canones. De consensione demum Græcorum cum Latinis non est, quod speciatim disseramus; evincunt eam vel illa, quæ L. I. de Sacr. in gen. Dissert. II. §. II. N. 46. pro septenario Sacramentorum numero notavimus. Qui plura volet, consulat Auctorem Perp. Fid. Tom. 5. L. 5. C. 4. & seqq.

## ASSERTIO II.

*Sacerdotis Ordinatio est verum ac proprie tale Sacramentum, illudque ab ipso immediate Christo pridie mortis in Cæna ultima institutum.*

**P**ARS I. certa est ex jam præmissa Assertionem I. Etenim 14 juxta illam fidei dogma est, aliquam Ordinationem esse Sacramentum; quæ autem illa? de Ordinatione Episcopi, Diaconi, Subdiaconi, & Minorum Ordinum controversitur non modo a Novatoribus, sed & Catholicis: omnes contra Catholici de Sacerdotio consentiunt, neque ullus omnino est Ordo, cui magis proprie conveniat Sacramenti ratio; ergo fidei dogmatis accenseri debet, Ordinationem Sacerdotis esse Sacramentum.

Atque istud prorsus conforme est Tridentino; tametsi enim hoc nusquam disertis verbis definiat præsentem doctrinam, certo attamen illa colligitur ex iis, quæ de Sacerdotio docet. Nimirum Sess. 23. Cap. 1. declarat, in Ecclesia Dei esse *externum Sacerdotium*, quod a Domino Salvatore institutum est: atque Apostolis, eorumque Successoribus

in Sacerdotio traditam esse potestatem consecrandi, - - nec non & peccata dimittendi & retinendi; Cap. 4. damnat eos, qui afferunt novi Testamenti Sacerdotes temporariam potestatem habere; ac (ut omittam alia) Can. 4. anathema fert in eum, qui dixerit, per sacram Ordinationem non dari Spiritum Sanctum: ac proinde frustra Episcopos dicere, Accipe Spiritum Sanctum: aut per eam non imprimi characterem, vel cum, qui Sacerdos semel fuit, Laicum rursus fieri posse. Igitur Tridentinum docet, Sacerdotium esse aliquid externum, cui ex institutione Christi annexa sit gratia Spiritus Sancti, ac etiam cum characterē stabili potestas consecrandi & absolvendi; quid vero amplius desideres, quo dici possit ex mente Tridentini Sacerdotium esse verum Sacramentum?

Sed enim (inquies) licet istud ex Tridentino recte deducatur, desideratur attamen aperta definitio. Ita res omnino se habet, non diffiteor; at neque nos Assertionis hujus doctrinam inter fidei dogmata referimus. propter solam Tridentini declarationem: verum potissimum propter certam Universæ Ecclesiæ consensionem. Constat nimirum universim Græcam perinde, ac Latinam Ecclesiam pro vero Legis novæ Sacramento habere Sacerdotis Ordinationem: cum igitur istud ad fidei materiam pertineat, & in hac Universæ Ecclesiæ judicium falli non possit, censendum est, fidē certum esse de Sacerdotii Sacramento assertum.

- 15 Pars II. etiam indubitata est ex sensu Ecclesiæ, de quo satis fuerit audire Tridentinum Sess. 22. Cap. 1. ubi de Christo ait: *In Cena novissima, qua nocte tradebatur - - Sacerdotem secundum Ordinem Melchisedech se in æternum constitutum declarans, Corpus & Sanguinem suum sub speciebus*

pa-

panis & vini Deo Patri obtulit, ac sub earundem rerum symbolis, Apostolis, quos tunc novi Testamenti Sacerdotes constituebat, ut sumerent, tradidit, & eisdem, eorumque in Sacerdotio successoribus, ut offerrent, præcepit per hæc verba: Hoc facite &c. uti semper Ecclesia Catholica intellexit & docuit. Ex mente igitur Tridentini, & totius Ecclesiæ in Cœna ultima Christus Apostolis contulit præcipuam Sacerdotii potestatem, conficiendi videlicet Eucharistiam, idque per verba, *Hoc facite* &c. quod quid aliud est, quam ipsum Christum instituisse Sacerdotium? Alteram interim potestatem, quæ pariter Sacerdotibus est propria, ac ad remittenda peccata pertinet, non nisi post resurrectionem Joan. 20. fuisse a Christo Apostolis complete concessam, jam alias L. V. Dissert. I. §. II. docuimus.

### Refelluntur Novatorum argumenta.

**C**ONtra primam Assertionem opponunt I. Manus impositio, 16  
cujus meminit Lucas in Act. Apost. & Paulus in sua ad Timoth. Epistola, non fuit ritus Ordinationis sacramentalis; haud recte igitur ex ea intuleris Ordinationem esse Sacramentum. Assertum porro hoc suum his fere momentis fulciunt. Manus impositio, ajunt, olim fuit cæremonia communis, qua suffragium ferebatur in electione & deputatione alicujus ad Magistratum profanum perinde ac sacrum; id quod satis indicat vox *χειροτονία*, nam teste Zonara in Can. 1. Apost. ipsum suffragium quondam nominatum est *chirotonia*, - - quatenus eligentes serunt solitos extendere manus. Inde & Apostoli ex more tum recepto suffragia sua quælibet manuum impositione exprimebant: seu videlicet pro infirmorum salutē orarent juxta illud Marci 16. *super agros manus imponent; seu deprecarentur Deum pro*

pro peccatorum venia alicui obtinenda, vel dono Spiritus Sancti Neophytis impetrando; seu cum aliquem ad Ecclesiæ ministerium deputarent. Quid, quod deinde etiam varius in Ecclesia fuerit usus manus impositionis, ut e. g. in cæremoniis Baptismi, Confirmationis, Pœnitentiæ, cujuslibet benedictionis &c.

II. Memorata ab Apostolo manuum impositio non poterat esse Sacramentum, nisi per illam conferretur proprius Sacramento effectus, hoc est, gratia sanctificans; at hanc fuisse collatam frustra asseritur: gratia enim illa, cujus Timotheo datæ meminit Paulus, ea duntaxat fuit, quam *gratis datam* dicimus, donum videlicet Prophetiæ, doctrinæ &c. Quam in rem facit illud, quod Apostolus in laud. Epist. utatur voce *χαρίσμα*, qua significatur *gratia gratis data*; quod item dicat gratiam illam fuisse datam *per Prophetiam*, seu (ut multi exponunt) *in Prophetiam*, proinde ad prophetandum & evangelizandum: quo ipso sensu gratiam hanc interpretantur Hieronymus & Chrysostomus, in cit. Apostoli locum commentantes.

Resp. ad I. N. Ant. cujus falsitas patet ex N. 12. Sed nec momenta Novatorum evincunt quidquam. Fatemur equidem manuum impositionis ritum olim communem fuisse, eundemque ab Apostolis, ac postea etiam ab Ecclesia in usus complures adhibitum; an vero propterea hæc nominatim manuum impositio, cujus ad Timoth. Paulus meminit, rationem Sacramenti Ordinis habere non potuit? Certe Baptisma etiam olim commune fuit Phariseis & Judæis omnibus, ejusque usus plane varius: teste enim Marco C. 7. V. 4. *nisi baptiscentur, non comedunt; & alia multa sunt, quæ tradita sunt illis servare, baptisмата calicum, & urceo- rum*

rum, & sacramentorum, & lectorum; nec tamen idcirco vel Novatores e numero Sacramentorum expungi volunt Baptisma, quo initiamur Christiani. Nimirum, cum ritus aliquis est communis & ad plura indifferens, per intentionem Ministri & verba ab eo prolata sufficienter determinatur ad id, ut nunc quidem evadat sacer potius, quam profanus, hocque potius speciatim, quam aliud Sacramentum.

Resp. ad II. neutrum, quod Novatores proferunt, evincere gratiam duntaxat *gratis datam* esse illam, de qua Paulus monet Timotheum. Quamvis enim *χαρισμα* etiam id genus gratiam significet, eamque Timotheus per impositionem manuum acceperit: propterea attamen non est continuo excludenda sanctificans gratia. Quis enim dicat Neophytos, quibus Apostoli imponentes manus conferebant dona linguarum, prophetiæ &c. solas has accepisse gratias, & non etiam sanctificantem gratiam, seu charitatem per Spiritum S. in cordibus diffusam? quam ipsam Apostolus vocat *Charisma melius & excellentius*, ut patebit conferenti vers. ultimum ex Ep. 1. ad Cor. Cap. 12. cum sequ. C. 13. Ac revera Timotheo, præter *gratiam gratis datam*, etiam *gratum facientem*, seu sanctificantem esse datam ipse indicat Apostolus, cum Ep. 2. ad eund. C. 1. V. 7. gratiam per impositionem manuum acceptam vocat *Spiritum virtutis, & dilectionis, & sobrietatis*; qui quidem Spiritus referri nequit inter gratias gratis datas, ut quæ in aliorum duntaxat commodum conceduntur.

Hinc jam autem u'tro consequitur: verba illa *per prophetiam*, vel *in prophetiam*, eorumque apud cit. Patres expositionem, sensu duntaxat positivo sumendam esse,

R. P. *Μυσζα* Tom. II. de Sacr.

Y y y

non

non exclusivo. Quamquam, si rem attentius expendere velimus, multo verisimilius sit, Apostolum isthic illo *per prophetiam* non intellexisse Ordinationis effectum, sed causam; revelationem videlicet sibi factam de Timotheo ordinando. Colligitur istud ex 1. ad Timoth. Ep. C. 1. ubi V. 18. ita scribit: *hoc praeceptum commendo tibi, fili Timothee! secundum praecedentes in te prophetias, ut milites in illis bonam militiam &c.* Ut adeo Apostoli ad Timotheum verba, quæ obijciuntur, hunc sensum faciant: noli negligere gratiam, quæ data est tibi, cum te ordinavi juxta revelationem mihi de tui ordinatione factam. Atque omnino hæc est communior verborum Apostoli interpretatio.

- 17 Assertio altera his fere impugnatur. I. Christus in ultima Coena Apostolis contulit Sacerdotium absque ullo ritu externo sacramentali; nec legitur uspiam dedisse mandatum ritus alicujus externi in ordinandis Sacerdotibus usurpandi; quamvis autem idem Joan. 20. in Discipulos insufflaverit, cum eis absolvendi a peccatis potestatem daret, hic nihilominus insufflationis ritus ab Ecclesia Catholica non observatur: actio igitur illa externa, qua Sacerdotes ordinantur, nullo jure dici potest Sacramentum a Christo institutum.

II. Apud ipsos Catholicos controvertitur de Ordinationis Sacerdotalis materia & forma; rectius ergo dicitur Ordinationem hanc fieri per quamlibet electionem, & deputationem solam: præsertim cum constet ex Gregorio Nyss. in vita S. Gregorii Thaumaturgi, eum absentem fuisse in Episcopum consecratum, sola proinde Superiorum voluntate & deputatione. Quod si vero Sacerdotis Ordinatio peragi



agi possit sine ritu externo, qui materiæ & formæ rationem habeat, legitime infertur, eam non esse Sacramentum.

Resp. ad I. Quod ajunt Novatores, nullo ritu externo Christum fuisse usum in conferenda Apostolis Sacerdotali potestate, id omnino falsum est. Quid enim verba illa, *hoc facite in meam commemorationem*: quid item insufflatio cum verbis, *accipite Spiritum S. quorum remiseritis* &c. quid hæc, inquam, nisi signa sensibilia sunt, & ritus externus? At ritus hic (inquier) non erat Sacramentum; esto: iidem certe Apostoli in Pentecoste corroborantem Spiritus S. gratiam sine Confirmationis Sacramento obtinuerunt; verum hinc non recte intuleris, Confirmationis & Ordinis Sacramenta non esse a Christo instituta. Nimirum virtus Christi non erat alligata certis signis aut Sacramentis; potuit ergo ipse Ordinis potestatem & gratiam Apostolis conferre sine ullo ritu, aut signo quolibet, tametsi hoc non esset Sacramentum: iis nihilominus mandatum dare, ut in Successoribus ordinandis ritu Sacramentali uterentur. Tale porro mandatum, etsi nusquam in Scriptura sit expressum, fuisse tamen a Christo datum, vel inde colligitur: quod & ipsi Apostoli ita ordinasse alios legantur, idemque Ecclesia constanter observaverit. Atque hinc jam expeditum est Responsum ad id, quod Sectarii in Object. altero loco oggerunt; imo etiam ad tertium. Vel ideo enim, quod Apostoli (idem est de Ecclesia) in ordinandis Sacerdotibus insufflatione usi non fuerint, censendum est, nullum esse Christi mandatum de Ordinatione Sacramentali hoc nominatim insufflationis ritu perficienda.

Resp. ad II. Doctorum de materia & forma controversias nihil favere Sectariis; quantumlibet enim illæ (ut

Y y 2

vi-

videbimus Diff. II.) graves sint, omnes tamen Catholici in eo consentiunt, ad Sacramentum Ordinis opus esse signo aliquo sensibili; neque sine illo unquam Sacramentalis Ordo ministratur. Istud vero sufficit ad vim argumenti nobis objecti elidendam. Gregorium Nyss. certe perperam appellant Novatores: nam quod de absentis Gregorii Thaumaturgi consecratione scribit, intelligendum est de electione tantum, non etiam ordinatione; præsentem enim deinde fuisse ordinatum satis indicat, cum addit, Episcopi munia eum non exercuisse, nisi *omnibus post hæc, quæ fieri solent, legitimis seu solemnibus in eo peractis.*

### Corollarium.

#### De Ordinatione Episcopi, Diaconi, Subdiaconi, & quatuor Minorum.

- 18 I. **C**ertum est, Episcopatum esse verum Ordinis Sacramentum, idque a Presbyteratu diversum.

Ratio *1<sup>mi</sup>* fundatur in illo 1. ad Tim. 4. *noli negligere gratiam &c.* quibus verbis, ex communi interpretum sensu, significatur Timothei in Episcopum Ordinatio; hæc vero, cum facta sit ritu externo, eoque a Christo instituto, & gratiæ collativo, ut supra N. 12. probatum est, non potuit non esse verum Sacramentum. Idemque plane ex eadem causa sentiendum est de reliquis deinde in Ecclesia factis, ac hodiernis etiam Episcoporum Ordinationibus; præsertim cum in omnibus Pontifex ordinans Episcopo ordinando imponens manus dicat, *Accipe Spiritum Sanctum*: hæc vero non frustra dici, ac proinde per id genus Ordinationem Spiritum Sanctum, hoc est, ejus gratiam dari definiat Trident. Sess. 23. Can. 4. Atque hoc ipsum jam an-

antea docuerunt Patres ; pro omnibus sit Ambrosius , qui L. de dignitate Sacerd. C. 5. *quis dat, inquit, Episcopalem gratiam? Deus, sed tamen per hominem dat Deus; homo imponit manus, Deus largitur gratiam.* Sed & Patres apertis verbis fatentur Episcopatus Ordinem esse Sacramentum. Ita Leo M. serm. 1. in Anniversario suæ assumptionis, de consecrat. Episcop. ait: *cum hujus divini Sacerdotii Sacramentum etiam ad humanas pervenit functiones* &c. & Ep. 87. monens, ut juxta Apostolum is *Episcopus ordinetur, quem unius uxoris virum fuisse, aut esse confiterit* &c. subdit, *quis ergo dissimulare audeat, quod in tanti Sacramenti perpetratur injuriam, bigamum ordinando Episcopum?* Reliquos PP. vide apud Bellarm. L. de Sac. Ord. C. 5. ubi præclara est ejus hæc animadversio: in Scripturæ locis, quibus probatur Ordinis Sacramentum, agi de ordinatione Episcopali; ut adeo, si hæc non sit Sacramentum, ex Scriptura aperte probari nequeat Ordinationem esse Sacramentum.

Ratio 2<sup>a</sup> est, tum quod alio ritu ordinetur Episcopus, alio Presbyter, ut constat ex plerisque Cypriani Epistolis, item Concilii Carthagin. IV. Can. 2. ac recepta a veteri Ecclesiæ disciplina; tum quod Episcopatus præter potestatem Sacerdotii (quod necessario supponit) aliam præterea potestatem sibi propriam habeat, ordinandi videlicet & confirmandi: diversum igitur etiam a Sacerdotio characterem, & gratiæ effectum peculiari huic potestati respondentem. Utrumque vero istud Ordinis perinde ac Sacramenti diversitatem satis declarat.

II. Certum etiam est Ordinationem Diaconi esse Sacramentum. Quid enim illi ad hanc prærogativam desit?

Peragitur ritu externo; ipsi certe jam Apostoli Aët. 6. hoc Ordine initiandis *orantes imposuerunt manus*. Ritus porro hunc operari gratiam, indubitatum reddit usitata Latinis forma, *accipe Spiritum Sanctum*: operari vero Ordinis characterem, docet stabilis potestas, unde iterari non potest. Non deesse item Diaconatui institutionem divinam, colligitur tum ex eo, quod jam Apostoli Ordinem hunc contulerint; tum quia Trident. Sess. 23. Can. 6. definit, *Hierarchiam divina institutione institutam, quæ constat ex Episcopis, Presbyteris, & Ministris*: quo postremo nomine Diaconos saltem intelligi necessum est. His omnibus momentum addat communis Theologorum sententia, ac etiam auctoritas Anastasii II. Papæ, qui in sua ad Anastasium Imp. Epistola simul asserit in Presbyterorum & Diaconorum Ordinatione gratiam conferri, simul ordinationem utramque vocat Sacramentum.

Neque dicas: Diaconos non esse a Christo institutos, verum ab Apostolis Aët. 6. & quidem in mensarum duxat ministerium. Etenim loco cit. ordinasse quidem Diaconos leguntur Apostoli, at non instituisse eorum Ordinem: supposita igitur Christi institutione ipsi deinde ordinationem perfecisse censendi sunt, ut in simili jam supra N. 12. arguimus. Quamvis autem primi Diaconi ex occasione corporalis ministerii ab Apostolis ordinati sint, non tamen ad hoc solum, quin præcipue ad munus spirituale. Nimirum (quod constat ex Pauli Epistolis ad Philipp. ad Timoth. & Tit.) jam tempore Apostolorum fuerunt Diaconi etiam Philippis, Ephesi, & in Creta: quibus tamen locis non erat opus mensarum ministerio, cum ibidem Christiani non viverent in communi. Philippus ipse, e primis Diaconis, non dabat mensis præcipue operam, sed prædicatione-

tioni & Baptismo Act. 8. reliquos etiam Diaconos fuisse Altaris & Sacramentorum Ministros certum est ex Justino Apolog. 2. in fine, Tertulliano, & aliis.

At forte Patrum saltem aliqui huic sententiæ adversantur? quod sciam, nullus. Opponitur equidem ex Cypriano L. 3. Ep. 9. verum isthic non aliud vult, quam quod Christus Episcopos tantum & Presbyteros ordinaverit: non etiam Diaconos; at hinc profecto arguere non licet, neque institutum esse a Christo Diaconatus Ordinem. Anacletus autem Ep. 3. & Damasus Ep. 4. contra Chorepiscoporum arrogantiam solum docent: Christum instituisse tantum duos Ordines Sacerdotum, Episcoporum videlicet in Apostolis, & Presbyterorum in 72. Discipulis; nullum proinde Sacerdotum Ordinem præterea dari alium, quem Chorepiscopi arrogabant.

III. Non perinde certum est de Subdiaconatu, multo autem amplius controversum de quatuor Minoribus, num hi quoque Ordines inter Sacramenta referendi sint? Nulla nimirum eorum in S. Literis fit mentio; quamvis autem Traditione accepti sint, hæc ipsa nihilominus, quantum ad rationem Sacramenti pertinet, est admodum obscura; non conferuntur manus impositione, quam tamen multi volunt esse essentialem (saltem partialiter) materiam Ordinationis sacramentalis; forma eorum non complectitur ea verba, quibus dicatur ordinato dari Spiritus Sanctus &c.

Ut ut interim ista se habeant, si in re hac controversa Florentinum & Tridentinum Concilia consulamus, ad mentem eorum ceu verisimilius existimandum est, tam Subdiaconatum quam Minores Ordines esse Sacramenta. Ac Florentini quidem pro hac opinione is est locus, quo in Decr. pro Arm. postquam dixit, *sextum Sacramentum est Ordinis, cujus materia est illud, per cujus traditionem confertur Ordo*, dein exponens Presbyteratus

&

& Subdiaconatus materiam, continuo subjicit: *Subdiaconatus vero per Calicis vacui cum patena vacua traditionem, & similiter de aliis (hoc est, Minoribus Ordinibus) per rerum ad ministeria sua pertinentium assignationem.* Mox vero relata Sacerdotii forma, accipe potestatem &c. & sic, inquit, de aliorum Ordinum formis, prout in Pontificali Rom. continentur. Demum generatim concludit, effectum Ordinis esse augmentum gratiæ, ut quis sit idoneus Minister. Ex Tridentino autem huc facit illud, quod Sess. 23. Cap. 2. septem Ordines recenseat, ac dein Cap. 3. nulla limitatione facta declaret: *Cum -- perspicuum sit per sacram Ordinationem, quæ verbis & signis exterioribus perficitur, gratiam conferri, dubitare nemo debet, Ordinem esse vere & proprie unum ex septem S. Ecclesiæ Sacramentis.*

Vides utrumque Concilium loqui de omnibus Ordinibus, ac ita generatim Ordini attribuire Sacramenti prærogativam, ut nullum excipiat, quin attento contextu omnes potius complectatur; igitur saltem verisimilius est existimasse, omnes indiscriminatim Ordines, proinde Subdiaconatum etiam & Minores, esse Sacramenta. Haud equidem diffiteor, utriusque Concilii verba sensu etiam restricto exponi posse, ut faciunt Adversarii; verum, dum certius aliquod hujus restrictionis fundamentum proferant, malim ego planum & apertum sequi verbor. sensum.

- 21 IV. Quod jam isthic contra relatas opiniones generatim pugnare videtur, id unum est: quod si præter Sacerdotium reliqui etiam Ordines sint Sacramenta, Sacramentorum numerum majorem futurum septenario? verum istud difficultatis nihil habet. Cum enim ex sensu Ecclesiæ septem Sacramenta dari dicuntur, sermo est de Sacramentis in specie duntaxat superiori: non etiam in specie infima. Unde septem tantum sunt hoc sensu Sacramentorum species; ita ut Ordo generatim sumptus unam superiorem Sacramenti speciem efficiat: diversæ autem Ordinationes sint diversæ ejusdem Ordinis generatim accepti species infimæ. DIS-

# DISSERTATIO II.

## DE MATERIA ET FORMA SACRAMENTI ORDINIS.

### §. I.

*Quæ sit materia & forma Ordinationis Presbyteri?*

Cum fide certum sit, Sacerdotium esse verum Ordinis Sacramentum, hujus solius materiam & formam penitus expendere, constitutum habemus; de reliquis vero Ordinationibus satis fuerit explanasse opinionem communiter receptam, id quod §. II. præstabimus. Una autem quæstione complectimur materiam & formam: hæc quippe ita connexa est cum illa, ut, designata Presbyteratus materia, vix ulli de forma dubio locus relinquatur. Inde cum primis de materia hoc loco Scholasticis omnibus est controversia, eaque (meo quidem judicio) adeo implexa, ut satisfacturum existimem Theologum, si vel tale quid proferat, quod cæteris verisimilius videatur. Nimirum, quamvis constet Ordinis Sacerdotalis materiam & formam definiri certo aliquo sensibili signo: at quod illud sit potissimum? nihil dum Ecclesia post tot Scholarum lites pronuntiandum censuit. Eo autem subinde illæ creverunt amplius, quo magis DD. progressu temporis ad calculum revocarunt ritus in ordinando Sacerdote varios, seu primitus, seu deinde in Latina & Græca Ecclesia usitados. Quæ ritus varietas cum sit præcipuum hujus controversiæ fundamentum, de ea primum: tum de Doctorum opinionibus dicendum est.

*R. P. Muszka Tom. II. de Sac.*

**Z z z**

**Ritus**

Ritus in Ordinatione Presbyteri varietas  
apud Latinos & Græcos.

- 22 I. **P**ontificale Romanum Tit. de Ordin. Presbyt. ritum  
in Ecclesia Latina receptum his describit.

1mo, Super caput cujuslibet ordinandi utramque manum imponit Episcopus nihil dicens, quod ipsum post eum faciunt omnes Sacerdotes præsentés; quo peracto tam Episcopus, quam Sacerdotes tenent suspensam manum dextram super ordinandos, solo Episcopo recitante hanc Orationem: *Oremus - - Deum Patrem Omnipot. ut super hos famulos suos, quos ad Presbyterii munus elegit, cælestia dona multiplicet; & quod ejus dignatione suscipiunt, ipsius consequantur auxilio.* Mox, deposita mitra, conversus ad ordinandos Deum precatur: *Exaudi nos - - & super hos famulos tuos benedictionem S. Spiritus, & gratia Sacerdotalis infunde virtutem, ut quos &c.* His subjungitur Præfatio simul Orationem pro ordinandis complectens.

2do, Aptat Stulam ante pectus ordinandi, ac deinde eidem imponit Casulam, ad primum dicens: *accipe jugum Domini &c.* ad alterum vero: *accipe vestem Sacerdotalem &c.* Recitata subinde Oratione, *Deus sanctificationum &c.* & Hymno, *Veni Creator Spiritus &c.* manus ordinandorum oleo ungit dicens: *Consecrare & sanctificare digneris Domine manus istas &c.*

3tio, Cuilibet ordinando Calicem cum vino & superpositam Patenam cum Hostia porrigit, hæc proferens: *Accipe potestatem offerre Sacrificium Deo, Missasque celebrare &c.* ubi Pontificale Romanum speciatim monet, ut ordinandus

Ca.



Calicem simul & Patenam tangat. Post hæc continuatur Missa ab Episcopo, cum quo ordinati una pronuntiant Consecrationis formam.

4to, Communione Ordinatorum finitâ iterum eis ambas manus Episcopus imponit, at solus, & singulis simul dicens: *Accipe Spiritum S. quorum remiseras peccata &c.* Sequitur explicatio Casulæ usque huc implicatæ, & promissio obedientiæ: tum ordinatis datur monitum, & terminatur Missa.

II. Usitatos Græcis in ordinatione Presbyteri ritus copiosissime omnium Cl. Morinus in Comment. de Ordination. Par. 2. refert ex antiquis MSS. Codicibus, quibus demum adjicit Simeonis Thessalon. Archiep. Librum de Sacr. Ordin. ex Bibliotheca Vaticana depromptum, & quosdam e recentioribus alios. Quamvis autem in his quoad aliqua notetur diversitas: in præcipuis tamen, quorumque hodie etiam in Græca Ecclesia est usus, omnino consentiunt. Atque hæc ea plane sunt, quæ ab Arcudio L. 1. de Sacr. Ord. C. 1. & Goario in Euchol. Græc. recensentur: quæque ad sequentia Capita commode reduxerim. Itaque

imo, Episcopus ordinandum ter cruce signat: capiti dein ejus partem sui pallii imponens, superposita manu dextera dicit: *Divina gratia, qua semper infirma curat, & qua defunct, supplet, promovet N. Venerabilem Diaconum in Presbyterum. Oremus pro eo, ut veniat super ipsum gratia SS. Spiritus.* Postea ter repetito *Kyrie eleison*, iterum eum ter cruce signat, manumque tenens ipsi impositam, orat: *Deus, qui es principii & finis expers &c.* ac iterum, interpositis

precibus pro pace, pro Archiepiscopo &c. manum habens ordinando impositam recitat Orationem : *Deus, qui potens es in virtute &c.*

2do, his finitis Episcopus posteriorem Orarii partem ad antierius Ordinati dextrum latus transfert, dicens : *Dignus.* Postea Phelonio (Casula) ipsum induens, iterum exclamat : *Dignus.* Idemque canunt reliqui, qui sunt in Sanctuario. Sequitur salutatio : ordinatus nimirum osculo salutat tam Pontificem, quam Presbyteros adstantes ; ac demum, in loco Presbyterorum consistens, cum iis & Pontifice Liturgiam recitat.

3tio, Cum in Liturgia eo ventum est, ut, Sanctis donis consecratis, dicatur : *ut fiant participantibus &c.* accedit Ordinatus, eique Sanctum Panem tradit Episcopus, dicens : *Accipe depositum istud, & custodi illud usque ad adventum D. N. J. C. quia illud a te est repetiturus.* Ipse vero eo accepto Episcopi manum osculatur, & reversus ad locum pristinum secreto recitat *Kyrie eleison, & Miserere mei Deus.* Cum autem dicendum est, *Sancta Sanctis !* reddit Sanctum Panem, ac dein primus ab Episcopo communicatur. Demum solito more terminatur Liturgia.

- 24 III. Hos jam vero ritus si invicem conferamus, clarum est : Græcam perinde ac Latinam Ecclesiam manuum impositione, huicque respondente Oratione uti in Ordinatione Presbyteri. At in cæteris quanta diversitas ! Apud Græcos nimirum solus Episcopus imponit manum, non item Sacerdotes alii ; nulla ordinando porriguntur instrumenta : nam Panis sanctus ( seu demum is sit consecratus, seu benedictus tantum, in quo variam esse disciplinam constat ex

Goario & Arcudio) post completam ordinationem traditur; nulla fit manuum unctio & consecratio; denique cum impositione manuum non dicitur unquam: *accipe Spiritum S. quorum remiseric peccata* &c.

Hæc omnia ex adverso in usu sunt apud Latinos. Quanquam nec horum semper eadem videatur fuisse disciplina: cum probabile sit Apostolos saltem aliquos, sola manuum impositione Ordinationes perfecisse; idemque in primæva Ecclesia, imo & posterioribus deinde seculis quandoque factum haud obscure colligatur ex Concilio Nicæno I. Toletano IV. Hispalensi II. Meldensi, & aliis, in quibus, cum de Ordinatione agitur, sola manuum impositio commemoratur. Idem iudicium formari posse videtur ex quibusdam Patribus.

Certa de hujus Ordinationis ritu Sententia;  
Status Controversiæ; variæ Doctorem  
opinionēs.

I. **Q**uantacunque hæc sit rituum in ordinando Presby-  
tero diversitas, consentientia sunt nihilominus Do-  
ctorum suffragia in eo primum: quod apud Latinos ad sub-  
stantiam Ordinationis non pertineat decussatio Stoliæ, im-  
positio Casulæ, ejusdem explicatio, unctio manuum, & pro-  
missio obedientiæ; apud Græcos vero signum crucis ter re-  
petitum, Orarii aut Phelonii impositio, & porrectio sancti  
Panis. Certum item est omnibus, etiam Latinis: Græco-  
rum Ordinationes esse validas, tametsi Calicis & Patenæ  
porrectionem penitus omittant. Neque omnino absque te-  
meritate istud in dubium vocari potest, quando vel Romæ  
ritu suo Presbyteros ordinant, nec de eo illis ab Ecclesia

lis unquam mota est; quin Ordinationes eorum esse ratas constat declarasse SS. Pontifices, Leonem X. Clementem VIII. Paulum V. Urbanum VIII. & alios apud Morinum in Comment. de Ordinat. Par. 1. C. 3. & 4.

- 26 II. Quod igitur controversiæ caput est, quæritur solum de manus impositione, & porrectione instrumentorum, tanquam materia; de Oratione item & verbis, memoratiæ porrectioni respondentibus, tanquam forma: num videlicet universam aut sola manus impositio cum Oratione, aut etiam sola instrumentorum porrectio cum verbis adjunctis sufficiant ad perficiendam Presbyteri Ordinationem? num item, si utrumque simul jungatur (ut fit in Latina Ecclesia) utrumque habeat rationem materiæ & formæ sacramentalis? De quibus singillatim omnibus ut statui possit, fatis fuerit, (quod nos faciemus) generatim definire: quæ sit ex institutione Christi ad perficiendum Ordinationis Presbyteri Sacramentum materia & forma?

- 27 III. De hac jam vero controversia si DD. consulas, in partes eos scindi varias reperies.

Ac Recentiorum quidem plurimi post Morinum in Comment. de Ordinat. Par. 3. Exercitat. 1. Cap. 1. existimant, solam manus impositionem & orationem materiæ & formæ rationem habere: porrectionem proinde instrumentorum ritum esse mere accidentalem. Utrique contra cum Vasquezio & Bellarmino attribuendam alii putant materiæ & formæ prærogativam; quorum aliqui, ut Græcorum Ordinationes explicant, in ipsa manuum impositione, ceu virtute, instrumentorum porrectionem ajunt contineri eatenus, quatenus in manu, tanquam *organo organorum*, implicite  
ia-

includuntur instrumenta. Quod ipsum dicere necesse habent, qui cum Dominico Soto & Estio solam instrumentorum porrectionem, eique adjuncta verba pro materia & forma agnoscunt.

Sed enim violentum istud videtur multis. Quo igitur Græcorum & Latinorum ritus concilient, quidam cum Bellarm. Lugo. & Platel. opinantur, generatim duntaxat Christum instituisse signum aliquod sensibile pro materia & forma, ejusque determinationem Ecclesiæ arbitrio reliquisse. Determinatam ex adverso institutionem hanc esse contendunt alii, ita nihilominus, ut disjunctive solum facta sit, liberumque esset Ecclesiæ vel sola manuum impositione, vel cum hac & instrumentorum porrectione simul, tanquam adæquata materia, ordinare Presbyteros. Postremam opinionem insinuat Cl. Simonnet in Traët. de Ord. Disp. 3. Ar. 1. Resp. 3. ubi ad Object. respondet. Atque hanc ipsæ etiam amplector, ceu verisimiliorem reliquis, & ad conciliandos Ecclesiæ ritus accommodatiorem: tametsi non plane in omnibus laud. Simonnetto consentiam.

## ASSERTIO.

*V*erisimilius est Christum, Ordinis Sacerdotalis Sacramentum instituentem, ejus materiam & formam disjunctive tantum determinasse, ita videlicet: ut vel sola manus impositio cum Oratione sufficiat; vel cum hac, simul instrumentorum porrectio, eique adjuncta verba, pro materia & forma completa adhiberi possint.

Cum universim nihil esse queat Sacramenti materia & forma, quod Christum non habeat auctorem, institutionem  
dis-

disjunctive factam, quam in præsentī asserimus, satis opinor tuebimur, si comprobemus primum: etiam sola manus impositione & oratione perfici ordinationem Presbyteri; deinde, rationem materiæ & formæ convenire tam memoratæ manus impositioni, quam porrectioni instrumentorum cum adjunctis verbis, dum simul adhibentur, ut sit in Latina Ecclesia.

- 28 Jam vero I. sola manus impositione & oratione valide ordinari Presbyterum, abunde docet praxis & sensus Ecclesiæ. Etenim probabile admodum est, aliquos saltem Apostolos solo hoc ritu in ordinandis aliis usos: nullius certe alterius meminerunt S. Literæ, cum factas ab Apostolis ordinationes referunt. Item, ut plurimum saltem, observatum fuisse primis temporibus in Ecclesia etiam Latina, prorsus verisimiliter colligitur ex compluribus Conciliis & Patribus: cum iis locis, quibus de Ordinatione Presbyteri agunt, solam commemorent manus impositionem. Ita ex Conciliis Generalibus Nicænum I. Can. 9. Chalcedonense Can. 1. ex particularibus Toletanum IV. An. 633. Can. 28. Hispalense II. An. 619. Cap. 5. ex Patribus Ambrosius L. de Dignit. Sacerdot. C. 5. Innocentius I. Ep. 22. ad Episcopos Macedoniæ C. 5. & plures alii. Sed præcipuum hujus loci argumentum est praxis Ecclesiæ Orientalis, in qua constat, sola manuum impositione & oratione Presbyteros ordinari, & quidem valide, ut supra N. 25. probavimus. Cum igitur nullum Sacramentum esse possit ratum absque materia & forma a Christo instituta, ultro consequitur: ex ejus institutione vel solam manus impositionem & orationem ita esse Presbyteratus materiam & formam completam, ut una illa ad hoc Sacramentum rite ministrandum sufficiat.

Quod

Quod autem ad II. attinet, ita arguo: dum ex more 29  
 Latinorum ordinatio Sacerdotis peragitur, nec manuum im-  
 positioni, nec instrumentorum porrectioni, prout conjun-  
 ctis cum verborum forma illis respondente, quidquam deest  
 ad rationem materiæ & formæ hujus Sacramenti; jure igi-  
 tur utrique eam prærogativam attribuerimus.

Ac de manuum quidem impositione & oratione mi-  
 nus dubium esse potest; certe vel sola sufficit ad perfici-  
 endam Ordinationem, ut paulo ante comprobatum est:  
 cur vero eadem in consortio alterius virtutem a Christo  
 acceptam penitus deperdat? Quo & illud facit: quod in  
 Presbyteri Ordinatione semper religiose observatus fuerit,  
 ac etiamnum observetur usus manuum impositionis; quod-  
 que eam semper etiam posteriorum seculorum, quibus ritus  
 Latinus invaluit, Patres & Concilia commemorent, cum  
 de hoc argumento pertractant. Quid quod & Concil. Tri-  
 dentinum hujus sententiæ fuisse videatur, cum Sess. 14.  
 de Sacr. Extremæ Unctionis agens, ejus Ministrum Cap. 3.  
 esse dicat aut Episcopos, aut Sacerdotes rite ordinatos *per*  
*impositionem manuum Presbyterii.*

Sed & Calicis cum vino, & Patenæ cum Hostiæ tra-  
 ditio, huicque adjuncta verba, *accipe potestatem offerre Sa-*  
*criticium &c.* hæc inquam etiam, dum ex ritu Latinorum  
 præter impositionem manuum adhibentur, ad substantiam  
 pertinent Ordinationis, ejusque proinde sunt materia & forma.  
 Cur ita vero? quia signum hoc est prorsus accommodatum ad  
 significandam Sacerdotis præcipuam in reale Christi Corpus  
 potestatem: quin eam illo revera conferri indicant verba,  
*accipe potestatem &c.* quæ (nisi vim iis inferre velimus) ex  
 notione sua sunt ipsa potestatis collatio, non autem mera

jam prius collatæ potestatis declaratio. Ac revera usque ad hanc instrumentorum porrectionem pro Sacerdotio Candidati solum *orānandū* vocantur in Pontif. Romano: post eam vero continuo dicuntur *Presbyteri Ordinati*, jubenturque cum Episcopo proferre consecrationis verba. Quæ omnia haud leve momentum sunt in rem nostram; præsertim cum Florent. in Decr. pro Arm. dicat: *Sextum Sacramentum est Ordinis, cujus materia est illud, per cujus traditionem confertur Ordo; sicut Presbyteratus traditur per Calicis cum vino, & Putenæ cum pane porrectionem; & infra, Forma Sacerdotii talis est: accipe potestatem &c.* Profecto autem violentum est dicere: Concilium isthic ritum duntaxat accidentalem designare, quando universim materiæ & formæ Sacramentalis nomine veniunt partes ipsam Sacramenti substantiam conficientes.

- 30 His jam vero invicem collatis, quid ni ita pro Assertionem generatim arguere liceat? Sacramenti valor haberi nequit sine materia & forma a Christo instituta; Sacerdotij Sacramentum est ratum, tametsi sola manuum impositione & oratione conferatur, ut fit apud Græcos; ratum idem est, cum ex more Latinorum tam memorata manus impositione, quam instrumentorum porrectione & verbis illi respondentibus ministratur: utrique huic præterea convenit ratio materiæ & formæ Sacramentalis; denique opinio hæc ad conciliandos Ecclesiæ ritus est plane accomodata; jure itaque censemus, Christum Ordinis Sacerdotalis Sacramentum ita instituisse, ut ejus materiam & formam disjunctive determinaverit in sensu Assertionis. Illud interim observandum: in Ordinatione ritu Latinorum facta, tam manuum impositionem, quam porrectionem instrumentorum seorsim sumptas (idem est de verborum forma) partialem duntaxat



duntaxat esse materiam : utramque autem simul in unam totalem coalescere ita, ut utriusque consortio perfectum ac completum efficiatur Presbyteratus Sacramentum.

Quod demum ad controversiam integre expediendam 3r est reliquum, una etiamnum superat difficultas Græco perinde ac Latino ritui communis. In utroque nimirum multiplicem esse manus impositionem constat ex ritu supra descripto; quæ igitur nominatim illa est, cui ex vero conveniat prærogativa materiæ sacramentalis? Rursum isthic DD. in varia abeunt; neque omnino sat proum est certi aliquid pronuntiare.

Mihi verisimilius videtur, in Ritu Græcorum omnes tres manus impositiones cum totidem Orationibus instar unius materiæ & formæ completæ adhiberi, ac per omnes illas simul conferri potestatem tam consecrandi, quam absolvendi a peccatis. Istud vero sentiendi ratio est: quia quævis earum cum oratione sibi adjuncta habet significationem potestatis Sacerdotalis & gratiæ divinæ; nulla præterea unquam in Ordinatione prætermittitur; ac denique, quia tam post primam quam secundam is, qui Sacerdotio initiatur, vocatur *Ordinandus*: post tertiam autem *Ordinatus*. Hæc omnia videre est in variis Ordinationum Ritibus a Cl. Morino relatis. Non nego interim, vel una manus impositione & oratione Presbyteratum valide conferri posse.

Apud Latinos autem verisimilius est, e tribus manus impositionibus ordine primam non esse de substantia materiæ; hæc enim (ut notatur in Pontif. Romano) fit ab Episcopo nihil dicente: caret proinde verborum forma, quæ semper materiam comitatur. Quod vero ad duas reliquas

attinet, utramque censeo esse substantialem Ordinationis materiam. Ac illa quidem, quam Episcopus facit, tenens manum super ordinandum cum oratione, *Oremus -- Deum Patrem &c.* pertinet ad consecrandi potestatem, eique adnexam gratiam: postrema vero cum verbis, *Accipe Spiritum S. quorum remiseris &c.* ad absolvendi potestatem, huicque rursus gratiam respondentem. Consulto autem de priore manus impositione dixi, *quam Episcopus facit*; tametsi enim tum cum Episcopo etiam alii Presbyteri super ordinandum manus teneant, hæc tamen manus impositio ab illis facta non videtur esse substantialis materia: tum quia ipsi nulla verba proferunt: tum quia Presbyteri non censentur ministri sacræ hujus Ordinationis. Quem igitur in finem, inquires, imponunt manus etiam Presbyteri? in signum ajo cooptationis & societatis ad idem ministerium: cui cæremoniæ apud Græcos respondet salutatio.

### Respondetur ad Objecta.

**Q**UADRUPLEX Objectionum genus est, quibus opinio hæc potissimum impugnari potest. Vel enim arguitur contra solam manus impositionem: vel contra instrumentorum traditionem: vel utramque simul: aut demum adversus institutionem disjunctive factam. De forma non est necessum speciatim agere: de hac enim difficultas est eadem, quæ de materia. Jam vero

- 32      Contra manus impositionem arguitur I. Gregorius IX. Cap. *Presbyter.* de Sacram. non iter. ait; *impositionem manuum esse ritum ab Apostolis introductum*; at ritus ejusmodi materia Sacramenti esse nequit.

II. So-

II. Sola manus impositione perfici Ordinationem Presbyteri, ut plurimum probatur ex Græcorum ritu; at in hoc fit etiam panis sancti traditio cum verbis, *accipe depositum* &c. quæ æquivalet instrumentorum porrectioni apud Latinos receptæ, ergo &c.

III. Si sola manus impositio sit sufficiens materia, hacque una utantur Græci, quid ni sola illa pariter apud Latinos valide conferri possit Presbyteratus Sacramentum?

Resp. ad I. cum Bellarmino: ex mente Gregorii Papæ manuum impositionem esse ab Apostolis introductam, non quoad institutionem: verum quoad usum tantum, cum primi illi ritu hoc a Christo instituto sacros Ministros ordinauerint.

Resp. ad II. C. Maj. Dist. Min. sic tamen, ut hæc panis traditio in ritu Græcorum non habeat rationem materiæ substantialis C. secus N. Min. una cum Illat. Nimirum hæc panis traditio apud Græcos fit post peractam quoad substantiam ordinationem: cum jam ante illam in Euchologiis dicatur *Ordinatus* Presbyter, ac etiam cum Episcopo consecret.

Resp. ad III. existimare me omnino, etiam in Ecclesia Latina per solam manus impositionem cum oratione illi respondente valide ordinandum Presbyterum, si Minister hac una materia & ~~forma~~ uti velit. *Valide* inquam; nam ut *licite* etiam fiat ordinatio, suus cuique Ecclesiæ ritus est observandus. Vide in simili dicta de Confirmationis materia L. III. N. 40.

- 33 Contra instrumentorum porrectionem opponitur I. si hæc sit etiam materia, perinde igitur illa sola, ac sola manuum impositione conferri potest Ordo Sacerdotii; istud admitti nequit: ergo nec primum.

II. Apostoli per solam manuum impositionem ordinarunt: idem factum usque ad Sæc. XI. ab Ecclesia Latina: Græca vero constanter tam primis, quam posterioribus seculis, ac etiam hodie hoc uno ritu Ordinis Sacramentum ministrat; instrumentorum igitur porrectio non est materia a Christo instituta, sed mera cæremonia a Latinis progressu temporis in Ecclesiam inducta.

Resp. ad I. N. Maj. Ratio discriminis est: quia (ut momenta N. 28. allata probant) ex institutione Christi vel sola manus impositio esse potest totalis & adæquata Ordinationis materia; secus est de instrumentorum porrectione, cum per hanc solam nusquam noverimus in Ecclesia ministratum Presbyteratus Ordinem.

Resp. ad II. N. Assertum quoad prima duo membra. Censeo nimirum probabile esse, aliquos saltem Apostolos, qui in Occidente Christi gregem rexerunt, quandoque manuum impositione simul & instrumentorum porrectione usos in ordinandis Sacerdotibus: idemque statim a primis temporibus fecisse Ecclesiam Latinam.

Ad id vero opinandum inducor veterum quorundam Codicum, præsertim Ordinis Romani verbis, quibus pro Ordinatione Sacerdotis instrumentorum porrectio præscribitur. Ita in Ordine Rom. (teste Simonnetto Tract. 17. de Ord. Disp. 3. Art. 3.) de Ordinatione Presbyterorum hæc

hæc leguntur: *Hoc facto* (manibus videlicet unctione consecratis) accipiat Episcopus *Patenam cum oblatis, & Calicem cum vino, & det eis* (ordinandis) *dicens: accipite potestatem offerre Sacrificium Deo, Missamque celebrare tam pro vivis, quam pro defunctis in nomine Domini.* Idem testatur insignis Criticus, & in veterum Codicum notitia verfatissimus Cl. Menardus; verba ejus in L. Sacram. Greg. *Nota 757.* hæc sunt: *In Ordinibus MSS. Sancti Germani a Pratis, & Tiliano, & in Ordine Romano extat ejusmodi instrumentorum traditio cum sua forma, quæ tamen ibi pluraliter effertur: Accipite potestatem offerre &c.* Igitur jam Seculo VIII. quo Ordo Rom. extabat, Ecclesia Latina instrumentorum porrectione cum verbis ei respondentibus usa est: imo etiam longe antea; nam Ordo Rom. non præscribit ritus novos, sed antiquos, & diuturna Ecclesiæ praxi roboratos. Cum præterea hunc porrectionis ritum ostendi non possit esse ab aliquo Concilio vel Pontifice institutum, juxta sæpe laudatam Tertulliani & Augustini regulam *sine dubio tenendum, quod eum Ecclesia ab Apostolis, Apostoli a Christo, Christus a Deo suscepit.* Jam vero, si ritus hic ab Apostolis sit traditus, verisimile est, eos etiam i. lo saltem aliquando fuisse usos.

Quod de Orientali Ecclesia in Object. additur, cum in oppositum nulla (quod sciam) extent testimonia, admittendum est; at hinc id sequitur unum, quod in Assertionem contendimus: materiam videlicet & formam hujus Sacramenti a Christo disjunctive tantum esse institutam.

Ritus impositionem manus cum instrumentorum traditione pro materia totali coniungens longe pluribus momentis impugnatur. Ac I. quidem ex Florentino: quod cum in

in Decr. pro Arm. Calicis & Patenæ porrectionem assignet pro materia, nulla impositionis manuum facta mentione, censuisse videtur in Latino ritu solam instrumentorum traditionem materiæ completæ rationem habere: manuum proinde impositionem ne partialem quidem esse materiam.

II. Ejusdem sententiæ jam antea fuisse Gregorium IX. colligitur ex Cap. *Presbyter*, de Sacr. non iter. ubi hæc ejus verba ex Ep. ad Archiep. Lond. data recitantur: *Presbyter & Diaconus cum ordinantur, manus impositionem tactu corporali - - recipiunt; quod si omissum fuerit, non est aliquatenus iterandum, sed statuto tempore ad hujusmodi Ordines conferendos caute supplendum, quod per errorem exiit pratermissum.* Non existimavit igitur manus impositionem pertinere ad substantiam materiæ: secus iterandam decrevisset Ordinationem.

III. Saltem per secundam manuum impositionem & instrumentorum traditionem complete confertur Sacerdotii Ordo, cum in Pontif. Rom. continuo dicatur *Ordinatus Presbyter*, ac etiam cum Episcopo consecret; ergo tertia manuum impositio cum verbis, *Accipe Spiritum S. quorum remiseras* &c. non est pars materiæ ad Ordinis substantiam requisitæ.

Resp. ad I. Factam ex Decreti Florent. verbis illationem non esse legitimam; certe silentii hujus causam passim aliunde DD. repetunt, ut legere est apud Bellarm. & alios. Ac mihi quidem videtur, Concilio in hac Arnenorum de Sacr. Ord. instructione haud aliud fuisse propositum, quam ut eos doceret, porrectionem instrumentorum in Latina Ecclesia esse substantialem Ordinationis materiam: id

id quod illi ignorabant, cum sola manus impositione Ordinis Sacramentum ministrarent; hinc ex adverso siluit de manus impositione, ut quæ jam Armenis nota, imo etiam usitata fuit. Eo nimirum universim spectabat Concilium hoc suo Decreto, *ne ulla in futurum de fidei veritate apud Armenos hæsitatio esse valeat, atque idem per omnia sapiant cum Sede Apostolica*: utque illis traderet *sub quodam brevi compendio Orthodoxæ fidei veritatem, quam -- Romana profiteatur Ecclesia*, ut statim principio præfatur Eugen. in cit. Decr.

Resp. ad II. hoc loco Pontificem, (quantum quidem ad Presbyteri Ordinationem attinet) agere de tertia manus impositione cum verbis, *Accipe Spiritum S. quorum &c.* conjuncta: hæc enim fit *tactu Corporali*. De hac igitur statuit: eam, si prætermissa fuit, supplendam omnino esse, quin necesse sit repetere secundam manuum impositionem, & porrectionem instrumentorum jam factam. At enim hinc non aliud inferre licet, quam quod Gregorius existimaverit, potestatem consecrandi conferri posse seorsim a potestate absolvendi, sicut revera eam Christus seorsim contulit. Conformiter ad quod

Resp. ad III. Dist. Ant. per secundam manuum impositionem, & instrumentorum porrectionem complete confertur Sacerdotii Ordo quoad potestatem consecrandi C. etiam quoad potestatem absolvendi N. quo eodem sensu Illatio explicanda est. Post primam nihilominus potestatem acceptam ordinatus dicitur absoluto nomine *Presbyter*, quia potestas hæc in Ordine Sacerdotali est præcipua; imo altera Judicem potius quam Sacerdotem constituit, cum aliunde jam sacrificandi potestatem solis Sacerdotibus propriam supponat. Jam vero uti hæc potestas duplex ac

R. P. Muszka Tom. II. de Sacr.

B b b b

di-

diversa confertur per diversam partialem materiam & formam, ita utrique suus respondet partialis character, & gratiæ effectus: sic tamen, ut, sicut diversæ partiales materiæ & formæ unam totalem conficiunt, sic pariter diversi hi partiales Ordinationis effectus in unum totalem & completum coalescant. Sed enim ex adverso

- 35 Instari potest: manus impositio, qua ordinatur Presbyter, juxta laud. Gregorium IX. *tañu corporali* recipitur; atqui istud non fit in secunda manus impositione, ut quæ non tactu, sed suspensione manus peragitur; quo igitur jure hæc altera manus impositio nomine materiæ veniat?

Resp. Jam supra in Resp. ad II. insinuavi, Pontificem isthic loqui de tertia duntaxat manus impositione, quam omnino *tañu corporali* Presbyter recipit. Præter hanc autem eum requirere etiam suspensivam manus impositionem, aperte colligitur ex eo, quod recitata ex Cap. *Presbyter* verba his concludat: *Suspensio autem manuum debet fieri, cum oratio super caput effunditur ordinandi*. Quod si interim quis volet primam manuum impositionem, quæ fit contactu capitis & sine ullis verbis, cum altera mere manus suspensiva unam moraliter esse manuum impositionem, proinde & unam partialem materiam, hujus ego quidem opinioni multum repugnare nolim; ac tum quidem vero sensu dici potest, alteram etiam manus impositionem, prout videlicet cum prima conjunctam, *tañu corporali* a Presbytero recipi.

- 36 Demum contra institutionem disjunctive factam ad eum fere modum argui potest, quo contra materiam Sacramenti Confirmationis disjunctive pariter institutam, de quo vide

N. 38.



N. 38. & seqq. L. III. de Confirm. unde prouum erit colligere, quid in præfenti quoque ad confimilia Objecta fit respondendum. Quin cum uniuersim opinio, de materia & forma Presbyteratus isthic a nobis asserta, magnam partem cum ea conveniat, quam cit. L. III. de Confirmationis materia & forma tuiti sumus: admodum utile fuerit recolere ejus L. Dissert. I. §. III. & IV. præsertim quæ ibid. ad Obj. responsa sunt.

## §. II.

Quæ sit materia & forma reliquorum  
Ordinum ?

**H**Aud minor est de materia & forma Ordinum reliquorum, præsertim Sacrorum & Majorum, controversia; quia interim illis Sacramenti prærogativa attribui non potest eadem certitudine, qua Sacerdotio: non est, cur perinde hujus ac prioris Quælitu litibus anxie componendis urgeamur. Inde satis fuerit communiorem DD. sententiam retulisse. Secundum hanc vero

I. Episcopus ordinatur manus impositione, tanquam materia: & verbis ei respondentibus, tanquam forma, quæ apud Latinos sunt: *Accipe Spiritum Sanctum*; apud Græcos autem Oratio: *Divina gratia, quæ semper infirma curat* &c. Nec dubium est, hanc esse apud Græcos completam materiam & formam: hac quippe utuntur una. Eandem etiam apud Latinos saltem partialem esse, certum est omnibus; idque evincunt ea, quæ de manus impositione ordinatoria jam alias ex S. Literis & Conciliis retulimus. Dixi *saltem partialem*: n n pauci enim existimant, etiam

B b b b 2

Pa-

Pastoralis baculi, annuli, aut saltem Libri Evangeliorum traditionem cum verbis ei adjunctis ad substantiam Episcopalis Ordinationis pertinere; quanquam communior oppositum tueatur. Sed & controversum est: num memorata manus impositio necessario fieri debeat a tribus Episcopis? Et quamvis id absolute requirant aliqui provocantes ad Anacleti Ep. 2. & Joannis III. Ep. ad Epp. German. & Galiliæ datam: potior attamen DD. pars censet, saltem cum dispensatione Pontificis, vel ab uno Episcopo hanc Ordinationem valide perfici posse. Quam in rem grave argumentum est, quod Gregorius M. Augustino Ep. Cantuar. concesserit, ut solus Episcopos ordinaret: quod ipsum a Gregorio XIII. concessum Patriarchæ Æthiopiæ recens a se constituto legitur. De his, si lubet, consule Platellium in syn. Th. C. 7. §. 2. a N. 1028.

- 38 II. Diaconi & Subdiaconi apud Latinos Ordinatio duplicem habet materiam & formam partialem. Nimirum Diaconus ordinatur manus impositione cum verbis, *Accipe Spiritum S. ad robur &c.* & Libri Evangeliorum traditione cum hac forma, *Accipe potestatem legendi Evangelium &c.* Subdiaconus vero sola instrumentorum traditione, primum quidem Calicis vacui & Patenæ vacuæ cum verbis, *videte, cujusmodi ministerium vobis traditur &c.* dein Libri Epistolarum cum verbis, *Accipite Librum Epistolarum, & habete potestatem legendi eas &c.* Apud Græcos contra uterque hic Ordo sola manus impositione confertur, Orationem ei respondentem dicente Episcopo, nempe: *Divina gratia - - promovet N. Lectorem in Subdiaconum*, vel *N. Subdiaconum in Diaconum*; oremus igitur pro ipso, ut &c. Horum omnium ratio generatim est: quia signa hæc externa cum verbis adnexis sufficienter significant potestatem Ordinis, eique

eique respondentem gratiæ & characteris effectum: tametsi is in quibusdam solum implicite importetur. Inde reliqua, quæ in his Ordinationibus præterea adhibentur, ut sunt apud Græcos, pallii super caput Ordinandi impositio, signi crucis repetitio &c. apud Latinos autem benedictio super ordinandos, manipuli vel stolæ traditio &c. hæc inquam, & id genus alia ritibus accidentalibus accensentur.

III. Demum quatuor Minorum Ordinum collatio juxta 39 Concilium Florent. jam cit. & Pontif. Romanum in Ritu Latinæ Ecclesiæ sola instrumentorum traditione, tanquam materia, absolvitur. Traduntur autem Acolytho urcei vacui, item candelabrum cum cereo extincto: Exorcistæ Liber Exorcismorum: Lectori Liber Lectionum: Ostiario Claves Ecclesiæ; cui traditioni respondentia verba sunt formæ Ordinationibus singulis propriæ. Græci contra Lectoris Ordinem, quem unum e Minoribus in usu habent, solo manus impositionis & Orationis ritu conferunt, ut videre est apud Morinum in Ritibus Ordinat. supra laud. & Auct. Perp. Fid. Tom. 5.

Lib. 5. Cap. 6.



## DISSERTATIO III.

DE SACRAMENTI ORDINIS EFFECTU, ET  
ADNEXA ORDINIBUS OBLIGATIONE.

## §. I.

*Qui sint effectus Ordinis Sacramento proprii?*

CUM sacra Ordinatio sit verum Legis novæ Sacramentum, idque ejusmodi, ut iterari non possit, ultro consequitur, operari illam tam gratiæ quam characteris sacramentalis effectum. Utrumque porro istud ita se habere satis, opinor, constat ex iis, quæ L. I. de Sacr. in Gen. Dissert. III. §. I. & II. de gratia & characteris sacramentali copiose disputata sunt. Quæ posteaquam Theologiæ studiosus in memoriam revocaverit, id solum videbit sibi esse jam reliquum, ut gratiæ & characteris, prout effectus hi Sacramento Ordinis sunt peculiares, naturam penitus investiget. Atque isthuc conferent duæ, quas subijcimus, animadversiones.

## ANIMADVERSIO I.

## De Gratia Ordinis.

Differentia, quæ inter Ordinis & reliquorum Sacramentorum gratiam intercedit, duobus definitur: quæ ipsa peculiarem ejus naturam constituunt. Nimirum

- 40 I. Gratia sanctificans, quam Sacramentum Ordinis operatur, quandam in genere gratiæ plenitudinem habet :  
eam

eam videlicet , qua cumprimis Ministri Ecclesiæ opus habent ad sancte obeunda Ordinum ministeria. Ita indubitanter sensit Innocentius I. cum Ep. 18. de Hæreticis ordinantibus scribens, dicat : *nec dare ejus ( gratiæ ) plenitudinem possunt, quæ maxime in Ordinationibus operatur.* Et Doctor Ang. in Suppl. qu. 35. Art. 1. postquam comprobavit in Sacramento Ordinis dari gratiam gratum facientem, eam deinde explicans, *ad idoneam, inquit, executionem Ordinum non sufficit bonitas qualiscunque : sed requiritur bonitas excellens ; ut sicut illi, qui Ordinem suscipiunt, super plebem constituuntur gradu Ordinis, ita & superiores sint gradu Sanctitatis* Ex quibus facile colligas, hanc gratiæ plenitudinem longe diversam esse ab ea, quæ in Confirmationis Sacramento confertur. Hæc nimirum ordinatur ad fidem profitendam, & reliqua cuilibet etiam Laico communia officia : illa vero ad rite exercendum publicum Altaris & Ecclesiæ ministerium ; sicut igitur sacer Clericorum Ordo a communi Christianorum statu est diversus, eoque longe superior : ita gratiæ plenitudo illi propria est diversa, multoque cumulatior ac perfectior.

Sed num, inquires, hanc gratiæ plenitudinem quælibet Ordinatio eadem ratione operatur? imo prorsus diversa. Uti enim unus Ordo alium perfectione excedit : ita plenitudinis gratiæ excessus major est in uno, quam in alio ; hinc plenior est gratia Presbytero collata quam Diacono, hujus rursus major quam Subdiaconi &c.

II. Alterum, quod gratia hæc sanctificans peculiare 41 habet, est jus in ea fundatum ad gratias actuales, quibus opportuno tempore ordinatus juvetur ad rite implenda sui Ordinis munia. Neque enim fieri potest, ut providentissimus

simus Deus quemquam ad suum ministerium assumat, nec tamen eidem (modo se indignum non reddat) largiatur conducentia ad illud gratiæ suæ subsidia. Inde Leo M. Serm. 1. in die suæ assumptionis aiebat : *Qui mihi honoris est auctor, ipse mihi fiet administrationis adiutor ; & , ne sub magnitudine gratiæ succumbat infirmus, dabit virtutem, qui contulit dignitatem.*

Ac hic quidem gratiarum affluxus erga primos Ecclesiæ Ministros tantus erat, ut virtute ordinationis etiam gratias gratis datas consequerentur : eas videlicet, quas Apostolus 1. Cor. 12. de *divisionibus ministrorum* loquens, a V. 7. his verbis commemorat : *unicuique autem datur manifestatio Spiritus ad utilitatem ; alii quidem, per Spiritum datur sermo sapientiæ, alii sermo scientiæ, - - alteri fides, - - alii gratia sanitatum, alii operatio virtutum, alii prophetia, alii discretio Spirituum, alii genera linguarum, alii interpretatio sermonum.* Nimirum hæc signa (ut ait Gregor. M. Hom. 29. in Evangelia) necessaria in exordio Ecclesiæ fuerunt ; ut enim fides cresceret, miraculis fuerat nutrienda : quia & nos cum arbuscula plantamus, tamdiu eis aquam infundimus, quousque ea in terra coaluisse videamus : *et si semel radicem fixerint, irrigatio cessabit.*

Ex quibus Gregorii verbis pronum est conjicere, cur jam adulto Ecclesiæ statu hæc gratiæ gratis datæ sacris Ministris parcius conferantur : quia videlicet *linguæ* (idem est de reliquis) *in signum sunt non fidelibus, sed infidelibus,* ut ait Apostolus 1. Cor. 14. Dixi parcius : nam & nunc id genus gratias virtus Ordinationis quandoque operatur, quod vel nostrorum temporum experientia docet. Ut autem decissent alia, novimus per rudes etiam & contemptos Ec-

Ecclesiæ Ministros socordiam multis excuti, desperatos in spem erigi, indurata peccatorum pectora ad pœnitentiam emolliri &c. Quod vero est isto majus prodigii genus? non humanæ profecto virtutis, sed divinæ gratiæ sunt hæc opera, eoque etiam curationum signis præstantiora, quo animus præstat corpori. Nunc (ait Augustinus de verbis Domini Serm. 88.) *maiores sanitates operatur Deus, - sicut enim animus melior est corpore, sic & melior salus animi quam salus corporis: modo caro cæca non aperit oculos miraculo Domini, & cor cæcum aperit oculos sermone Domini, &c.*

## ANIMADVERSIO II.

### De Charactere Ordinis

I. **C**haracter, qui per Sacramentum Ordinis confertur, 42 est signum quoddam spirituale & indelebile animæ impressum, cui proinde stabilis potestas sacri Ministerii ita adnexa sit, ut Ministri Ecclesiæ a reliquo fidelium coetu nunquam non discernantur: uti hæc certa sunt partim ex Trident. partim ex ejus Catechismo jussu Pii V. edito. Talem porro characterem in Sacerdotis saltem Ordinatione imprimi, nemo Catholicorum ambigit; de reliquis vero Ordinationibus istud non magis constat, quam certum sit eas esse vera Ordinis Sacramenta. Inde, cum nobis probabile sit visum, etiam Minoribus Ordinibus rationem Sacramenti convenire: probabile quoque est eos characterem operari. Per hos nimirum etiam fit ordinati consecratio, confertur potestas ad sacrum ministerium, eaque ita stabilis, ut collati semel Ordines iterari non possint: quæ omnia haud obscurum præbent argumentum judican-

di, his quoque Ordinibus inesse vim efficiendi in anima characteris.

- 43 II. Quoniam autem Ordinum natura non est eadem, consequens videtur, non eundem pariter, sed plane distinctum a singulis imprimi characterem. Hac una certe causa differentes esse dicimus Baptismi & Confirmationis characteres; cur non igitur idem dicamus de Ordinibus, quos & potestate & gratiæ effectu invicem differre novimus? Unde non probatur mihi opinio eorum, qui eundem prorsus in specie esse ajunt omnium Ordinum characterem, solumque intendi illum per accedentes alias Ordinationes. Nemini unquam profecto in mentem venit dicere, characterem Confirmationis non aliud esse, quam extensionem characteris Baptismi; perinde igitur dici nequit characterem Presbyteratus esse meram extensionem characteris Diaconatus, & sic de reliquis Ordinibus. Atque ad hoc conformiter existimo sentiendum esse de duplici quoque characterē Presbyteratus, ut jam præced. Dissert. §. I. in Resp. ad III. N. 34. istud ipsum insinuavi.

## §. II.

### *Quæ sit Obligatio Ordinibus adnexa?*

SACRAMENTI Ordinis effectus, plenitudo videlicet gratiæ & sacrae potestatis prærogativa, satis indicat: Ecclesiæ Ministros supra vulgus Christianum evehi, atque in coetu fidelium sublimiorem locum tenere. Hæc ipsa porro status sublimitas monet, eorum vivendi normam communibus Christiani hominis officiis non definiri; amplius certe ab illis præterea exigi, passim testantur Patres iis locis, qui-



quibus de Vita Clericorum agunt. Audiatur pro omnibus Hieronymi monitum in Ep. ad Nepctian. *Clericus* - - inquit, *interpretetur vocabulum suum*, & *nominis definitione prolata*, nitatur esse quod dicitur; - - *propterea Clerici dicuntur*, quod de Sorte Domini sint: *vel quia Dominus fors*, id est, *pars Clericorum est*; qui autem vel ipse pars Domini est, vel Dominum partem habet, talem se exhibere debet, ut ipse possideat Dominum, & ipse possideatur a Domino &c. Atque isthuc spectant Clericorum obligationes, partim ex ipsa Ordinis natura ortum ducentes, partim lege lata, aut constanti usu inductæ; quarum aliæ omnibus Ordinibus sunt communes, aliæ folis Sacris & Majoribus propriæ. Utrasque nunc compendio perstringemus.

### Obligationes omnibus Ordinibus communes.

I. **Q**uod primum Clericis universim omnibus incumbit, 44 est obligatio deferendi tonsuram, & habitum Clericalem: talem videlicet, qui eos pro regionis more a sæcularibus distinguat, sitque statui sacro conveniens quoad formam, colorem &c. ut constet ex pluribus Capp. Tit. de vita & honest. Cleric. item de Cler. Conjug. ac etiam Trident. Sess. 14. & 23. de Reform. Cap. 6. Ut ut autem istud sententia omnium ita se habeat, controvertitur nihilominus: quæ, & quanta sit hæc obligatio? Panormitanus in in Cap. Si quis. de vita & honest. Cleric. cum paucis quibusdam docet, omnes Clericos peccare graviter, si absque iusta causa per longius tempus tonsuram & habitum non deferant. Vasquez cum Navarro & Bonacina solos Clericos Beneficiatos, & in sacris Ordinibus constitutos gravi hac obligatione obstringi contendit. Cajetanus demum cum Sylvestro, Barbosa, Laymanno, & pluribus aliis exi-

stimat, secluso contemptu & scandalo aut contumacia neminem peccare graviter, sed venialiter tantum; id quod concedunt omnes, si delatio tonsuræ & habitus ad breve duntaxat tempus negligatur. Opinionum harum momenta apud laud. DD. videri possunt. Illud ex Trident. Sess. 23. de Reform. Cap. 6. certum est omnibus: Clericos in Minoribus constitutos fori privilegio privari, si longiori tempore habitum & tonsuram Clericalem non deferant.

- 45 II. Alterum, quo Clerici communiter omnes obstringuntur, est potestatis acceptæ ministerium: quod tum saltem ab iis exerceri oportet, cum id aut necessitas, aut Ecclesiæ & animarum bonum postulat. Quæ quidem obligatio eo magis stringit, quo sublimior est Ordinis accepti conditio, ut est in Presbyteris & Episcopis. An enim Deus otiosam duntaxat in Ministris suis potestatem esse velit, quam in Sacramento Ordinis tanta cum plenitudine gratiæ illis impertitur? *Va mihi, ajebat Apostolus 1. Cor. 9. si non evangelizavero, necessitas enim mihi incumbit, ex divina scilicet vocatione & ordinatione.* Hinc idem sollicitè suum monebat Timotheum, ne gratiam negligeret, quam per impositionem manuum accepit. Nec dubium est ipsum Tridentianum isthuc respexisse, cum Sess. 23. de Reform. Cap. 4. statuit: *Prima tonsura non initientur, - - de quibus probabilis conjectura non sit, eos non secularis judicii fraude, sed ut Deo fidelem cultum præsent, hoc vitæ genus elegisse; & rursus ibid. Cap. 6. nullus debet ordinari, qui judicio sui Episcopi non sit utilis aut necessarius suis Ecclesiis.* Multa in hanc rem dici possent; at suffecerit adjecisse monitum Augustini Ep. 48. ad Eudoxium: *Vos autem Fratres cohortamur in Domino, ut propositum vestrum custodiat, - - ac, si quam operam vestram Mater Ecclesia desideraverit, - - mihi corde obtemperetis Deo, - - nec vestrum otium necessitatibus Ec-*

*Ecclesiæ præponatis; cui parturienti si nulli boni ministrare vellent, quomodo nasceremini, non inveniretis.*

III. Quod demum a nemine in Clerum, seu sortem 46 Domini, assumpto absque piaculo negligi potest, est doctrina ad implendum Ordinis ministerium sufficiens, & sanctioris vitæ professio. Utriusque autem hujus necessitatem ex ipsa Ordinis natura profluere dubitari nequit: cum illo initiati ad sublime Altaris & Ecclesiæ ministerium, ac regimen animarum deputentur. Inde sunt illa toties repetita Patrum ac Conciliorum monita, quin gravissima etiam Decreta, quibus Clero sacræ eruditionis studium & vitæ probitas magnopere commendatur.

Ac doctrinam quidem quod attinet, eo potissimum ea referri debet, ut Ministri Ecclesiæ egregiam sibi cognitionem comparent Sacrarum Literarum, Patrum, Conciliorum, Ecclesiæ Canonum, Historiæ & Disciplinæ Ecclesiasticæ. Certe horum ignoratio vacare non potest periculo, præsertim si sacro Ordine initiatus animarum regimen susceperit; hinc Gregor. M. in sua Pastoralis, *ab imperitis*, inquit, *Magisterium Pastorale suscipitur in magna temeritate, quoniam ars est artium regimen animarum.* Nimirum, si cæcus cæco ducatum præset, nihil est pronius, quam ut ambo in foveam cadant, ut aperte edixit Christus Matth. 15. propterea deinde ibid. C. 23. imperitis id genus Ministris comminatus, *Vae vobis Duces cæci!* Cui malo ut occurreret Deus, per Malachiam monuit: *labia Sacerdotis custodient scientiam*; eum vero qui neglexerit illam, Sacerdotio prohibet apud Oseam, *quia tu*, inquit, *scientiam repulisti, repellam te, ne Sacerdotio fungaris mihi.* Provide igitur a Concilio Tridentino (ut taceam alia) actum,

cum peculiaribus Decretis requirit doctrinam in ordinandis, præsertim autem in promovendis ad regimen animarum, & Ecclesiasticas dignitates. Ita Sess. 23. de Reform. Cap. 7. statuit, ut Episcopus universim omnium *ordinandorum doctrinam diligenter investiget*. Item Sess. 24. Cap. 12. *Nemo*, inquit, *ad quascunque dignitates, quibus animarum cura subest, promoveatur, nisi doctrina ad suum munus exequendum necessaria - - commendetur*; imo ibid. sub medium hortatur, ut, ubi id commode fieri potest, *dignitates omnes, & saltem dimidia pars Canonicatum - - conferantur tantum Magistris, vel Doctoribus, aut Licentiatis in Theologia vel Jure Canonico*. En sollicitas Ecclesiæ de Ministrorum doctrina curas! quibus profecto non respondent, qui Scholas egressi, sacræ eruditionis studium in postremis habent.

De sanctioris vitæ obligatione minus dubium esse potest, quando ipsa Ordinum susceptio est sublimioris cujusdam sanctimonix professio: id quod docet ipse ordinationis ritus, ac in eo ab Episcopo factæ ad ordinandum cohortationes, quas legere est in Pontificali Rom. Idem certum est ex Patrum sensis, iisque cumprimis Conciliorum & Pontificum Decretis, quibus Clero districtim præcipitur castigata morum ratio, singulare virtutis omnigenæ studium, bonæ vitæ exemplum &c. ex adverso prohibentur sæcularia negotia, consortia mulierum, luxus, comestationes &c. Hæc omnia compendio exposita habentur in Tridentino Sess. 22. in Decr. de Reform. Cap. 1. ubi Canones de vita & honestate Clericorum innovantur. Si porro quæras ad quamnam sanctitatis perfectionem Ordinum, præsertim sacrorum, susceptio obliget? Audi respondentem D. Thomam 2. 2. qu. 184. Ar. 8. ubi, *manifestum est*, inquit,

inquit, excellere præminentiam Ordinis quantum ad dignitatem; quia per sacrum Ordinem aliquis deputatur ad dignissima ministeria, - - ad quod major requiritur sanctitas interior, quam requirat etiam Religiosus status; - - unde gravius peccat Clericus in sacris Ordinibus constitutus, si aliquid contrarium sanctitati agat, quam aliquis religiosus. His non absimilia jam antea sensit D. Bernardus, cum Traët. de vita & moribus Cler. Cap. 9. statum Clericorum cælo, eosque Angelis comparans, diceret: *In Clero, tanquam in cælo, agens iniqua quid nisi de ministerio judicetur? cæleste tenet officium, Angelus Domini exercituum factus est, tanquam Angelus aut eligitur, aut reprobat; inventa quippe in Angelis pravitās & distriktius judicetur necesse est, & inexorabilis, quam humana.*

### Obligationes Majoribus Ordinibus propriæ.

I. **H**As inter primo loco nominanda est obligatio recitandi Divinum officium, quod Horas Canonicas complectitur. Est vero Officii hujus usus in Ecclesia antiquissimus, ac ab ipsis Apostolorum temporibus ad nostram usque ætatem derivatus, ut ex Patribus & veterum Scriptorum monumentis erudite comprobat Laymann Theolog. Mor. L. 4. Traët. 1. C. 2. quod ipsum præstitit erudit. Martene in Traët. de ant. Eccl. discipl. ubi Cap. 1. Horarum Canonicarum institutionem ab Apostolis repetit, seqq. deinde Capp. de earum ritu copiose differens. Quamvis autem in jure ex Cap. 1. de celebrat. Missa soli Presbyteri Parochi ad hoc Officium videantur obligari: ex veteri nihilominus & per Ecclesiam recepta consuetudine, quæ vim Legis obtinet, certum est sub lethali culpa obligationem eandem extendi ad omnes universim Majoribus Ordinibus ini-

initiatos, Presbyteros videlicet, Diaconos, & Subdiaconos. De qua quidem obligatione, modo eam implendi, causisque ab illa excusantibus, & id genus aliis cum passim diffuse tractent Juris Canonici Scriptores & Morales Theologi, non est, cur nos argumento huic amplius immorari oporteat.

- 48 II. Peculiare illud est præterea sacris & Majoribus Ordinibus, quod in iis constituti ad perpetuam continentiam adstringantur ita, ut nec Matrimonium inire, nec prius inito (in Latina saltem Ecclesia) amplius uti possint. Lege eadem aliquando in quibusdam Ecclesiis etiam Minoribus Ordinibus initiatos fuisse obstrictos, haud obscure colligitur ex Conc. Carthaginensis V. Cap. 3. & Chalcedonensis Can. 14. at istud nec diu, nec universim, seu in Græca, seu Latina Ecclesia, observatum fuit: ac nunc quidem Legem eam penitus sublatam novimus, nisi quod ex Constitut. Alexandri III. & Innocentii III. beneficio & privilegio Ecclesiastico priventur inferiores Clerici, si Matrimonio eos jungi contingat, ut constat ex Cap. 1. 3. & 7. de Cler. conjug. Secus res habet circa Ministros sacro aliquo Ordine initiatos; ut adeo perpetuæ continentiae obligatio ad hos solos pertineat.

Estque istud ita certum omnibus, ut solum controversetur de Legis hujus origine: aliis videlicet eam a jure naturali aut divino, aliis a solo jure Ecclesiastico repetentibus. Verisimilior interim est opinio, ad solum jus Ecclesiasticum referendam esse: uti istud aperte insinuat Tridentinum, cum Sess. 24. de Sacram. Matrim. Can. 9. anathema pronuntiat eum, *qui dixerit, Clericos in sacris Ordinibus constitutos - posse matrimonium contrahere, contra-*  
flum-

*etumque validum esse, non obstante lege Ecclesiastica*; quibus postremis verbis satis indicat, legem de Clericorum coelibatu, esse Ecclesiasticam. Ac revera, qui dici possit eam a jure naturali, aut divino profluere? Certe cum Ordine sacro ex natura sua non pugnat Matrimonii usus; ut qui apud Græcos etiamnum Presbyteris permittitur juxta Cap. 6. de Cler. conjug. Sed nec ullum proferri potest præceptum divinum; secus in Ecclesia non fuisset unquam de coelibatu Clericorum variata disciplina: neque cum Clericis majore aliquo Ordine initiatis dispensari posset ad in-eundum Matrimonium, ejusque usum, id quod tamen jam factum novimus.

III. Atque hæc perpetuæ continentiae lex sancte adeo in 49  
Latina Ecclesia semper observata fuit, ut Episcopis, Presbyteris, & Diaconis nunquam omnino post Ordinationem licuerit uxorem ducere, aut ante ducta uti. Certa in hanc rem sunt omnis ævi Patrum, Pontificum, & Conciliorum testimonia, quæ copiose refert Bellarm. de Cler. L. 1. C. 19. & Thomassin. de discipl. Eccl. Par. 1. L. 2. a Cap. 60. ac ex his Tournelyus in suis Prælect. de Sacr. Ord. Quæst. ult. Ar. 2. Concl. 2. ut adeo, si qui contra aliquando egerint, pro transgressoribus semper sint habiti, gravibusque una poenis coerciti: quanquam maximam partem exempla, quæ Novatores objectant, fabulam sapiant, ut apud laud. AA. videre est. Consulto autem isthic solos Episcopos, Presbyteros, & Diaconos nominavimus: sunt enim non pauci, qui cum cit. Tournelyo existiment, Subdiaconos nec semper, nec universim lege continentiae adstrictos fuisse etiam in Occidente. Arguunt vero istud ex compluribus Conciliorum Decretis, iis videlicet, in quibus, cum de continentia Clericorum statuitur, soli Episcopi cum Pre-  
R. P. Mufzka Tom. II. de Sacr. D d d d sby-

byteris & Diaconis nominantur, nulla Subdiaconorum facta mentione. Id genus Decreta leguntur in Conc. Toletani I. Cap. 1. Toletani III. Cap. 5. Arelatensis II. Can. 2. & 3. aliisque Conciliis. Quo & illud facit: quod nec Siricius, nec Innocentius I. in suis pro Clericorum continentia Decretalibus Subdiaconos appellent.

- 50 IV. Paulo diversa fuit, ac etiamnum est circa Clericorum continentiam Ecclesiæ Græcæ disciplina. Utenim de Subdiaconis nihil dicamus: Diaconis aliquando (& quidem probabilius usque ad Sec. VII.) concessum fuisse, ut, si in ipsa Ordinatione contestarentur non posse se continentiam servare, post Ordinationem uxores ducerent, colligitur ex Conc. Ancyrano An. 314. Can. 9. id ipsum vero etiam Episcopis & Presbyteris liquisse, manifesta est Sectariorum calumnia. Quin primitus in Græca Ecclesia Episcopos, Presbyteros, & Diaconos ab uxoribus ante Ordinationem ductis abstinuisse, tametsi nulla legis universalis necessitate ad id adstringerentur, conjectare licet ex Eusebio L. 1. Demonstrat. Evang. Cap. 9. Cyrillo Hierosol. Catech. 12. Epiphanio, Chrysostomo, & Hieronymo apud Tournelyum. Lex porro ad Clericorum continentiam pertinens, quæ universim a Græcis recepta est, primum in Concilio Trullano An. 692. lata videtur; sunt autem ejus capita duo. Statuitur nimirum primo: Græcis Episcopis non esse licitum uxores ante Ordinationem ductas retinere, cum iis cohabitare, minus vero habere consuetudinem; ac de hoc est Can. 12. & 48. uterque deinde religiose observatus. Quin constat, eam subinde apud Græcos invaluisse disciplinam, ut nemo ad Episcopatum assummeretur, qui uxorem habeat: verum Religiosus tantum castitatem professus, vel certe qui a conjugali commercio fue-



fuerit immunis. Altera legis parte, quæ potius indultum est Can. 13. contentum, permittitur Græcis Presbyteris, Diaconis, & Subdiaconis uxores legitimas ante Ordinationem ductas retinere, & omni conjugali jure uti; quem morem hodie etiam tuentur ira, ut præterea nemini sit integrum post sacrum Ordinem susceptum novo Matrimonii vinculo illigari.

## DISSERTATIO IV.

### DE SACRAMENTI ORDINIS MINISTRO, ET SUBJECTO.

#### §. I.

#### *Quis sit Ordinationis Minister?*

**O**rdinatio Ministrorum Ecclesiæ nonnunquam a Scriptoribus Ecclesiasticis promiscue sumitur pro electione, consecratione, aut vocatione; at enim hæc prorsus diversa sunt, non confundenda proinde, quod Novatores faciunt. Electio nimirum est designatio, aut præsentatio certæ personæ ad ministerium vel beneficium Ecclesiasticum; vocatio, quæ a quibusdam missio dicitur, est jurisdictionis spiritualis collatio; consecratio demum est sacra illa actio, qua certo ritu confertur potestas Ordinis. Atque de hac solum postremo sensu accepta Ordinatione in præsentī procedit quæstio proposita. Ita autem de illa habet

Status Controversiæ, & Opinionum varietas.

**C**um, ut alias notavimus, Sacramenti Minister esse possit ordinarius, vel extraordinarius, de utroque isthic statu-

D d d d 2

tuen-

tuendum est. Quamvis autem contra Sectarios, communi Doctorum suffragio solus Episcopus censeatur esse Sacramenti Ordinationis Minister ordinarius: de extraordinario nihilominus, qui videlicet potestate delegata ordinare possit, controvertitur. Sunt nimirum, qui cum Aureolo existiment, simplicem Sacerdotem ex commissione summi Pontificis conferre posse (excepto Episcopatu) omnes Ordines, tam Majores, quam Minores; negat istud contra communior de Presbyteratus Ordine, tametsi multi cum Platelio de Diaconatu & Subdiaconatu concedant; plurimi etiam Diaconatum exclusum volunt; aliqui ad solos Minores Ordines potestatem hanc delegatam extendi putant; pauci demum quidam cum Adriano contendunt, ad nullum omnino Ordinem, seu Majorem, seu Minorem, valide ministrandum concedi posse licentiam simplici Sacerdoti. Opinionem has, earumque momenta cum suis Patronis copiose refert Vasquez in 3. parte D. Thomæ qu. 243. Art. 3. & 4. Nos duabus Assertionibus de tota controversia pronuntiabimus: & quia magnam partem ea fundatur in ministeriali Chorepiscoporum potestate, de hac speciatim in Corollario differemus.

## ASSERTIO I.

*Solus Episcopus est ordinarius Minister Ordinationis Episcopi  
& Presbyteri: quin etiam Diaconatus, Subdiaconatus,  
& quatuor Minorum.*

51 **P**ARS I. probatur ex Scriptura & Traditione. Constat enim Act. 14. Paulum & Barnabam Apostolos, proinde Episcopos, per singulas Ecclesias fecisse Ordinationes Presbyterorum: & ad Tim. 1. Timotheum ab Apostolo fuisse ordinatum in Episcopum; nusquam autem legitur Episcopi aut

aut Presbyteri Ordinatio facta a simplice Sacerdote. Post Apostolorum deinde tempora nullus unquam existimatus est Episcopus aut Presbyter valide ordinatus nisi ab Episcopo. Inde vel Novatianus Hæresiarcha, cum Episcopatum Romanum ambiret, tres ex Italia accivit Episcopos, quos deinde crapula oppressos ad se ordinandum coegit, ut ex Cornelii Papæ Epist. ad Fabium Antioch. refert Eusebius L. 6. Hist. C. 43. adeo nimirum vel hæretico homini persuasum fuit, ad conferendum Episcopatus Ordinem opus esse Episcopi ministerio. Et Synodus Alexandrina An. 319. in Ep. synodica declaravit, Ichyram non esse Presbyterum: quia ordinatus est a Collutho, qui non erat Episcopus, sed simplex duntaxat Sacerdos. Plura id genus alia legere est in Hist. Ecclesiastica. Quæ quidem id saltem evincunt: semper in Ecclesia existimatum fuisse jure ordinario potestatem ordinandi Episcopos & Presbyteros solis Episcopis convenire. Verum istud ipsum ex alterius Partis probatione multo certius evadet. Jam vero

Pars II. Probatur rursus tam Scripturæ, quam Traditionis testimonio. Scripturæ quidem: nam Act. 6. primi septem Diaconi ab Apostolis ipsis ordinantur; & Paulus 1. ad Timoth. 3. & 5. ad Titum vero Cap. 1. utrique jam tum Episcopo præscribit, quibus imponenda sit manus: ubi cum generatim loquatur de impositione manus ordinandi, universim Ordinationis cujuslibet jus saltem ordinandi solis Episcopis competere censuerit, præsertim cum oppositum opinandi nullum sit in Scriptura fundamentum. Sed nimirum magis convincens argumentum suggerit Traditio in Patribus fundata, cum eorum multi universim Ordinum (nullius exceptione facta) collationem attribuant solis Episcopis. Ita Epiphanius Hær. 75. insectatur Aerium, qui

Episcopis æquans Presbyteros, his quoque ordinandi jus convenire asserbat. Et Hieronymus Ep. 85. ad Evagrium, *quid enim, inquit, excepta Ordinatione, facit Episcopus, quod Presbyter non faciat?* Chrysostomus vero Hom. 11. in 1. ad Timoth. ait: *Sola Ordinatione superiores sunt Episcopi, atque hoc tantum plus quam Presbyteri habere videntur.*

- 54 Ad utramque demum Assertionis Partem simul comprobendam præcipuum est momentum ex Conciliis Florentino, & Tridentino. Nimirum Florent. in Decr. pro Arm. de Ordinis Sacramento agens, generatim declarat: *Minister ordinarius hujus Sacramenti est Episcopus.* Et Trident. Sess. 23. Can. 7. definit: *Si quis dixerit Episcopos - non habere potestatem confirmandi & ordinandi, vel eam, quam habent, illis esse cum Presbyteris communem, - anathema sit.* Utriusque porro Concilii verba in sensu Assertionis intelligenda esse vel illud suadet, quod nusquam in Ecclesia sciamus ullum, ne Minorem quidem Ordinem ab alio quam Episcopo collatum, nisi ex peculiari Sedis Apostolicæ privilegio.

## ASSERTIO II.

*Simplex Presbyter potest esse extraordinarius Minister Minorum Ordinum: non item Episcopatus & Sacerdotii; de Diaconatu & Subdiaconatu vix certi aliquid statui potest.*

- 55 **P**ARS I. certa est ex privilegio id genus Ordinationes peragendi simplicibus Sacerdotibus per Pontifices & Concilia concessio; ac sæpe confirmatio. Ac primum quidem hujusmodi facultas Abbatibus Presbyteris collata, aut verius confirmata legitur in Conc. Nicæno II. Can. 14. ubi sta-

statutum est: *Lectoris autem manus impositionem licentia est unicuique Abbati in proprio Monasterio solummodo faciendi, - - dum constet illum esse Presbyterum.* Idem privilegium subinde confirmarunt Alexander III. & Innocentius III. ut constat ex Cap. *Requisivit.* de ordinatis ab Episcopo: & Cap. *Contingat.* de ætate & qualit. ordinand. in *Extrav.* Quin etiam Trident. Sess. 23. de Reform. supponit illud, ac tacite approbat, Cap. 10. ita statuens: *Abbatibus & aliis quibuscunque, quantumvis exemptis, non liceat in posterum intra fines alicujus Diœcesis consistentibus, etiamsi nullius Diœcesis, vel exempti esse dicantur, cuiquam, qui Regularis subditus sibi non sit, Tonsuram vel Minores Ordines conferre.* Huc denique facit praxis vel hodie recepta: nam Cardinales Presbyteri in suis Ecclesiis, & Abbates aliqui suis Religiosis Minores Ordines re ipsa conferunt.

Pars II. inde arguitur: quod universim potestas ministrandi Sacramenti a sola Christi institutione pendcat, hæc vero nobis non ex humanis argutiolis, sed ex Scriptura duntaxat & Traditione innotescat. Jam vero utriusque hujus testimonio constat, Episcopum esse Ministrum Ordinis Episcopatus & Sacerdotii: ex adverso nullum est vel vestigium potestatis, quæ ad hoc ministerium delegari possit simplici Presbytero; censendum igitur est, ita esse Episcopatus & Sacerdotii Ordinem a Christo institutum, ut conferendi ejus potestatem delegari noluerint simplici Sacerdoti. Certe (quod in hanc rem plurimum momenti habet) nulli unquam ejusmodi potestas concessa legitur; tametsi sæpe gravissima fuerit Ecclesiæ necessitas, præsertim primis temporibus, quibus pauci erant Episcopi, hique ipsi magnam partem ob sævitiem Tyrannorum latebant.

Quis

Quis vero credat, tot Seculorum tractu otiosam mansuram fuisse hanc delegandi potestatem, si eam Christus arbitrio Ecclesiæ reliquisset?

- 57 Pars III. repetitur ab incertitudine argumenti, quo probari solet, dari posse ab Ecclesia licentiam simplicis Sacerdoti ordinandi Diaconos & Subdiaconos.

Præcipuum scilicet hujus loci argumentum ducitur ex eo, quod Innocentius VIII. An. 1489. concefferit Abbati Cisterciensi facultatem suis Religiosis conferendi Diaconatus & Subdiaconatus Ordines. Atque concessionis hujus Bullam Vasquez in 3. par. S. Th. Disp. 243. C. 4. testatur se legisse, eandemque assertari in nostro Complutensi Collegio. Idem privilegium pro legitimo agnoscunt Navarrus Consiliorum L. 5. Consil. 13. Major in 4. dist. 7. qu. unic. & Morinus de Ordinatu. Par. 3. Exercit. 4. Cap. 3. imo quidam asserunt, extare illud in Ordinis Cisterciens. Privilegiis L. 1. Privileg. 118.

Sed enim Bullam hanc dubiæ ac incertæ fidei esse multi existimant. Nimirum non reperitur illa in Bullario Romæ edito, nec in publicis monumentis, quibus Pontificum Constitutiones & Indulta referuntur. Victoria in summa N. 235. testatur vidisse se Bullam, qua Cisterciensi Abbati conceditur jus suis conferendi Subdiaconatum: at Diaconatus isthic nullam fieri mentionem. Tridentinum Sess. 23. de Reform. Cap. 8. agit ex proposito de Ministro sacræ Ordinationis, & Cap. 10. Prælatorum Episcopis inferiorum privilegia ad Minorum Ordinum collationem pertinentia restringit, quin uspiam ullam injiciat mentionem hujus privilegii. Navarro ipsi suspectum est visum; hinc illud

illud loco cit. *exorbitans* vocat. Hallerius de Min. sacræ Ordinat. Sect. 5. Art. 2. §. 2. putat esse supposititium, ad-  
dens: *nec nostra, nec Patrum memoria Cistercienses eo privi-  
legio usos fuisse; quod si a S. Sede obtinuissent, nusquam ab  
ejus usu tamdiu abstinuissent, præsertim in Gallia.* Ex eadem  
ratione Sylvius in supplem. D. Th. qu. 38. Ar. 1. ambigit  
de fide Bullæ a Vasquezio visæ.

Quid, quod privilegium hoc ( tametsi legitimum fo-  
ret ) sacra Cardinalium Congregatio Tridentini interpres  
An. 1592. ac rursus Clemens VIII. in Bulla Cisterci-  
ensibus data, eo duntaxat sensu accipiendum esse declarave-  
rint: quod Innocentius VIII. concesserit Abbatibus Cister-  
ciensibus, ut cuilibet Episcopo dare possint licentiam ordi-  
nandi suos Religiosos absque Ordinarii consensu. Utramque  
hanc Declarationem commemorat Bensonius L. 2. de Anno  
Jubilæi C. 23. ejusque expositionem ipse amplectitur.

Jam vero hæc ( opinor ) satis evincunt, Vasquezia-  
num monumentum in rem præsentem auctoritatis esse du-  
biæ: proinde nonnisi incertum ex eo argumentum duci.  
Idem esto judicium de simili privilegio Abbatibus Benedi-  
ctinis, & Prælatibus Franciscanis in India concessio, cujus me-  
minit Henriquez in Summa, in addition. ad L. 10. de Ord.  
De Chorepiscoporum Ordinationibus dicetur in Corollario.  
Nihil igitur de memorata potestate delegata certi statui po-  
test, dum certiora ejus proferantur testimonia; id vero  
si præstiterit aliquis, nihil morabor perinde de Subdiacono-  
natu & Diaconatu, ac de Minoribus Ordinibus pronun-  
tiare.

## Diluuntur argumenta Adversariorum.

58 **J**us Ordinationis ordinarium ad solos Episcopos non pertinere his fere probant. I. Ex Act. 6. Cap. constat, ipsos Apostolorum Discipulos, qui omnes non erant Episcopi, jus suffragii in Ordinatione Ecclesiæ Ministrorum habuisse.

II. Conc. Nicænum I. in Ep. Synod. ad Eccl. Alexandr. agens de Clericis, qui ad nullum schisma defecerunt, *jus, inquit, habeant & ordinandi, & eos, qui digni Clero fuerint, nominandi.*

III. Qui potest majus, potest & minus; cum igitur Presbyteri potestate ordinaria possint consecrare & absolvere a peccatis, quod est quid majus, cur eadem potestate nequeant ordinare, quod est quid minus?

Resp. ad I. ex cit. Cap. clarum esse, Apostolorum Discipulos jus eligendi duntaxat & nominandi Diaconos habuisse: nam V. 5. aperte dicitur, *elegerunt Stephanum & Philipppum &c.* & V. 6. *hos statuerunt ante conspectum Apostolorum*, qui dein (ut ibid. additur) *orantes eis imposuerunt manus.*

Resp. ad II. attento Epistolæ Nicænæ contextu id colligi unum: memoratis Clericis jus datum, ut Ecclesiæ Ministros a populo electos solo suo suffragio approbare & confirmare possint, non expectata etiam aliorum Clericorum approbatione & confirmatione; id quod negat Clericis ad Meletii schisma deficientibus, ac subinde ad Ecclesiam revertis. Nec officit vox Græca *πονηροὶς*, qua  
Con-



Concilium utitur : sumitur quippe in significatione verbi *praordino*, *designo*, ut constat ex Act. C. 22. ubi verbum *προειρῳατο*, Vulgata reddit *praordinavit*, Anania scilicet ad Saulum dicente : *Deus Patrum nostrorum praordinavit te* - - quia *eris testis illius* &c. hoc est designavit te in testem.

Resp. ad III. Axioma objectum, ut jam alias L. III. de Confirm. N. 74. in Resp. ad II. diximus, hoc uno sensu verum est: posse minus eum, qui potest majus in eodem genere; secus si hæc in diverso genere versentur. Ita potens remittere peccata gravia, potest & levia; contra potens remittere peccata, quod majus est, non hoc ipso potest mortuos suscitare, tametsi istud sit minus. Cæterum argutationes hujusmodi universim sunt futes in iis, quæ a sola Christi libera voluntate dependent: unde ad hanc unam semper contra illas provocandum est.

Qui Sacerdotii, aut etiam Episcopatus extraordinarium 59  
Ministram esse volunt simplicem Presbyterum, ita arguunt.  
I. Moyses, tametsi ipse non fuerit Sacerdós, Aaronem nihilominus in Sacerdotem unxit & consecravat Lev. 8.

II. Florentin. in Decr. pro Arm. generatim dicit Sacramenti Ordinis Ministram ordinariam esse Episcopum; ab opposito igitur censuit, cujuslibet Ordinis Ministram extraordinarium dari.

III. Complures jam Presbyteri & Episcopi a simplicibus Sacerdotibus ordinati leguntur. Ita apud Cassianum Collat. 4. C. 1. Paphnutius Abbas discipulum Daniele ordinavit primo in Diaconum, deinde in Presbyterum. Ex

Epiphanio Hær. 73. & Theodoro L. 4. Hist. C. 12. sub persecutione Valentis Imper. ejectis in exilium orthodoxis Episcopis substituti sunt alii per Flavianum & Diodorum Presbyteros. Ex Gregorio Turon. L. 4. Hist. Franc. Cap. 5. & seqq. colligitur, Catonem Presbyterum, post obitum Galli Arvernorum Episcopi, propria Episcopo munia obivisse. Plura his similia congerit Blondellus Calvin. in sua pro S. Hieronymo Apolog. Sect. 3.

IV. Non desunt DD. etiam orthodoxi, qui existiment a Summo Pontifice delegari posse simplicem Sacerdotem ad ordinandos non modo Subdiaconos & Diaconos, sed etiam Presbyteros. DD. hos commemorat Morinus de Ordinat. Par. 3. Exercit. 4. C. 3. quorum momenta expendens supra laud. Vasquez, de Subdiaconis & Diaconis affirmative pronuntiat primum: de Presbyteris deinde non audet statuere quidquam, sed Lectoris judicio sententiam relinquit.

Resp. ad I. ab ordinatione veteris Legis universim argui non posse, cum ea imperfectior fuerit, uti & illius Sacerdotium. Moysen præterea Sacerdotem fuisse probabile videtur non paucis: quod ipsum censet Leo M. in Ep. 88. arguens ex illis Psalmi 98. verbis: *Moyses & Aaron in Sacerdotibus ejus*. Denique Moysen peculiari voluntate Dei ordinationem Aaronis perfecisse constat ex cit. Lev. Cap. unde id consequitur unum: absoluta Dei voluntate nunc quoque Sacerdotes ordinari posse a quolibet, cui Deus id juris pro summa sua potestate concesserit, quod nos haud inficiamur.

Resp. ad II. C. Ant. N. Illat. Quod enim Concilium in cit. Decr. *ordinarium* Ministrum Ordinis dicat Episcopum,

pum, in causa erat: quia ibid. etiam meminit Diaconatus, Subdiaconatus, inq. tacite ipsorum Minorum Ordinum; unde, nisi rō *ordinarius* adiecisset, facile existimari poterat declarari ab eo, neque horum Ordinum extraordinarios Ministros posse esse Presbyteros: de quo tamen variare Theologorum opiniones noverat. Neque urgeat quis a Confirmationis Ministro: postquam enim Concil. in eod. Decr. dixit, Sacramenti hujus *ordinarium* Ministrum esse Episcopum, continuo ibid. aperte significat, *extraordinarium* præterea esse posse simplicem Sacerdotem: nihil ex adverso simile addit de extraordinario Sacramenti Ordinis Ministro.

Resp. ad III. Dist. assertum: Episcopi & Presbyteri a simplicibus Sacerdotibus ordinati leguntur hoc sensu, quod eos ad hunc sacrum Ordinem promovendo suo suffragio designaverint, elegerint, ac nominaverint, aut etiam jurisdictionem contulerint C. eo sensu, quod re ipsa etiam ritu Sacramentali ordinauerint, potestatem videlicet Ordinis conferentes N. Ita autem rem se habere colligitur tum ex contextu totius narrationis: tum ex Synodo Arausica I. An. 441. habita, cujus ætatis potissimum exempla profert Blondellus. In hac nimirum Can. 30. statuitur, *ut si quis Episcopus per infirmitatem aut in hebetudinem sensus inciderit, aut oris officium amiserit, ea, quæ nonnisi per Episcopos geruntur, non sub præsentia sua Presbyteros agere permittat, sed Episcopum evocet, & quod in Ecclesia agendum fuerit, imponat.* Quorsum vero istud? si Presbyter ordinare possit, quod præcipuum est Episcopi munus. At sævientibus Tyrannis, inquires, non licebat Episcopos evocare? ita equidem; una attamen constat, Sanctos temporum illorum Præsules tuendæ Religionis studio clam, & mutato sæpe habitu, Provincias Pastoribus viduatas per-

agrasse. Ita nominatim Eusebius Samosatenus, *cum multas Ecclesias Pastoribus privatas comperiret, militarem habitum sumens -- Syriam, Phœnicem, ac Palæstinam peragravit, Presbyteros ordinans ac Diaconos, aliosque Ordines Ecclesiæ supplens*, ut refert Theodoret. L. 4. Hist. C. 13. Quod si nihilominus fuerint aliqui Presbyteri, qui sibi (ut indubie aliquando evenit in tanta hæresum & Schismatum varietate) hoc ordinandi jus arrogarent, istud non officit: neque enim id genus Ordinationes Ecclesia unquam ratas habuit.

Resp. ad IV. Ut ut sit de quorundam Theologorum ratiociniis & conjecturis; nos in rebus ad Sacramenta pertinentibus (quod olim in simili agebat Basilii) *mentis nostræ partus non audemus tradere: sed quæ a SS. Patribus (Traditionem fundantibus) edocti sumus, ea nos interrogantibus annuntiamus.*

Cæterum, quo cumprimis Theologorum quidam in opinionem adversam adducuntur, sunt Ordinationes a Chorepiscopis factæ, quos illi existimant simplices fuisse duntaxat Presbyteros; at enim momentum hoc est futile, aut incertum saltem, ut jam videbimus. Sit igitur speciatim

### Corollarium

#### De Chorepiscoporum Ordine & ministeriali potestate.

**P**Ræ aliis hoc argumentum copiosius pertractant Bellarm. L. 1. de Clericis, Thomassinus in vet. & nova Eccl. disciplina de Benefic. Par. 1. & Morinus de Ordinat. Par. 3.  
Exer-

Exercit. 4. Ex his nos, quæ ad Chorepiscoporum institutionem, durationem, & potestatem Ordinis pertinent, compendio perstringemus: ostensuri demum, Ordinationes ab illis factas frustra nobis Adversarios oggerere. Jam vero

I. Chorepiscopi nomen ex communiore sententia derivatur a χωρος, vel χώρα, χωριον, quæ idem sunt, ac locus, regio, rus, villa, pagus: ut adeo Chorepiscopus ex vi nominis significet locum & vices Episcopi tenentem, vel Episcopum ruralem, in pago, oppido &c. Ac revera nomini huic Chorepiscoporum munus respondebat. Tametsi enim principio Ecclesias omnes Episcopi ipsi administrarent, crescente nihilominus subinde earum & fidelium numero, fatis eos distinebat cura Ecclesiæ principalis, quam Matrem dicimus; inde coacti sunt minores in pagis & oppidis Ecclesias per Vicarios & suffraganeos regere, qui ipsi propterea dicti sunt τῶ χωρὶ ἐπίσκοποι, contractisque in unum vocabulis Chorepiscopi. Idem igitur fere munus erat eorum, quod deinde ac hodie etiam est Parochi, aut saltem Archidiaconi, vel Decani ruralis. Fere inquam: nam licet in Ecclesiæ suæ regimine non plus possent, quam indulgeret Episcopus; communiter attamen indulgebantur eis omnia, quæ Episcopo sunt propria: dempta Presbyteros & Diaconos ordinandi, confirmandi, templa item ac altaria consecrandi potestate. Atque hæc certa sunt ex Scriptoribus Ecclesiasticis, cum primis vero ex copiosis Canonibus, qui referuntur in Decreto Gratiani.

II. Si porro quæras: quonam tempore Chorepiscoporum munus in Ecclesiam sit investum? Si rem hoc nomine expressam attendamus, vix dubium esse potest, ipso  
sta-

statim Ecclesiæ Seculo I. fuisse villarum & oppidorum Episcopos. Certe Clemens Rom. in sua ad Corinth. Ep. ait, Apostolos *predicantes per urbes & agros constituisse Episcopos & Diaconos*; idemque Sec. II. & III. factum ab aliis narrat Eusebius Hist. L. 5. C. 16. & L. 7. C. 30. Ipsum interim *Chorepiscopi* nomen ante Seculum IV. in usu vix fuerit: primum quippe legitur apud Græcos in Conc. An-cyrano Can. 12. & Neo-Cæsariensi Can. 13. Anni 314. apud Latinos vero in Conc. Regiensi Can. 3. An. 439. Hinc Morinus supra cit. Exercit. C. 1. opinatur, Chorepiscopos quoad eam, quæ deinde illis competebat, potestatem non prius quam circa An. Chr. 270. a Synodis quibusdam Provincialibus fuisse institutos. Ab eo vero tempore perduravit Chorepiscoporum Ordo usque ad Sec. IX. quo exeunte, aut saltem sub medium Seculi X. penitus abrogatus videtur, cum posterioribus Seculis nulla amplius fiat ejus mentio; id quod probans Morinus in laud. Exerc. C. 6. addit: sublato nomine & privilegiis Chorepiscoporum, successisse iis in Occidente Archipresbyteros, sive Archidiaconos, & Decanos rurales; in Oriente autem Exarchos. Causa porro abrogandi Chorepiscopos fuit duplex. Primum quidem nonnullorum e Chorepiscopis præsumptio: erant etenim complures, qui Episcoporum jura sibi integre arrogarent, iis subijci renuerent &c. qui abusus sæpe in antiquis Canonibus apud Gratian. memorantur. Causam alteram præbuit Episcoporum desidia, & muneris sui negligentia: cum videlicet, toto Episcopatus onere in Chorepiscopos rejecto, multi otio & luxui duntaxat se dederent, aut certe partem maximam secularibus negotiis & Aularum ministeriis vacarent, ut legitur in Caroli M. Capitularium L. 6. Cap. 121. & testatur Hincmarus Tom. 2. Concil. Gall.

III. Quod jam vero isthic potissimum in quæstionem vocatur, illud est: num Chorepiscopi ordinatione sua veri fuerint Episcopi? aut simplices tantum Presbyteri, jurisdictione peculiari pollentes? Primum opinatus est Rabanus Archiep. Mogunt. quem secuti sunt Lupus, Basnagius, & pauci RR. cum Tournelyo; alterum tuetur Petrus de Marca, Morinus, Thomassinus &c. qui tamen ipsi fatentur evenisse aliquando, ut Chorepiscopatus conferretur alicui vera Episcopali consecratione inaugurato. Inde media has inter duas sententia apud plurimos cum Bellarmino L. 1. de Clr. C. 17. hodie obtinet: Chorepiscopos nimirum ex origine sua & institutione fuisse Presbyteros duntaxat simplices; aliquos nihilominus eorum habuisse etiam Episcopalem Ordinationem & characterem.

Primum ex duplici capite certum est. 1<sup>mo</sup>, Quia nusquam legitur, consecrari eos oportuisse Episcopi ritu; quin, cum in vetustis pontificalibus aliquando illorum ordinatio describitur, ex toto ritu patet, eum non fuisse sacramentalem, verum meram cærimoniam illi consimilem, qua Archipresbyterorum inauguratio peragitur: ab ea autem, quæ Episcopali Ordini est propria, plane diversam, ut comprobat laud. Morinus. 2<sup>do</sup>, Quia Leo III. in Responso ad Epp. Gall. & Germ. relato in Capitulari Aquisgran. declarat: Ordinationes Presbyterorum, aut Diaconorum, vel etiam Subdiaconorum a quibusdam Chorepiscopis factas non esse peculiari Decreto irritandas, cum aliunde nullæ sint; omnia proinde a canonice ordinatis Episcopis debere iterum peragi: *quia, inquit, quod non ostenditur gestum, ratio non finit, ut videatur irritatum.* Certe autem ordinationes hæc fuissent validæ, si memoratis Chorepiscopis character & Ordo Episcopatus non defuisset.

R. P. Muszka Tom. II. de Sacr.

F f f f

Al-

Altera autem hujus sententiæ pars inde evincitur : quod constat aliquos Chorepiscoporum munus adeptos ex iis, qui jam antea in Episcopos ordinati, a Sede sua per Tyrannos subinde depulsi sunt, aut certe ab hæresi ad Ecclesiam redierunt. Ita Armentarius, Episcopatu suo Ebrodunensi dejectus, a synodo permissus est Chorepiscopum agere in pagis, & urbibus minoribus. Similiter Episcopis Novatianis ad fidem conversis Concil. Nicænum I. Can. 8. Chorepiscopatus dignitatem concessit. Plura idgenus vide apud Morinum. Quia etiam prorsus verisimile est, aliquos Episcopatus Ordine initiatos fuisse a propriis Episcopis, iis præsertim, quibus amplæ erant Diœceses, vel quos senium aut ægritudo minus idoneos reddidit ad Pastorale ministerium; id quod hodie etiam fieri videmus, cum Episcopi assumunt Suffraganeos, vel Coadjutores. Ac de talibus Chorepiscopis videtur loqui Conc. Antiochenum An. 341. dum Can. 10. statuit : *Chorepiscopi, etiamsi Episcopi ordinationem - - acceperint, visum est, ut suum modum sciant &c. Constituant Lectores, Hipodiatonos, & Exorcistas, & eorum promotionem sufficere existiment; nec Presbyterum, nec Diaconum ordinare audeant absque Urbis Episcopo, cui subjicitur regio &c.* Fiat autem Chorepiscopus ab Episcopo Civitatis, cui subjicitur.

Pro utraque demum simul parte illud facit, quod hac ratione concilientur quàm optime pugnantes ad speciem Canones & Pontificum Decreta; quorum aliis declarantur esse nullæ ordinationes Presbyteri aut Diaconi a Chorepiscopis factæ: aliis aperte insinuaturs esse tantum illicitas, si fiant absque Episcopi licentia.



IV. Atque ex hac, quam cum Bellarmino tuemur, 63  
sententia expeditum est Responsum ad Objectionem, a Chorepiscoporum ordinationibus petitam. Si quando enim Presbyteros consecraverint ordinatione, quam Ecclesia ratam habuit: id ab illis Chorepiscopis factum a zo, qui character Episcopali fuerunt insigniti. Si contra ordinationem eandem attentaverint ii, qui simplices duntaxat erant Sacerdotes: hæc ipsa illa ordinatio fuit, quæ non modo quoad executionem Ordinis, verum quoad ipsum valorem & substantiam pro nulla est habita. Istud vero non arbitrarie, sed cum gravi fundamento sustineri, docent momenta pro hac opinione relata; ut adeo ex Chorepiscoporum ordinationibus perperam inferatur: aliquando ex concessione Ecclesiæ simplices Sacerdotes Presbyteratus Ordinem contulisse.

## §. II.

*Qui sint capaces Sacramenti Ordinis suscipiendi?*

**Q**uia Ordinis susceptio esse potest vel valida tantum, aut valida simul & licita: quæ ad utramque ex certa, vel communiore saltem Doctorum sententia requiruntur, isthic exponemus paucis; uberior deinde notitia, eorum præsertim, quæ controversa sunt, petenda erit ex commemorandis Auctoribus.

### De valida Ordinis susceptione.

**A**D hanc I. requiritur in subjecto virilis sexus; hinc mulieres jure divino incapaces sunt Ordinationis sacræ. Prohibentur nimirum illæ loqui & præesse in Ecclesia r.

Fiff 2

Cor.

Cor. 14. & 1. ad Tim. 2. potiori igitur jure etiam ab Ordinibus, quibus proprium est munus regendi Ecclesiam, & in ea prædicandi. Prohibitionem porro hanc ipsum spectare valorem, sensus & praxis Ecclesiæ abunde declarat: cum nullo unquam casu mulierem (tametsi earum aliquæ sapientia non minus quam sanctitate forent illustres) ordinari permiserit; imo istud attentantes hæreticos continuo damnaverit, ut est exemplum in Pepuzianis & Collyridianis teste Epiphanio Hær. 49.

Solemne isthic est quibusdam Novatoribus objectare Joannam Papissam: tum etiam Episcopas & presbyteras, præsertim autem Diaconas, quarum veteris Ecclesiæ monumenta sæpe meminerunt. At enim primum vel ipsi perspicaciores Hæretici fabulis adnumerant, ut nominatim Blondellus in peculiari Dissert. de Joanna Papissa; alterum autem quo sensu accipiendum sit, in Corollario dicemus.

- 65 Requiritur II. ut Ordinationem suscipiens sit initiatus Baptismo, ut qui Ecclesiæ & reliquorum Sacramentorum est janua; inde constanti Traditione habetur, eos, qui sine Baptismo rite suscepto, aliquando ordinati sunt, iterum baptizari, tumque rursus ordinari oportuisse. Testimonium hujus certum est ex Conc. Nicæni I. Can. 19. & Innocentii III. ad Ep. Ferrariens. Responso, quod refertur Cap. *Veniens*, de Presbyt. non baptizato.

Illud hic controvertitur: num Sacram. Ordinis mari cuilibet baptizato, proinde etiam infanti ante usum rationis, vel amenti valide conferri possit? Ac communior quidem opinio cum S. Thoma & Bonaventura affirmat, excepto Episcopatu uno; multi cum Præposito & Paludano  
ne

ne hunc quidem exceptum volunt. Durandus contra cum Tournelyo & paucis aliis omnem id genus Ordinationem contendit esse invalidam. Mihi cum D. Thoma sentiendum videtur, cum in oppositum nullo fundamento solido pugnetur: ex adverso autem paritas a Baptismi & Confirmationis Sacramento urgeat. Id interim certum est omnibus, infantem aut amentem illicite ordinari, cum ordinationes ejusmodi Canonibus Ecclesiasticis adversentur.

Demum III. in adultis requiri intentionem, eamque 66 saltem habitualement, indubitatum est; de quo vide a nobis disputata L. I. de Sacr. in Gen. Dissert. V. §. II. Assert. 1. & 2. Unde si rationis usum habens sit invitatus, nec ullo pacto in sui ordinationem consentiat, ea omnino est irrita. Aliter nihilominus sentiendum est de iis, qui metu etiam gravi & injuste incusso ordinantur; in his enim non deest simpliciter intentio sufficiens, cum vel coacta voluntas sit voluntas. Ita attamen ordinati non tenentur voto continentiae Ordinibus adnexo, nisi deinde illud expresse vel tacite ratum habeant.

### De licita Ordinis susceptione.

I. **Q**uo licite etiam Ordo suscipi possit, in ordinando 67 (præter statum gratiæ) nominatim requiritur, ne ulla irregularitate sit irretitus. Irregularitatis autem nomine isthic venit impedimentum Canonicum, quo vir baptizatus directe interdicitur susceptione Ordinum, consequenter vero eorum usu, seu exercitio. Varias porro esse irregularitatis species certum est; ego, quantum ad rem præsentem attinet, duas earum classes statuo: alteram

ex defectu , ex delicto alteram. - Utriusque species nunc recensendæ sunt. Itaque

- 68 II. Classis irregularitatum ex defectu ad novem species commode reducitur : eas videlicet , quæ oriuntur ex defectu animæ , corporis , natalium , ætatis , libertatis , obligationis , Sacramenti , bonæ famæ , & lenitatis. Classis altera ex delicto quatuor complectitur species : harum prima est ex homicidio , altera ex iteratione Sacramenti , tertia ex hæresi , ex illicito Ordinis usu ultima. Quo porro sensu singulæ irregularitatum species accipiendæ sint ? quando & a quibus incurrantur ? quis in illis dispensare possit ? hisque similia alia copiosum præbent in Jure Canonico & Morum Theologia disputandi argumentum ; cui nos cum immorari non possimus , consulendi erunt Canonistæ & Theologi Morales. Eandem materiam etiam e Theologis Dogmaticis erudite pertrastant Ludov. Habert Tract. de Sacr. Ord. Par. 3. C. 6. §. 1. & seqq. Tourneiyus item in Prælect. de Ord. Quæst. 4. Ar. 5.

### Corollarium.

De Episcopissis , Presbyterissis , Diaconissis ,  
& Subdiaconissis.

**N**omina hæc in pluribus Conciliis & Patrum Operibus occurrunt ; ut adeo dubitari nequeat , fuisse olim in Ecclesia Episcopas , Presbyteras , Diaconas , & Subdiaconas. Atque hinc est , quod Novatores crebro declamitent : injuriam a nobis irrogari scemineo sexui , cum mulieres ab Ordinum susceptione arcentur , imo incapaces etiam eorum pronuntiantur. Sed enim hallucinari istud est , non arguere ; ut ex dicendis patebit. Nimirum

I. His

I. His nominibus designabantur sacrorum Ministro-  
rum uxores, quibus post Maritorum ordinationem perpetua fuit continentia observanda, aut etiam in Monasterio solemniter profitenda Religio. Vel eo igitur nomine, quod mulier aliqua Episcopi foret uxor, dicta est Episcopa, idem est de aliis. Atque hoc sensu vocabula hæc a pluribus Conciliis adhibentur; ut cum Conc. Turonense II. Sec. VI. Can. 13. statuit: *Episcopum, Episcopam non habentem, nulla sequatur turba mulierum; & Can. 19. Si inventus fuerit Presbyter cum sua Presbyteria, aut Diaconus cum sua Diaconissa, aut Subdiaconus cum sua Subdiaconissa, annum integrum excommunicatus habeatur &c.* Idem sensus habetur in Conc. Antisiodorensi Sec. VII. Can. 21. Romano sub Gregorio II. Cap. 1. & 2. pluribusque aliis. His jam autem mulieribus omnibus, quæ a maritis duntaxat, juxta vulgarem loquendi modum, mutuato nomine dicebantur Episcopæ, Presbyteræ &c. nullam fuisse peculiarem ordinationem, nec ullum in Ecclesia ministerium vel inde constat, quod neutrius in monumentis Ecclesiasticis uspiam occurrat vestigium; ut adeo ab his quidem mulieribus frustra erroris sui patrocinium Novatores repetant.

II. At saltem, inquires, Diaconarum nomen eis favore videtur: cum præter illas, quæ a maritis Diaconis nomen hoc mutuarunt, aliæ etiam fuerint, quibus videlicet peculiari ordinatione conferebatur potestas ad Ecclesiæ ministerium. Ac omnino hoc etiam Diaconarum genus olim in Ecclesia fuisse, negari non potest; neque tamen propterea rem confectam putent Sectarîi. Totâ porro nos inter & illos controversia ut planior evadat,

Fate:

Fatemur 1<sup>mo</sup>, In veteri Ecclesia ad certum Ecclesiastici ministerii genus assumptas quasdam mulieres, quæ propterea Diaconæ vel Diaconissæ dicebantur. Hasque ex mente Interpretum designat Apostolus, cum ad Rom. 16. ait : *commendo vobis Phæben sororem nostram, quæ est in ministerio Ecclesiæ*, ubi Græcus textus habet, Phæben *διάκονος τῆς ἐκκλησίας*, Diaconam Ecclesiæ; item 1. Tim. 5. *Vidua eligatur non minus sexaginta annorum, quæ fuerit unius viri uxor*. Apertius id præstat Ignatius M. in Ep. ad Antiochen. *saluto*, inquit, *sanctarum portarum custodes, Diaconissas*. Unde liquet primis statim Ecclesiæ temporibus Diaconas fuisse; at quando potissimum desierint, controversatur. Perdurasse eas in Oriente usque ad Sec. XI. putat Balsamon in Not. ad Can. 15. Concilii Chalcedonensis; in Occidente autem usque ad Sec. XII. Card. Bona in Rer. Liturg. L. 1. C. 25. Illud certum, Diaconarum mentionem fieri Can. 14. & 40. Synodi Quinisextæ, seu Trullanæ An. 692. vel (ut alii cum Cabasutio volunt) An. 707. habitæ. Nullo unquam autem tempore aliæ assumptæ sunt, quam vel Virgines, eæque annorum quadraginta : vel Viduæ, uni duntaxat viro nuptæ, ac jam sexagenariæ; utrisque præterea continentia perpetua fuit servanda. Habentur hæc ex Constit. Apostol. L. 6. C. 17. Epiphanio Cap. ultimo Panarii in expos. Cath. fidei, Conciliis item Chalcedonensi, & Aurelianensi II.

Fatemur 2<sup>do</sup>, his Diaconissis commissæ fuisse quædam Ecclesiastica ministeria; commemorat illa Epiphanius. Hæc. 79. copiosius vero describuntur sparsim in Constit. Apost. L. 2. 3. & 8. Præcipua fuerunt: mulieres in sacrum Baptismatis fontem immergendas exuere, & eductas suscipere; imperitas foeminas principia fidei edocere; gerere curam pro-

portæ, qua fœminæ ingrediebantur templum, atque in hoc illis locum designare; internuncias agere mulierum ad Episcopos vel Presbyteros, horumque ad illas &c. Quæ omnia, ut pronum est conjicere, eo spectabant, ut per ministerium Diaconissarum consuleretur decentiæ status Clericalis, & Ministrorum Ecclesiæ exultationi, ac famæ integritati.

Fatemur 3tio, Diaconissas fuisse consecratas peculiari quodam ritu, qui speciem ordinationis referret. Sic enim L. 8. Const. Apost. C. 19. præscribitur, ut ordinandæ in Diaconam manus imponat Episcopus, ac dicat: *Deus æternè - respice hanc ancillam electam ad ministerium, & mundam effice, - ut opus sibi impositum digne perficiat, &c.* Ordo Romanus autem in Bibl. Patrum editus de eadem Ordinatione agens, tunc, inquit, ponat Episcopus Orarium in collo ejus dicens: *Stola jucunditatis induat te Dominus.* Plures id genus ordinationis ritus ex vetustis Codicibus refert Morinus de Ordin. Par. 3. Exercit. 10. C. 2. Sed enim

Demum 4to, (quod jam contra Novatores est) negamus ritum hunc fuisse Sacramentalem ordinationem, virtute cujus nimirum Diaconissæ verum aliquod Ordinis Sacramentum acciperent, & in Ordine Clericali constituerentur. Cur ita vero? quia quisque Clericorum Ordo est dispositio & gradus ad Sacerdotium, conficiendamque Eucharistiam: Diaconissæ autem non ordinabantur ad suscipiendum aliquando Sacerdotium, & Eucharistiæ administrationem, quamvis similibus fungerentur officiis erga mulieres, quibus Ostiarii & Lectores erga viros. Hinc Epiphanius ad Hær. 79. N. 3. *quamquam, inquit, Diaconissarum in Ecclesia Ordo sit, non tamen ad Sacerdotii functionem,*

R. P. Muszka Tom. II. de Sacr.

G g g g

aut

*aut ullam ejusmodi administrationem institutus est; sed ut mulieris sexus honestati consulatur &c.*

Qui plura de Diaconissis nosse cupit, consulat Alexandrum Natalem, Thomassinum, ac cumprimis Morinum in Comment. de sacris Ordinat. Par. 3. Exercit. 10.

## DISSERTATIO V. DE RITIBUS AD ORDINIS SACRAMEN- TUM PERTINENTIBUS.

### §. I.

*Quæ sint juxta Ecclesiæ disciplinam ante Ordinationem observanda?*

**J**AM inde a principio sollicitè cavit Ecclesiæ, ne quis minus idoneus sacro Clericorum Ordini adscriberetur. Inde tot, ac repetita Pontificum & Conciliorum statuta, quibus in ordinandis certæ requiruntur conditiones; ut adeo attento earum fine, jure illas dixerim quamdam ad rite percipiendum Ordinis Sacramentum ex mente Ecclesiæ prærequisitam dispositionem. Uti autem harum conditionum aliquæ ad Ordines præparant vel remote tantum, vel etiam proxime: ita iisdem constans dispositio congrue dividitur in remotam, & proximam; ac de utraque hac nunc compendio agendum habemus.

De remota ad Ordines dispositione.

71 I. **P**Ræcipuum ac prorsus necessarium remotæ hujus dispositionis caput, est divina vocatio; hanc ante omnia sacro-



sacrorum Ordinum Candidatus explorare, hanc in eo Episcopus debet requirere. Nemo quippe (quod Apostolus ad Hebr. 5. monet) *sumit sibi honorem* sacri Ministerii, *sed qui vocatur a Deo*; ac si quidem non vocatus sumat, ex eo utique Ministrorum est genere, de quibus Jer. 23. queritur Deus: *non mittebam Prophetas & ipsi currebant*; ac rursus Osee 8. *ipsi regnaverunt & non ex me*. Quam vero temerarium istud, ac periculi plenum! hinc sunt profecto illa, quæ non raro lugemus, Ecclesiæ & animarum detrimenta. Unde D. Bernardus in Tract. de vita & moribus Cleric. C. 5. *Videte vocationem vestram, ait vocatus Apostolus; consideremus & nos, an vocati venerimus? & vocati a Deo, cujus hæc vocatio est*. Paucis dein interjectis, *quid istud*, inquit, *temeritatis, imo quid insanix est? ubi timor Dei? ubi terribilis illa expectatio judicii? sponsa nec cubiculum ingredi, nisi Rege introducente, præsumit: tu irreverenter irruis nec vocatus, nec introductus*.

Vocationis porro hujus certissimum, quod haberi potest, indicium, est recta mens, & propositum eo consilio sacros Ordines amplectendi, ut gloriam Dei amplius promoveas, & Ecclesiæ ac animarum bona certius procures. Si cui mens alia est: si in sacris Ecclesiæ ministeriis vix animo designat aliud, quam temporalia commoda, opum affluentiam, honores &c. næ is a Deo vocatum se existimaverit. *Sacrum officium* (verba sunt Gregorii M. in Pastoralis) *non solum non diligit omnino, sed nescit, qui ad culmen regiminis anhelans in occulta meditatione caterorum subjectione pascitur, laude propria lætatur, ad honorem cor elevat, rerum affluentium abundantia exultat; Mundi ergo lucrum quæritur sub ejus honoris specie, quo Mundi lucra destrui debuerant &c.* Atque ad hanc ordinandorum vocationem,

nem, ejusque indicia attendere Episcopis incumbit, quo sanctionibus Ecclesiae respondeant, ac cumprimis Conc. Tridentini, quod Sess. 23. de Reform. Cap. 4. aperte decrevit: ut *ne prima* quidem *Tonsura* initientur, - - *de quibus probabilis conjectura non sit*, eos non *saecularis* *judicii fraude*, sed ut Deo *fidelem cultum praestent*, hoc *vita genus elegisse*.

- 72 II. Quod praeterea ad remotam dispositionem pertinet, est omne id, quo Candidatus Ordinum ad Ecclesiae ministerium juxta Canonum statuta habilis ac idoneus redditur. Oportet igitur Ordinandum habere Canonicam aetatem, sufficientem scientiam, probitatem vitae, Titulum Clericalem, honestam Natalium conditionem: eum denique universim esse, qui nulla irregularitate, seu ex defectu, seu ex delicto profecta, sit irretitus; ac si quidem harum conditionum aliqua destituatur, censi nequit ad suscipiendos Ordines rite comparatus. Quibus demum ex Tridentino addendum: ante Ordines, imo Tonsuram etiam preparationis instar suscipiendum esse Confirmationis Sacramentum; *prima Tonsura*, inquit Concil. Cap. supra cit. *non initientur, qui Sacramentum Confirmationis non susceperint*. Quamvis autem disceptetur: num verba Concilii praeceptum, an consilium duntaxat contineant? praescripto nihilominus illorum sancte insistendum est; quando nihil convenientius, atque ut Ecclesiae Ministri, quorum ductu fideles praeliari oportet praelia Domini, non destituantur insignibus Christiano militi propriis.

### De proxima ad Ordines dispositione.

- 73 I. **P**roxima ad Ordines dispositio habetur per Tonsuram Clericalem; hinc eam D. Thom. in Supplem. qu.

40. Ar. 2. vocat *præambulum ad Ordinem*; & Trident. Sess. 23. Cap. 2. ait, eam esse in Ecclesia Ordinum distributionem, ut, qui jam Clericali Tonsura insigniti essent, per Minores ad Majores gradum facerent. Hujus autem Tonsuræ Clericalis nomine venit ritus ille ab Ecclesia (ut fert communior opinio) institutus, quo quis per capillorum detonsionem in Clerum adscribitur, & ad suscipiendos Ordines præparatur, eorumque veluti tyrocinium ponit; ut enim homines ad Baptismum exorcismis, ad Matrimonium sponsalibus præparari solent: ita, tonsa capillo Deo, dedicantur, & aditus ad Ordinis Sacramentum illis aperitur; ait Catech. Rom. Ex quo quidem patet, quem in finem primæ Tonsuræ ritus in Ecclesiam sit investus. Res nimirum plane divina est Sacer Ordo; æquum igitur fuit, ut ejus Candidati Ecclesiasticæ disciplinæ veluti tyrocinium præmitterent. Inde ab illis, priusquam ad Ordines admittantur, Ecclesia exigit: ut habitum sæcularem abjiciant; caput attondeant; vestem Clericalem assument; sanctioris vitæ profiteantur disciplinam; atque alicui Ecclesiæ (quod Trid. Sess. 23. de Reform. C. 6. speciatim addit) ex mandato Episcopi inserviant, vel in Seminario Clericorum, aut in aliqua Schola, vel Universitate, de licentia Episcopi, quasi in via ad majores Ordines suscipiendos versentur.

II. Quod jam vero ad Tonsuræ hujus figuram attinet, tametsi constanter orbicularis, quæ coronæ referret speciem, retenta sit: in modo attamen ejus variatum legimus. Sufficiat in hanc rem testimonium ex Concilio Toletano IV. Anni 597. depromptum, quod Can. 15. ita statuit: *Omnes Clerici, vel Lectores, sicut Levitæ & Sacerdotes, detonso superius capite toto, inferius solum circuli coronam relinquant; non sicut hucusque in Galliciæ partibus fa-*

*cere Lectores videntur, qui, prolixis ut Laiçi comis, in solo capitis apice modicum circulum tondent.*

Si porro de origine ejus, & mystica significatione quæras: variæ sunt Doctorum opiniones, quas videre est apud Morin. in sæpe laud. Comment. de Ordin. Par. 3. Exercit. 15. Mihi interim cum Concilii Trident. Catechismo. Rom. sentire libet; ita autem ille in Sacram. Ord. §. de variis Ord. Ministr. istud explicat. *Tondentur, inquit, capilli ad coronæ speciem, - - quod quidem ex Apost. traditione acceptum esse, docet Ecclesia; cum de hujusmodi tondendi more SS. Dionysius Arcop. Augustin. Hieronym. vetustissimi, & gravissimi PP. meminerunt. Primum autem omnium ferunt Apostolorum Principem eam consuetudinem induxisse ad memoriam coronæ, quæ ex spinis contexta, Salvatoris nostri capiti fuit imposita; ut quod impii ad Christi ignominiam & cruciatum excogitarunt, eo Apostoli ad decus & gloriam uterentur; simulque significarent, curandum esse a Ministris Ecclesiæ, ut omnibus in rebus Christi D. N. speciem & figuram gerant. Addit deinde & alias juxta quorundam DD. opinionem significationes.*

- 75 III. Tonfuræ haud incongrue adjeceris piam animi Recollectionem, qua ipsa status Clericalis Candidatos ad suscipiendos Ordines proxime præparari necesse est, aut saltem prorsus conveniens. Præparationis porro hoc genus jam antiquitus Ordinandis in usu fuisse, colligitur ab exemplo Augustini: qui cum a Valerio Hippon. Episcopo (non præmissa ob temporis angustias sacra id genus exercitatione) in Presbyterum ordinatus fuisset, id deinde efflictim postulavit ab Antistite, ut, priusquam in suscepto Ordine

ministraret, liceret sibi aliquot dierum intervallo rerum divinarum meditationibus secreto vacare, quo se videlicet ad tantum ministerium rite compararet *petendo, quarendo, pulsando, orando, legendo, plangendo*, ut ipse ait *Ep. 148. nunc 21.*

Posterioribus deinde temporibus sacrum hoc Exercitii genus adeo invaluit, ut non modo in morem verteretur, sed etiam ex præscripto Præfulum ab Ordinandis observandum foret. Certe S. Carolus Borrom. in Concilio Mediolanensi An. 1576. nominatim constituit: ut nemini in sua Ecclesia ad sacros Ordines accedere liceret, nisi prius ad eos per spiritualia Exercitia aliquot dierum spatio se comparasset. Idem in Romana, & Suburbanis Ecclesiis servandum sanxit Alexander VII. An. 1662. quod deinceps Innocentius XI. & Clemens pariter XI. ad universas Italiæ Diœceses extenderunt. Hodie regnans etiam S. P. BENEDICTUS XIV. id ipsum observari magnopere cupit, ut constat ex *Notificatione* Bononiæ ab eo edita An. 1734. Haud dispares sunt reliquorum Præfulum curæ, quod vel ipsi novimus; in hac certe Metropolitana Viennensi Ecclesia nulli ad sacros Ordines (cumprimis autem Presbyteratum) patet aditus, nisi prius sacra dierum aliquot Ascefi animum excoluerit, atque de hoc ipso testimonium attulerit. Id solum igitur est reliquum, ut justis adeo & Sanctis Præfulum votis ac conatibus Ordinandi respondeant, memores: ne ipsos quidem Apostolos, tametsi Christi Magistri sui exemplis & doctrina probe exultos, sacrum Ecclesiæ ministerium auspicari prius voluisse, quam in coenaculum a turba secedentes, ibique in oratione unanimiter perseverantes virtute induerentur ex alto.

## §. II.

## §. II.

*Quid de Ritibus in Ordinatione ipsa observari  
solitis præcipue notandum veniat?*

**P**rolixum foret omnium Ordinationum ritus minutim recensere: multo etiam prolixius singulorum originem, significationem mysticam, & variam circa eos Ecclesiæ disciplinam accuratius expendere. Primum videri potest in Pontificali Rom. Clementis VIII. & Commentario Morini de Ordinatio. Par. 2. ex Græcorum, Latinorum, & Syrorum Codicibus ab eo ibid. relatis: alterum apud Menardum in Not. ad Sacram. Gregorii, Martenium de antiqu. Eccl. Ritibus, & cumprimis laud. Morinum sparsim in cit. Comment. Nos ex his præcipua duntaxat referre constitutum habemus: dicturi primum de loco, tempore, & gradibus Ordinationum; dein de manus impositione, & unctione; tum de instrumentorum traditione; de vestibus demum, quibus ad Ordines promoti in ipsa ordinatione induuntur.

De loco, tempore, & gradibus Ordinationum.

- 76 I. **L**ocus Ordinationi peragendaæ proprius est Ecclesia; & Græci quidem Presbyteros & Diaconos non nisi in *Sanctuario* ordinant: Hypodiaconos autem & Lectores in *Diaconico*, hoc est, loco Ecclesiæ contiguo, & ad sacrorum vasorum custodiam destinato. Atque hic mos est a veteri, ut ex Gelasii Ep. 1. & antiquis LL. Pontificalibus patet; eundemque confirmat Trident. Sess. 23. de Reform. Cap. 8. statuens: *Ordinationes sacrorum Ordinum* - - *in Cathedrali Ecclesia, vocatis & presentibus ad id Eccle-*

*clesiæ Canonicis, publice celebrentur; si autem in alio Diœcesis loco, - - dignior, quantum fieri poterit, Ecclesia semper adeatur.* Consulto autem Trid. dicit, *Sacrorum Ordinum:* nam ex more Latinorum *Minores Ordines possunt dari ubicunque,* ut notat Pontificale Rom. in præviis Rubricis ad Tit. de Ordin. confer. Ratio porro publicæ hujus in Ecclesia Ordinationis est, tum decentia & rituum solemnitas: tum etiam, ut de promovendis Cleri & fidelium testimonium habeatur; hinc jam An. 397. Conc. Carthaginense IV. Can. 22. relato Cap. *Episcopus.* Dist. 24. decrevit: *Episcopus sine concilio Clericorum suorum Clericos non ordinet, ita, ut civium conniventiam & testimonium quarat.* Sed nimirum hæc omnia de eo duntaxat intelligenda sunt, quod regulariter fieri oportet: ex privilegio enim, aut usu tacita saltem Pontificum consensione approbato, licitum est Episcopis justa de causa in privatis Oratoriis etiam sacros Ordines conferre.

II. Quod ad tempus Ordinationis attinet, duo jam<sup>77</sup> inde ab Ecclesiæ primordiis observata sunt: primum, ne arbitrarium esset quolibet anni tempore sacrum Ordinem ministrare; alterum, ne sine interstitiis Ordines conferrentur.

Primum colligitur ex testimonio Leonis M. qui in Ep. 4. ad Anastas. Thessalon. C. 6. ait repugnate Patrum traditioni, *Presbyteros & Diaconos qualibet die dignitatem accipere;* quod ipsum repetit Ep. 11. ad Dioscorum Alexandrinum; unde Ep. 84. ad Martian. reprehendit Anatolium, quod Aetium sexta feria in Presbyterum ordinasset, *Traditionis Apostolicae aut nescius, aut oblitus.* Indubium interrim est, circa hæc ipsa statuta Ordinationum tempora vari-

R P. Muszka Tom. II. de Sac.                      H h h h                      ria-

riationem aliquam in Ecclesia intercessisse; dum demum partim Pontificum Decretis, partim usu ipso id obtineret, quod in Pontificali Rom. Tit. de Ord. confer. in Rubricis adnotatur his verbis. *Tempora Ordinationum sunt: sabbata in omnibus Quatuor Temporibus; Sabbatum ante Dominicam de Passione; & Sabbatum sanctum. Clericatus, seu prima Tonsura, quocunque die, hora, & loco conferri potest. Minores vero Ordines possunt dari singulis Dominicis, & Festivis diebus duplicibus, ubicunque, in mane tamen.* Hæc vero nominatim tempora a multis jam Seculis observari, argumento est Alexandri III. sub med. Seculi XII. Pontificis Epist. ad Episcop. Herfordiensem, relata L. 1. Decr. Cap. 2. & 3. de Tempor. Ordin. ubi contrariam quorundam consuetudinem dicit institutioni Ecclesiastica inimicam; unde Urbanus III. ejusdem Seculi S. P. declaravit, ordinatum extra hæc tempora esse suspensum, donec dispenseretur cum eo, & Ordinans puniatur, ut habetur Cap. 8. loco paulo ante cit.

Alterum perinde certum est, cum constet antiquum esse in Ecclesia interstitiorum usum. Testis ejus est Cyprianus in Ep. 33. Siricius S. P. in Ep. ad Hymerium, Innocentius I. Ep. 4. ad Felicem. Ac primis quidem Seculis multo plus, atque nunc temporis fuisse inter singulos Ordines interpositum, docemur ex Zozymi sub init. Sec. V. Pontificis Ep. 3. relata Cap. *in singulis*, Dist. 77. ac etiam ex Concilii Constantinopol. VIII. Can. 5. quem rigorem Tridentinum deinde temperavit, ita de Ordinum interstitiis decernens Sess. 23. de Reform. Cap. 11. 13. & 14. Nimirum: ut Minores Ordines per temporum interstitia conferantur; ab his susceptis annus interponatur usque ad Subdiaconatum, ac rursus annus unus ad Diaconatum,



ab hoc vero similiter ad Presbyteratus Ordinem : nisi forte Episcopo aliud videretur, ut ibid. addit Concilium. Idem porro laud. Sess. Cap. 11. causam interstitiorum his verbis reddit : *ut in eis ( videlicet ordinandis ) cum aetate vitae meritum, & doctrina major accrescat ; quod & bonorum morum exemplum, & assiduum in Ecclesia ministerium, atque major erga Presbyteros & superiores Ordines reverentia, & crebrior, quam antea, Corporis Christi communio maxime comprobabunt.* Quod vero circa interstitia ex ejusdem Concilii Decreto cumprimis observari oportet, illud est : *ne duo sacri Ordines eodem die, etiam Regularibus, conferantur ; privilegiis ac indultis quibusvis concessis non obstantibus, ut habetur Cap. 13.*

III. Gradus Ordinationum ita observandos esse, ut inferiori Ordine prætermisso, superiorem suscipere non liceat, aperte docent complura Pontificum Decreta in Jure Canonico relata. Lege Cap. *solicitudo*, Dist. 52. Cap. *Illud nos*, & Cap. *In singulis gradibus*, Dist. 77. item Cap. *Tua Litera*, de Clerico per saltum promoti, in L. 5. Decr. ac demum Concilii Trident. Sess. 23. de Reform. Cap. 14. sub finem. Ex his certe locis cum pluribus Theologis colligit Suarez : eum qui *per saltum* ( ut Jura loquuntur ) ordinatus est, ipso jure suspensum esse saltem ab executione superioris Ordinis per saltum suscepti ; item non posse suscipere Ordinem prætermissum, nisi prius cum eo dispensetur ; demum sic ordinatum, si ministret in Ordine per saltum suscepto, irregularem fieri.

### De manus Impositione, & unctione.

I. **R**itus impositionis manus in Ordinatione Græcis perinde ac Latinis est usitatus, cum eo tamen discrimine : quod Latini eum non nisi in ordinandis Episcopis, Presby-

Presbyteris, & Diaconis adhibeant; Græci autem illo universim omnes Ordines, etiam Subdiaconatum & Lectoratum conferant. De ritus antiquitate dubitari non potest, quando tam Christo quam Apostolis ejus usum fuisse familiarem ex Evangg. & Aët. Ap. constat. Eundem ab origine sua pro signo symbolico habitum (ut profanos Scriptores taceam) vel S. Literæ abunde testantur. Ita jam in veteri Lege existimabant Judæi manus impositione conferri supernam quamdam virtutem, eandemque significari; hinc Dent. 34. Josue fuisse divino Spiritu repletus dicitur, *quia Moyses posuit super eum manus suas*. Et in nova lege (præter alia) ritu hoc designari suffragium & electionem ad ministerium, legimus Aët. 14. item 2. Cor. 8. & alibi. In ipsa porro Ordinatione manus impositionem nominatim significare collationem potestatis sacræ, & gratiæ ad eam necessariæ, colligitur tum ex ejus effectu sacramentali, tum ex verbis ritui huic respondentibus.

- 80 II. Unctio Episcoporum & Presbyterorum apud Latinos usitata, origine sua est omnino antiqua; meminerunt quippe ejus Pacianus Ep. 3. ad Sympron. Leo M. Serm. 8. de Passione Dom. Gregorius M. L. 4. 1. Reg. C. 4. Nicolaus I. ad Consulta Bulg. C. 73. & plures alii. Presbyteris autem manus utraque in modum crucis ungitur oleo Catechumenorum: Episcopis vero tam manus quam caput chrismate. Cujus diversitatis causa, simulque mystica significatio ex Stephano Eduensi de Sacram. Alt. C. 9. hæc est. *Propterea, inquit, oleo sancto manus Presbyterorum inunguntur, per quod gratia Spiritus S. eis collata significatur, & quod abundant operibus misericordiae designatur. In his etiam manus Sacerdotis, quæ in figura crucis oleo sancto signantur, confortantur manibus Christi; & illud insigne miraculum, quod inter manus Sacerdotis fieri creditur,*

*ditur, hoc manus Christi operantur &c. Unctio Episcopi fit in capite, quia ordinantur Vicarii illius, qui unctus fuit oleo lætitiæ in plenitudine, &c.*

Græcos ritu unctionis non uti in ulla Ordinatione certum est ex eorum Euchologiis, Simeone item Thessalon. in L. de Sacram. aliisque apud Morinum. An autem antiquitus saltem usi fuerint? controvertitur. Ac id quidem nonnulli putant colligi posse ex veterum testimoniis, præsertim Gregorii Naz. Orat. 5. & Auctoris Vitæ Chrysostomi apud Metaphrastem, apud quos sacri Antistites dicuntur *chrismate deliniri*. At aliis istud non videtur esse sufficiens fundamentum propterea, quod in laud. locis *chrismatis unctionem* mystico duntaxat sensu accipiendam contendant Græcorum rituum periti, ut Arcudius L. 6. de Sacram. C. 1. & Morinus in Comment. de Ord. Par. 3. Exerc. 6. Verum nobis istud insinuas, satis esto; quando controversiam totam expendere prolixum foret. Si lubet, laud. Morinum consule.

### De instrumentorum traditione.

I. **Q**Uæ in Ordinatione instrumenta apud Latinos (nam & Græcis istud in usu non est) tradantur Presbytero, Diacono, Subdiacono, & inferioribus Clericis, ex Pontificali Rom. jam supra retulimus Dissert. II. Ex his ipsis porro instrumentis, ac etiam verborum formis, quæ eorum traditionem comitantur, pronum est cuique statuere, ritu hoc non modo conferri, sed & significari potestatem ministerii singulis Ordinibus proprii. Nec novitium esse ritus hujus usum, comprobant ea, quibus pro antiquitate illius pugnavimus Dissert. II. §. I. N. 33. in Resp. ad II. Quod igitur isthic addendum videtur, est ea solum instrumentorum traditio, quæ ex ritu Latinorum fit in Ordinatione Episcopi.

H h h h 3

II. Jam

82 II. Jam vero (ut constat ex Pontif. Rom.) ordinato Episcopo porrigitur *Baculus Pastoralis* Consecratore dicente: *Accipe baculum Pastoralis officii, ut sis in corrigendis vitiis pie serviens* &c. deinde *Annulus* cum hac verborum forma: *Accipe annulum, fidei scilicet signaculum, quatenus Sponsam Dei Ecclesiam - - intemerate custodias*; demum *Liber Evangeliorum* his verbis: *Accipe Evangelium, & vade, prædica populo tibi commissum* &c. Quibus quidem omnibus quid significationis sacræ insit, ipsa verba instrumentorum traditioni respondentia satis indicant.

Quod si jam de ritus hujus origine quæras: quod certi dicam, nusquam reperio. Baculi nihilominus & annuli apud Episcopos usum esse vetustum, colligitur ex Conc. Toletano IV. An. 597. & Ordine Romano; in utroque enim fit mentio eorum, seu Episcopi insignium. Cæterum Baculi Pastoralis non idem semper nomen apud veteres legitur; dictus quippe est a quibusdam *cambuta*, *linuus Pontificius*, *ferula*, *virga Pastoralis* &c. nec materia semper eadem: memorantur enim formati ex argento, auro, cupresso, sambuco, canaa &c. Ad figuram vero quod attinet, apud Latinos (quod sciam) recurva & re-torta semper fuit ejus pars summa: apud Græcos contra desinit in globum, vel in signum Crucis, aut instar literæ T. in transversum lignum. Vide de his Card. Bona Rer. Liturg. L. 1. C. 24. Evangelii demum traditio, apud solos Latinos usitata, quibusdam cum Morino videtur recentior, cum eam LL. Ritua-les ante quingentos annos scripti non commemorant.

### De Vestibus, quibus Ordinati induuntur.

**V**estes sacris Ministris peculiares, quæ illis in Ordinatione ritu solemnî, ac sub certa verborum forma ab Episcopo aptantur, juxta Pontificale Rom. hæc sunt. Nimirum

I. Ad

I. Ad Ordinem Clericatus per Tonsuram promoti induuntur *Superpelliceo*, dicente Episcopo: *Induat te Dominus novum hominem, qui secundum Deum creatus est &c.* quod ipsum indumenti genus est Ordini cuilibet e quatuor Minoribus proprium. Nomen porro *Superpellicei* Burius in suo Onomast. putat inde haberi, quod primitus super vestes pelliceas portaretur, quibus antiqui Canonici vestiebantur in memoriam primorum Parentum, post peccatum tunicis pelliceis indutorum.

Usus ejus aliqui a primis Ecclesiæ temporibus repetunt, existimantes; hoc vestimenti genus intelligendum esse sub illis veterum vocabulis, *Ephod, phelonium, lacerna, birrus, amphibalum, &c.* Illud ex S. Hieronymo L. I. contra Pelag. est certius: jam antiquitus Clerum Sacrificiis adfuisse in candidis vestibus; quod ipsum confirmatur ex Conc. Narbonensi An. 589. ubi sancitum fuit, ne Diaconus, Subdiaconus, aut Lector ante finem Missæ præsumant se *Alba* exuere. Sicut autem *Alba* talaris est, ita etiam superpelliceum olim talare fuisse, testis est Stephanus Tornac. in Ep. ad Albinum, & Honorius Augustod. de antiq. Ritu Miss. L. I. C. 232. Progressu temporis decurtari cœpit, ut jam hodie vix ad genua pertingat; id quod opinor factum propterea, ut Clerici inferiores in suo ministerio expeditiores essent: vel ne quam vestem cum Superioribus Clericis communem haberent. Apud Græcos interim (Morino teste) etiamnum Lectores *Camisium* talare deferunt. In utraque autem Ecclesia candidum ejus colorem esse semper oportuit: ad commonstrandum videlicet, Clericum induere debere novum hominem, qui sit absque labe & immunditia, ut notat S. Carolus Borom. in Conc. Mediolanensi V.

II. Subdiacono imponitur primum *Amictus*, deinde *Manipulus*, tum *Tunica*, Episcopo ad primum dicente: *Accipe amictus*

amictum, per quem designatur castigatio vocis; ad alterum: Accipe manipulum, per quem designatur fructus bonorum operum; ad tertium: Tunica jucunditatis, & indumento latitiæ induat te Dominus. Ac de amictu quidem & Manipulo jam dictum est L. IV. de SS. Euch. N. 209. de sola igitur Subdiaconorum Tunica aliquid addendum. Est autem vestis hæc similis Dalmaticæ, qua Diaconi utuntur, minor attamen illa: idcirco a quibusdam dicitur *Dalmatica minor*, & communiter *Tunicella*. Originem ejus referendam opinor longe post Seculum VI. nam ætate Gregorii M. ut ipse commemorat L. 7. Ep. 64. ad Joan. Syracus. Subdiaconi sola Alba induti ministrabant: & in Ordine Rom. iis usus Planetæ (diversæ attamen a Sacerdotum Planetæ, ut opinari licet) attribuitur; hinc Honorius Augustod. in Gemma animæ L. 1. serius illis concessam scribit Tunicellam, quam *Subtile* vocat, quia subtilius texebatur. Nunc, quo major sit vestium in Diacono & Subdiacono simul ministrantibus conformitas, nihil differentię est inter Dalmaticam & Tunicam. Apud Græcos pariter Subdiaconi deferunt *Tunicam*, quam *σχιματιον* dicunt, cum eo tamen discrimine, quod (teste Morino) discissa utrinque non sit, ut apud Latinos.

- 85 III. Diaconus, post impositam *Stolam*, induitur *Dalmatica*; ad stolam Episcopus dicit: *Accipe Stolum candidam de manu Dei, adimple ministerium tuum* &c. ad Dalmaticam vero: *Induat te Dominus indumento salutis, & vestimento latitiæ, & Dalmatica justitiæ circumdet te semper.* De Stola diximus L. IV. supra cit. N. de Dalmatica vero Card. Bona hæc adnotat. Diaconorum indu mentum nunc est Dalmatica ex institutione S. Sylvestri, qui (ut legitur in ejus Actis) præcepit, ut in Ecclesia Dalmaticis uterentur, cum antea *Colobiis* uti solerent, teste Alcuino. Erant autem Colobia tunicæ sine manicis; non quod manicis carerent, sed quia ad cubitum tantum pertingebant: Dalmaticæ vero manicatæ erant, talares, sericæ, albæ, auro

or-

ornatae, & plagulis, seu clavis ex purpura affutis distinctae. Haetenus Bona. Nunc addendum & illud: Dalmaticas semper fuisse laxis & apertis manicis in signum liberalitatis, quam Diaconos, utpote eleemosynis erogandis praefectos, exercere oportebat; hinc Innocentius III. *manicarum*, inquit, *latitudo largitatem datoris demonstrat*. Apud Græcos *ερχάριον* vestis est communis perinde Diacono ac Subdiacono, ut ex Euchologiis & Simeone Thessal. refert Morinus de Ordin. Par. 2. Adnot. in Græcas Ordinat. N. 30.

IV. Presbyter, præter *Stolam*, induitur *Capula*; verba 86 his respondentia sunt: *Accipe jugum Domini, jugum enim ejus suave &c.* item, *Accipe vestem Sacerdotalem, per quam charitas intelligitur &c.* De utroque hoc vestis genere consule dicta L. IV. cit. N. 208.

V. Episcopo sub finem Ordinationis Consecrator im- 87 nit *Mitram*, tum etiam manibus ejus *Chirothecas*. Ad *Mitram* autem dicit: *Imponimus, Domine, capiti hujus Antistitis galeam munitionis & salutis, quatenus decorata facie, & armato capite, cornibus utriusque Testamenti terribilis appareat hostibus veritatis &c.* ad *Chirothecas* vero: *Circumda, Domine, manus hujus Ministri tui munditia novi hominis &c.* Ex quibus verbis facile colligas symbolicam utriusque significationem; quidam interim cum Cl. Berti putant, per *Mitram* bifidam designari jus spirituale & temporale: per *Chirothecas* autem manuum custodiam. Sed de utroque hoc vestimenti genere amplius dicendum.

*Mitra*, a Græco *μῆτρος* *filum*, est quodvis capitis tegmen ex filis contextum; subinde interim speciatim Episcoporum

pileus bicornis, qui juxta Burium duo Moÿsis cornua refert, hoc nomen obtinuit. Idem apud veteres nonnunquam vocatur *cidaris*, *phrygium*, *corona Sacerdotalis*, *caphia*, *tiara*, *insula*; quæ postrema duo nomina etiamnum sunt in usu. De tempore, quo primum Episcopi mitra uti cæperunt, variant Eruditorum opiniones. Quidam id ad Sec. X. referendum putant propterea, quod vetera monumenta ad hanc usque ætatem Episcopos, cæteris quidem Pontificalibus ornamentis indutos, at nudo semper capite exhibeant. Alii cum Cl. Saussay L. 1. Panopl. ab ipsis Apostolorum temporibus Mitræ Episcopalis originem repetunt, nixi videlicet Epiphaniï, Gregorii Naz. & quorundam PP. aliorum testimoniis. Card. Bona utramque opinionem conciliare nititur, existimans: Mitram, qualis est hodie, ornatum esse nuperum, qui videlicet ante Sec. X. vix fuerit in Ecclesia; aliquod nihilominus tegmen admittendum, quo aliqui saltem Episcopi a primis Ecclesiæ temporibus caput ornaverint. Atque istud probat ex Epiphanio, qui in Hær. Antidicomarianit. affirmat Jacobum Apostolum in capite gestasse Pontificale *πέταλον*, seu laminam; quod ipsum de Joanne Apostolo refert Hieronymus L. de Script. Eccl. & ex Polycrate Eusebius L. 5. Hist. Cap. 24. Ut ut vero ista sint: certe Gregorius Naz. in Orat. 5. de sua Ordinatione loquens, *Cidarim* ait suo capiti impositam. Est vero *Cidaris* usus (teste Morino) etiam apud Episcopos Orientales, Maronitas scilicet, Nestorianos, & Jacobitas; non item apud Græcos: quanquam horum aliquos in Regionibus nostris sciam uti Mitra, quæ speciem Ducalis pilei habeat. ❧

Chirothecæ Græcis, Latinis sunt *manicæ*: utrisque a manu, ut constat. Earum in Ecclesia usum esse traditionis



nis Apostolicæ scribit Honorius Augustod. in Gemma animæ L. 1. Cap. 215. at opinionem hanc plurimi rejiciunt: cum per aliquot Secula nullum earum monumentum reperiatur, nec illis unquam sit usa, uti nec hodie utitur Ecclesia Orientalis. Cæterum Ordo Rom. in Ordinatione Episcopi Chirothecarum jam meminit: Missa item Ratoldi apud Menardum; quæ satis indicant earum in Ecclesia vetustatem.

Reliqua Episcoporum ornamenta, quibus sub solemnî Officio vestiuntur, ad propositum nostrum non faciunt; de iis enim solum isthic agere constituimus, quibus Ministri Ecclesiæ in ipsa Ordinatione ab Episcopo ordinante induuntur. De reliquis potest consuli Bona Rer. Liturg. L. 1. C. 24. *uti de sacris indumentis Sacerdotum, Pontificum, & Ministrorum copiose, una ac erudite differit.*



# LIBER VIII.

## *De Matrimonio.*

**N**E a proposito recedamus, in argumento hoc, facile omnium amplissimo, ita versabimur, ut ea solum, quæ in Matrimonio rationem Sacramenti constituunt, aut ad explicandam illam cumprimis conferunt, in quæstionem vocemus. Atque istud Dissertationibus quatuor præstabimus. I. erit de Natura, Existentia, & Institutione Sacramenti Matrimonii. II. de ejusdem Materia, Forma, Ministro, & Subjecto. III. de Effectibus, & proprietatibus. IV. de Ritibus ad Matrimonii Sacramentum pertinentibus. His omnibus more nostro præmittemus Tridentinos Canones, quædam item aliorum OEcumen. Conciliorum Decreta, tum Propositiones damnatas.

## CANONES CONCILII TRIDENTINI

### *Ex Sess. XXIV. de Sacramento Matrimonii.*

**I.** **S**I quis dixerit Matrimonium non esse vere, & proprie unum ex septem Legis Evangelicæ Sacramentis a Christo Domino institutum, sed ab hominibus in Ecclesia inventum; neque gratiam conferre; anathema sit.

**II.** Si quis dixerit licere Christianis plures simul habere uxores, & hoc nulla Lege divina esse prohibitum; anathema sit.

**III.** Si quis dixerit, eos tantum consanguinitatis, & affinitatis gradus, qui Levitico exprimuntur, posse impedire

dire Matrimonium contrahendum, & dirimere contractum, nec posse Ecclesiam in nonnullis illorum dispensare, aut constituere, ut plures impedian & dirimant; anathema sit.

IV. Si quis dixerit Ecclesiam non potuisse constituere impedimenta Matrimonium dirimentia, vel in iis constituentis errasse; anathema sit.

V. Si quis dixerit propter hæresim, aut molestam cohabitationem, aut affectatam absentiam a conjugē dissolvi posse Matrimonii vinculum; anathema sit.

VI. Si quis dixerit Matrimonium ratum non consummatum per solemnem Religionis professionem alterius conjugum non dirimi; anathema sit.

VII. Si quis dixerit Ecclesiam errare, cum docuit, & docet juxta Evangelicam & Apostolicam doctrinam propter adulterium alterius conjugum Matrimonii vinculum non posse dissolvi, & utrumque, vel etiam innocentem, qui causam adulterio non dedit, non posse altero conjugē vivente, aliud Matrimonium contrahere; mœcharique eum, qui dimissa adultera, aliam duxerit, & eam, quæ dimisso adultero, alii nupserit; anathema sit.

VIII. Si quis dixerit Ecclesiam errare, cum ob multas causas separationem inter conjuges quoad thorum, seu quoad cohabitationem, ad certum, incertumve tempus fieri posse decernit; anathema sit.

IX. Si quis dixerit Clericos in sacris Ordinibus constitutos, vel Regulares castitatem solemniter professos posse

Matrimonium contrahere, contractumque validum esse, non obstante lege Ecclesiastica vel voto: & oppositum nil aliud esse, quam damnare Matrimonium, qui non sentiunt se castitatis, etiamsi eam voverint, habere donum; anathema sit: cum Deus id recte petentibus non deneget, nec patiatur nos supra id, quod possumus, tentari.

X. Si quis dixerit statum conjugalem anteponendum esse statui virginitatis, vel coelibatus, & non esse melius, ac beatius manere in virginitate, aut coelibatu, quam jungi Matrimonio; anathema sit.

XI. Si quis dixerit prohibitionem solemnitatis nuptiarum certis anni temporibus superstitionem esse tyrannicam, ab Ethnicorum superstitione profectam, aut benedictiones, & alias cæremonias, quibus Ecclesia in illis utitur, damnaverit; anathema sit.

XII. Si quis dixerit causas Matrimoniales non spectare ad Judices Ecclesiasticos; anathema sit.

## DECRETA ALIORUM CONCILIORUM.

**C**onc. Lateranense IV. Can. 51. prohibet clandestina Matrimonia; prolem ex illis susceptam declarat illegitimam; Parochum, qui conjunctiones in gradibus prohibitis impedire contempserit, & Regularem quemlibet, qui eis interfuerit, per triennium ab officio suspendit.

*Ibidem statuit*, ut, cum Matrimonia fuerint contrahenda, in Ecclesiis publice proponantur per Presbyteros, competentis termino præfixito.

Con-

*Concil. Constantiense Sess. 15. damnat Joannem Hus, quod (præter alia) de Sacramento Matrimonii male sentiret; hinc approbante Concilio Martinus V. decrevit, ut suspecti de hæresi interrogentur: an credant? quod Christianus contemnens susceptionem Sacramentorum Confirmationis, vel Extremæ Unctionis, vel Solemnisationis Matrimonii, peccet mortaliter.*

*Conc. Florentinum in Decr. pro Arm. & de Matrimon. Septimum est, inquit, Sacramentum Matrimonii, quod est signum conjunctionis Christi & Ecclesiæ secundum Apostolum dicentem: Sacramentum hoc magnum est: ego autem dico in Christo & in Ecclesia. Causa efficiens Matrimonii, regulariter est mutuus consensus per verba de præsentis expressus.*

*Idem eodem loco: Assignatur autem triplex bonum Matrimonii: Primum est proles suscipienda & educanda ad cultum Dei. Secundum est fides, quam unus conjugum alteri fervare debet. Tertium indivisibilitas Matrimonii propter hoc, quod significat indivisibilem conjunctionem Christi & Ecclesiæ.*

*Demum concludit: Quamvis autem ex causa fornicationis liceat tori separationem facere, non tamen aliud Matrimonium contrahere fas est, cum Matrimonii vinculum legitime contracti perpetuum sit.*

## PROPOSITIONES DAMNATÆ AB INNOCENTIO XI.

IX. Opus conjugii ob solam voluptatem exercitum, omni penitus caret culpa, ac defectu veniali.

L. Copula cum conjugata, consentiente marito, non est adulterium: adeoque sufficit in Confessione dicere, se esse fornicatum.

DIS-

## DISSERTATIO I.

## DE NATURA, EXISTENTIA, ET INSTITUTIONE SACRAMENTI MATRIMONII.

## §. I.

*Quid sit Matrimonium? quæ item de illo generatim sumpto notanda veniant?*

**A**bstrahendum est tantisper a Sacramenti ratione, quæ in Matrimonio reperitur, quo de illa deinceps expeditius fiat differendi argumentum. Præliminarium igitur instar de Matrimonio generatim sumpto isthic præfabimur pauca: de nomine ejus videlicet, de definitione, substantia, origine, honestate, & necessitate.

## Nomina Matrimonii.

**H**oc ipsum *Matrimonii* nomen omnium usitatissimum est ad significandam rem, quæ illo designatur. Deducitur autem a *Matre*; seu quod prima prolis ex Matrimonio natæ cura incumbat Matri: seu quod hæc prolis onus cumprimis sentiat. *Matri* quippe (ut ait Gregorius IX. Cap. *Ex Literis*. de Convers. Infid.) *infans ante partum onerosus, dolorosus in partu, post partum laboriosus; ac ex hoc legitima conjunctio maris & femine magis Matrimonium, quam Patrimonium nuncupatur.* Atque hinc est, quod communiter existimetur *Matrimonium* esse quasi *Matris munus*, seu officium. Idem porro Græci vocant γάμος a verbo γαμῶ, quod idem est, ac *domo*: idque juxta Arcudium de Matrim. L. 7. propterea, quod *conjuges domet*. Cui plane

ne consentit haud infrequens apud Latinos *Conjugii* nomen, multorum opinione derivatum a *jugo*; per Matrimonium enim mas & foemina conjunguntur sub eodem quasi jugo, cum quisque eorum corporis sui potestatem & libertatem amittat, seque alter alteri subdat juxta illud 1. Cor. 7. *mulier sui corporis potestatem non habet, sed vir: similiter autem & vir sui corporis potestatem non habet sed mulier.*

### Definitio, & Substantia Matrimonii.

I. **M**atrimonium sumi potest vel pro contractu, vel 2  
pro vinculo jam per contractum inducto; seu quod idem est, pro Matrimonio *in fieri*, vel *in facto esse*, ut Scholæ loquuntur.

Primo modo sumptum est *contractus*, quo vir & foemina mutuo sibi tradunt & accipiunt jus ad sua corpora in ordine ad actum conjugalem, seque ad mutua obsequia in perpetuum obligant. Atque hic contractus, si spectetur ut actus mere naturalis, est in officium naturæ ad propagationem generis humani necessarium; si vero spectetur ut est simul actus civilis, perfectionem suam habet a legibus Reipublicæ, ex quarum præscripto celebratur.

Pro vinculo sumptum Matrimonium est *viri & foeminae conjunctio maritalis*, individuum vitæ consuetudinem retinens; ubi per conjunctionem designatur nexus ex contractu ortus, idemque habitualiter perseverans. Dicitur autem *maritalis* ad significandum Matrimonii finem & obiectum, mutuam scilicet corporum traditionem. Reliquis verbis significatur vinculi indissolubilitas, & perpetua ad mutuam vitæ societatem obligatio.

- 3 II. Ex his jam definitionibus prout est statuere, quid Matrimonii substantiam constituat. Ac illud quidem pro *contractu* acceptum, seu ut est actus mere transiens, in solo mutuo contrahentium consensu legitime expresso consistere, nemo negat; idemque facile evincitur ab exemplo aliorum contractuum. At de eodem pro *nexu permanente* sumpto controvertitur. Certe Julianus Pelagianus teste Augustino L. 5. contra eundem C. 16. & Wicleffus teste Thoma Vald. Tom. 2. de Sacr. C. 130. totam Matrimonii essentiam reponebant in ejus usu, seu carnali conjunctione: Quamvis autem DD. orthodoxi istud, ceu erroneum, rejicerent: fuerunt nihilominus aliqui, qui cum Medina L. 5. de Contin. Sacr. hominum C. 64. existimarent, sine copula non esse verum ac perfectum Matrimonium, tamen illud jam ante consummationem contrahi faterentur.

Sed enim utrique opinioni huic repugnant Patrum *sensa*. Contra primam Chrysostomus aperte pronuntiat, dum Hom. 32. in Matth. ait: *Matrimonium non facit coitus, sed voluntas*. Contra alteram pugnat Augustinus L. 1. de Nupt. & Concup. C. 11. ubi inter V. Mariam & Joseph verum fuisse Matrimonium asserens, *neque enim*, inquit, *fallaciter ab Angelo dictum est ad Joseph; noli timere accipere Mariam conjugem tuam. Conjux vocatur ex prima fide desponsationis, quam concubitu nec cognoverat, nec fuerat cogniturus; nec perierat, nec mendax manserat conjugis appellatio, ubi nec fuerat, nec futura erat carnis ulla commixtio. Et antea ibidem: quibus placuerit ex consensu ab usu carnalis concupiscentiae in perpetuum continere, absit, ut inter illos vinculum conjugale rumpatur; imo firmitus erit, quo magis ea pacta secum inierint, quae concordius servanda sunt,*


non



*non voluptuariis corporum nexibus, sed voluntariis affectibus animorum.* At de his adhuc recurret sermo Dissert. II. §. I. N. 36. Nunc

Reliquum est, ut Matrimonii pro vinculo permanente accepti substantiam reponamus in nexu illo & jure perpetuo, quod ex mutuo partis utriusque contractu resultat. Nimirum, cum Matrimonium hoc sensu acceptum sit quid firmum ac stabile, nequit consistere nisi in eo, quod ipsum etiam stabiliter perseveret; istud vero est vinculum & jus memoratum: non item seu contractus, seu carnalis commixtio, qui sunt actus transeuntes, ergo &c. Quid quod universim rei dominium ex contractu ortum non constituitur per contractum, aut usum rei: verum per jus permanens ad usum rei ex contractu acquisitæ; quid ni igitur idem sentiendum de Matrimonio? Hanc eandem certe sententiam amplectitur Catechismus Concilii Trid. Par. 2. de Sacram. Matr. N. 5. & 6. ac jam ante illum D. Thomas in 4. dist. 26. qu. 2. Ar. 3. ac rursus in Supplem. qu. 44. Ar. 1. in Resp. ad 1.

### Origo, & Institutio Matrimonii.

I. **M**atrimonium secundum se, ac ut est merum naturæ officium, originem suam habet ex naturæ lege, quam ipsam deinde Deus lege positiva confirmavit. Ut enim post D. Thomam in suppl. qu. 41. Art. 1. in  arguit Estius, *natura, etiam secluso peccato, inclinat hominem ad prolis generationem, & ad eum finem sexuum diversitas est ordinata, ut quæ extra conjugium nullum alium usum habeat.* Ipsa deinde proles, sicut concepta juxta naturæ ordinem in lucem edi debet ita in lucem edita

su.

nutriri ac educari : utrumque porro hoc nutritionis ac educationis officium certos requirit parentes, eosque vinculo quodam indissolubili colligatos. Quæ quidem naturalem Matrimonii legem satis indicant ; hujus autem origo vel ideo repetenda est a Deo, quod is sit auctor naturæ universæ. Sed nimirum idem legem hanc deinde positiva etiam sanctione firmavit. Id quod (ut omittam alia) aperte colligitur ex iis Christi verbis, quibus Pharisæis interrogantibus, num uxorem liceat dimittere ? ita respondit Matth. 19. *non legistis ? quia qui fecit hominem ab initio, masculum & feminam fecit eos ; & dixit : propter hoc dimittet homo patrem & matrem, & adhærebit uxori suæ, & erunt duo in carne una ; - - quod ergo Deus conjunxit, homo non separet.* Quamvis autem verba ex Gen. 2. isthæc recitata, ab Adamo prolata sint, ea nihilominus Christus attribuit Deo ; quia nimirum Adamus illa *Divini Spiritus instinctu pronuntiavit*, ut declarat Trident. Sess. 24. in Doctr. de Saor. Matr.

- 5 II. Fatendum interim fuisse PP. nonnullos, qui Matrimonii originem, non ab institutione naturæ, verum ex primo Protoparentum peccato repetendam censerent. Opinionis hujus fuerunt Chrysostomus Hom. 18. in Gen. Damascenus L. 2. Fidei Orthodox. C. 30. Eutymius in Ps. 50. quin ipse Augustinus L. 1. de Genesi contra Manich. C. 19. juxta quos inter primos Parentes nostros ante peccatum non fuit ullum Matrimonium ; imo nec deinceps futurum erat, si in statu innocentiae permansissent, multiplicandum proinde genus humanum fuisse, sine via generationis, modo nobis incognito, ac forte eo, quo in Paradiso creatus est primus homo. Sed nimirum opinio hæc sustineri nequit, ut vel rationes ex D. Thoma supra adductæ compro-

probant. Adversantur illi præterea plurium Patrum aliorum sententiæ ; quos inter est Tertullianus L. de anima C. 11. Hieronymus in C. 5. Epistolæ ad Ephes. Innocentius III. L. 2. Ep. 219. & PP. Concilii Moguntini C. 36. item Colonienſis Par. 7. C. 41. Quodque amplius est, ipse Augustinus subinde communem aliorum Patrum sententiam est amplexus, suamque priorem retractavit L. 1. Retract. C. 10. 13. & 19. ac iterum de Civ. Dei L. 14. C. 21. & seqq. Illud nihilominus cum laud. Synodo Colonienſi fateri oportet: Matrimonium, quod ante peccatum fuit in merum naturæ officium, post peccatum fuisse simul in concupiscentiæ remedium ; at *non ulla nova constitutione, sed sola rerum mutatione*, ut observat Maldonatus.

### Honestas Matrimonii.

I. **E**X Libris ab Irenæo, Epiphanio, & Augustino contra hæreses scriptis constat, Matrimonium damnasse Simonianos, Nicolaitas, Tatianos, Manichæos, compluresque alios hæreticos. At enim errori huic oppositum semper docuit Ecclesia ; ex cujus mente Matrimonium est honestum ac licitum. Ac sane nisi istud ita habeat, qui fieri poterat, ut Christus Joan. 2. nuptias in Cana Galilææ sua præsentia, imo & prodigio cohonestaret, ac sanctificaret ? Sed nihil in rem præsentem certius repetitis Apostoli verbis: *Si acceperis uxorem, inquit, non peccasti ; & si nupserit virgo, non peccavit.* - - *Qui Matrimonio jungit virginem suam, bene facit.* 1. Cor. 7. & rursus ad Hebr. 13. *honorabile connubium in omnibus, & thorus immaculatus.* At forte usus saltem conjugii damnandus est ? neque istud ; quando rursus Apostolus in cit. ad Cor. Ep. *Uxori, inquit, vir debitum reddat, similiter autem & uxor viro.* - -  
No-

*Nolite fraudare invicem, nisi forte ex consensu ad tempus, ut vacetis orationi.*

- 7 II. Nec diversa est a verbis Apostoli doctrina Patrum, quorum complures propterea adversum memoratas hæreses scriptis pugnarunt. Equidem damnant illi nonnquam commixtionem carnis; at eam, quæ est extra concubium: aut certe illam, quæ in Matrimonio ipso cum excessu sæpe conjungitur. Usus vero suis circumscriptum terminis adeo non improbant, ut eum in statu etiam innocentiae futurum fuisse existiment. Audiatur præ aliis Augustinus L. 14. de Civ. Dei C. 22. & 23. *Certum est, inquit, Masculum & fæminam ita primitus institutos, ut nunc homines duos diversi sexus videmus. - - Quisquis autem dicit non fuisse coituos, nec generaturos, nisi peccassent, quid dicit, nisi propter numerositatem Sanctorum necessarium fuisse peccatum?*

### Necessitas Matrimonii.

- 8 I. **L**utherus & Calvinus sub ipsum statim suæ (si Superis placet) Reformationis principium summis curis complexi sunt Matrimonii causam. Larva nimirum aliqua inducenda fuit lasciviæ, in quam se licentiose adeo effuderunt, ut oculis subduci non posset. Quid igitur? docent Matrimonium omnibus esse necessarium, & plus quam præceptum; continentiam esse impossibilem; coelibatum esse causam portentosæ libidinis, & nefandorum criminum &c. Vide Calvini LL. Inst. & Lutheri L. de Capt. Bab. ipsam etiam Confess. August. in Articulis de abus. mut. §. 2. cum primis autem celebrem ad Albertum Archiep. Mogunt. Epistolam, in qua hæc legas: *non video, quomodo sine offensa & ira Dei possit manere vir sine conjuge;*

¶ *horribile est, si absque uxore inveniatur in morte.* En reformati Evangelii placita! quæ expendens Erasmus (tametsi & ipse in fide labasceret) non dubitavit L. 19. Epist. suæ 50. de Reformatis hæc inferere: *duo tantum querunt, censum & uxorem; cetera præstat illis Evangelium, hoc est, potestatem vivendi, ut volunt.* Sed jam nobis

II. Errori huic opponenda est Magistra veritatis Ecclesia: quæ licet fateatur, initio mundi extitisse naturale, ac divinum Matrimonii præceptum, imo & nunc respectu totius hominum communis extare; negat nihilominus illo obstringi omnes & singulos, quin etiam Matrimonio Cælibatum anteposit.

Scilicet mundi principio ad propagandum genus humanum necessarium erat Matrimonii medium: imo & nunc ad ejusdem conservationem eadem est necessitas; unde isthuc spectabat, ac etiamnum spectat naturæ instinctus, ipsa hominis ad generationem habilitas, ac denique illa Dei verba Gen. 1. *crescite & multiplicamini*, ut quidam volunt: nam alii existimant, verbis his solam Dei benedictionem designari, cum eadem brutis etiam animalibus dicta sint. Sed enim multiplicato subinde humano genere, uti causa necessitatis hujus, ita necessitas ipsa universalis desit; inde jam in lege veteri nonnullos vixisse cælibes & castos novimus, ut Josue, Eliam, Joannem Baptistam &c. Quid quod Il. 56. & Sap. 3. vel in thoro conjugali laudetur castitas. De legis porro Evangelicæ statu minus dubium esse potest; cum Christus in se ipso & Matre sua exemplum virginis dederit: ac etiam per Apostolum 1. Cor. 7. edixerit: *qui Matrimonio jungit virginem suam, bene facit, & qui non jungit, melius facit.* Quæ ver-

verba simul comprobant, Matrimonium adeo non esse omnibus necessarium, ut ei etiam virginitas sit præferenda. Inde oppositum sentientis Joviniani doctrina jam ante ab Ecclesia damnata est, ac novissime eundem reformatorem errorem Concil. Tridentinum Sess. 24. Can. 10. anathemati subjecit. Addi hic possent magno numero Patres, Chrysostomus, Hieronymus, Augustinus &c. vel Chrysostomi interim L. de Virgin. clarissima verba suffecerint: *mihî ipse persuadeo*, inquit, *Virginitatem conjugio multo esse præstantiorem.*

At sollicitum forte habebit Novatorum aliquem conservatio generis humani: si enim (inquiet) ex præcepto necessarium non sit Matrimonium, quin eidem præferenda etiam Virginitas, evenire potest, ut genus humanum deficiat. Idem plane metus aliquando inceserat Jovinianum, hocque ipso errorem suum tuebatur. Sed enim vanus hic timor est: nec tam illo quæritur generis humani, quam speciosum libidinis patrociniû. Hoc igitur unum a me Novatori responsum esto, quod olim in eadem causa Joviniano dedit Hieronymus: *noli, ajebat, noli metuere, ne omnes Virgines fiant; difficilis est virginitas, & ideo rara, quia difficilis.*

## §. II.

*An Matrimonium in Lege Evangelica sit verum, & proprie tale Sacramentum a Christo institutum?*

**O**Mnes DD. Orthodoxi cum Novatoribus in eo consentiunt, quod Matrimonium pro vinculo permanente sumptum, non sit Sacramentum proprie dictum; quod igitur in contro-  
ver-

versiam vocatur, est actio illa transiens, per quam Matrimonium contrahitur, seu, ipse matrimonialis contractus. Quæritur nimirum: num contractus hic in Lege Evangelica ad dignitatem Sacramenti a Christo sit evectus? De quo priusquam ex sensu Ecclesiæ statuamus, præmittenda est Sacramenti Matrimonii definitio: notandæ item DD. opiniones, & Novatorum error.

### Definitio Sacramenti Matrimonii.

**M**atrimonium pro Sacramento acceptum, est *legitimus ma- 10*  
*rem inter & feminam contractus, quo sibi mutuo tradunt*  
*jus in corpora ad usum conjugalem, & se ad individuum vitæ*  
*societatem obligant, quique ex institutione Christi significat &*  
*causat gratiam sanctificantem.* In hac descriptione designatur institutio ad Sacramentum requisita, materia & forma, Minister, subjectum, & effectus: uti hæc ex dicendis amplius patebunt. Nunc id notasse suffecerit: Sacramentum Matrimonii ita constitui per contractum matrimonialem, qui ad Matrimonium etiam generatim sumptum requiritur, ut ei non aliud addat, quam virtutem ex Christi institutione significandi & causandi gratiam; id quod vel relata definitio satis indicat.

### DD. Orthodoxorum opiniones, & Novatorum error.

**I.** **M**atrimonii Sacramentum, ut nunc definitum est, da- 11  
*ri, constans semper fuit Ecclesiæ doctrina: tametsi*  
*ex ipsis DD. Orthodoxis non defuerint, qui circa illud in*  
*quibusdam variarent.* Ac post Concil. quidem Tridentinum, in quo Sacramenti Matrimonii existentia apertis ver-

bis est definita, de institutionis duntaxat tempore controvertunt. Existimant videlicet aliqui institutum esse a Christo ante mortem, dum nuptias in Cana Galilææ celebratas sua præsentia cohonestavit: vel certe Matth. 19. dum indissolubilitatem Matrimonii stabilivit dicens, *quod Deus conjunxit, homo non separet*. Alii contra institutionem hanc referunt ad tempus, quo Christus a mortuis resurgens in terris egit. Quidam demum nihil de hoc statuunt, imo nec statui posse contendunt. Quæ omnia, ut clarum est, non pugnant contra veritatem Sacramenti. Contra

- 12 II. Doctorum aliqui ante Tridentinum opinionibus suis amplius progressi sunt. Nimirum Magister sent. l. 4. dist. 2. quamvis Matrimonium inter novæ legis Sacramenta recenseat: vim tamen illi causandi gratiam adimere videtur. Durandus vero in eund. l. dist. 26. qu. 2. præterquam quod memoratam virtutem Matrimonio inesse neget: negat etiam esse Sacramentum proprie dictum, quod nimirum cum reliquis univoce conveniat. Quam ipsam sententiam amplexi sunt Guilielmus Peraldus in *summa vitiorum*, Jacobus de Vitriaco L. Occident. Hist. C. 36. & nonnulli Canonistæ in Glossa ad Cap. *Quidquid*, Causa 1. qu. 1. item in Glossa ad Cap. *Honorantur*, Causa 32. qu. 2. Atque hæ opiniones, ut nunc quidem sunt propositæ, ab errore vindicari omnino non possunt; quid ni interim venia censeamus dignos earum olim Patronos, ut qui non ita pertinaciter sensus suis inhæserunt, ut parati non fuerint ea mutare, si oppositum Ecclesia decerneret, quod tum aperte nondum præstiterat: hinc ipse D. Thomas, S. Bonaventura, Scotus, & quidam e veteribus alii, tametsi catholicam de Matrimonii Sacramento doctrinam traderent, eam nihilominus ut probabiliorem tantum proponebant.

III. Jam



III. Jam vero Novatorum longe diversa est ab his conditio. Expunctum illi penitus volunt e Sacramentorum numero Matrimonium: huicque præterea errori pervicaciter adeo insistant, ut ne post claram quidem Ecclesiæ in Tridentino definitionem saniora sapiant. Sed nimirum ipsi eorum Magistri de hoc audiendi sunt. Lutherus l. de Cap. Bab. Cap. de Matr. contendit, in Matrimonio *neque signum a Deo institutum, neque gratiæ promissionem esse*; hinc deinde ait: *Matrimonium non est Sacramentum, sed ab hominibus in Ecclesia inventum.* Calvinus l. 4. Inst. C. 19. *Matrimonium inquit, quod ut a Deo institutum fatentur omnes, ita pro Sacramento datum nemo usque ad Gregorii tempora viderat; - & cui unquam sobrio venisset in mentem; ac rursus ibid. non magis Sacramenti rationem Matrimonio convenire, quam agriculturæ, aut constrinæ, vel sutoriæ arti &c.* Atque huic errori opponenda jam nobis est Ecclesiæ doctrina ex Conc. Tridentini sess. 24. Can. 1. cujus ipsius proinde verbis sit

## ASSERTIO I.

*Matrimonium est vere & proprie unum, ex septem legis Evang. Sacramentis a Christo Dom. institutum, non vero ab hominibus in Ecclesia inventum.*

**A**rgumentum I. Ducitur ex Scriptura, illis videlicet ad 14 Eph. 5. verbis: *Viri diligite uxores vestras, sicut & Christus dilexit Ecclesiam. - Propter hoc relinquet homo patrem & matrem suam, & adhærebit uxori suæ, & erunt duo in carne una; Sacramentum hoc magnum est, ego autem dico in Christo & Ecclesia.* Ex quibus colligitur, nihil Matrimonio deesse eorum, quæ ad rationem Sacramenti requiruntur.

Agit nimirum isthic Apostolus de Matrimonio, quod est contractus signo externo expressus, signum proinde sensibile. Idem vero esse signum rei sacrae satis indicat, cum Matrimonium vocat *Sacramentum magnum in Christo & Ecclesia*, vel (ut in græco textu legitur) *in Christum & Ecclesiam*; quod idem est, ac Matrimonium esse mysterium significans Christi cum Ecclesia unionem, ut docent Chrysost. Hom. 56. in Gen. & Hieronymus in cit. locum Apostoli, alique PP. cum Gregorio Naz. & Augustino. Unde autem Matrimonium habet significationem hanc mysticam, nisi ex institutione Christi? Quamvis enim longe ante adventum illius præfiguraret memoratam unionem futuram, eandem nihilominus jam factam sola Christi voluntate significat: quatenus videlicet is post adventum suum sustulit Sacramenta ipsum promittentia, eaque illis substituit, quæ id exhiberent, quod vetera promittebant, quem in finem etiam Matrimonium, quod antea significabat Christum Ecclesiae uniendum, assumpsit in signum significandæ hujus unionis jam factæ. Inde est, quod Apostolus cit. Cap. V. 23. conjugum Christianorum officia exponens, eadem repetat a dilectione Christi in Ecclesiam, hujusque erga illum subjectione. Quibus ipsis innuit, Matrimonium, prout a Christo ad rationem Sacramenti evectum, non esse, jam amplius, ut erat antea, signum mere vacuum ac inefficax: verum prorsus practicum, & effectivum gratiæ, qua conjugum animi ea indissolubili charitate copulentur, qua Christus diligit Ecclesiam. Hoc certe sensu laud. ad Eph. locum exponit Trident. Sess. 24. in doctr. de Matr. *Gratiam vero, inquit, quæ naturalem illum amorem perficeret, & indissolubilem unitatem confirmaret, conjugesque sanctificaret, ipse Christus, venerabilium Sacramentorum institutor ac perfectior, sua nobis passione promeruit, quod Paulus Ap. innuit dicens: Viri diligite uxores, sicut Christus dilexit*

*dilexit Ecclesiam, & se ipsum tradidit pro ea, mox subiungens: Sacramentum hoc magnum est &c.*

Quæ omnia invicem collata gravissimum, ut vides, ex S. Literis suggerunt momentum pro Sacramenti hujus veritate. Fatendum interim, si pro ea solius scripturæ pugnetur testimonio, nunquam Novatoribus defuturum effugium: cum vel ex DD. Catholicis cum Vasquezio & Estio nonnulli RR. existiment, ex scriptura sola efficaciter demonstrari non posse Matrimonium esse verum Sacramentum. Quo igitur istud contra Sectarios conficiatur certius, adjiciendum est

Argumentum II. ex Traditione. Ac hoc quidem adeo 15 convincens visum est Tridentino, ut illud statim principio Sess. 24. in Doctr. de Sacr. Matr. ante anathematismos scuti instar firmissimi Novatoribus opponeret, ita arguens: *Cum igitur Matrimonium in Lege Evang. veteribus connubiis per Christum gratia præset, merito inter novæ Legis Sacramenta annumerandum SS. PP. nostri, Concilia, & universalis Ecclesiæ traditio semper docuerant.* Istud vero ita se habere, copiosissime demonstrat Bellarminus L. un. de Sacr. Matr. C. 3. & 4. postquam jam antea toto C. 2. pro veritate Sacram. Matrimonii ex S. Literis egregie pugnavit. Nobis pro asserenda Traditione satis fuerit commemorare præcipua Patrum & Conciliorum testimonia, Latinæ item & Græcæ Ecclesiæ consensionem. Ac primum quidem

Ex Patribus eorum suffecerit audire aliquos, qui ante Gregorium M. floruerunt. Tertullian. L. 2. ad uxorem C. ult. unde sufficiam ad enarrandam felicitatem ejus Matrimonii, quod Ecclesia conciliat, & confirmat oblatio, & obsignat benedictio? Ambrosius L. 1. de Abraham C. 7. de eo, qui alteri nuptam ducit, qui sic egerit, inquit, peccat in Deum, cujus legem violat, gratiam solvit; & ideo, quia in Deum

*peccat, Sacramenti celestis amittit consortium.* Augustinus L. de bono Conjug., *bonum nuptiarum per omnes gentes - - causa generandi est, - - quod autem ad populum Dei pertinet, etiam in sanctitate Sacramenti.* & L. de fide & oper. C. 7. *in Ecclesia nuptiarum non solum vinculum, sed etiam Sacramentum commendatur.* Plura ex eodem loca vide apud laud. Bellarm. Demum Cyrillus Alex. L. 2. in Joan. C. 22. docet, *Christum sanctificasse conjugium, & gratiam nuptiis præparasse.* En Patres, qui Gregorium M. antecesserunt! quorumque sententia Matrimonium ab Ecclesia conciliatur, benedicitur, rationem Sacramenti habet, simulque adnexam gratiam ex Christi præparatione, seu institutione. Qua fronte igitur Calvinus dicere ausus? *Matrimonium pro Sacramento datum nemo usque ad Gregorii tempora viderat.*

Ex Conciliis huc faciunt ea, quæ pro fronte hujus L. laudavimus. Nimirum Lateranense IV. meminit solemnitatis, quæ ex ritu Ecclesiæ in Matrimoniis celebrandis est adhibenda: de qua ipsa jam antea Conc. Carthaginense IV. An. 398. egerat, dum Cap. 13. statueret *sponsum & sponsam benedicendos esse a Sacerdote.* Conc. Constantiense Sacramentis accenset Matrimonium: quod ipsum deinde clarius præstitit Florentinum, ac Tridentinum.

Consensio demum Græcæ & Latinæ Ecclesiæ in hanc doctrinam perpetua invictissimum est Traditionis Apostolicæ argumentum. Hanc autem consensionem vel illud comprobatur, quod Græci nunquam exprobraverint Latinis, admitteri ab eis Matrimonii Sacramentum: nec Latini unquam Græcis objecerint, quod male sentirent de eodem Sacramento. Inspiciantur præterea utriusque Ecclesiæ vetustissimi LL. Rituales, ac in omnibus procul dubio reperietur  
nomen

nomen Sacramenti Matrimonii, ritusque illud benedicendi. Ac si hæc Novatoribus non sufficiant, revocent in memoriam Græcorum confessionem in Synodis duabus Constantinopolitanis Sec. XVI. & XVII. factam, alteram contra Lutheranos appellantes, contra Cyrillum Lascar apostatam Calvinianum alteram: in utraque apertis verbis septem Sacramenta, ac inter hæc Matrimonii Sacramentum profitentur. Posterioris Synodi contra Cyrillum verba ex Art. 15. recitare juverit: *Negat Ecclesiæ Sacramenta quinque, Sacerdotium, sacram Unctionem, sacrum oleum, Confessionem cum pœnitentia, & honorabiles nuptias, quæ omnia ut Sacramenta, & divinam gratiam conferentia, antiqua nobis Traditio reliquit.*

Dicant jam vero Novatores, quando & quis doctrinam hanc primus in Ecclesiam utramque invexerit? Certe ex Patribus supra laudatis constat, perperam provocari ad Gregorium Magnum; præsertim cum hic in suo Sacramentario non aliud referat, quam ritum benedicendi Nuptias, huncque ipsum non ut novitium, & a se inductum, sed jam antea usitatum, ut certum est ex Tertulliano, Clemente Alex. & aliis Patribus antiquioribus, qui benedictionis hujus meminerunt. Cum igitur hæc de Matrimonii Sacramento doctrina utrique Ecclesiæ sit communis, eademque antiquissima, nec initium ejus ab ullo Patre, Pontifice, aut Concilio repeti possit, quid ni eam juxta Tertulliani & Augustini regulam necesse est referre ad Traditionem Apostolicam, atque adeo ad Christum ipsum? Unde cum Tertull. L. de præscript. C. 28. lubet concludere: *ecquid verisimile est, ut tot ac tanta in unam fidem erraverint? variasse debuerat error doctrinæ Ecclesiarum. Caterum quod apud multos unum invenitur, non est erratum, sed traditum. Audeat ergo aliquis dicere illos errasse, qui tradiderunt.*

ASSER-

## ASSERTIO II.

*Institutio hujus Sacramenti, spectatis Patrum sensis, probabiliter facta est tum, dum Christus in Cana Galilææ interfuit nuptiis Joan. 2.*

16 **A**B ipso immediate Christo Matrimonium ad dignitatem Sacramenti evectum esse, supra N. 14. sub medium docuimus; quanquam istud vel inde satis constet, quod omnium Sacramentorum auctor sit ipse Christus, ut jam alias sæpe dictum, imo etiam L. I. de Sacr. in Gen. §. III. ex proposito comprobatum. Quod jam vero ad institutionis hujus tempus attinet, fateor ex S. Literis nihil statui posse. Si porro Patrum attendamus sensa, existimasse videntur id, quod in Assertionem contendimus. Nimirum eorum aliqui docent, Christum in Cana Galilææ *benedixisse nuptiis*: ita PP. Ephesini in Concilio, & Epiphanius Hær. 67. Alii addunt, eo tempore Christi benedictione etiam *sanctificatum fuisse conjugium, eidem præparatam gratiam, castitatem conjugalem firmatam*: ita Cyrillus Alexandr. in Ep. ad Nestor. & L. 2. in Joan. C. 22. Augustinus Tract. 9. in Joan. Maximus Hom. I. de Epiph. Domini. Quibus verbis admodum probabile est Patres intellexisse institutionem eam, qua Christus Matrimonio prærogativam Sacramenti indiderit: cum nullo alio magis proprio sensu dici possit, Christum ita benedixisse nuptiis, ut sanctificaret conjugium, gratiam ei præpararet, hacque ipsa castitatem conjugalem firmaret.

Refelluntur Novatorum argutiæ.

**B**ellarminus supra laud. L. C. 5. copiose recenset Lutheri, Calvini, & Kemnitii argumenta, eademque ibidem

dem minutim diluit. Nos eorum summa referemus capita, ex quibus de cæteris pronum erit judicare. Ita autem Novatores.

Arguunt I. Verum Evangelicæ Legis Sacramentum non pugnat cum aliis: cum interim Sacramento Ordinis adversetur Matrimonium. Idem licite contrahitur cum pacto de certa pecunia; istud vero absque simoniæ labe fieri non posset, si Matrimonium foret Sacramentum.

II. Sacramenti prærogativa Matrimonio attribuitur, propterea, quod sit signum rei sacræ, unionis videlicet Christi cum Ecclesia; at unionem hanc perinde significabat Matrimonium in statu naturæ & Legis, quin tamen dici queat fuisse verum Sacramentum. Quid quod Sacramenta Evangelica universim id operentur, quod significant: certe autem Matrimonium non operatur dictam unionem, tamen eam significet.

Resp. ad I. Matrimonium non pugnare absolute cum Sacramento Ordinis: nam conjugatus cum consensu uxoris initiari potest etiam Sacerdotio, manente vinculo conjugali. Præterea, quod conjugati communiter non admittantur ad Ordines, nec ordinatis concedatur conjugium, hocque sensu detur aliqua oppositio, id ex natura Matrimonii non provenit; verum ex jure duntaxat Ecclesiastico, istud prohibente propter majorem status sacri decentiam, ac ad certius removenda impedimenta, quæ ex conjugio consequuntur, quæque Ecclesiæ Ministros a divinis officiis haud parum avocare possent. Quod autem de simonia additur, nihil momenti habere satis constat, cum pecunia illa non exigatur pro Sacramento, sed pro oneribus Matrimonii sustinendis.

*R. P. Muzka Tom. II. de Sac.*

M m m m

Resp.

Resp. ad II. Diversitas inter vetus & Evangelicum Matrimonium est duplex; illud quippe figurabat unionem primum futuram; hoc vero jam factam significat, ac præterea vim habet in conjugatis efficiendi gratiam sanctificantem, quo cumprimis nomine Sacramentis Evangelicis accensetur. Hac igitur virtute cum destitutum fuerit in Legge veteri Matrimonium, verum ac proprie tale, ut jam nunc est, Sacramentum esse non potuit; imo ne legale quidem fuisse existimo, cum nullam legalem sanctitatem contulerit. Sensu interim aliquo latiore Sacramentum dici potest propterea, quod fuerit signum rei sacræ: atque hoc sensu uno intelligendus est Innocentius III. dum infidelium matrimonia vocat Sacramentum.

Atque ex his expeditum habes responsum ad id, quo ab effectiva Sacramenti virtute urgetur objectio. Nimirum in Sacramento Matrimonii duplex est significatio, unionis videlicet memoratæ, sacramentalis item gratiæ; illam significat tantum speculative: hanc simul practice, ita ut eam simul *ex opere operato* efficiat. Istud vero ad rationem Sacramenti satis esse docemur exemplo Baptismi, qui, tametsi Christi sepulturam & resurrectionem repræsentet, non tamen eam operatur, sed solam gratiam.

- 18 Instant I. Quamvis Matrimonio concedatur virtus *ex opere operato* effectiva gratiæ, nequit attamen esse Legis novæ Sacramentum, nisi id, quod in eo signi sensibilis rationem habet, a Christo fuerit primum institutum; at certe mutui consensus sensibilibiter expressus, in quo natura Matrimonii constituitur, non est id genus signum: nam jam ante Christum ritu hujusmodi matrimonia celebrabantur, ergo &c.

Resp.



Resp. Dist. Maj. nisi hoc signum fuerit a Christo primum institutum in ratione signi sacramentalis, hoc est, practice *ex opere operato* causantis gratiam C. in ratione signi generatim sumpti N. Eadem distinctione explicanda est subjecta propositio: tamen enim jam antea hoc signum extiterit, idem nihilominus a Christo primum assumi potuit, ac revera assumptum est pro signo sacramentali; & vero Legis novæ Sacramento. Habes in hanc rem exemplum a Poenitentia, quam ipsam, jam prius a Deo præceptam, deinde Christus erexit ad rationem Sacramenti. Neque hinc inferas: igitur & Martyrium erit in Lege Evang. proprietate Sacramentum; in tantum huic ex Dei privilegio longe ante adventum Christi inerat vis *ex opere operato* causandi gratiam; quamvis autem illud in ratione hujus signi practici etiam Christus confirmaverit, non tamen esse voluit instrumentum communicandæ gratiæ ordinarium, quod proprium est Sacramentis. Vide adhuc in hanc rem dicta L. II. de Bapt. Dissert. II. §. III. N. 86. in Resp. ad II. V. *Neque tamen* &c.

Instant II. Etiamnum controvertunt Theologi de materia, forma, & Ministro Sacramenti Matrimonii: tempore item, quo a Christo institutum fuerit; imo a quibusdam Sec. XII. XIII. & XIV. negata etiam fuit veritas hujus Sacramenti, ut supra N. 12. retulimus. Qui igitur doctrina hæc dici possit universæ Ecclesiæ consensu confirmata?

Resp. Controversiæ hæc, ac etiam paucorum quorundam veterum error officere nequeunt, quando pro Sacramenti Matrimonii quo ad substantiam veritate luculenta aliunde habemus argumenta, quæ ipsa Traditionem, & universalis Ecclesiæ in hanc doctrinam consensum invicte testantur.

stantur. Sed nimirum de singulis, quæ obijciuntur, pauca speciatim dicenda sunt.

Ac prima quidem de materia, forma, & Ministro controversia cur officiat? Differunt, fateor, in his assignandis Theologi; omnes attamen aliquid statuunt, quod materiæ & formæ rationem habeat: unaque pro Ministro aliquam designant personam, sacerdotem videlicet, vel contrahentes: omnes item consentiunt, ratum fore, procul dubio Matrimonii Sacramentum, si contractus matrimonialis coram testibus & Sacerdote assistente ac benedicente celebretur; omnes igitur profitentur Matrimonium esse Sacramentum, quin & in iis, quæ ad ejus substantiam generatim pertinent, omnes conveniunt.

Idem est judicium de controversia altera. Vel ideo enim, quod de solo institutionis tempore DD. controvertant, institutionem ipsam a Christo factam agnoscunt; certe autem nemo illorum negat, tempus hoc esse disjunctive aliquod ex iis, de quibus speciatim controvertunt. Quæ porro nostra de hoc sit opinio, supra in Assert. II. exposuimus. Neque adversus eam facit, quod Matrimonii Sacramentum instituendum fuerit post Baptismum: nam juxta nos Christus ante mortem suam Baptismum instituit; probabilis præterea est eorum sententia, qui id factum ajunt, dum in Jordane baptizaretur: hic vero Baptismus Nuptias in Cana Galilææ celebratas antecessit, ut constat ex Joan. C. I. & 2. Cæterum absque ullo inconvenienti poterat Christus Matrimonii Sacramentum etiam ante Baptismum instituere: non minus enim libera illi fuit Sacramentorum quoad tempus & ordinem, ac quoad substantiam institutio.

Quod

Quod demum ad DD. illos veteres attinet, qui negasse videntur Matrimonium esse Sacramentum, illud dixisse suffecerit: Catholici dogmatis veritatem non debere aestimari ex quorundam privatorum iudicio, sed ex communi Conciliorum ac Patrum Traditione. Ita novimus Ecclesiam Traditione nixam definivisse, Baptismum ab hæreticis collatum esse validum, licet aliquando nonnulli Episcopi cum S. Cypriano oppositum existimarent. Hi ipsi interim Doctores, qui nobis a Novatoribus objiciuntur, non adimebant penitus rationem Sacramenti Matrimonio: verum in iis duntaxat errarunt, quæ tum circa illud nondum erant aperte definita, ut patebit expendenti eorum opiniones N. 12. relatas. Certe autem jam Sec. XII. quo Magister Sent. floruit, Matrimonium esse Sacramentum negantibus anathema dictum est a Lucio III. An. 1181. creato S. P. in Cap. *Ad abolendam*, Tit. de Hæret. ubi, *universos*, inquit, *qui de Sacramento Corp. & Sangv. D. N. J. Christi, vel de Baptismate, seu de peccatorum Confessione, Matrimonio, vel reliquis Ecclesiasticis Sacramentis aliter sentire aut docere non metuunt, quam S. Rom. Ecclesia prædicat & observat, - - - vinculo perpetui anathematis innodamus.*

### §. III.

*An quodlibet Matrimonium in statu legis Evangelicæ contractum sit verum Sacramentum?*

Quamvis ex præced. §. generatim constat, Matrimonium in hoc legis Evangelicæ statu esse a Christo ad rationem Sacramenti evectum, ultro nihilominus in particulari quæritur: num quodlibet, in quovis casu, & a quocunque contractum sit verum Sacramentum? sunt autem de hoc quædam

certa, controversa alia; utraque nunc referemus, nostram simul de controversis opinionem adjecturi.

### Sententiæ certæ.

20 **C**ertum est I. Matrimonium ab infidelibus hoc legis statu legitimæ initum valere quidem ac firmum esse in ratione Matrimonii: nec tamen esse Sacramentum. Ratio 1<sup>mi</sup>. est: quia contractus conjugalis jure naturali & divino jam inde a Principio valuit; nullum autem est fundamentum dicendi, in lege Evang. reddi irritum eo ipso, quod ab infidelibus celebretur. Imo validum esse constat ex Apostolo 1 Cor. 7. v. 12. jubente, ne infidelis ad fidem conversus dimittat uxorem, cui se in infidelitate conjunxerat, si ea cum ipso pacifice habitare consentiat; hinc & Innocentius III. Cap. *Gaudemus*, de divort. ait, *per Baptismum non solvuntur conjugia*: uterque igitur supposuit validum esse Matrimonium in infidelitate contractum. Ratio 2<sup>dæ</sup>. partis est: quia Christus non nisi baptizatorum matrimonia ad rationem Sacramenti evexit, cum aliunde ante Baptismum nemo sit capax Sacramentorum.

21 **C**ertum est II. Matrimonium esse Sacramentum, si a Catholicis præsentibus, ac implicite saltem illud intendentibus, nec ullo impedimento dirimente irretitis, mutuo consensu contrahatur coram duobus testibus & Parocho, hicque illud ex ritu Ecclesiæ benedicat. Quid enim hoc casu desideres ad rationem Sacramenti? Certe ne inter controversas quidem opiniones, quæ in præsentī argumento complures occurrunt, ulla est, quæ amplius requirat seu ex parte materiæ & formæ, seu ex parte Ministri & subiecti. Quod autem dictum est de Catholicis, idem censerī debet universim de baptizatis omnibus: cum enim Christus baptizatorum Matrimoniis præroga-

rogativam Sacramenti contulerit, nulla est ratio, cur non perinde contractus matrimonialis hæreticorum, vel Catholici cum hæretica parte sit Sacramentum, modo in requisitis cæteris non deficiat.

### Sententiæ controversæ.

**C**ontrovertitur I. num Matrimonium, a baptizatis sine intentione Sacramenti contractum, valere possit in ratione contractus civilis, quin idem valeat in ratione Sacramenti? Negant cum Præposito Bellarminus, Sanchez, Coninck, &c. ex adverso affirmant Vasquez, Pontius, Hurtadus, Gonet &c. Mihi cum postremis sentiendum videtur: cur enim Sacramenta reliqua possint esse invalida defectu intentionis, non item etiam Matrimonii Sacramentum? quo quidem casu nihil Matrimonio deerit, quo minus habeat valorem contractus mere civilis. Certe baptizati Matrimonium contrahentes non tantum possunt carere intentione Sacramenti, sed & prorsus contrariam habere: id quod facile evenit apud hæreticos Matrimonium e Sacramentorum numero expungentes; quis autem credat, aut quo fundamento dici potest, Christum hoc Sacramentum ita instituisse, ut illud ratum esse voluerit etiam nolente Ministro? Profecto, tametsi Christus ablutionem aqua factam cum verbis *ego te baptizo in nomine &c.* evexerit ad rationem Sacramenti, si tamen requisita desit intentio, fieri potest id genus ablutio, quin evadat Sacramentum; perinde igitur &c.

Controvertitur II. An Matrimonium inter absentes Christianos per Procuratorem ritu legitimo celebratum sit Sacramentum? Negat Durandus, Cajetanus, idemque sentire videtur Estius in 4. dist. 29. §. 5. affirmant vero Dominicus Soto, Platelius, Simonet, & plures alii, quorum sententia multo probabilior est priore. Nimirum Christus baptizato-  
rum

rum Matrimonium evexit ad rationem Sacramenti, nullo ad id præterea speciali ritu instituto; sicut igitur absentes per Procuratorem valide contrahunt Matrimonium, ita hoc ipsum etiam in ratione Sacramenti valide perficiunt. Hoc casu porro sicut actio contrahendi, ita & actio Sacramentalis ab ipso contrahente ponitur mediate, mediante scilicet Procuratore, seu instrumento: ac rursus sicut contractus hujusmodi solos contrahentes obligat, sic pariter ab his solis recipitur Matrimonii Sacramentum. Neque pugnat contra hanc opinionem: contrahentes sæpe dormire, aut saltem de Sacramento non cogitare eo tempore, quo Procurator contractum celebrat; cum enim status hic contrahentium non officiat valori contractus, non etiam Sacramento. Quorum omnium ratio repetitur a voluntate Christi, fidelium Matrimonia ad rationem Sacramenti ita evehenti, ut nullum præterea specialem ritum requisiverit: potest igitur omni eo ritu externo ministrari & suscipi hoc Sacramentum, quo potest fieri contractus Matrimonii validus.

- 24 Controvertitur III. An Matrimonium fidelis cum infideli per dispensationem contractum sit Sacramentum ex parte fidelis? Consulto additur *per dispensationem*: cultus quippe disparitas a XII. ut minimum Seculo est unum ex impedimenti Matrimonium dirimentibus; unde non nisi accedente dispensatione fit legitimum id genus Matrimonium. Posse autem per dispensationem reddi legitimum, illud suadet: quod quamvis Ecclesia generatim semper prohibuerit hujusmodi Matrimonia propter adjunctum subversionis periculum; hoc nihilominus cessante toleravit illa, ac pro legitimis habuit, idque saltem primis quinque seculis, quibus constat sanctas quasdam mulieres absque ulla censura Ecclesiastica gentilibus nupsisse. Ita Eunice Timothei mater Christiana, ut colligitur ex 2. Timoth. I. v. 5. nupsit gen-

gentili Aët. 16. V. 2. item Monica Augustini mater teste ipso August. L. 9. Confess. C. 9. idem est de S. Clotilde nupta Clodovæo Regi ethnico apud Gregorium Turon. L. 2. Hist. C. 28. & pluribus aliis a Ven. Beda commemoratis in Hist. Angl. L. 1. C. 25. & L. 2. C. 9. Imo (quod refert Platelius C. infra laudando, §. 7. N. 1169.) Paulus V. An. 1616. facultatem in hoc impedimento dispensandi concessit ad decennium Episcopo Funainensi in Japonia, & Superioribus Soc. J. in Regno Chinenfi.

Jam vero de questione sic proposita cum Vasquez pars Theologorum maxima censet respondendum negative; nonnulli interim cum Catharino & Dominico Soto opinantur, Matrimonium hujusmodi ex parte fidelis fore Sacramentum. Meam de hoc si requiras sententiam: difficile esse fateor aliquid statuere. Id igitur solum cum Tournelyo habe: nulla satis firma ratione demonstrari, id genus Matrimonium ex parte fidelis non esse Sacramentum. Nimirum (ut observat Platelius in Synop. Theol. de Sacr. C. 7. §. 4. N. 1086.) *dici posset, quod Christus unum & indivisibilem Matrimonii contractum elevaverit ad esse duo partialia Sacramenta, quorum unum possit subsistere sine altero; sicut alter conjugum potest recipere gratiam hujus Sacramenti, altero illam non recipiente defectu dispositionis.*

Controvertitur IV. num Matrimonium inter infideles <sup>25</sup> contractum fiat Sacramentum accedente Baptismo? Probabile id videtur multis cum Bellarmino, Sanchezio, Laymon, Platelio &c. negandum contra alii existimant cum Vasquezio, Pontio, Simonnet. &c. quibus & ipse accedendum puto. Etenim Matrimonium hoc casu evaderet Sacramentum vel per ipsum Baptismum: vel per consensus ratificationem post Baptismum factam. At certe non per Baptismum:

R. P. Muszka Tom. II. de Sacr.

Nnnn

quo

quo enim fundamento virtutem hanc illi attribuas? quando ex institutione Christi istud colligi prorsus non potest. Non etiam per consensum renovatum: nam Matrimonii materia & forma, ipsumque Sacramentum consistit in actione contrahentium, seu in contractu, qui actu initur; atqui inter hos infideles post Baptismum non initur contractus, sed antea initus supponitur, ergo &c. Nec obest, per Baptismum ita hoc Matrimonium reddi firmum, ut dissolvi amplius non possit: hæc quippe firmitas inde solum provenit, quod jam cesset ratio, propter quam antea dissolvi poterat. Nimirum Matrimonium infidelium solvi potest, si uno conjugum ad fidem converso, alter infidelis non velit pacifice cohabitare absque Creatoris injuria: quæ ratio, ut clarum est, cessat accedente utriusque Baptismo.

## DISSERTATIO II.

### DE MATERIA, FORMA, MINISTRO, ET SUBJECTO SACRAM. MATRIMONII.

#### §. I.

#### *Quæ sit Sacramenti Matrimonii materia & forma?*

**C**ontroversia hæc prorsus connexa est cum altera, quæ de Ministro institui solet; inde (jam nunc prævie notatis simul de Sacramenti hujus Ministro, simul de materia & forma Doctorum opinionibus) paucis duntaxat ad præsens quæsitum respondebimus: plenior dein hujus ipsius Asserti notitia petenda erit ex sequ. §. quo speciatim de Ministro differemus.



Opiniones de Ministro, materia item, & forma  
hujus Sacramenti.

I. **C**ommuniter Theologi existimant, ipsos contrahentes<sup>26</sup> esse Ministros Sacramenti Matrimonii. Pro hac sententia Cl. Simonnet. Traët. 18. de Matrim. disp. 2. Art. un. §. 1. e veteribus laudat Hugonem a S. Victore, Magistrum Sent. D. Thomam, S. Bonaventuram, Scotum, & Durandum; eandem cum Dominico Soto, Suarezio, Vasquezio & Belarmino deinceps amplexi sunt plurimi, ac hodie etiam amplectuntur. Verum inter hos ipsos non convenit de materia & forma. Quidam eorum cum Platelio putant, corpora contrahentium esse materiam, signa autem consensum exprimentia formam. Alii tam materiam quam formam reponunt in contrahentium verbis, consensum exprimentibus: ita videlicet, ut sub ratione traditionis sint materia, forma vero sub ratione acceptionis; atque hæc opinio tribuitur Dominico Soto & Suarezio. Plurimis attamen cum Navarro videtur, materiam haberi in consensu contrahentium interno, formam autem in verbis vel signis aliis consensum exprimentibus.

II. Altera de Ministro hujus Sacramenti sententia, quam<sup>27</sup> Domin. Soto *singularem* vocat, est eorum, qui docent Ministrum Matrimonii, quatenus est Sacramentum, esse Sacerdotem. Atque hi omnes in eo consentiunt, quod materia hujus Sacramenti sit consensus contrahentium verbis vel alio signo expressus: forma vero Sacerdotis benedictio, seu verba illa, quibus Sacerdos conjuges in Matrimonium conjungit. Quis jam vero hujus opinionis sit auctor, non satis constat. Plurimi eam cum Vasquezio & Tournelyo attribuunt Guillelmo Parisiensi, qui Sec. XIII. floruit; aliquibus interim videtur, cum de Matr. C. 9. benedictioni sacerdotali non asse-

ruisse Sacramenti efficientiam : verum id tantum ad Sacramenti hujus virtutem requisivisse , *ut nuptialis benedictio non contemnatur.* Ut ut interim sit istud , post Card. Cajetanum Tom. 1. Opusc. Traët. 12. qu. 1. & præcipue Melchiorum Canum de locis Theolog. l. 8. C. 5. sententiam hanc tuiti sunt Toletus , Maldonatus , Estius , Sylvius : ex recentioribus vero Du-Hamel , Juenin , Vanroy , Tournely &c.

- 29 III. Hæc jam porro opinionum varietas fatis indicat , nihildum de præsentī controversia Ecclesiam decretorio oraculo pronuntiasse : præsertim cum teste Pallavicino l. 23. Hist. Trid. C. 9. ipsum Concilium Trident. *nunquam declaraverit clandestina Matrimonia fuisse Sacramenta.* Salva igitur fide & Sacramenti veritate in utramvis partem disceptatur a Theologis , estque integrum cuilibet de hoc argumento sentire , ut libet.

Ac mihi quidem , fateor , aliquando visa sunt posterioris sententiæ momenta tanti ponderis , ut me in eam inclinarent ; sed enim , cum rem ex proposito & attentius utrinque expendo , nihil in ea reperiō , quo persuaderi possim ad deserendam opinionem communiter receptam : quin hanc denique existimo Concilii Florentini & Tridentini sensui magis conformem , ac Ritualibus invicem conciliandis prorsus opportunam. Secundum eam igitur de materia & forma sit ,

### ASSERTIO.

*Verissimilius est , materiam Sacramenti Matrimonii esse legitimum contrahentium consensum internum : formam vero , verba vel alia signa hunc consensum exprimentia.*

- 29 Probationem hujus Asserti uno dumtaxat nunc complectemur argumento ; eo ipso videlicet , quod suggerit Concil. Florenti-

rentinum in Decr. pro Arm. ubi §. de Matr. ait: *Septimum est Sacramentum Matrimonii, -- causa efficiens Matrimonii regulariter est mutuus consensus per verba de presenti expressus.* Hinc interim antequam argumentum instruam, hæc quatuor prævie notari velim. Nimirum 1<sup>mo</sup>, isthic agitur de Matrimonio, ut est *Sacramentum*; id enim aperte indicant verba statim principio §. posita: tum etiam propositum Concilii, quod hoc §. intendit Armenos docere nominatim de Matrimonii Sacramento, sicut idem jam prioribus §§. præstiterat de aliis Sacramentis. 2<sup>do</sup>, dum Concilium hoc loco *causam efficientem* nominat, non sumit eam sensu stricto; hoc enim sensu causa efficiens Matrimonii est ipse Minister, ut nemo negat. Reliquum igitur est, ut dicamus: causam efficientem hic accipi in significatione minus propria & latiore, hoc est, pro *causa formaliter efficiente*, seu constitutiva; hoc certe sensu etiam de gratia dicitur, quod hominem sanctum & justum efficiat. 3<sup>io</sup>, cum Concilium pro causa Sacram. Matrimonii constituyente non aliud assignet, quam consensum memoratum, recte infertur, ad constituendum illud quoad substantiam nihil requiri amplius ex mente Concilii. 4<sup>to</sup>, adjectum *regulariter*, satis indicat censuisse Concilium, non officere valori hujus Sacramenti, si consensus diverso a verbis signo aliquo exprimatur: tametsi istud regulariter fieri debeat verbis.

Hac jam vero quadruplici animadversione præmissa, ita 30 pro Assertionem arguo: ex sensu laud. Concilii totum id, quod Matrimonii Sacramentum quoad substantiam constituit, est mutuus consensus per verba vel alio signo expressus; atqui id, quod Matrimonii Sacramentum quoad substantiam constituit, est ejus materia & forma; ergo ex sensu Concilii materia & forma hujus Sacramenti est consensus memoratus per verba vel aliud signum expressus. Nominatim

Nnnn 3

autem

autem internum consensum esse materiam, verba autem (idem est de signo alio) esse formam inde patet: quod consensus internus ad rationem signi sensibilis & sacramentalis determinetur per verba eundem significantia; id vero, quod sic determinatur est materia, quod determinat est forma: præsertim cum idem Conc. in eod. Decr. generatim dicat, Sacramenta perfici verbis tanquam forma.

Atque hæc pro Assertionem tuenda nunc retulisse suffecerit; momenta reliqua petenda sunt ex sequ. §. unde etiam ad Objecta primum erit respondere. Id vero isthic nobis est adhuc reliquum, ut pro Corollario exponamus ea, quæ conferunt ad plenioram notitiam matrimonialis consensus, in quo hujus Sacramenti materiam & formam reponimus.

### Corollarium I.

de Requisitis ad consensum, qui sit contractus  
Matrimonii legitimus.

**C**UM Christus contractum Matrimonii, nulla in eo mutatione facta, ad rationem Sacramenti evexerit: idem plane consensus, qui ad contractum Matrimonii legitimum sufficit, sufficit pariter ad constituendum hujus Sacramenti materiam & formam. Jam vero ad hunc consensum

- 31      Requiritur I. ut sit mutuus, idemque verus. *Mutuus* quidem: cum enim natura contractus cujuslibet mutuam exigit contrahentium consensionem, potiori id jure necessarium est in Matrimonii contractu: ut qui est animorum & corporum conjunctio, individua vitæ societas, vinculum-  
que

que perpetuum, quod solvi non possit. Hinc Doctor Ang. in 4. dist. 27. qu. 1. Ar. 2. *si dicit, inquit, consensus maritalis ex parte unius, ex neutra parte est Matrimonium; quia Matrimonium consistit in mutua conjunctione.* Idem porro consensus debet esse verus, hoc est, sincerus & non fictus: quia Matrimonii contractus est mutua translatio juris in corpora, est vinculum perpetui amoris, & animorum conjunctio; quæ profecto consistere nequeunt absque vero & sincero consensu. Unde S. Bonaventura in 4. dist. 27. qu. 2. aperte docet: *si sit consensus exterior sine interiori, non est Matrimonium secundum veritatem, nec secundum divinum judicium, nec secundum conscientiae forum.* Virumque denum istud colligitur ex pluribus Canonibus, præsertim ex Cap. Cum apud Sedem. Cap. Tuæ paternitatis. Cap. Tuas. De Sponsa duorum. Item Cap. Cum locum. de Sponsalibus. Quomodo autem consensus veritatem vitiet metus aut error, videndum est apud Canonistas iis locis, quibus de utroque hoc impedimento dirimente pertractant.

Requiritur II. ut consensus interior signo aliquo exteriori sit expressus. Nimirum suus Matrimonio valor constare nequit, nisi consensus contrahentium ita sit mutuus, ut traditio corporis ab uno facta acceptetur ab altero conjuge, & vicissim: acceptari autem nequit, nisi cognoscatur per signum exterius. Signum porro hoc ex usu ordinario consistit in verbis; interim *verborum loco* (ut declarat Catech. Rom. Par. 2. de Matr.) *tum nutus & signa, quæ intimum consensum aperte indicent, satis ad Matrimonium esse posunt: tum ipsa etiam taciturnitas, cum puella propter verecundiam non respondet, sed pro ea Parentes loquuntur.* Id ipsum insinuat Conc. Florent. in Decr. pro Ann. cum ait, Matrimonii causam efficientem esse *regulariter mutuum consensum per verba expressum.*

Re-

- 33 Requiritur III. ut consensus sit publicus, hoc est, ut contractus ex præscripto Tridentini celebretur coram Parocho & testibus; ac demum generatim, ne personæ contrahentes ullo dirimente impedimento sint irretitæ; secus enim Matrimonii contractus erit invalidus, proinde nec Sacramenti rationem habebit. De his recurret adhuc sermo infra §. III.

## Corollarium II.

De conditionibus vel pactis, quæ consensui adjecta Matrimonio non officiant: aut ex adverso illud reddunt irritum.

**D**E his certa sunt alia, alia controversa; hinc seorsim de utrisque dicendum erit. Et quidem

- 34 I. Certum est, ex communiore saltem Doctorum sententia, conditionem de præsentis vel præteriti consensui appositam, modo ea subsistat, valori Matrimonii non officere; id genus quippe consensus re ipsa est absolutus: uti interim Matrimonio hoc casu conjuges non possunt, dum eis innotescat conditionem esse impletam. Contra, si adjecta conditio sit de futuro, eademque simul honesta, aut saltem indifferens, valor Matrimonii suspenditur usque ad conditionis eventum; hinc illum contrahentes tenentur expectare. An autem, dein conditione (ut vulgo dicitur) purificata, Matrimonium continuo reddatur absolute validum sine novo consensu? disceptant etiamnum Theologi: quorum tamen pars potior affirmandum censet, modo prior consensus interea non fuerit retractatus. Id nimirum etiam in contractibus aliis sub huiusmodi conditione initis evenire novimus; cur non igitur perinde sentiendum sit de contractu conjugali? Propter opinionis interim adversæ probabilitatem in pra-

xi curandum est, ut hoc modo contrahentes, impleta conditione, consensum renouent, & quidem coram Parocho & testibus, ubi Tridentinum est receptum.

II. Certum item est, per adjectam ejusmodi conditionem, quæ pugnat cum natura aut fine Matrimonii, contractum matrimonialem reddi irritum: id quod & ratio ipsa suadet, & ab aliorum contractuum exemplo confirmatur. Inde Cap. *Si conditiones*, de conditionibus appositis, Gregorius IX. S. P. declarat, nullum esse Matrimonium sub his conditionibus contractum: *si generationem prolis evites; aut donec inveniam aliam honore vel facultatibus ditio- 35 rem; aut si pro quaestu adulterandum te tradas*: quorum primum repugnat fini Matrimonii, alterum ejus indissolubilitati, tertium fidei Matrimonii & sanctitati Sacramenti. Ex adverso, secundum fori externi præsumptionem non est irritum Matrimonium, si contrahatur sub conditione turpi vel impossibili, modo ea non repugnet substantiæ Matrimonii, e. g. contraho tecum, si commiseris furtum, homicidium &c. si solem stiteris, vel coelo detraxeris &c. Habetur istud ex supra laud. Cap. *Si conditiones*, ubi post memoratam declarationem addit Pontifex: *licet aliæ conditiones appositæ in Matrimonio, si turpes aut impossibiles fuerint, debeant propter ejus favorem pro non adjectis haberi*. Consulto autem est additum: *secundum præsumptionem fori externi*; in hoc enim juxta cit. Cap. supponitur, conditiones hujusmodi non esse adjectas serio. Unde, si quis consensum tali conditioni ita alliget, ut revera contrahere non velit nisi expleta illa, in foro conscientiæ irritum est Matrimonium.

III. Quod jam vero hic potissimum controvertitur, primum est: num valeat Matrimonium sub conditione minus proprie tali, hoc est, sub modo servandi perpetuam virgin-

tatem contractum, præsertim si modus hic deducatur in pactum? Negant multi cum Sanchez & Layman : plures attamen affirmant cum Paludano, Vasquez. &c.

Ac omnino affirmantium opinio videtur probabilior ex triplici capite. Nimirum 1<sup>mo</sup>, modus hic non repugnat substantiæ Matrimonii; secus enim pactum de servanda perpetua castitate ne quidem post jam contractum Matrimonium fieri posset, quod tamen fit non tantum licite, sed & meritorie. 2<sup>do</sup>, quia Matrimonium est validum quoad substantiam, dum ex mutua traditione & acceptatione habetur jus mutuum in corpora ad usum conjugalem; in casu autem hujus pacti per contractum matrimonialem haberetur jus ejusmodi, tametsi illud ex adjecto pacto esset impeditum ab usu licito: quæ duo invicem non pugnant. 3<sup>io</sup>, quia inter B. Virginem & S. Josephum, salva utriusque virginitate, verum ac proprie tale fuit Matrimonium, ut colligitur utrumque ex pluribus Scripturæ locis invicem collatis, nempe Matth. 1. V. 18. 19. & 20. Luc. 1. V. 34. aperteque docent Ambrosius L. de instit. Virg. C. 6. item Augustin. L. 1. de Nupt. & concup. C. 11. L. de sancta Virginit. C. 4. & L. 23. contra Faust. C. 8. Jam vero id multo verisimilius ac expeditius sustinetur in hac sententia: si nimirum dicatur, B. Virginem & S. Josephum contraxisse cum pacto tacito vel expresso perpetuæ castitatis; in adversa enim opinione securi debet ad specialem revelationem B. Virgini factam, quod S. Josephus nunquam sit usus jure conjugali, cujus tamen revelationis nullum exstat in S. Literis fundamentum. Ac omnino de hoc B. Virginis Matrimonio, & cum eo conjuncto servandæ virginitatis pacto integre nobiscum sentit Augustinus cit. L. 1. de Nupt. & concup. C. 11. dum ait: *Quibus vero placuerit ex consensu ab usu carnalis concupiscentiæ in perpetuum continere, absit, ut inter illos vinculum conjugale rumpatur;*  
imo



imo firmitus erit, quo magis ea pacta secum inierint &c. Neque enim fallaciter ab Angelo dictum est ad Joseph: *Noli timere accipere Mariam Conjugem tuam: Conjux vocatur ex prima fide desponsationis, quam concubitu nec cognoverat, nec fuerat cogniturus &c.*

Dictum est autem in proposita questione: *sub conditione minus proprie tali.* Dum enim contendimus valere hunc contractum matrimonialem: *contraho tecum, si perpetuam castitatem servaveris*, per particulam *si* non intelligimus conditionem proprie talem de futuro, quæ utique valorem Matrimonii suspenderet ad tempus conditionis non purificandæ nisi cum fine vitæ. Intelligimus itaque duntaxat modum, seu onus perpetuæ castitatis deductum in pactum, ut adeo hujusmodi contractus faciat hunc sensum: *Contraho tecum, si te simul obliges ad servandam perpetuam castitatem*, quæ conditio, utpote de præsentī, non est suspensiva, proinde nec proprie talis. Hujusmodi porro pactum non repugnat substantiæ & firmi Matrimonii: nam servando perpetuam castitatem prolis generatio non evitatur positive, sed mere negative; in quantum videlicet omittitur usus Matrimonii. Quo quidem in casu evitationem generationis non adversari positive bono prolis vel ideo certum est, quod secus etiam post contractum Matrimonium non foret licitum inter conjuges pactum de servanda castitate perpetua.

IV. Controvertitur præterea nominatim de Calvinianorum Matrimoniis: an nimirum ea valida sint, si contractui adjiciant conditionem, *si fidem thori servaveris?*

De hoc antequam sententiam dicamus, illud observandum: quamvis tam Lutherani quam Calviniani ex cer-

tis causis, præsertim ex causa adulterii, dissolvi posse Matrimonium doceant, si tamen contractui hanc dissolutionis conditionem non apponant, ex communi Doctorum sensu validum est eorum Matrimonium; quia nimirum eo casu præsumuntur velle inire verum Matrimonium, ut adeo tum particulari errori prævaleat intentio generalis de faciendi contractu legitimo. Tota igitur controversia in eo versatur: an tum etiam pro rato ac valido habendum sit, cum dissolutionis hujus conditio (ut crebro fit apud Calvinianos) contractui apponitur, & in pactum deducitur? Nec defuerunt e Theologis complures, qui id genus etiam Matrimonium pro valido habendum censerent propterea, quod hoc etiam casu existimaverint conditionem aut pactum hujusmodi elidi virtute intentionis generalis, qua Sæctarii intendunt verum inire Matrimonium. At enim oppositum docet pars Theologorum potior; cum quibus

Dicendum omnino est: Matrimonia sub hujusmodi conditione vel pacto a Calvinianis, aut aliis quibuscumque contracta penitus esse nulla ac irrita. Etenim dubitari nequit, conditionem hanc aut pactum adversari substantiæ Matrimonii, ejus videlicet indissolubilitati; adjectione autem talis conditionis elidi virtutem intentionis generalis ex supra laud. Cap. Si conditiones, de condit. apposit. satis constat: idque etiam eo certius est de Calvinianis, quod Matrimonia sic inita, violatis conditionibus contractui adjectis, dissolvere attentent, sæpe imo (quod experientia docemur) re ipsa dissolvant, nisi Magistratus publici auctoritate prohibeantur. Plura in hanc rem disputari possent, nisi id jam superfluum foret post apertam hodie regnantis S. P. BENEDICTI XIV. Declarationem: hanc unam proinde pro affirmanda, quam tuemur, sententia adjicimus. Ne quis porro de sensu Summi Pontificis relinquitur dubitandi

bitandi locus, factum ipsum, cujus occasione Declaratio emanavit, lubet referre.

Ita autem facti series habet. Illustriss. Domina N. origine Transylvana & Calvinum professa cum Domino N. eidem sectæ addicto coram Ministro pariter Calviniano An. 1742. Matrimonium contraxit sub conditione dissolubilitatis; eademque subinde, ejurato Calvino, Religionem Catholicam amplexa de sui Matrimonii valore dubitare cæpit: imo etiam, si hoc irritum foret, ad alia vota transire cogitavit. Consultit eapropter Sacerdotem N. Ord. Min. Obs. Refor. in Transylvania Missionarium; qui, ne quid improvide decerneret, Romana sensa censuit exploranda. Eo igitur proposito duos casus hoc argumentum complexos S. Congregationi de propag. Fide submittit. Horum primus erat: *Sempronius Calvinista Diaecesis Transylvaniæ - coram Curione suo Calvinista - - sub conditionibus, contra-* ho tecum si, vel quamdiu manseris in honestate conjugali, vel si fidem thori servaveris, *contraxit Matrimonium cum Sempronia Calviniana; hæc Sempronium aliquoties infideliter deseruit, redire renuit. Sempronius fidem Catholicam suscepit &c.* Alter casus: *Titius Calvinista coram Ministro ejusdem sectæ & testibus in Diæc. Alb. Transyl. contraxit Matrimonium cum Titia Calviniana - - sub iisdem conditionibus; iidem nunc, recenter conversi ad fidem Catholicam, dubitant &c.* His præmissis quærit: *an Sempronius validum contrahat Matrimonium? siquidem & ipsi hæretici violatis dictis conditionibus Conjuges ad alia vota transmittunt. Quærit item: an taliter in hæresi contrahentes, postquam convertuntur, juxta formam Concilii Tridentini consensum renovare teneantur?*

Haftenus P. Missionarii quæſita: quæ a S. Congr. de propag. continuo remiſſa ſunt ad S. Congreg. Gener. Inquiſit. in qua demum, coram ipſo SS. Domino An. 1748. die 1. Menſis Auguſti habita, de propoſita controverſia pronuntiatum eſt. Declaratio autem facta ſic habet. *BENEDICTUS Dom. N. Papa, prædictis auditis votis DD. Eminentiff. & Reverendiſſ. Cardinalium Generalium Inquiſitorum, cenſuit reſcribendum eſſe per eandem S. Congregationem de fide propag. Patri N. Ord. Min. Obſ. Refor. Miſſionario in Tranſylvania, Matrimonia in utroque caſu relata nulla prorsus eſſe & invalida; & ad primum dubium ſpecialiter, Sempronium non teneri ad recipiendam uxorem in hæreſi Calviniana manentem: imo nec teneri ad eam recipiendam, ſi ad Catholicam fidem convertatur; poſſe tamen ad Catholicam fidem converſam recipere (ſi velit) in uxorem, renovato coram Parocho & teſtibus utriuſque conſenſu &c. Ad ſecundum vero dubium: debere recenter converſos conſenſum coram Parocho & teſtibus renovare, ut tanquam legitimi Conjuges in Conjugio manere poſſint. Subſcripſit, Paulus Ant. Capellanus S. Rom. & Univerſ. Inquiſitionis Notar.*

Atque hac Romana Declaratione accepta, nihil jam dubitavit memorata Illuſtr. Domina N. deſerto priore Calviniano Coniuge, cum alio Nob. Viro N. Matrimonium inire: uti etiam illud re ipſa deinde ritu catholico iniit. De quo cum ſubinde ad ſedem Apoſtolicam notitia perveniret, ratum illud ac validum eſſe Summus Pontifex pronuntiavit, in eam rem ad Excellentiff. ac Reverendiſſ. Albenſem in Tranſylvania Episcopum Brevi Apoſtólico ad diem 25. May. An. 1754. dato: de quo ipſo hoc eod. die & Anno D. Ludovicus de Valentibus Aſſeſſor S. Officii ſupra memoratam Illuſtriſſ. Dominam nomine Pontificis certiore reddidit per Epistolam, quam præ manibus habeo.

Huic

Huic jam vero tam apertæ Declarationi nihil est, opinor, quod adjici debeat; reliquum duntaxat habemus, ut pro ea, qua nos in Sedem Apostolicam ferri oportet observantia, Sapientissimi Pontificis sensa omni submissione amplectamur.

## §. II.

### *Quis sit Minister Sacramenti Matrimonii?*

Cum indubitatum sit, eum esse Sacramenti Ministrum, qui ejus materiam & formam ponit, ex præc. §. ultro jam consequitur

## ASSERTIO.

*Verisimilius est Ministros Sacramenti Matrimonii esse ipsos contrahentes: non autem Parochum.*

Summa argumentorum omnium, quibus hæc sententia nititur, in eo est: quod Christus, fidelium Matrimonio ad rationem Sacramenti eveſto, nihil peculiare ritui ejus substantiali adjecerit; id quod deducitur ex doctrina CC. Florentini & Tridentini, vario item in LL. Ritualibus præscripto ritu, Doctorum communi sensu, ac demum ex ratione: ut adeo quinque sint præcipua hujus loci argumenta.

Argumentum I. ex Conc. Florentino. Juxta hoc causa 38 constitutive efficiens Sacram. Matrimonii, ac proinde ejus materia & forma est consensus mutuus regulariter per verba de præſenti expreſſus; ergo juxta idem Concil. is est hujus Sacramenti Minister, qui ponit dictum consensum: atqui hunc ponunt contrahentes, non Parochus; non igitur iste, sed contrahentes ipsi sunt Ministri Sacramenti Matrimonii juxta Concilium. Argumentatio hæc (ut vides) est legit-

gitima, modo sua sit Asserto primo veritas. Cur vero illa in dubium revocetur?

Causam efficientem commemorans Concilium, inquit Adversarii, non amplius agit de Matrimonii Sacramento: verum de Matrimonio duntaxat pro contractu civili sumpto, & ut est in naturæ officium. Atenim ex N. 29. constat arbitrarie istud dici; quin nec absque Concilii injuria dici posse contendo. Etenim si his verbis Concilium agat de causa efficiente Matrimonii ut Sacramenti, integre dat doctrinam de materia & forma, imo etiam Ministro hujus Sacramenti: cum universim is sit Minister Sacramentalis, qui materiam & formam ponit; ex adverso, si assignet causam efficientem Matrimonii solum ut contractus naturalis & civilis, nihil eorum præstat: manca proinde & mutila est ejus doctrina de Matrimonii Sacramento, contra quam pro institutione Armenorum sibi proposuerit Concilium, ac jam de aliis Sacramentis re ipsa præstiterit.

Sed consulto forte nolebat de Ministro hujus Sacramenti quidquam statuere propter controversiam Scholasticam. Itane vero? Qui ante Concilium Florent. de Ministro Sacramenti Matrimonii controverteret, unus fuit duntaxat Guillelmus Parisiensis: & persuaserit sibi quispiam, Synodum statuere nihil voluisse propter singularem unius Doctoris opinionem, reliquis omnibus contrarium sentientibus? præsertim cum constet, quod, tametsi Magister Sentent. item Durandus, & complures Canonistæ in Matrimonii Sacramento conferri gratiam negarent, nihilominus Concilium juxta communem aliorum sententiam non dubitaverit in Decreto suo docere Armenos oppositum: cum videlicet, enumeratis septem Sacramentis, continere illa gratiam, ac etiam conferre generatim asseruit.

Ar-

Argumentum II. ex Conc. Tridentino. Nimirum secundum hujus Concilii declarationem,

1mo, Sess. 24. in Doctr. de Sacram. Matrimonii, inter illud, ut est novæ Legis Sacramentum, & Matrimonium, ut fuit ante Legem Evangelicam, non aliud intercedit discrimen, quam quod illud veteribus connubiis præstet virtute conferendi gratiam per Christum; igitur Concilium censuit, nihil præterea peculiare habere Matrimonium, ut est Sacramentum: eandem proinde esse ejus materiam & formam, ac etiam Ministrum, quæ erant in Matrimonio ante Legem Evangelicam; ante hanc autem indubium est, Ministrum ejus fuisse contrahentes, consensum autem ab illis per signa expressum totam Matrimonii substantiam constituiffe.

2do, cit. Sess. Can. 1. generatim definit, baptizatorum Matrimonium esse verum Legis Evang. Sacramentum: & Can. 11. nuptiarum *benedictiones* refert ad solemnitatem & cæremonias Matrimonii; ergo ex mente Concilii universim Matrimonium inter Christianos (supposita intentione ad Sacramenti consecutionem requisita) est verum Sacramentum, si sit verum ac legitimum quoad substantiam Matrimonium: tale autem est sine benedictione Parochi, tametsi is videlicet nulla verba proferat, modo cum duobus aliis testibus Matrimonio assistat. Ex quo recte intuleris, existimasse Concilium benedicientis Parochi verba, utpote ad meram solemnem cæremoniam pertinentia, non esse formam hujus Sacramenti: nec Parochum fungi officio Ministri Sacramentalis, sed testem duntaxat agere, & Ministrum solemnitatis.

3tio, in Decr. de Reform. Matr. Cap. 1. ait: *dubitan-  
dum non est, clandestina Matrimonia, libero contrahentium con-*

*sensu facta, rata & vera esse Matrimonia, quamdiu Ecclesia ea irrita non fecit; jam vero Matrimonium ratum ex usu loquendi Ecclesiastico est verum Sacramentum, ut patet ex Cap. Quanto, de Divort. ubi Innocentius III. cisi, inquit, Matrimonium verum inter infideles existat, non tamen est ratum: inter fideles autem verum & ratum existit, quia Sacramentum fidei, quod semel est admissum, nunquam amittitur, sed ratum efficit conjugii Sacramentum &c. igitur clandestina Matrimonia, ante Concilium Trident. celebrata sine Parocho, fuerunt Sacramenta, atque adeo ex mente ejusd. Concilii Parochus non est Minister hujus Sacramenti.*

40. Demum & illud addendum. Ex toto paulo ante cit. Cap. haud obscure colligitur, in Matrimoniis celebrandis testium & Parochi praesentiam, propterea tantum requiri, ut vitentur incommoda, quae oriuntur ex clandestinis conjugiiis: cui quidem malo satis occurritur, si Parochus nomine Ecclesiae testem agat; nusquam autem certe Concilium innuit, Parochum adesse debere ceu Ministrum Sacramenti quoad substantiam.

40 Argumentum III. est ex LL. Ritualibus, Pontificalibus, & Missalibus; ex quibus invicem collatis colligitur, haec, aut his similia Sacerdotis verba, *ego vos in Matrimonium conjungo, in nomine Patris &c.* non esse formam Sacramenti quoad substantiam: proinde nec Sacerdotem esse ejus Ministrum, nisi quoad solemnitatem. Ita autem istud arguo.

1mo, referente erud. Martene de antiq. Eccl. Rit. Par. 2. L. 1. Cap. 5. in MS. Missali Redonensi annorum circiter 700. in MS. Monasterii Lyrensis Pontificali annorum 600. in MS. Codice Victorino annorum 500. in MSS. Pontificali-  
bus



bus Ecclesiæ Arelatenfis & Antiffiodorenfis annorum circiter 400. idem est de Pontificalibus Eccl. Lugdun. & Ambianen. ac etiam Miſſali Eccl. Pariſienſis, ante annos circiter 300. ſcriptis, in his inquam omnibus, poſt conſenſum mutuum a ſponſis præſtitum, non aliud præſcribitur Sacerdoti dicendum, quam *orationes*, & quidem fere complures, ac demum: *Deus Abraham, Deus Iſaac, Deus Jacob, ſit vobiscum; ipſe conjungat vos, impleatque benediſſionem ſuam in vobis.* Quid jam vero in his formæ Sacramentalis rationem habeat? Non *orationes*; præterquam quod enim illæ ſenſum formæ non contineant: ſimilis oratio etiam in Rituali Rom. Pauli V. præſcribitur præter verba: *ego vos conjungo &c.* in hac autem oratione, cum prædiſtis verbis conjuncta, nemo formam Sc. cr. Matrimonii conſtituit. Non verba illa, *Deus Abraham &c.* hæc quippe quoad omnia prorsus diverſum ſenſum faciunt ab his, *ego vos conjungo &c.* in quibus tamen juxta Rituale Rom. prolatis Adverſarii formam reponunt.

2do, apud eumd. Martene loco cit. juxta Miſſale Gelatianum, item MSS. Codices Rhemenſem & Gellonenſem annorum 900. in celebratione Matrimonii Sacerdos nihil dicendum habet præter orationes, quibus petit: ut *Deus nuptias hæc confirmare dignetur, conſortio maritali copulatos filiorum ſucceſſibus facundet, eorum conjunctiones foveat &c.* Dominicus Soto Volum. 2. in 4. pag. 101. refert, in quibusdam Eccleſiis formam a Sacerdote proferendam his verbis definiri: *quod Deus conjunxit, homo non ſeparet.* In Rituali Salisburgenſi (teſte Cl. Berti. de Theol. Diſcipl. L. 37. C. 10.) hæc forma Parocho præſcribitur: *Matrimonium, in facie Eccleſia inter vos me annuente contractum, Deus confirmet; & ego illud approbo, perficio, atque ſolemnizo, in nomine Patris &c.* Quid multis? in ipſo noſtro Vienneniſi

Rituali An. 1730. edito, cujusque etiam hodie usus est in hac Archi-Dioecesi, totus Matrimonii celebrandi ritus his absolvitur: mutuum consensum sponsi verbis exprimunt, tradunt sibi anulum, jungunt manus, hasque dein Sacerdos stola circumvolvens, dicit: *Matrimonium, in facie Ecclesiæ inter vos me annuente contractum, Deus confirmet; & ego illud &c.* ut supra in Rit. Salisburgensi. Quæ quidem omnia satis indicant, verba Sacerdotis supponere potius Matrimonium jam factum, quam illud efficiant; ut primum autem inter fideles Matrimonium est validum, est simul Sacramentum: nemini enim usque huc in mentem venit, duo hæc diversis temporibus perfici, atque ab invicem separari. Quod igitur hinc consequitur, Sacerdotis verba non pertinent ad substantiam formæ Sacramenti Matrimonii: sed ad solemnitatem duntaxat, & testimonium, quo videlicet significatur Matrimonium ab Ecclesia approbari, & quoad solemnitatem perfici. Unde, conformiter ad nunc relatas formas, communiter recepta forma illa: *ego vos conjungo in Matrimonium in nomine Patris &c.* non alium ex mente Ecclesiæ sensum facit, quam, *ego approbo, solemniter confirmo, & benedico conjugium vestrum.*

3tio, in vetusto Rituali Ecclesiæ Catalaunensis (apud laud. Martene eod. C.) non præscribitur aliud, quam ut post mutuum consensum sponсорum, junctasque eorum manus, & traditum anulum, *Sacerdos aspergat eos aqua benedicta.* En! nulla sunt isthic Sacerdotis verba: Matrimonium nihilominus hoc ritu in facie Ecclesiæ celebratum est verum Sacramentum; igitur Sacerdotis verba non sunt forma hujus Sacramenti, nec Sacerdos ejus Minister. Fateor equidem in hoc eod. Rituali Parochum moneri, ut post asperisionem factam dicatur Missa, atque in hac post Communionem recitetur pro benedicendis sponis Oratio, *Pro-*  
*pitare*

*pitare &c. & Deus, qui potestate virtutis &c.* At hæc benedictio, sub finem Missæ fieri solita, juxta omnes non est Sacramentalis, sed mere cæremonialis: cum secundis Nuptiis communiter impendi solet.

4to, Rituale Leodiense, rursus a Martene loco cit. relatum, ritum Matrimonii in facie Ecclesiæ celebrandi ita describit. Post annulum traditum Pastor sponsum manus stola colligabit, signoque Crucis facto dicet, *in nomine Patris &c.* Præeunte dein eodem Pastore verba, contractum matrimonialem exprimentia, sponsi proferunt; quibus peractis (verba sunt Ritualis) *admonitis ambobus, si jam contracti Matrimonii qualitas benedictionem admittit, ut eam devoto suscipiant, Sacerdos signo benedictionis, seu Crucis, super eos facto, pronuntiet: Deus Abraham - - ille vos in Christo benedicat, & crescere faciat in gentem magnam, in nomine Patris &c.* *Quam quidem benedicendi formam non impendet secundis Nuptiis, sed primis duntaxat: non quidem quod secundæ Nuptiæ non verum ac legitimum Matrimonium contineant; sed quod non tam adæquate, seu perfecte, sicut primæ Christi Domini unius sponsi cum unica sua sponsa Ecclesia unicam ac simplicem repræsentent conjunctionem.* In hoc jam ritu, post mutuum consensum sponsum, nulla Sacerdotis verba occurrunt alia, quam *Deus Abraham &c.* hæc autem certe dici nequeunt Sacramenti forma, cum omitti debeant in secundis Nuptiis, quæ tamen perinde sunt verum Sacramentum, ac primæ; ergo juxta hunc ritum Matrimonii Sacramentum perficitur sine forma a Sacerdote prolata, ac proinde absque ejus Ministerio Sacramentali.

Argumentum IV. ex Doctorum consensu. Sententiam 41  
hanc scilicet cum duobus Ecclesiæ Doctoribus D. Thoma  
& S. Bonaventura olim amplexi sunt omnes Theologi, dem-

pto Guillelmo Parisiensi, de quo ipso est ambiguum; ab unanimi autem Majorum doctrina non est recedendum, nisi gravia in oppositum proferantur momenta: præsertim cum in multis Ecclesiæ sensus nobis potissimum ex consentientibus Doctorum suffragiis innotescat. Loca porro ex veteribus DD. pro nobis facientia copiose recitat Simonnet supra N. 26. laudatus. Equidem scio Melchiorem Canum adniti, ut D. Thomam suarum faciat partium: Sylvius etiam multa ex ejus Operibus colligit, quo ostendit illum in *summa* retractasse complura, quæ in LL. Sententiarum scripserat. At enim nusquam legitur retractasse, quod in 4. dist. 26. qu. 2. Ar. 1. ita habet: *Verba, quibus consensus exprimitur, sunt forma hujus Sacramenti; non autem benedictio Sacerdotis, quæ est quoddam Sacramentale*; idem quippe repetit ad Annibaldum L. 4. dist. 27. Ar. 2. imo & in iis locis, quæ pro se laudat Canus, modo contextus attendatur. Consulte cit. Simonnetum pro germano Divi Thomæ sensu acriter pugnantem.

- 42 Argumentum V. ex ratione. Sacramenti Matrimonii is est Minister, qui ponit id, quod Christus evexit ad rationem Sacramenti Matrimonii; atqui istud non aliud est, quam contractus Matrimonialis legitimus: hic enim perfecte significat conjunctionem Christi cum Ecclesia, eumque ponunt soli contrahentes, & quidem tacente etiam, nihilque proficiente præfente Parocho; soli igitur contrahentes sunt Ministri Sacramenti Matrimonii.

Respondetur adversæ sententiæ Patronis.

Argumenta, quibus opinio nostra impugnatur, fere collecta sunt ex Cano, Estio, & Sylvio; his nihilominus etiam RR. aliqua adjecerunt, præsertim du Hamel, Tournely,

nely, & Vanroy. Quia autem omnia petuntur vel ex Patrum & Pontificum sensis, vel Conciliorum Decretis, vel L.L. Ritualibus, aut demum ex ratione: libet eadem hoc eodem ordine expedire.

Opponitur auctoritas Patrum & Pontificum eorum, qui dicunt Matrimonia conciliari per Ministros Ecclesiæ, horumque benedictiones ad Matrimonii Sacramentum requiri; ut adeo censuisse videantur, Parochum esse Ministrum hujus Sacramenti, formamque illius in benedictione Sacramentali consistere. Ita

I. Tertullian. L. 2. ad Uxorem C. 9. commendat *felicitatem ejus Matrimonii, quod Ecclesia conciliat, & confirmat oblatio*. Ambrosius Ep. 79. nunc 19. ait: *conjugium Sacerdotali benedictione sanctificari oportet*. Augustinus in Pf. 149. Matrimonii vinculum comparans compedibus, *tales, inquit, compedes consolidant vobis & Episcopi manus; ubi per manus intelligitur potestas*. D. Thomas 2. 2. qu. 100. Ar. 2. *benedictionem nubentium refert ad Matrimonium, in quantum est Ecclesiæ Sacramentum*. Et in 4. dist. 1. qu. 1. Ar. 3. de Poenitentia & Matrimonio ait, *secundum quod utrumque est Sacramentum, in dispensatione Ministrorum Ecclesiæ consistens, utrumque habet aliqua verba; sicut in Matrimonio sunt verba exprimentia consensum, & iterum benedictiones ab Ecclesia institutæ: in Pœnitentia autem est absolutio Sacerdotis*. Item 3. p. qu. 83. Ar. 3. *dispensatio Sacramentorum pertinet ad Ministros Ecclesiæ*.

II. Complures Pontifices cum Siricio & Hormisda docent Matrimonium esse Sacramentum, *si Sacerdotis ministerium interveniat*: utque sine hoc non contrahantur Matrimonia pluribus Canonibus præcipiunt. Hinc Evaristus C. *Aliter*.

ter. C. 30. qu. 5. ait, *Connubia sine Sacerdotis benedictione contracta, - adulteria aut fornicationes potius, quam legitima conjugia esse.* Nicolaus I. C. Lotharius. C. 31. qu. 2. declarat, Matrimonium inter Lotharium & Gualdradam initum non esse validum, *si nuptiæ non fuerint per benedictionem Sacerdotis celebratæ.*

Resp. I. generatim: ex his Patrum & Pontificum verbis id unum deduci, quod ex Præcepto Matrimonium celebrandum sit solemniter in facie Ecclesiæ, proinde coram Sacerdote & per ejus benedictionem; atque adeo Sacramenti Matrimonii simul quoad integritatem, seu solemnitatem Ecclesiasticam sumpti Ministrum esse Sacerdotem: benedictionem autem ejus, vel alia verba, quibus Matrimonium nomine Ecclesiæ confirmat & approbat, esse formam. Unde

Resp. II. in particulari, & quidem ad I. Tertullianus non plus dicit, quam felix esse Matrimonium, quod Ecclesia conciliat, hoc est, quod a fidelibus approbante Ecclesia contrahitur; id quod adversum nos non pugnat. Ambrosius vero loquitur de præcepto benedictionis a Conjugibus suscipiendæ; huic autem attribuit sanctificationem solum accidentalem, eam videlicet, quæ cæremoniæ sacrae responderet: non autem Sacramentalem, quam benedictio ex opere operato efficiat. Colligitur istud vel inde, quod juxta Ambrosium cit. Ep. nuptiæ sanctificantur etiam *Sacerdotali velamine*: juxta alios autem PP. *oblationibus*; quorum certe neutrum pertinet ad substantiam Sacramenti, nec virtutem habet efficiendæ sacramentalis gratiæ. Si tamen Ambrosius intelligat sanctificationem Sacramento propriam, id eo sensu congrue exponitur: quod sine benedictione Sacerdotali ab Ecclesia præcepta non conferatur gratia sanctificans de-  
fectu

fectu dispositionis conjugum Ecclesiæ præceptum violentum. Quod ex Augustino refertur, verbo *consolidant* satis innuit S. Doctor Matrimonium per Episcopum confirmari duntaxat, quo videlicet publico Ministri Ecclesiæ testimonio pro rato ac legitimo habeatur.

Demum de D. Thoma ita habet: in primis duobus obj. locis id solum vult, benedictionem pertinere ad Matrimonii Sacramentum, esse ejus formam, prout nimirum Matrimonii Sacramentum sumitur etiam integraliter quoad solemnitatem. Atque istud dici debere colligitur ex eisdem verbis supra N. 41. recitatis; quæ eadem repetit in suppl. qu. 42. Ar. 1. ad 1. & confirmat ad dist. 18. qu. 1. Art. 3. ubi ait: *Sacerdotis benedictio non requiritur in Matrimonio quasi de essentia Sacramenti*. Ex quibus patet, quo sensu accipiendus sit locus ultimo objectus. Nimirum ex mente S. Doctoris ad Ministros Ecclesiæ pertinet dispensatio Sacramentorum, reliquorum quidem tam quoad substantiam, quam quoad solemnitatem: hujus vero tantum quoad solemnitatem. Ipsa profecto loca, quæ Adversarii ex D. Thoma objiciunt, si totus eorum contextus consulatur, sensum a nobis intentum satis produnt.

Resp. ad II. universim Pontifices præceptis suis eo tantum spectare; ut impediant clandestina Matrimonia, quæ sine testibus, & solemnī Sacerdotis ministerio ac benedictione contra Ecclesiæ prohibitionem fiunt: quæque propterea quidam eorum dicunt non esse Sacramenta, intellige, actu gratiam conferentia ob indispositionem contrahentium. Nominatim certe Evaristus agit de clandestinis Matrimoniis, & quidem iis, quæ secundum fori externi præumptionem non habentur pro legitimis, nisi legitimus contrahentium consensus probari possit; continuo quippe post laud. verba subjicit:

*R.P. Muszka Tom. II. de Sac.*

Q 999

*nisi*

*nisi voluntas suffragaverit, & vota succurrerint legitima. Ac profecto nisi istud dicatur, quomodo Trident. Sess. 24. C. 1. declarare poterat, clandestina Matrimonia, libero consensu inita, ante irrationem ab Ecclesia factam rata & vera fuisse? Idem esto iudicium de Nicolai I. declaratione; nam cit. C. præterea ait: si minime probatum fuerit Gualdradam fuisse uxorem legitimam, neque nuptiis secundum morem celebratis, per benedictionem scilicet Sacerdotis, Lothario extitisse conjunctam, suggerite illi, ut non moleste ferat legitimam sibi reconciliari uxorem, Teutpergam scilicet, quam repudiaverat. Id ipsum colligitur ex Baronio & Du-Mesnil ad An. 862. ubi de nuptiis Lotharii disserunt. Cæterum hæc obiectio, ex Evaristi & Lotharii verbis petita, perinde Adversariis resolvenda est: cum ante Tridentinum Matrimonia clandestina saltem in ratione contractus, ejusque indissolubilis, fuerint valida.*

- 44 Concilia, ad quæ Adversarii provocant, sunt I. Florent. & Trident. Nimirum illud in Decr. pro Arm. generatim ait Sacramenta *perfici verbis, tanquam forma*; id quod verum non est de Sacramento Matrimonii, si Sacerdos non sit ejus Minister, nec verba a Sacerdote prolata habeant rationem formæ Sacramentalis: nam in hac sententia ratum est Matrimonii Sacramentum, modo contrahentes consensum nuptu aut quovis signo alio exprimant. Tridentinum vero Sess. 24. Cap. 1. præscribit Parocho, ut, mutuo sponsoꝝ consensu intellecto, dicat: *ego vos in Matrimonium conjungo* &c. hæc igitur sunt illa verba, quibus *tanquam forma* perficitur Matrimonium in ratione Sacramenti; secus enim falsa esse oportet; cum Parochus sponsoꝝ non conjungat in ratione contractus.



II. Carthaginense IV. Can. 13. per modum consilii ait: *sponsus & sponsa - - cum acceperint benedictionem, eadem nosse pro reverentia ipsius benedictionis in virginitate permaneant?* quorsum autem istud? si Matrimonium non fiat Sacramentum per Sacerdotis benedictionem. Fieri certe, supponit Conc. Lateranense sub Alexandro III. celebratum, in quo Cap. *Cum in Ecclesiæ*, de simonia, dicitur: *horribile est, quod in quibusdam Ecclesiis locum venalitas perhibetur habere, ita ut - - pro sepulturis & exequiis mortuorum, & benedictionibus nubentium, seu aliis Sacramentis aliquid requiratur;* ubi vides benedictionem nubentium aliis Sacramentis accenseri. Idem supposuit Conc. Constantiense, cum Sess. 15. in quæstis, quæ suspectis de hæresi proponi debeant, *solemnisationem Matrimonii* inter Sacramenta numeret.

III. Conc. Colonienſe An. 1536. Par. 7. C. 40. aſſerit, Matrimonium accedente Sacerdotali benedictione & preſentatione gratiam conferre. Item Petricoviense An. 1551. a Cl. Vanroy productum, *firmitatem vinculi conjugalis, & donum perſeverantiæ* (quod utrumque habetur per Sacramenti gratiam) ait *effici accedente verbo, a viſibili, quæ fit per Sacerdotem, copulatione*. Quod ſi autem Sacerdotis verba gratiam Sacramenti efficiant, ſunt utique ejus forma, Sacerdos vero Miniſter.

Reſp. ad I. ſenſum Florentini eſſe: Sacramenta verbis tanquam forma perfici, ſex priora quidem eſſentialiter, ut conſtat ex Traditione & ſenſu Eccleſiæ: Matrimonium autem regulariter, quæ particula in eod. Decr. §. de Sacr. Matr. nominatim adjicitur. Neque propterea dixeris falſa reddi Sacerdotis verba, *ego vos conjungo*, ſi formæ Sacramentalis vim non habeant: ut enim N. 40. V. 2. &c. inſinuavimus, eorum ſenſus eſt: *ego Matrimonium vſtrum*

auctoritate Ecclesiæ ratum habeo, id est solemniter approbo & confirmo; hinc Parochus sponfos conjungit approbative, non efficienter. Violenta forte Adversariis videbitur hæc verborum acceptio? at, si consulant formam in Rituali Salisburgensi & nostro Viennensi præscriptam, eamque etiam hodie usitatam, facile in animum inducent, nullam nos vim inferre verbis in sensu Ecclesiæ acceptis. Ac omnino nisi istud admittant, quomodo ratum erit Matrimonii Sacramentum, in cujus solemnī celebratione ex ritu quarundam Ecclesiarum Parochi proferunt verba, quoad sensum prorsus differentia ab his: *ego conjungo* &c. & tamen Trident. eod. C. 1. suum cuique Ecclesiæ ritum integre relinquit: *vel aliis* (inquit de Parocho assistente) *utatur verbis, juxta receptum uniuscujusque Provinciæ ritum.* Consule ac etiam invicem confer Ritualia supra N. 40. relata.

Resp. ad II. ex Carthaginensi haud recte argui: nam non tantum Sacramenta, sed etiam Sacramentalia præsertim solemniora, qualis est nuptiarum benedictio, digna sunt magna veneratione. At cur non potius, inquires, hanc continentiam suadet propter Sacramentum? imo propter hoc etiam; cujus sponfos sufficienter admonet per benedictionem, quæ impenditur propter Matrimonii Sacramentum, illudque quoad integritatem & solemnitatem complet. Solum interim benedictionem nominat: cum enim hæc fiat sacris verbis, facilius illis excitantur ad memoriam rei sacræ in Matrimonio acceptæ. Quod ad Lateranense attinet: Sacramenta isthic sumuntur latiore significatione, cum inter illa etiam sepulturæ & exequiæ mortuorum numerentur. Aut, si mavis, dic: *non aliis* isthic non esse relativum, sed absolutum, ita ut sensus sit: seu pro aliis rebus sacris, qualia sunt Sacramenta. Ita & Luc. 23. *ducebantur autem*

autem & alii duo nequam cum eo, tō alii non accipitur relative ad plures nequam. Quod si hæc Adversarii non satisficiant, licebit perinde inferre, etiam sepulturam esse Sacramentum. Demum Conc. Constantiense frustra opponitur; voluit illud quidem de hæresi suspectos interrogari: *num credant, quod peccet contemnens susceptionem Sacramentorum Confirmationis, vel Extr. Unctionis, vel solemnisationis Matrimonii?* at postrema hæc verba re ipsa non plus supponunt, quam *solemnisatum Matrimonium* esse Sacramentum: id quod verum est, tametsi *solemnitas* non pertineat ad substantiam, sed tantum ad integritatem Sacramenti. Quid quod Hussitarum de Matrimonio error, contra quem cit. sess. agit Concilium, in eo duntaxat fuerit, quod ejus *solemnisationem*, utpote ab Ecclesia tantum institutam, contemnerent: non autem, quod illam negarent esse Sacramentum; cui errori ut occurreretur, satis erat declarare, memoratam *solemnisationem* absque piaculo contemni non posse.

Resp. ad III. Utrumque laud. Concilium propterea ait Matrimonium conferre gratiam, accedente Sacerdotis benedictione & copulatione: quia, qui illam contra præscriptum Ecclesiæ negligit, hoc ipso neglectu incapacem se reddit recipiendæ gratiæ Sacramento propriæ. Unde nominatim Petricoviensis Synodi verba accipienda sunt hoc sensu: gratiam effici ab illa visibili, hoc est, verbis contrahentium sensibilibiter expressa copulatione, quæ per Sacerdotem solemniter confirmatur & benedicitur.

Quæ ex LL. Ritualibus obijciuntur, hæc fere sunt. 45  
Rituale vetus Roman. An. 1494. ait: *contrahentibus respondentibus se nec esse affines, nec consanguineos &c. Sacerdos pronuntiet verba, quæ sunt forma hujus Sacramenti.* Alterum

vero Rit. Rom. Pauli V. in Præfat. inter Sacramenta, quæ ministrari debent a Parochis, recenset Matrimonium; ac in eodem, uti & in plurimis aliis Ecclesiarum Ritualibus, Sacerdos jubetur proferre hæc verba: *ego vos conjungo* &c. Quin in Enchiridio Conc. Coloniensis An. 1536. & Manuali Iprensi An. 1576. ac Mechliniensi 1589. notatur, verba hujusmodi dicenda esse a Sacerdote, *tanquam Ministro Ecclesiæ*. Denique (præter complura alia apud Martene loco a nobis supra citato) Rituale Mediolanense ex præscripto S. Caroli Bor. Actorum Par. 14. quinque Sacramenta esse ait, quæ *Parochus ex officio administrare potest*, ac inter hæc Matrimonium numerat. Igitur testimonio Ritualium Parochus est Minister, verba autem ejus sunt forma Sacramenti Matrimonii.

Resp. ex omnibus his Ritualibus non plus evinci, quam Sacerdotem in Matrimonii celebratione esse *Ministrum solemnitatis*: & verba ab eo prolata esse *formam Sacramenti Matrimonii quoad integritatem simul, seu solemnitatem ab Ecclesia institutam accepit*. Istud porro congrue dici, tria suadent. 1<sup>mo</sup>, quia omnia Ritualia agunt de solemnitate celebrationis Matrimonii, proinde de hoc Sacramento, non mere quoad substantiam, sed simul integraliter, quoad solemnitatem sumpto. 2<sup>do</sup>, quia illud ipsum Concilii Colon. Enchiridion, quod nobis objicitur, tametsi dicat, a Sacerdote tanquam Ministro proferenda esse verba, simul hæc addit: *verbum hujus Sacramenti, quo accedente ad elementum fit Sacramentum, id nimirum est, quo ambo mas & femina cum pietatis respectu, quæ in Deum est, sibi mutuo fidem conjugalem dant, accipiuntque*. Juxta hoc igitur Enchiridion verborum forma, qua fit Sacramentum, ponitur a contrahentibus, hique proinde sunt Ministri Sacramenti: Sacerdos autem est tantum Minister solemnitatis. 3<sup>io</sup>, quia hæc expositio est magis conformis sensui Florentini & Tridentini: imo sine illa explicari nequit, quomodo Matrimonia

monia juxta ritum quarundam Ecclesiarum celebrata sint verum Sacramentum. Vide Ritualia N. 40. laudata, præsertim Catalaunensè & Leodiensè.

Ex ratione theologica ita arguitur. I. Minister in aliis 46 Sacramentis diversus est a fuscipiente; quidni igitur etiam in Matrimonii Sacramento? Quid quod contrahentes non gerant personam Christi, quod tamen est proprium Ministro Sacramentali; imo plerique ignorant se esse Ministros, carent proinde intentione ad perficiendum Sacramentum requisita.

II. Quomodo contrahentium verba, *ego te accipio in meam*, aut alia his similia possint habere rationem formæ Sacramentalis, cum nec sint sacra, nec significant effectum Sacramenti Matrimonii?

III. Cum secundum Jus antiquum (idem est & nunc de locis, in quibus non est receptum Tridentinum) sponsalia per copulam, affectu maritali factam, transiverint in Matrimonium, sequitur, si contrahentes sint Ministri, copulam hanc illicitam posse esse partem Sacramenti Matrimonii; id quod sine gravi inconvenientia dici non potest.

Resp. ad I. ab aliis Sacramentis haud recte argui ad Matrimonii Sacramentum: hoc enim plene consistit in ipso conjugum contractu legitimo, ad rationem Sacramenti per Christum eveſto; sicut igitur contractus hujus subiectum simul & Minister sunt conjuges, sic & Sacramenti Matrimonii: nihil autem simile occurrit in aliis Sacramentis. Nec dubium est contrahentes simul gerere personam Christi: quatenus nimirum per hujusmodi matrimonialem contractum ex institutione Christi significant unionem Christi cum Ecclesia, & Sacramen-

cramenti gratiam operantur. Sed nec requisita deest illis intentio : vel ideo enim, quod Matrimonium intendant contrahere eo modo, quo contrahitur a fidelibus in Ecclesia, implicite saltem intendunt Sacramentum.

Resp. ad II. Conjugum verba, aut signa quævis alia, quibus internum consensum exprimunt, non quidem, mere secundum se spectata, verum prout ad rationem Sacramenti eveſta, ac proinde a Christo ad significandam & efficiendam gratiam instituta, sunt quid sacrum, ac etiam effectum Sacramenti significant.

Resp. ad III. verbis Platellii, qui in Synop. Th. de Sacram. C. 7. §. 4. N. 1102. ait: *esse moraliter impossibile, ut copulam affectu maritali affectam non præcedant verba, quibus significant se in eam affectu maritali consentire; ac proinde antecederet ad illam contractum esse per ista verba Matrimonium. Si tamen aliquo casu contingeret, ut ipsa copula foret primum signum mutui consensu in Matrimonium, non esset absurdum dicere, quod copula illa in ratione signi consensu mutui concurreret ad hoc Sacramentum: sicut non est absurdum asserere, quod actio turpis, qua v.g. aqua applicaretur baptizando per tactus impudicos, esset materia proxima Baptismi.* Ita ille ad verbum.

### §. III.

#### *Quod sit subjectum capax Sacram. Matrimonii?*

**T**Ria in præſenti ſecernenda ſunt ab invicem: Subjecti videlicet generatim capacitas; capacitas item ad valide tantum, vel licite ſimul recipiendum hoc Sacramentum. Seorſim pauca notabimus de ſingulis.

De

## De capacitate subiecti generatim.

**S**pectata ratione subiecti secundum se capaxis soli fideles 47 possunt Matrimonii Sacramentum suscipere : tum quod in Lege Evangelica fidelium duntaxat Matrimonia ex institutione Christi dignitatem Sacramenti sortita sint ; tum quod sine Baptismo nulli ad Sacramenta reliqua aditus pateat. Inde, tametsi non baptizati perinde in nova ac veteri Lege vera ac firma in ratione contractus celebrent Matrimonia, eadem nihilominus Sacramenti proprie talis rationem non habent.

## De subiecti capacitate ad valide suscipiendum Matrimonii Sacramentum.

**I. Q**uamvis baptizati ex se hujus Sacramenti sint capaces, 49 non tamen omnes. Nimirum valere nequit Matrimonii Sacramentum, nisi valeat contractus ipse matrimonialis : sicut, igitur hic ab omnibus fidelibus valide ac legitime iniri nequit, ita nec Matrimonii Sacramentum ab omnibus potest suscipi valide. Jam verò ea, quæ Matrimonium in ratione contractus reddunt irritum, sunt *impedimenta Matrimonii dirimentia*, his versibus expressa :

*Error, conditio, votum, cognatio, crimen,  
Cultus disparitas, vis, ordo, ligamen, honestas,  
Amens, affinis, si clandestinus, & impos,  
Si mulier sit rapta, loco nec reddita tuto ;  
Hæc facienda vetant connubia, facta retractant.*

Horum porro alia sunt juris naturalis, ut: error personæ, amentia, perpetua impotentia &c. alia juris Ecclesiastici, e. g. votum, remotiores cognationis gradus, crimen, cultus disparitas, clandestinitas, raptus &c. quorum omnium no-

mine quid veniat, quidque speciatim de singulis sit observandum, copiose docent passim Canonistæ & Theologi Morales: ad quos, cum mihi non vacet, Lectorem benevolum remittere necesse habeo. Id solum addo: fideles horum impedimentorum aliquo irretitos, uti capaces non esse Matrimonii valide contrahendi, ita nec hujus Sacramenti.

- 49 II. Quod isthic Novatores offendit, sunt impedimenta juris Ecclesiastici. Negant nimirum Ecclesiæ eam potestatem, qua statuere possit aliquid, quo irritum reddatur Matrimonium. Sed enim, cum error hic proficiscatur ex eo, quod Matrimonio rationem Sacramenti inesse negent, nihilque in illo nisi humanum & civile agnoscant, veritate hujus Sacramenti a nobis jam asserta, hic quoque error alter abunde confutatus est. Adde: potestatis hujus usum & praxi Ecclesiæ perpetua, & definitione Concilii Lateranensis IV. Can. 50. ac rursus Tridentini Sess. 24. Can. 3. & 4. esse confirmatum. Nec propterea Ecclesia mutat materiam & formam a Christo institutam; quo enim is constitui voluit Matrimonii Sacramentum, non aliud est, quam contractus matrimonialis legitimus ac civiliter validus: quin determinaverit in specie infima, per quid præcise valor hic habeatur. Jam vero Ecclesia legitimum contractum a ratione Sacramenti nunquam excludit: dum autem certas statuit condiciones ac leges, quibus non servatis contractus matrimonialis, qui ante illas fuit legitimus, redditur irritus, id agit vi potestatis a Christo acceptæ, eoque spectantis, ut animarum bono ac Sacramenti reverentiæ opportunius consulatur. Sicut autem Ecclesia potest impedimenta statuere, ita in iisdem gravi ex causa etiam dispensare: de quo vide Tridentini cit. sess. Cap. 5. & Can. 3.



## De subjecti capacitate ad licitam ejusdem Sacramenti susceptionem.

Potest a fidelibus valide celebrari Matrimonii Sacramen-  
tum, quin propterea istud fiat etiam licite. Etenim si  
contractus matrimonialis ineatur sine ullo dirimente impedi-  
mento, non potest non esse validus: illicitus erit nihilominus,  
si quod impedimentum eorum, quæ *impedientia vel simplicia*  
dicuntur, interveniat. Ac id genus quidem olim impedi-  
menta numerabantur duodecim, ex quibus jam septem ab-  
olita sunt, scilicet: pœnitentia publica, incestus cum con-  
sanguinea uxoris in primo & secundo gradu, raptus alienæ  
sponsæ, uxoricidium, occisio Presbyteri, conjugium cum  
Moniali, & fraudulenta propriæ prolis ad Baptismum vel Con-  
firmationem susceptio eo sine, ut alter conjux frustretur con-  
jugali debito. His igitur abolitis quinque duntaxat deinde  
obtinuerunt juxta vulgatos illos versus:

*Ecclesiæ vetitum, nec non tempus feriatum,  
Atque Catechismus, sponsalia, jungito votum,  
Impediunt fieri, permittunt facta teneri.*

Ex his ipsis interim *Catechismi* impedimentum amplius in usu  
non est; quin per Tridentinum penitus sublatum videtur, ut  
cum Navarro, Coninck, Fagnano, & communiter aliis do-  
cet Sanchez L. 7. Disp. 10. hinc etiam laud. AA. monent, ut  
Parochus in Libro distinguat Patrimonios Catechismi a Patrinis  
Baptismi. Atque ita nunc ex impedimentis simplicibus qua-  
tuor tantum sunt reliqua, scilicet:

*Ecclesiæ vetitum, votum, sponsalia, tempus.*

# DISSERTATIO III.

## DE EFFECTIBUS ET PROPRIETATIBUS SACRAMENTI MATRIMONII.

### §. I.

#### *Qui sint Effectus Sacramenti Matrimonii?*

**P**erspecta Sacramenti Matrimonii natura, facile est de effectibus illius statuere. Nimirum

51 I. Vel ideo, quod Matrimonium sit verum novæ Legis Sacramentum, in Conjugibus rite dispositis ex opere operato efficit sanctificantem gratiam: non eam quidem primam, at secundam, seu augmentum illius, cum non mortuorum, sed vivorum sit Sacramentum. Certa hæc sunt ex iis, quæ L. I. de Sacr. in Gen. Diss. III. §. I. disputavimus: ac etiam ex Patrum doctrina hoc L. Dissert. I. §. II. a nobis jam laudata. Tridentino certe adeo non erat satis istud declarare Seff. 24. in Doctr. de Sacr. Matr. ut etiam deinde Can. 1. sub anathemate definiret.

52 II. Quod porro gratia hæc peculiare habet, est jus ei adnexum ad illas nominatim opportuno tempore conferendas actuales gratias, in quibus conjuges habeant remedium adversus mala, quæ per culpam primorum Parentum in nuptias irrepserunt: quibusque adjuventur ad implendas obligationes statui conjugali proprias. Quorum ratio est: quia universim in Sacramentis confertur sanctificans gratia simul cum jure in illa fundato ad auxilia tam necessaria, quam

quam conducentia ad finem Sacramenti; id genus vero memoratæ auxiliantes gratiæ non modo conducentes, sed & necessariæ sunt ad finem Sacramenti Matrimonii, ut clarum est. Quæ jam autem nominatim sint mala in Matrimonio cavenda: quæ item Conjugum obligationes, patebit ex §. sequ. Nunc in rem nostram referre suffecerit Tridentini doctrinam a Catechismo Rom. §. de Matr. Sacr. ita explicatam: *Sed gratiam quoque hoc Sacramento significari & tribui, in quo maxime ratio Sacramenti inest, ea Synodi (Trid. sess. 24. in doctr. de Sacr. Matr.) verba declarant: Gratiam vero, quæ naturalem illum amorem perficeret, & indissolubilem unitatem confirmaret, Conjugesque sanctificaret, ipse Christus venerabilium Sacramentorum institutor atque perfector, sua nobis passione promeruit. Quare docendum est, hujus Sacramenti gratia effici, ut vir & uxor, mutua charitatis vinculo conjuncti, alter in alterius benevolentia conquiescat, alienosque, & illicitos amores & concubitus non quærat: sed in omnibus sit honorabile connubium, & thorus immaculatus.* Hebr. 13.

## §. II.

### *Quæ sint proprietates Sacram. Matrimonii?*

Post S. Augustinum & D. Thomam in 4. dist. 31. communiter Theologi tria numerant Matrimonii Bona: fidem scilicet, Sacramentum; & prolem. Nomine *fidei* venit ea pars justitiæ, qua Conjuges facta sibi mutuo in matrimoniali contractu promissa implent; nomine *Sacramenti* autem firmitas contractus conjugalis; per *prolem* demum intelligitur procreatio prolis, ejusque cura & institutio. His jam vero spectatis haud difficulter quisque deduxerit Matrimonii

monii proprietates, quarum ego præcipuas ad tria capita revoco: unitatem videlicet, quæ ad fidem pertinet: indissolubilitatem, quæ est Sacramenti; peculiare deinde Conjugum obligationes, quæ ex omnibus Matrimonii Bonis ortum habent.

### De unitate Matrimonii, eique opposita Polygamia.

**U**nitas Matrimoni consistit in eo, ut vir unam uxorem habeat, & vicissim; inde unitati huic adversatur polygamia. At quæ, inquires, illa? simultanea, an successiva? hæc de utraque habe.

- 53 **I.** Polygamia simultanea est, cum eodem tempore aut vir plures uxores, aut mulier plures habet viros. Atque hæc indubie pugnat cum unitate Matrimonii: estque hoc Legis gratiæ statu jure divino illicita simul & irrita ejusmodi conjunctio. Utrumque istud disertis verbis docet Tridentinum; *illicitam* quidem sess. 24. Can. 2. *irritam* autem ead. Sess. in Doctr. de Sacr. Matr. ubi ait: *hoc vinculo duos tantummodo copulari & conjungi Christus Dom. aperius docuit* &c. Tridentini doctrinam confirmat perpetua Ecclesiæ praxis & Traditio; nunquam enim in Ecclesia polygamia simultanea fuit permessa, imo semper ut jure divino illicita ac irrita est habita. Quam in rem faciunt Christi, Matrimonium ad primævam institutionem reducentis, & licentiam Patriarchis factam revocantis, verba illa Luc. 16. *omnis, qui dimittit uxorem suam, & alteram ducit, mœchatur; potiori igitur jure mœchatur, qui alteram ducit priore re-tenta.* Item illa Matth. 19. *propter hoc dimittet homo patrem suum & matrem suam, & adhærebit uxori suæ, & erunt duo in carne una;* in quæ verba Innocent. III. Cap. 8. de Divort. *non dixit tres vel plures, sed duo: nec dixit, adhærebit uxoris, sed uxori.* At

At senior Valentinianus Imper. (inquires) duas habuit uxores: imo & aliis conjugii hujusmodi veniam fecit publico edicto? Quod si istud ita se habeat, indubitanter affirmo, tam factum quam edictum Valentiniani iniquum fuisse: certe autem suffragio Ecclesiæ nunquam est approbatum. Cæterum tota hæc narratio dubiæ est fidei: cum apud neminem scriptorum, præter Socratem, reperitur.

II. Ac hæc quidem in Lege Evangelica in dubium <sup>54</sup> vocari nequeant; controversitur autem: num, & quo jure universim pro quovis statu illicita sit nominatim simultanea uxorum pluralitas? Mihi videtur cum iis sentiendum, qui illam dicunt universim illicitam, ac legi naturali repugnare citra peculiarem Dei dispensationem. Etenim Adamus ex solo instinctu a Deo naturæ auctore sibi indito (nondum quippe tum ulla extabat lex Dei positiva prohibens) Gen. 2. dixit: *relinquet homo patrem suum & matrem suam, & adheret uxori suæ, & erunt duo in carne una*; certe autem duorum in una carne conjunctio simultaneam uxorum pluralitatem excludit. Inde Hieronymus in C. 19. Matth. ait: Christum ibid. V. 6. & 8. ad confirmandam in Matrimonio uxoris unitatem, *adducere in testimonium S. Scripturam & naturalem legem*. Quid quod pluralitas hæc vel ideo lege naturali sit prohibita, quod secundariis saltem Matrimonii finibus adversetur. Nimirum 1mo, vir & uxor ex contractu inito quoad thorum sunt pares: quia teste Apostolo 1. Cor. 7. sicut corpus uxoris est in potestate viri, ita pariter corpus viri est in potestate uxoris; tam uxori proinde quam viro infertur injuria, cum alterutrius corpus alteri traditur, id quod fieret in hoc casu. 2do, inter alios Matrimonii fines est animorum conjunctio, & ordinata proles cura ac educatio: quibus quanto impedimento esse possit pluriū uxorum societas, pronum est cogitare.

Con-

Consulto autem est additum, *citra Dei dispensationem*: nam Patriarchæ veteres & alii in Lege Mosaica post diluvium, Deo dispensante, pluribus simul veris uxoribus fuerunt copulati, ut Abraham Gen. 16. Jacob Gen. 29. & 30. pluresque alii. *Tunc enim* (Chrysostomus ait Hom. 56. in C. 30. Gen.) *quia principia erant, permissum fuit, cum duabus, vel pluribus uxoribus misceri, ut genus humanum propagaretur.* Et Augustin. L. 3. de doctr. Christ. C. 12. *sufficiendæ prolis causa, erat uxorum plurium simul uni viro habendum inculpabilis consuetudo.* In eundem sensum loquuntur Ambrosius L. 1. de Abraham C. 4. Hieronymus in Ep. ad Oceanum, & Patres alii. Dispensationem porro hanc per Dei revelationem innotuisse, communis est opinio; at num revelatio hæc facta sit speciatim singulis, an Abrahamo soli, ab eoque dein aliis tradita? controversum est, nec certo definiri potest. Illud in hac sententia pro indubitato habendum: uxorum pluralitatem, accedente divina concessione, non repugnare juri naturali, hocque proinde conditionatum duntaxat, non absolutum esse. Nimirum, facta hac dispensatione, Deus suppeditat media, quibus ex id genus polygamia provenientibus malis occurratur: simulque suprema sua potestate jus, quod uxor una ex contractu matrimoniali in corpus mariti haberet exclusive, in plures dividit.

Neque pugnat adversus hanc opinionem, quod Gen. 25. & aliis Scripturæ locis mulieres, uxori primæ a Patriarchis adjunctæ, vocentur concubinæ: quodque virorum pluralitas ex communi Doctorum sensu ita sit illicita, ut nec Deus in illa dispensare possit. Nam (quod ad primum attinet) eædem mulieres in Scriptura dicuntur etiam uxores, ut Gen. 16. ac etiam C. 25. Quæ duo ut concilientur invicem, Scripturæ interpretes observant: apud Hebræos duo fuisse

fuisse uxorum genera. Aliquæ non tantum prolis causa, sed & ad bonorum communionem & rem familiarem administrandam assumebantur: atque harum proles adibant Patris hæreditatem. Aliæ, quæ modo uxores, modo concubinæ in Scriptura vocantur, assumebantur solum ad procreandos liberos, quibus tamen jus hæreditatis non competebat. Omnes igitur erant uxores veræ quoad vinculum: quamvis honoris & potestatis gradu diversæ. A virorum autem pluralitate non recte argui, inde patet: quod ea repugnet fini primario Matrimonii, hoc est, prolis generationi, quæ virorum plurium commixtione communiter impeditur; ac tametsi quandoque non impediatur, incertum nihilominus reddit patrem, quod prolis educationi adversatur. Vide plura apud Bellarminum L. de Sacr. Matr. C. 10. & 11. ubi disputat contra Lutherum, polygamiam uxorum etiam in Lege Evang. admittentem.

III. His de simultanea polygamia præmissis, dicendum 55 est pariter de ea, quæ successiva dicitur, quamque Montanistæ & Novatiani damnarunt. Est autem polygamia successiva, cum, mortuo conjugē uno, alter ad secundas vel posteriores transit nuptias. Hanc jam vero esse licitam, nec ullo jure naturali aut divino prohibitam, Catholicis omnibus certum est imo ex Apostolo 1. Cor. 7. dicente: *mulier alligata est legi quanto tempore vir ejus vivit; quod si dormierit vir ejus, liberata est, cui vult nubat, tantum in Domino.* Id quod perinde de viro intelligendum est, cum par sit ratio pro utroque conjugē. Certum est 2do ex Traditione, cujus testes sunt Basilii Ep. ad Amphilocho, Can. 41. Ambrosii L. de Viduis, Augustini L. de bono viduit. Epiphani. Hær. 59. & plures alii. Unum his omnibus antiquiorem libeat audire Clementem Alex. L. 3. Strom. *si cui Apostolus, inquit, propter intemperantiam & usionem ex venia secundum concedit*

R. P. Muszka Tom. II. de Sacr.

S s s s

Ma-

*Matrimonium, hic quidem non peccat ex testamento: non est enim lege prohibitus. Eandem Traditionem confirmat Concil. Nicænum l. Can. 8. Laodicænum Can. 1. & Florent. in Decr. pro Arm. ubi, post laudata Apostoli verba, diserte declaratur, non solum secundas, sed tertias, & quartas, atque ulteriores Nuptias, si aliquod canonicum impedimentum non obstat, licite contrahi posse; quod ipsum nominatim jam antea dixerat Hieronymus in Apolog. ad Pammach.*

Fatendum interim, Ecclesiam semper optasse, ut fideles a secundis nuptiis abstinerent; non quidem quod illas secundum se sumptas damnaret: verum quod essent incontinentiæ signum, eoque majus, quo sæpius repeterentur. Inde in Ecclesia Græca bigami subijciebantur Pœnitentiæ publicæ: compluresque Patres cum Basilio & Gregorio Naz. durioribus verbis quandoque Secundas nuptias compellabant *castigatam fornicationem, iniquitatem &c.* Quibus omnibus non damnabantur, nec puniebantur ipsæ nuptiæ: sed incontinentia, quæ ex repetitis nuptiis præsumitur.

### De Indissolubilitate Matrimonii.

**I**ndissolubilitas in Matrimonio spectari potest vel quoad vinculum, vel quoad thorum & habitationem tantum. Utraque diffusum est in Jure Canonico, ac etiam Theologia Morali & Polemica argumentum, cujus præcipua hæc sunt capita.

- 56 I. Matrimonii quoad vinculum indissolubilitas est juris divini, tam positivi quam naturalis, ita ut sine concessione divina solvi nunquam potuerit. Et jus quidem positivum eruitur ex Christi ad Phariseos responso Matth. 19. ubi, post recitata ex Genesi verba, subjungit: *quod ergo Deus conjunxit*



*junxit, homo non separat.* Jus vero naturale colligitur tum ex eo, quod vinculi matrimonialis solubilitas adverteretur fini Matrimonii, animorum videlicet conjunctioni, convenienti prolis generationi, ejusdem educationi &c. tum quod Adamus, nulla lege positiva duce, vinculum hoc indissolubile esse divini Spiritus instinctu (ut Trid. sess. 24. notat) pronuntiaverit, cum dixit Gen. 2. *quamobrem relinquet homo patrem suum & matrem, & adhærebit uxori suæ, & erunt duo in carne una.*

Dictum est, *sine concessione divina*: lex quippe hæc tam positiva quam naturalis non est absoluta, sed conditionata tantum, *si nimirum Deus non dispensaverit*; id quod asserendi argumentum suggerit Lex utriusque Testamenti.

In Lege nimirum Mosaica per libellum repudii solvebatur Matrimonii vinculum, ex dispensatione divina, ut indicant illa Deuter. 24. verba: *scribet libellum repudii, - & dimittet eam de domo sua; cumque egressa alterum maritum duxerit, & ille quoque - dederit ei libellum repudii, - vel certe mortuus fuerit, non poterit prior maritus recipere eam in uxorem.* Tamen si autem libellus repudii Judæis permissus fuerit ad duritiam cordis, hæcque illos a peccato non excusaverit: permissio nihilominus, occasione hujus duritiæ a Deo facta, sufficiens erat ad validam, imo & licitam Matrimonii solutionem, ut docet S. Th. in suppl. qu. 67. Art. 3. ad 4. Inde, cum Deut. 24. V. 4. mulier repudiata, si alteri nupserit, *polluta & abominabilis coram Domino* dicitur, sensus est esse pollutam & abominabilem in ordine ad id, ut a secundo marito repudiata redeat ad primum, id quod deducitur ex Versibus 2. 3. & 4. invicem collatis; nam si ad primum redeat, videtur ad tempus duntaxat dimissa, & quasi commodata viro alteri, quod est abominabile.

§§§ 2

Quod

Quod vero ad Legem Evangelicam attinet, in hac quoque certum est 1mo, infidelium Matrimonium, etiam consummatum, dissolvi posse ex Dei dispensatione, in gratiam Religionis Christianæ concessa: ita videlicet, ut con ux ad fidem conversus liberetur a vinculo priore, possitque contrahere cum fidelis, si nimirum prior infidelis ei aut penitus cohabitare nolit, aut non nisi cum Creatoris contumelia, vel eum pertrahendo ad peccatum. Habetur istud ex C. *quanto de Divortiis*, Declaratione videlicet Innocentii III. eaque fundata in Apostoli verbis 1 Cor. 7. *si infidelis discedit, discedat: non enim servituti subiectus est frater aut soror in huiusmodi*. Certum item est 2do, etiam fidelium Matrimonium non consummatum dissolvi posse, ac re ipsa dissolvi per solemnem professionem, in Religione approbata factam, ut constat ex C. *verum*, & C. *Ex publico*, de Convers. Conjug. ac etiam ex definitione Tridentini sess. 24. Can. 6. Imo quidam cum Navarro docent, huiusmodi Matrimonium ex aliis quoque gravibus causis dissolvere posse Pontificem.

Ex quibus, ut vides, aperte conficitur: etiam in Lege Evang. per dispensationem divinam solvi posse Matrimonii vinculum. At illud, quod Græci & Novatores docent, solutionem hanc nimirum fieri propter adulterium, omnino erroneum est, ut constat ex Florent. in Decr. pro Arm. & Trident. sess. 24. Can. 7. Etenim in scriptura generatim & absolute dicitur: *omnis, qui dimittit uxorem suam, & alteram ducit, mæchatur; & qui dimissam a viro ducit, mæchatur*. Lucæ 16. Idem legitur Mar. 10. item 1 Cor. 7. V. 10. 11. & 39. Quibus adde consentientem Patrum doctrinam apud Bellarminum L. de Sacr. Matr. ubi argumentum istud C. 16. & 17. copiose pertractat. Hoc ipsum porro potiori jure intelligi oportet de Matrimonio fidelium consummato.

II. Indissolubilitas Matrimonii, quoad thorum tantum & 57  
 cohabitationem, minoris est rigoris. Quamvis enim hæc quo-  
 que sit propria Matrimonio: aliquando nihilominus Conjuges  
 Christiani, salvo Matrimonii vinculo, licite possunt separari  
 quoad thorum & cohabitationem, ut constat ex communi  
 Ecclesiæ praxi, & pluribus Capp. Tit. de divortiis. Causæ  
 autem, ex quibus separatio hæc fieri potest, sunt e. g. si  
 communi consensu Conjuges consentiant ad vitam perfectio-  
 rem amplectendam; ob adulterium unius partis, imo & alia  
 crimina, quæ vergunt in grave detrimentum spirituale aut  
 corporale alterius conjugis: uti esset sævitia, furor, apostas-  
 sia, lepra, vel alius morbus contagiosus &c. Consule de his  
 Bellarminum in paulo antè cit. L. Cap. 14. cum primis vero  
 Canonistas in Tit. de Divort. commentantes.

### De obligatione conjugum.

EX tribus jam memoratis Matrimonii Bonis triplex præci-  
 pua nascitur obligatio. Et quidem

I. Ex Fidei bono obligantur Conjuges ad reddendum si 58  
 bi mutuo debitum conjugale Apostolo ipso monente 1. Cor.  
 7. *uxori vir debitum reddat, similiter & autem uxor viro; &*  
*rursum, nolite fraudare invicem.* Nec dubium est contra justitiam  
 graviter peccari, si uno conjugum petente alter sine justa causa  
 debitum neget; quid enim istud? nisi fidem in contractu datam  
 infringere, alterum incontinentiæ periculo exponere, occasionem  
 odio & dissensionibus præbere &c. Dixi sine justa causa; non raro  
 quippe denegatio debiti excusatur a peccato gravi, imo etiam  
 levi: ut si remissius petatur & admittatur excusatio: si cre-  
 bro admodum exigatur, aut loco indebito, vel tempore pror-  
 sus importuno: excusat item notabilis morbus, periculum  
 contagionis &c.

59 II. Ex *Sacramenti* Bono obligantur, ut uxor quidem per subjectionem simul & charitatem conjuncta sit viro : hinc illam rursus sincera dilectione complectatur. Matrimonium quippe, ut Sacramentum, est signum unionis Christi cum Ecclesia, confertque Conjugibus gratiam, qua divinum hoc exemplar imitentur. Inde Apostolus ad Ephes. 5. ait : *sicut Ecclesia subiecta est Christo, ita & mulieres viris suis in omnibus*; cujus rationem jam ante præmisit, cum diceret : *quoniam vir caput est mulieris, sicut Christus caput est Ecclesia*. Et mox : *viri diligite uxores vestras, sicut & Christus dilexit Ecclesiam &c.* Profecto autem, si Conjuges aliena sint ab invicem voluntate, & mutuis animorum scindantur dissidiis, hunc charitatis, qua Christus & Ecclesia junguntur, nexum non referunt : quodque hinc consequitur, quantum est per ipsos, Matrimonio rationem ac dignitatem Sacramenti adimunt.

60 III. Ex *Prolis* Bono demum obligantur, ut conjugalī carnis commixtione prolis generationem intendant : certe ob solam voluptatem opus conjugii exercitum nunquam caret culpa, saltem veniali, ut constat ex Prop. 9. ab Innocentio XI. An. 1679. damnata. Præclare in hanc rem Augustinus L. de Bono Conjug. C. 10. *Concubitus*, inquit, *necessarius causa generandi, inculpabilis, & solus ipse nuptialis est*; ille autem, qui ultra istam necessitatem progreditur, jam non rationi, sed libidini obsequitur. Et hunc tamen non exigere, sed reddere Conjugi, ne fornicando damnabiliter peccet, ad personam pertinet conjugalem : si autem ambo tali concupiscentiæ subiguntur, rem faciunt non plane nuptiarum. Sicut autem Conjuges in opere Matrimonii generationem prolis spectare debent : ita pariter deinde bonum prolis procurare necesse habent. Unde graviter peccant, si conceptionem prolis impedian, aut conceptam extinguant, vel natam ab-  
jiciant,

jiciant, vel denique incuria sua aut prava educatione ejus mores corrumpant. *Qui hoc faciunt* (audiatur rursus Augustin. cit. L. C. 15.) *quamvis vocentur conjuges, non sunt, in effectu scilicet, nec ullam nuptiarum retinent veritatem: sed honestum nomen velandæ turpitudini obtinent. Produuntur autem, quando consueque progrediuntur, ut exponant filios, qui nascuntur inuitis; olerunt enim habere vel nutrire, quos gignere metuebant. Itaque cum in suos sedit, quos nolens genuit, tenebrosa iniquitas, clara iniquitate in lacem promitur, & occulta turpitudine manifesta crudelitate convincitur.*

## DISSERTATIO IV.

### DE RITIBUS AD MATRIMONII SACRAMENTUM PERTINENTIBUS.

#### §. I.

*Quæ dispositionis instar ex ritu Ecclesiæ præmittantur Sacramento Matrimonii?*

Solemnnes cæremoniæ, quæ juxta Ecclesiæ disciplinam, celebrationem Sacram. Matrimonii præcedunt, sunt sponsalia, & publica sponforum denuntiatio; de his igitur, eorumque fine, ac ritu commemoranda sunt præcipua.

De natura & fine sponsalium.

I. Sponsalia a *spondendo* nomen habent: suntque mutua sponsio, seu promissio Matrimonii futuri, per quod differunt a Matrimonio de præsentis. Possunt autem contrahi vel absolute

lute per simplicem promissionem: vel sub conditione contractui adjecta. Constantem illorum in Ecclesia esse usum, testantur Canones in Decr. Gratiani & LL. Decretalium repetiti, iidemque ex vetustissimis perinde ac posterioris æri Patribus & Conciliis desumpti. Horum interim cum nullus sit, qui communi lege absolutam adstruat necessitatem Sponsalium, indubium est, iis etiam non præmissis ratum ac firmum esse Matrimonium. Laudabilis nihilominus ac pius est Sponsalium usus ex pluribus causis. *Institutum est* (inquit Augustin. L. 8. Conf. C. 3.) *ut jam pacta sponsæ non tradantur statim, ne vilem habeat Maritus datam, quam non suspiravit sponsus dilatare.* At præcipua causa est: ut fideles rite dispositi accedant ad magnum Matrimonii Sacramentum. Sunt quippe Sponsalia juxta D. Thomam veluti quoddam status conjugalis tyrocinium, in quo Sponsis elaborandum est: ut Christianorum conjugum condiscant officia, seque ad ea subinde præstanda, & ad percipiendam hujus Sacramenti fructum comparent.

- 62 II. Attenta jam vero sponsalium natura, ultro patet, gravem ex illis oriri obligationem contrahendi Matrimonium, promissio quippe sponsalitia est in re gravi: in tali autem universim-absque piaculo fas non est recedere a legitimis promissis, dictante id ipsum, imo exigente jure naturali. Atque hæc sententia post D. Thomam in 4. dist. 27. Art. 1. ad 2. est communis apud Theologos. Non desunt interim complures causæ, ex quibus obligatio hæc potest desinere, & Sponsalia dissolvi, ut constat ex L. 4. Tit. de Sponsalibus, præsertim Capp. *Præterea. Ex literis. Requiritur.* & pluribus aliis. Id genus causæ sunt: mutuus sponsorum in dissolutionem consensus; defectus dotis promissæ; subsequens Matrimonium cum alio contractum; fornicatio

nicatio unius post sponsalia; superveniens notabilis mutatio, ut est gravis morbus, infamia &c.

### De ritu Sponsalium.

**L** Si natura contractus sponsalitii spectetur, ratus ac firmus est, modo mutua inter sponfos intercedat promissio, eaque signo aliquo exprimatur; hinc ad sponsalium valorem nullo jure communi requiritur peculiaris aliqua solemnitas ac cæremonia. Non jure veteri: secundum hoc enim vel Matrimonia clam & sine ullo solemnī ritu celebrata fuisse rata ac vera constat ex Tridentino; quid nī igitur etiam sponsalia, quæ sunt accessorium quid ad Matrimonium? Non etiam jure novo: nam idem Tridentinum circa sponsalium celebrationem nihil peculiare constituit; valent igitur etiamnum perinde ac olim, tametsi clam & absque solemnī cæremonia ineantur. Atque in hoc consentientia sunt Theologorum non minus quam Canonistarum suffragia.

II. Ex more nihilominus tam veteri quam hodierno, 64 eoque judicio Ecclesiæ approbato, communiter ac regulariter Sponsalia celebrantur publico & solemnī ritu: qui ipse attamen pro temporum ac regionum varietate est varius. Ita, usu apud plurimos recepto, sponsalitia promissio peragitur coram Parentibus & cognatis sponforum: in quibusdam vero Diocæsisibus, præsertim Galliæ, etiam Paróchi præsentia requiritur. Certe juxta Conc. Rhemense An. 1583. sponsalia fieri debent *non nisi coram Paræco, idque in Ecclesia, & non alibi, nisi de licentia Ordinarii, quatuor vel tribus testibus præsentibus.* Idem jam ante præscripsit Synodus Colonienſis An. 1280. Cap. 10. Synodus autem Wirgomiensis An. 1240. præterea addit, ut *jejuna saliva*

R. P. Mufzka Tom. II. de Sacr.

Tttt

fiant.

fiant. In plurimis etiam locis porriguntur manus, traduntur annuli, offeruntur munera *jocalia*, adjicitur *arrha*, quin & conficiuntur *tabula matrimoniales* pacta futuri Matrimonii continentes. Quæ omnia in testimonium sponsionis & futuri Matrimonii securitatem fieri, res ipsa docet.

- 65 III. Ritus porro hujusmodi antiquos esse, declarant veterum monumenta. Annuli sponsalitii meminit Tertulianus L. de Cultu fœmin. ubi eum *pronubum* vocat: eundem commemorat Gregorius Turon. in L. de Vitis Patrum C. 20. & Isidorus L. 20. Ethymolog. ubi ait, *fœminas non fuisse usas annulis, nisi quos Virgini sponsus miserat*. Arrharum speciem referebant nummi, quos in desponsatione veteres offerebant; quorumque meminit Fredegarius C. 18. in sponsalibus Clodovei Reg. Franc. cum Chlotilde. Notat vero isthic Cl. Martene de ant. Eccl. Rit. L. 1. C. 9. Art. 3. nummos hos non fuisse communes, sed in usum hunc peculiariter cusos; quorum Turonensis unus ab eo visus, & cit. Art. repræsentatus, in una facie refert duo lilia, in altera signum Crucis cum epigraphe: *Pour epouser*. Tabularum Matrimonialium sæpe mentionem injicit Augustinus, unaque ex iis valide probat, Matrimonium ineundum esse non explendæ libidinis, sed liberorum causa. *Ut non erubescant*, inquit Serm. 51. *parentes cum dant filias, recitantur tabula: ut sint soceri, non lenones. Quid ergo de tabulis recitatur? Liberorum procreandorum causa &c.*

### De publica Sponsalium denunciatione.

- 66 I. Antequam a contractis sponsalibus procedatur ad Matrimonium in facie Ecclesiæ celebrandum, præmittuntur denunciationes publicæ, quæ in Jure vocantur *Ban-na*. De his nominatim agitur Cap. fin. de Clandest. Despons. item



item in Tridentino sess. 24. de Reform. Matr. ubi Cap. 1. *Lateranensis Concilii, sub Innocentio III. celebrati, vestigiis inhaerendo præcipit, ut in posterum, antequam Matrimonium contrahatur, ter a proprio contrahentium Parocho tribus continuis diebus festivis in Ecclesia inter Missarum solemnias publice denunciatur, inter quos Matrimonium sit contrahendum &c.* Quis autem harum denunciationum sit finis, ex sequentibus eod. Cap. verbis colligitur: ut nimirum impedimenta, si quæ sint inter futuros conjuges, certius innotescant, impediunturque Matrimonia illegitima. Nec dubitari potest de antiquitate hujus in Ecclesia disciplinæ, ut quæ originem ducere videtur a primis Christianis, quibus (ut S. Ignatius M. indicat in Ep. ad Polycarp.) moris erat Episcopos & Sacerdotes consulere de ineundo Matrimonio, ne quid minus caute in re tanti momenti agerent. Atque hoc ipsum esse illud complures cum Albaspinæo existimant, quod Tertulian. L. 2. ad Uxorem C. 9. dicat, Ecclesiam *conciliare* Matrimonium. Utut interim sit istud, denunciationis Sponsalitiæ antiquitas satis superque probatur vel ex Conc. Lateranensi IV. An. 1215. quod, cum C. 51. usum hunc generali lege confirmet, indicat utique non esse novum, sed jam antea in quibusdam saltem Ecclesiis observatum.

II. Quod si porro de hujus denunciationis necessitate quæras; certum est non esse necessariam ad valorem & substantiam Sacramenti; cum juxta Trident. cit. Cap. ex causa legitima possit celebrari Matrimonium sine ulla denunciatione prævia. Declaravit equidem Concilium irrita esse Matrimonia clandestina; at hoc nomine veniunt solum illa, quæ sine Parocho & testibus celebrantur. Necessitas attamen præcepti in dubium vocari nequit propter clara verba loco supra cit. Concilii Lateran. & Trident. Ex quo postremo simul constat, facultatem in publicis his denunciationibus

bus dispensandi ad Episcopos pertinere; quamvis autem ibid. causam dispensationis concedendæ non aliam adferat, quam *si probabilis sit suspicio Matrimonium malitiose impediendum*: quia tamen simul Episcopi *prudentiæ & judicio* relinquit rem totam, utique nec alias justas & graves causas excludit.

## §. II.

*Qui Ritus in solemni ministracione Sacram. Matrimonii juxta Ecclesiæ disciplinam sint aliquando observati, aut nunc observandi?*

**N**E a proposita, & hætenus (quoad licuit) a nobis observata Ritus Sacramentales describendi ratione recedamus: isthic quoque tam veteris quam modernæ disciplinæ memores erimus, adjecturi etiam, quæ Græcis sunt peculiariora. Dicemus autem primum de tempore & loco celebrandi Matrimonii: deinde de manuum conjunctione, annulo, & benedictione nuptiali: tum de flammeis & fertis: demum de Communione nuptorum, pane item, poculo, & thalamo nuptiali.

De tempore & loco Matrimonii solemniter celebrandi.

- 68 I. **C**um quædam tempora peculiariter destinata sint poenitentiae & fidelium devotioni, cum quibus carnale commercium, & festiva hilaria, quæ nuptias fere comitari solent, componi nequeunt: sapienter provisum est ab Ecclesia, ut hujusmodi temporibus non celebrentur Matrimonia. Nec tamen circa hoc *Ecclesiæ vetitum* eadem semper fuit disciplina. Concil. Laodicænum Sec. IV. habitum Can. 52. interdicat Nuptias tempore Quadragesimæ: quod ipsum
- Nico-

Nicolaus I. ad Consulta Bulgar. C. 48. confirmat. At Concil. Ilerdense sub Symmacho Papa sub init. Sec. VI. interdictum hoc (ut legere est apud Gratian. Cau. 33. qu. 4.) sub poena separationis Conjugum extendit *a septuagesima usque ad octavas Paschæ, item tres hebdomades ante festivitatem S. Joannis Bapt. & ab adventu Domini usque post Epiphaniam.* His temporibus præterea in Concil. Nemausensi An. 1284. & Senonensi An. 1485. adjiciuntur *Dies Rogationum: quia tunc* (ut postremum Art. 3. C. 5. habet) *omnes magis, quam aliis temporibus, debent devotioni & orationi intendere, a quibus tamen plurimum retrahit carnale commercium.* Ex eadem causa Conc. Aquisgranense. An. 836. Can. 18. vetuit diebus Dominicis nuptias *pro reverentia tantæ solemnitatis celebrari:* quod ipsum jam antea Gregorius III. in suis Judiciis Cap. 30. decreverat, poenitentia etiam unius vel trium dierum contra facientibus imposita. Demum (teste Mabillonio in suo Itinere Germ.) in quibusdam Germaniæ locis prohibentur Nuptiæ totis triginta diebus post Festum Assumption. B. V. M. Nunc quod ex Decreto Tridentini Sess. 24. de Reform. Matr. Cap. 10. lege universali obtinet, *ab Adventu Domini N. J. C. usque in diem Epiphaniæ, & a Feria IV. Cinerum usque in octavam Paschatis inclusive, antiquæ solemnium nuptiarum prohibitiones diligenter ab omnibus observandæ sunt: in aliis vero temporibus nuptia solemniter celebrari permittuntur.* Hæc eadem in Rituali Rom. Pauli V. Tit. de Sacr. Matr. recensentur tempora, quibus prohibitiæ sunt Nuptiarum solemnitates; ubi simul additur: *Matrimonium autem* (intellige, seclusa solemnitate benedictionis, hilarium &c.) *omni tempore contrahi potest.*

II. Sed nec locus celebrandi Matrimonii arbitrarius est. 69  
Certe jam a veteri in pluribus Diœcesibus sancitum novimus, ut id pro reverentia tam Sacramenti, quam benedictionis

nuptialis in Ecclesia fieret ; ita apud Martene sæpe citato L. & C. Ar. 2. legitur in antiquis statutis Ecclesiæ Lingonenfis, Macloviensis, & Mediolanensis. Quin apud eundem in privatis domibus & Oratoriis sub anathematis interminatione iniri Matrimonium vetant statuta synodalia Guillelmi Ep. Andegav. & Concilium Senonense sub Tristando Archi-ep. Idem nihilominus ibid. refert, aliquando solemnem nuptiarum benedictionem in domo nubentium ad thalamum celebratam, cujus ritus exemplum profert ex Actis S. Amatoris Ep. Antistiodor. apud Bollandistas ad 1. Maji. Ad hodiernam quod attinet disciplinam, tam ex sensu Tridentini Sess. 24. Cap. 1. insinuat, quam ex praxi communiter recepta, ac etiam in Pauli V. Rituali Rom. passimque aliis præscripta in Templo celebrari oportet Matrimonia. Ritualis Rom. verba sunt : *Matrimonium in Ecclesia maxime celebrari debet ; sed si domi celebratum fuerit præsentem Parochum & testibus, sponsi veniant ad Ecclesiam benedictionem accepturi.* Eadem est Græcorum disciplina : nisi quod apud eos sponsi primum pro foribus consistant, nec nisi acceptis a Sacerdote accensis cereis ab eodem in templum inducantur, ut videre est in Euchologio a laud. Martene relato. Hæc nihilominus non officiant, quominus ex indulto Ecclesiæ aliquando Matrimonia solemniter celebrentur in privatis domibus vel Oratoriis : quod in Nuptiis Principum fieri experimur.

### De manuum conjunctione, annulo, & benedictione nuptiali.

- 70 I. **P**ost consensum matrimonialem præstitum sponsi jungunt manus in testimonium fœderis initi, ejusque confirmationem : uti istud in Rituali Romano, passimque aliis præscribitur. Ritus hujus meminere Tertullianus L. de veland. Virgin. C. 11. & Gregorius Nazianz. Ep. 57. ad

ad Anysum, ac etiam multa veterum Ritualia apud Martene : unde moris hujus antiquitatem colligas. Idem nihilominus non legitur in Græcorum Euchologio a Martene cit. Ar. 2. relato. In quibusdam præterea Ecclesiis conjunctas sponforum manus stola circumvolvit Sacerdos, quo significet, conjunctionem eorum ab Ecclesia acceptari, & ratam haberi.

II. Alterum, quod a contracto Matrimonio, ac etiam 71 per Sacerdotis verba confirmato, Latinorum Ritualia præferibunt, est benedictio annuli: quem dein sponsus digito annulari sinistrae manus sponsæ imponit, Sacerdote dicente, *In nomine Patris &c. vel, Confirma hoc Deus &c.* Cæremoniæ hujus antiquitatem rursus docent vetustissima Ritualia apud Martene; ejusdem etiam meminit S. Isidorus L. 2. de divin. Offic. C. 19. ubi simul significationem ejus explicans, *illud vero, inquit, quod annulus a sponso sponsæ datur, fit hoc vel propter mutuæ fidei signum: vel propter id magis, ut eodem pignore eorum corda jungantur.* Apud Græcos (teste Allatio L. 3. de consens. Occid. & Orient. Eccl. C. 16.) Sacerdos ex altari duos annulos accipit, unum aureum, argenteum alterum; & aureum viro, argenteum mulieri, recitans verba ad hoc præscripta, exhibet: annulos postea immutat Compater, sive Fidejussor, Sacerdote orante &c. Apud Martene in Græcorum Euchologio præterea additur: *crucem super sponforum capita a Sacerdote faciendam annulis; at benedictionis annuli nulla fit mentio.*

III. Benedictio nuptiarum, ut res ipsa indicat, eum in finem ordinatur, ut Neo-nuptis a Deo impetrentur gratiæ statui 72 conjugali opportuniæ. Usus porro ejus jam in primæva Ecclesia fuisse testimonio sunt Tertullianus L. 2. ad Uxorem, Ambrosius Ep. ad Vigilium, Siricius in Ep. ad Himerium, & plures alii. Certe Hormisdas sub init. Sec. VI. Papa adjecto etiam præcepto morem

rem hunc confirmavit, ut legitur Cau. 33. qu. 5. ubi, *nul-  
lus fidelis, inquit, cujuscunque conditionis sit, occulte nuptias  
faciat, sed benedictione accepta a Sacerdote publice nubat in Do-  
mino.* Est autem ex veteri ac hodierno Ecclesiæ ritu duplex  
Nuptiarum benedictio. Prima fit, dum sponsis mutuo con-  
sensu contrahentibus Sacerdos dicit, *in nomine Patris &c. vel  
ego vos conjungo &c.* aut recitat Orationem quæ post annuli  
traditionem in Ritualibus præscribitur. Altera benedictio est,  
quæ conferri solet inter Missarum solemnias; de hoc Rituali  
Rom. ita habet: *si benedicendæ sint nuptiæ, Parochus Missam  
pro sponso & sponsa, ut in Missali Romano, celebret, ser-  
vatis omnibus, quæ ibi præscribuntur.* Dicitur, *si benedicendæ  
sint*: nam ex more in plurimis Ecclesiis recepto secundis &  
ulterioribus nuptiis hæc altera benedictio non impenditur  
ex causis mox referendis. Fuisse autem istud jam antiquitus  
observatum, constat ex S. Cæsario Sec. VI. Patre, qui Serm.  
289. in Append. novæ edit. S. Augustini hæc scribit: *qui  
uxorem optat accipere, sicut illam virginem invenire desiderat,  
ita ipse usque ad nuptias virgo sit; quia si non fuerit, bene-  
dictionem accipere non merebitur.* Causam hujus moris insi-  
nuat Durandus in Rationali L. 1. C. 9. ubi, *vir & mulier,  
inquit, ad digamiam transiens, matrimonium contrahendo non  
debet a Presbyteris benedici: quia, cum alia vice benedicti sint,  
eorum benedictio iterari non debet. Non ergo debent nuptiæ be-  
nedici, nisi ubi virgo cum virgine contrahit.* Et infra: *quod  
quidem ad exhortationem continentia nescitur introductum; qui-  
bus verbis insinuat, benedictionem hanc negari propter in-  
continentiæ speciem, quam præ se ferunt secundæ & ulte-  
riores nuptiæ.* Diverfa ab his causa redditur in Rituali Leodien-  
si, cujus verba recitavimus supra N. 40. V. 4to Rituali &c.

Quamvis autem morem hunc Concil. Lateranense III.  
sub Alexandro III. habitum confirmaverit, ut legitur Cap. 1.  
de

de secundis Nuptiis : ac de eodem observando Rit. Rom. Pauli V. speciatim Parochum moneat : sicubi tamen oppositum etiamnum in usu est, licebit cuique Ecclesiæ suæ disciplinam sequi.

## De flammeis & fertis.

I. **O**lim sub Sacerdotali nuptiarum benedictione in signum 73 virginei pudoris velum purpureum (quod propter flammæ colorem *flammeum nuptiale* dictum est) super Ne-nuptos expandebatur. Ritus hic præscribitur in compluribus antiquis Ritualibus apud Martene : ejusdemque, præter Tertullianum & Siricium Papam, sæpius meminit Ambrosius. Ita L. de Virginit. C. 15. *utinam possem, inquit, revocare nupturas ! utinam possem flammeum nuptiale pio integritatis mutare velamine.* Et L. Exhort. ad Virg. C. 6. a nubibus putat duci nomen nubentium, eo quod obnubantur *velamine* : quo ipso *conjugium sanctificari* demum Ep. 19. asserit. Porro Bigami, qui nuptiali benedictione carebant, nec consequenter velabantur, tamquam qui pudorem omnem, cujus purpureum velum erat indicium, abjecissent, ut notat Martene. Hodie mos velandi nuptos penitus exolevit.

II. Præter ritum velaminis coronatio quoque Neo-nuptorum antiquis in usu fuit. Testis hujus est Tertullianus L. de Corona Militis C. 13. Gregorius Turon. L. 1. C. 42. Nicolaus Papa in Resp. ad Conf. Bulg. 6. 3. & alii complures. Quid interim ritu hoc veteres potissimum designari voluerint, quod certi dicam, non reperio ; si conjectura uti fas est, ad meram solemnitatem eum retulisse videntur : aut certe in signum pacis, cum ut plurimum ex olivæ ramusculis id genus corollæ neferentur. Illud certum ex MSS. Actis S. Alexii impostas fuisse a Sacerdote nuptorum capitibus : asseruas.

item deinde in Ecclesia, quod nominatim commemorat Nicolaus Papa paulo ante laudatus. Nunc ritus hic Latinis amplius in usu non est: nisi quod ex communi more sponsa seroto viridi ornata in templo se sistat in signum virginitatis ad Matrimonium allatæ.

Græci contra etiamnum solemniter ritu sponfos coronant, & quidem (ut ex Goario refert Du-Cange in Glossario græco) corollis ex olivæ ramo, candida vel purpurea seta circumdato, contextis. Quamvis autem primitus bigamos & trigamos non coronarent, id tamen progressu temporis immutatum est eo cum discrimine: ut cum una nubentium pars virgo esset, hæc quidem in capite, altera vero in humero coronaretur. Quem morem, ceu ridiculum & absurdum, insectans Theodorus Studita in Ep. ad Naucraticum, etiam tertio nubenti, inquit, ubinam ponetur corona? in manu an ad genu, cum ea, quæ vidua nubit, in humero coronetur? Vide plura apud Auct. Perp. Fid. Tom. 5. L. 6. C. 2. ubi simul notat, ab hoc coronationis ritu Græcos Matrimonium vocare *σεφάνωμα* & *σεφανισμός*, hoc est, coronationem. Est autem apud Græcos prolixum Coronationis nuptiarum Officium, quod ex Euchologio descriptum exhibet Martene sæpe laud. C. in Ord. XVI. adjecta etiam peculiari Oratione, quæ a Sacerdote recitanda est, cum ex more Græcorum octava die nuptis coronæ deponuntur.

De S. Communione: poculi item, panis, & thalami nuptialis benedictione.

751. **P**RO uberioribus ad ferenda Matrimonii onera impetrandis gratiis olim in Latina Ecclesia Neo-nuptis data fuit S. Communio sub Missa nuptiali ante benedictionem. Constat id ex Missali Gelasiano, & MSS. Codicibus Rhemenſi & Gelonenſi



lonensi Annorum 900. in quibus in *Actione Nuptiali* post Canonem hæc notantur : *Post hæc dicis, Pax vobiscum; & sic eos communicas. Deinde, posteaquam communicaverint, dicis super eos benedictionem his verbis, Domine S. Pater &c. Unde peculiare fuit Theodori Cantuariensis Archiep. statutum in Capitulari N. 14. quo jubet, ut Neo-nupti post acceptam benedictionem abstineant se ab Ecclesia triginta diebus; quibus peractis, pœniteant quadraginta diebus & vacent orationi, & postea communicent cum oblatione. Progressu temporis ea consuetudo invaluit, ut sponsi ante ipsam Matrimonii celebrationem, expiatis per Confessionem peccatis, S. Synaxi reficerentur; de quo ipso Tridentinum sess. 24. in Decr. de Reform. Matr. Cap. 1. monet conjuges, ac etiam Rituale Rom. Hinc nostrum Rit. Viennense Tit. de Matr. Sacram. Can. 5. laudabilis, inquit, consuetudo obtinuit, ut sponsus & sponsa, sultem triduo antequam Matrimonium contrahant, sua peccata confiteantur, & ad SS. Eucharistiæ Sacramentum accedant; de his igitur peractis Parochi ab iis testimonium exigant.*

II. Apud Græcos etiam antiquitus Sponsis imperitum fuisse S. Communionem discimus ex supra laud. Epist. Theodori Studitæ; in qua id illis peculiare fuit, quod sub una duntaxat panis specie sponfos communicarent: quippe poculum vitreum, vino minime consecrato plenum, oblationi eorum inferviebat, ut scribit Bertholdus Nihusius in Tract. de Oriental. Commun. sub unica specie, & notat Arcudius L. 7. C. 32. At jam nunc (teste Martene) Græci in nuptiis non communicant: sed cum a prandiis, atque etiam domi permulti Matrimonia contrahant, poculum vino benedicto plenum Presbyter solet exhibere sponso & sponsæ, dum eos Matrimonio conjungit. Hujus poculi, imò & panis benedicendi ritus apud Latinos etiam olim in usu fuit, quin & nunc in quibusdam Ecclesiis viget.

- Verum quoad tempus benedictionis variant Ritualia apud Martene : in MSS. Pontificali Monasterii Lyrensis , Missali Eccl. Rotomagensis , & plurimis aliis præscribitur panis & vini benedictio statim a Missa nuptiali peracta ante benedictionem thalami ; contra in MS. Pontificali Ecclesiæ Ambianensis , & veteri Rituali Lemovicensi prior est thalami benedictio. De utraque Pontif. Ambianense ita habet : *Benedictio thalami cum odore incensi , & aqua benedicta , & stola. Sponsus sedeat ad caput lecti , & sponsa ad pedes , & stans Sacerdos incipiat hanc Orationem , Respice Domine &c. Quæ dicta , sequitur Evangelium secundum Johannem , In principio erat verbum &c. In cujus principio debet Sacerdos thurificare : lecto Evangelio , accipiat vinum & benedicat , dicens : Coenam suæ familiæ benedicat Rex gloriæ in nomine Patris &c. Quo finito , bibat Sacerdos , & det Sponso , & sponsus det sponsæ. Deinde possunt alii bibere &c. De benedictione panis simul & vini , eaque priusquam benedicatur thalamus , in MS. Missali Parisiensi hæc leguntur : *Missæ celebrata , recedant Sponsus & Sponsa ; & ipsis stantibus ante ostium domus illorum , præsentibus pane & vino , faciat Sacerdos benedictionem super panem dicens , Benedic Domine &c. Tunc Sponsus mordet in pane , postea Sponsa. Benedictio super vinum , Potum servorum suorum benedicat &c. Tunc Sponsus bibit , postea Sponsa. Quo facto , introducit eos Sacerdos per manum in domum dicens , in nomine Patris &c. Sequitur benedictio thalami.**

- 77 III. Hæc , ut vides , satis produnt variam fuisse apud veteres circa id genus benedictiones disciplinam ; non minus autem hodie etiam esse variam docet praxis Ecclesiarum : in quibusdam enim nulla fit panis aut vini vel thalami benedictio , in aliis solius vini & thalami. Quo porro ex mente Ecclesiæ spectet hic ritus , non aliunde certius eruitur , quam ex contextu verborum ,

rum, quibus benedictionum formæ constant. His vero attentis thalamus benedicitur, -ad procurandam Conjugibus fecunditatem, & liberandos eos ab illusione carnis ac dæmonis &c. Panis autem & vini benedictio eo refertur, ut jam nunc in his Bona Conjugum temporalia ad onus Matrimonii sustinendum necessaria, ac etiam nuptiale convivium benedicantur: hocque ipso sacro ritu admoneantur Conjuges, rerum temporalium proventus a Deo esse expectandos, & Matrimonii hilaria non nisi sancte ac sobrie agenda.

Ac revera cumprimis curæ esse debet Christianis conjugibus, ut nuptiarum solemnia cultu religioso celebrentur. Sane probrosum foret, eos in Christianorum nuptiis instrui ludos, ea convivia, a quibus pudor exularet, ubi sobrietas & modestia verterentur in crimen. Quid enim istud esset, nisi gentilium bacchanalia ad tanti Sacramenti solemnitatem transferre? quid, nisi gratiarum divinarum affluxum in ipso statim Matrimonii aditu avertere? Id quod ne eveniat, sedula ac vigili Pastorum cura opus est; propterea Pauli V. Rituale Romanum in prævia Parochorum instructione de Sacr. Matr. disertis verbis notat, *Nuptia verò qua decet modestia & honestate fiant; sancta enim res est Matrimonium, sancteque tractandum.*

O. A. M. D. G.



VVVV 3

IN-

# I N D E X

## IN RELIQUOS QUINQUE LIBROS SACRAMENTORUM.

- LIBER IV. de SS. Eucharistia. - pag. 1.

*Partitio Libri. Tridentini Canones de Eucharistia Sacramento: de Communionem sub utraque specie, & parvulorum: de Sacrificio Missæ. Decreta aliorum Conciliorum. Propositiones damnatæ ab Innocentio XI. Alexandro VII. & VIII.*

DISSERTATIO I. De SS. Eucharistiæ in genere natura, & institutione. - - - - 8.

§. I. Quid Eucharistiæ nomine veniat? - - - ibid.

*Figura & Symbola Eucharistiæ. Varia ejusdem Mysterii nomina. Definitio Eucharistiæ.*

§. II. An & quando Eucharistiam Christus instituerit? - 13.

*Animadversiones de Paschate Mosaico. Opiniones de Paschate a Christo celebrato. ASSERTIO I. Christus per se ipsum Eucharistiam instituit: & quidem post legalem Agnum Paschalem pridie mortis manducatum. ASSERTIO II. Pascha, in quo Eucharistiam instituit, uno eodemque tempore cum Judæis celebravit. Respondetur ad objecta. Corollarium de luna, vespere, & feria Paschatis Christi.*

§. III. An in Eucharistia sit vere ac realiter præsens Corpus Christi? - - - 39.

*Narratur Origo & progressus hæresis, realem Christi in Euch. præsentiam negantis. Refertur & refellitur*

*fellitur calumniâ d. mutata apud Catholicos in præ-  
senti argumento doctrina. ASSERTIO. In Eucha-  
ristiâ est vere ac realiter, & substantialiter præsens Cor-  
pus & sanguis Christi. Respondetur Sacramentario-  
rum Objectionibus.*

§. IV. Per quam actionem Corpus Christi præsens  
fiat in Eucharistia? - - - 69.

*Sectariorum errores. Doctrina Catholica, & in  
exponenda illa DD. opiniones. ASSERTIO. In  
Eucharistia Corpus & sanguis Christi existit per trans-  
substantiationem. Sectariorum argutiæ refelluntur.*

DISSERTATIO II. De Eucharistiæ ut Sacramentum est,  
natura, effectibus, & necessitate. - - - 88.

§. I. An Eucharistia sit Legis novæ Sacramentum?  
& num in re permanente consistat? - - - ibid.

*Novatores inter & Orthodoxos controversia.  
ASSERTIO. Eucharistia est verum legis Evang.  
Sacramentum; idemque in re permanente consistit:  
non autem in actione transeunte in sensu Novato-  
rum. Solvuntur objectiones. Confessio de ado-  
ratione Eucharistiæ & supplicatione Theopho-  
rica.*

§. II. Quæ sit Eucharistiæ Sacramenti materia? - - - 98.

*Errores de materia Eucharistiæ. Circa panem azy-  
mum & fermentatum varia Ecclesiæ disciplina.*

De materia Corporis Christi in Eucharistia. - - - 107.

*ASSERTIO. Pro Corpore Christi in Eucharistia  
consciendo necessaria materia est panis triticeus; ad  
valorem autem Sacramenti perinde est, seu sit azy-  
mus, seu fermentatus; ex præcepto tamen Ecclesiæ  
a Latinis azymus, a Græcis fermentatus adhiberi  
debet. Objectiones Sectulariorum. Corollarium præ-  
dicum.*

De

De Materia Calicis Eucharistici. - - 116.

ASSERTIO. *Solum de vite vinum est materia Calicis; huic nihilominus ex præcepto Ecclesiæ modica aqua misceri debet. Resolvuntur Objectiones. Corollarium practicum.*

§. III. Quæ sit forma Sacram. Eucharistiæ? - - 126.

*Novatorum error, & DD. Orthodoxorum opiniones. ASSERTIO. Forma Sacram. Eucharistiæ consistit in solis his aut æquivalentibus verbis, hoc est Corpus meum, hic est Sanguis meus; ea proinde, quæ illis præterea Latini & Græci adjiciunt, necessaria non sunt ad valide perficiendum hoc Sacramentum. Respondetur Adversariis.*

§. IV. Qui sint Sacram. Eucharistiæ effectus? - - 144.

§. V. An, & quæ sit hujus Sacramenti necessitas? - 147.

ASSERTIO. *Eucharistiæ perceptio non est ulli necessaria necessitate mediæ; adultis attamen necessaria est ex præcepto tam Divino quam Ecclesiastico. Diluitur Objectio.*

DISSERTATIO III. De Ministro & subiecto Sacram. Eucharistiæ. - - 153

§. I. Quis possit ministrare Euchar. Sacramentum? ibid.

*De Ministro Consecrationis. - - 154*

ASSERTIO. *Soli Sacerdotes possunt valide consecrare Eucharistiam; hi proinde soli sunt Consecrationis Ministri. Objectioni occurritur.*

*De Ministro dispensationis. - - 156*

ASSERTIO. *Ordinarius Eucharistiæ dispensandi Minister est Sacerdos; extraordinarius vero Diaconus.*

§. II. Cui ministrari possit Euchar. Sacramentum? & quæ in percipientibus requiratur dispositio? - 158

ASSE-

ASSERTIO I. Omnis & solus homo baptizatus, idemque viator, est capax suscipiendæ Eucharistiæ. ASSERTIO II. Ad Eucharistiam cum fructu percipiendam ex parte animæ necessario requiritur status gratiæ; ex parte corporis vero regulariter jejunium naturale. Fiunt animadversiones pro Objectis expediendis.

§. III. An laicis, ac universim non sacrificantibus debeat ministrari Eucharistia sub utraque specie? 164

*De Sacramentali Communione, Ecclesiæ disciplina & doctrina: item Novatorum error.* ASSERTIO. Communio sub utraque specie non est ex præcepto Christi necessaria laicis, & universim non sacrificantibus; jureque illis Ecclesia usum Calicis prohibuit. Refelluntur argumenta Novatorum.

DISSERTATIO IV. De SS. Eucharistia, ut est Sacrificium. 178

§. I. An Eucharistia sit verum Legis novæ Sacrificium? ibid.

*Sacrificii definitio & varietas. De Eucharistiæ Sacrificio Catholicorum doctrina; vocis Missæ æthymologia; Novatorum error.* ASSERTIO. Eucharistia est verum ac proprie tale Legis Evang. Sacrificium, quod in Missa offertur. Respondetur ad Objecta.

§. II. In quo consistat Euchar. Sacrificium, quod in Missa peragitur? 192

ASSERTIO I. *Res oblata in Missa Sacrificio est solus Christus, prout sub panis & vini speciebus existens.* ASSERTIO II. *In Missa actio sacrificandi est sola consecratio: quæ jure divino debet esse utriusque speciei, ut perfectum sit sacrificium. Momenta partis adversæ resolvuntur. Consuetudinem de Missa Præsantificatorum, & Missa sicca.*

§. III. Quale sit Eucharistiæ Sacrificium? - - - 208

*ASSERTIO. Est simul laeuiticum, simul eucharisticum, impetratorium, & propitiatorium. Observantur quædam pro Objectionibus expediendis. Confessarium de oblatione Missæ in SS. honorem: item pro vivis & defunctis. Corollarium de Missæ iudiciu, seu purgatoria.*

DISSERTATIO V. De Cæremoniis ad Eucharistiæ Sacramentum & Sacrificium pertinentibus. - - - 215

§. I. De varietate Missæ. - - - 216

*Missæ solemnis. Privata. Solitaria.*

§. II. De loco & tempore Missæ. - - - 221

*Templum. Altare. Dies liturgici.*

§. III. De apparatu ad Missam requisito. - - - 228

*Apparatus Altaris. Apparatus Sacerdotis.*

§. IV. De cæremoniis, quibus ipsum Missæ Sacrificium peragitur. - - - 235

*Actiones. Lectiones, Orationes, & Canon Missæ. Communio Sacerdotis & populi.*

LIBER V. De Pœnitentia. - - - 246

*Partitio Libri. Ad eum pertinentes Conc. Tridentini Canones, & aliorum Conciliorum Decreta, Propositiones item damnata ab Innocentio XI. Alexandro VII. & VIII.*

DISSERTATIO I. De natura, existentia, & institutione Sacramenti Pœnitentiæ, - - - 252

§. I. Quid, & quotuplex sit Pœnitentia? - - - ibid.

*Definitio Virtutis Pœnitentiæ. Definitio Sacramenti Pœnitentiæ.*

§. II. An detur verum novæ Legis Pœnitentiæ Sacramentum? & quando sit a Christo institutum? - 256

*Recen-*



*Recensentur Sæclarii Sacram. Pœnitentiæ negantes.*

**ASSERTIO I.** *Datur in Ecclesia verum novæ Legis Pœnitentiæ Sacramentum a Christo institutum.*

**ASSERTIO II.** *Tum autem præcipue fuit institutum, dum Christus post Resurrectionem suam Joan. 20. dixit, Accipite Spir. S. quorum remiseritis &c.. Respondetur Sæclarius.*

- §. III. An Sacramentum Pœnitentiæ sit diversum a Baptismo, ejusque memoria? - - - 271

**ASSERTIO.** *Sacram. Pœnitentiæ a Baptismo & ejus memoria est omnino diversum. Satisfit Objectionibus.*

**DISSERTATIO II.** De materia & forma Sacram. Pœnitentiæ. - - - 275

- §. I. Quibus tanquam materia & forma perficiatur Pœnitentiæ Sacramentum?

*Orthodoxorum doctrina, & Novatorum error.*

**ASSERTIO.** *Sacram. Pœnitentiæ perficitur Pœnitentis contritione, confessione, & satisfactione tanquam materia proxima: Sacerdotis autem absolutione tanquam forma. Solvuntur Objectiones.*

- §. II. Quæ contritio sit sufficiens ad Pœnit. Sacramentum? - - - 287

*Definitio & Divisio contritionis. Extra Sacramentum contritionis efficacia. Conditiones contritionis Sacramentalis. Doctorum opiniones de contritione ad Pœnit. Sacramentum requisita. ASSERTIO. Ad valorem & fructum Sacram. Pœnitentiæ non requiritur contritio perfecta: non etiam Dei dilectio, quæ diversa sit a spe veniæ; sufficit proinde attritio, etiam ut talis cognita. Respondetur Adversariis. Corollarium de sententia hujus securitate in praxi.*

§. III. Qualis confessio requiratur ad Pœnit. Sacramentum? - - - 312

*Confessionis Sacramentalis definitio & varietas. Novatorum sensa de Confessione auriculari, voce expressa: & ejus integritate. Vetus Ecclesia disciplina de eadem Confessione. ASSERTIO I. Ad valide perficiendum Pœnit. Sacramentum perinde est, seu Confessio sit secreta, seu publica; regulariter attamen secreta fieri debet. ASSERTIO II. Rata ac valida est Sacramentalis Confessio gestu, nutu, aut scripto facta, si loquendi moralis impotentiâ adsit; hæc contra si absit, voce fieri debet, idque adeo, ut, si secus fiat, Confessio evadat graviter illicita, proinde & invalida. ASSERTIO III. Ad valorem hujus Sacramenti necessaria est Confessio saltem formaliter integra: eadem quandoque sufficit, ut adeo materialis integritas non semper requiratur. Resolvuntur objecta. Corollarium de Confessionis integritate quoad peccata dubia, circumstantias, & alieni peccati manifestationem.*

§. IV. An in Sacramento Pœnit. imponi debeat satisfactio, eademque a pœnitente impleri & quando? - - - 334

*ASSERTIO. Confessarius regulariter obligatur ad imponendam satisfactionem, statui pœnitentis convenientem. ASSERTIO II. Eam vero pœnitens tenetur acceptare, & implere. ASSERTIO III. Non est tamen necesse, ut impleatur ante absolutionem. Respondetur Adversarius.*

§. V. In quo consistat, & quæ sit nominatim Absolutionis forma in Pœnit. Sacramento? - - - 347

*Doctrina fidei de potestate Clavium Ecclesiæ. DD. Orthodoxorum opiniones de absolutionis sacramentalis forma. ASSERTIO I. Absolutionis forma exprimi*  
necef-

*necessario debet verbis proprie talibus: hinc nutu vel scripto data est irrita. ASSERTIO II. Irrita pariter est, si concipiatur verbis mere deprecativis: quo igitur valeat, verbis indicativis exprimenda est. ASSERTIO III. Ad valorem autem ejus satis est a Sacerdote proferri hæc, aut his æquivalentia verba: absolvo te. Respondetur Adversariis.*

## DISSERTATIO V. De Sacramenti Pœnit. effectibus & necessitate. 380

§. I. Qui sint Pœnit. Sacramenti effectus? & an eos semper operetur? ibid.

*ASSERTIO I. Effectus hujus Sacramenti sunt: gratia sanctificans peccatorum remissiva, & gratiæ actuales ad vitandum relapsum; condonatio item pœnæ peccatis debiti, & meritorum per peccata perditorum restitutio. ASSERTIO II. Si Sacramentum Pœnit. sit validum, semper operatur gratiam peccati remissivam: nunquam proinde esse potest validum & informe. Expeditur Objection.*

§. II. An per Sacramentum Pœnit. peccata quælibet, & quomodo remittantur? 384

*ASSERTIO I. Per Sacramentum Pœnit. remittuntur omnia peccata, quantumvis gravia, & sæpe commissa. ASSERTIO II. Ita autem remittuntur, ut simul opera bona, ante peccatum in statu gratiæ facta, in ratione meriti redeant, & rursus imputentur. Satisfit Objectionibus.*

§. III. Quæ sit Pœnitentiæ Sacramenti necessitas? 395

*ASSERTIO I. Sacramentum Pœnit. etiam prout includit Confessionem Sacramentalem: est a Christo præceptum: jure proinde divino necessarium post Baptismum graviter lapsis. ASSERTIO II. Idem in re vel in voto iisdem est necessarium necessitate medi.*

*Refelluntur Sellariorum argutia. Corollarium de obligatione Confessionis sacramentalis, spectato jure tam divino, quam Ecclesiastico.*

**DISSERTATIO IV. De Ministro & subiecto Sacramenti Pœnitentiæ.** 416

- §. I. Quis sit Minister Pœnit. Sacramenti? ibid.  
*Sellariorum errores. ASSERTIO. Solus Sacerdos est Minister hujus Sacramenti. Resolvitur Objection. Corollarium de Ministri Pœnit. obligatione quoad sigillum Confessionis.*

§. II. Quibus ministrari possit Pœnit. Sacramentum? 423

*ASSERTIO. Omnes post Baptismum lapsi, quamvis proinde graves & inveterati peccatores, aut etiam ad extremum vitæ pœnitentiam differentes, capaces sunt valide & cum fructu percipiendi absolutionem Sacramentalem a Ministro præsentem. Corollarium de moribundi sensibus destituti capacitate ad percipiendam eandem absolutionem.*

**DISSERTATIO V. De Pœnitentiæ Sacramenti Cæremoniis secundum veterem & modernam Ecclesiæ disciplinam.** 432

- §. I. Quæ fuerit vetus disciplina in ministrando Pœnit. Sacramento, præsertim quoad ritum absolutionis & satisfactionis? ibid.  
*Ritus confitendi & absolvendi. De absolutionis dilatione controversia. Satisfactionis rigor & varietas.*

§. II. Quid a veteribus observatum in ministranda solemni pœnitentia? 438

*Origo pœnitentiæ publicæ. Minister & subiectum. Ritus ejusdem Pœnitentiæ.*

§. III. Quo ritu sit impensa publice pœnitentibus solemnis reconciliatio? 445

De

*De Ministro reconciliationis & tempore. De reconciliationis canonica cæremonia. De ejusdem non iteratione.*

- §. IV. Quæ sit moderna Ecclesiæ disciplina in administrando Pœnitentiæ Sacramento? - 449  
*Ritus Pœnit. Sacramenti apud Latinos. Ritus ejusdem Sacramenti apud Græcos. Communis utriusque Ecclesiæ disciplina circa pœnitentiam publicam.*

**LIBER VI. De Extrema Unctione.** 455  
*Partitio Libri. Tridentini Canones. Aliorum Conciliorum Decreta.*

**DISSERTATIO I. De existentia, institutione, & natura Sacramenti Extremæ Unctionis.** - 457

- §. I. Quid Extr. Unctionis nomine veniat? & an ea sit verum Legis novæ Sacramentum ab ipso Christo institutum? - ibid.

*Sectariorum error de existentia Extr. Unctionis. De ejus institutione Doctorum opiniones. Definitio hujus Sacramenti. ASSERTIO I. Extr. Unctio est verum Legis novæ Sacramentum. ASSERTIO II. idemque ab ipso Christo institutum: apud Marcum quidem C. 6. insinuatum, a Jacobo autem promulgatum. Respondetur Novatoribus.*

- §. II. Quæ sit Sacram. Extr. Unctionis materia? - 470

*ASSERTIO I. Materia remota est oleum olivarum: idque ex præcepto saltem Ecclesiæ, benedictum ab Episcopo, vel ex delegatione per simplicem Presbyterum. ASSERTIO II. Proxima materia est unctio; vel unica autem ad Sacramenti valorem sufficit, tametsi ex præcepto multiplex sit adhibenda regulariter. Corollarium de opinionibus circa valorem Extr. Unctionis per chrisina vel oleum non benedictum collatæ.*

§. III.

§. III. Quæ sit Extremæ Unctionis forma? 476

*Latinorum & Græcorum forma, earumque differentia.* ASSERTIO. Sacramentum hoc valde ministratur forma mere deprecativa: eaque Græcorum non minus, quam Latinorum. Expediuntur dubitationes. Corollarium de controversia ad formam indicativæ valorem pertinente.

DISSERTATIO II. De effectibus & proprietatibus Extr. Unctionis. 484

§. I. Quos effectus Sacramentum Extr. Unctionis operetur? ibid.

ASSERTIO I. Effectus sunt: infirmi quoad animam alleviatio; peccatorum, si quæ supersint, remissio, corporis sanitas, si animæ expediat. ASSERTIO

II. Primarius autem effectus est animæ alleviatio, seu reliquiarum peccati absterfus; reliqui sunt secundarii. Occurritur Objectionibus.

§. II. Quæ sint Extr. Unctionis proprietates? quidque de illis sentiendum? 490  
De necessitate Extr. Unctionis. De iteratione ejusdem.

DISSERTATIO III. De Ministro & subjecto Extr. Unctionis. 493

§. I. Quis Extr. Unctionis sit Minister? ibid.

*Novatorum error, & varia Ecclesiæ disciplina.* ASSERTIO. Solus Sacerdos est Minister Extr. Unctionis; vel unus autem sufficit. Respondetur ad Objecta.

§. II. Quibus ministrari possit Extr. Unctionis Sacramentum? 502

ASSERTIO. Soli infirmi sunt capaces suscipiendi Extr. Unctionis Sacramenti. Resolvitur Obiectio. Corol.

*Corollarium de conditione infirmi, cui danda sit Extr.  
Unctio.*

**DISSERTATIO IV. De cæremoniis Extremæ Unctionis.** 507

**§. I. Qui sint ritus ad Extr. Unctionis materiam pertinentes?** - - - - *ibid.*

*Ritus benedictionis olei apud Latinos. Ejusdem benedictionis ritus apud Græcos.*

**§. II. Quo ritu ipsum Extr. Unctionis Sacramentum ministratur?** - - - - **510**

*Ritus Extr. Unctionis apud Latinos. Ejusdem ritus apud Græcos.*

**LIBER VII. De Ordine.** - **515**

*Partitio Libri. Ad eum pertinentes Tridentini Canones, & aliorum Conciliorum Decreta.*

**DISSERTATIO I. De natura, existentia, & institutione Sacramenti Ordinis.** - - - **519**

**§. I. Quid sit Ordo, & quæ in Ecclesia Ordinum varietas?** - - - *ibid.*

*Definitio Ordinis. Existentia Ordinis Ecclesiastici contra Sæclarios asseritur. in Ecclesia tam Latina, quam Græca varietas Ordinum. Eorundem munia.*

**§. II. An detur aliquod Ordinis Sacramentum a Christo institutum? & quod illud?** - - - **528**

*Inter Novatorum errorem, & DD. Catholicorum opiniones differentia. ASSERTIO I. Ordinatio saltem aliqua est verum Legis Evang. Sacramentum a Christo institutum. ASSERTIO II. Sacerdotis Ordinatio est tale Sacramentum, idque ab ipso immediate Christo in Cæna ultima institutum. Refelluntur Novatorum argumenta. Corollarium de Ordinatione Episcopi, Diaconi, Subdiaconi, & quatuor Minorum.*

DISSERTATIO II. De materia & forma Sacramenti Ordinis.

545

- §. I. Quæ sit materia & forma Ordinationis Presbyteri?

ibid.

*Ritus in Ordinatione Presbyteri varietas apud Latinos & Græcos. Certa de hujus Ordinationis ritu sententia; status controversia; variae Doctorum opiniones. ASSERTIO. Verisimilius est Christum, Ordinis Sacerdotalis Sacramentum instituentem, ejus materiam & formam disjunctive tantum determinasse, ita videlicet: ut vel sola manus impositio cum Oratione sufficiat; vel cum hac simul instrumentorum porrectio, eique adjuncta verba, pro materia & forma completa adhiberi possint. Respondetur ad Objecta.*

- §. II. Quæ sit materia & forma reliquorum Ordinum?

563

DISSERTATIO III. De Sacramenti Ordinis effectu, & adnexa Ordinibus obligatione.

566

- §. I. Qui sint effectus Ordinis Sacramento proprii?

ibid.

*Animadversio I. de gratia. Animadv. II. de characteribus.*

- §. II. Quæ sit obligatio Ordinibus adnexa?

570

*Obligationes omnibus Ordinibus communes. Obligationes Majoribus Ordinibus peculiæ.*

DISSERTATIO IV. De Sacramenti Ordinis Ministro & subiecto.

579

- §. I. Quis sit Ordinationis Minister?

ibid.

*Status controversia, & opinionum varietas. ASSERTIO I. Solus Episcopus est ordinarius Minister Ordinationis Episcopi & Presbyteri: quin etiam Diaconatus, Subdiaconatus & quatuor Minorum. ASSERTIO II. Simplex Presbyter potest esse extra ordinarius Minister Minorum Ordinum: non item Episcopatus & Sacerdotii; de Diaconatu & Subdiaconatu*

natu



*natu vix certi aliquid statui potest. Diluuntur argumenta Adversariorum. Corollarium de Chorepiscoporum Ordine, & ministeriali potestate.*

- §. II. Qui sint capaces Sacram. Ordinis suscipiendi? 595  
*De valida Ordinis susceptione. De ejusdem licita susceptione. Corollarium de Episcopissis, Presbyterissis, Diaconissis, & Subdiaconissis.*

DISSERTATIO V. De Ritibus ad Ordinis Sacramentum pertinentibus. - - - 602

- §. I. Quæ sint juxta Ecclesiæ disciplinam ante Ordinationem observanda? - - - ibid.  
*De remota ad Ordines dispositione. De proxima item dispositione.*

- §. II. Quid de ritibus in Ordinatione ipsa observari solitis præcipue notandum veniat? - - - 608  
*De loco, tempore, & gradibus Ordinationum. De manus impositione, & unctione. De instrumentorum traditione. De vestibus, quibus ordinati induuntur.*

## LIBER VIII. De Matrimonio - 620

*Partitio Libri. De Sacramento Matrimonii Tridentini Canones, & aliorum Conciliorum Decreta, item Propositiones ab Innocentio XI. damnata.*

DISSERTATIO I. de natura, existentia, & institutione Sacramenti Matrimonii. - - - 624

- §. I. Quid sit Matrimonium? quæ item de illo generatim sumpto notanda veniant? - - - ibid.  
*Nomina Matrimonii. Definitio & substantia Matrimonii. Ejusdem origo & institutio. Honestas Matrimonii. De necessitate illius Catholica doctrina.*

- §. II. An Matrimonium in Lege Evang. sit verum & proprie tale Sacramentum a Christo institutum? - - - 632

*Definitio Sacramenti Matrimonii. DD. Orthodoxorum opiniones, & Novatorum error. ASSERTIO I. Matrimonium est verum Legis Evang. Sacramentum a Christo institutum: non vero ab hominibus in Ecclesia inventum. ASSERTIO II. Institutio illius, spectatis Patrum sensis, probabiliter facta tum, dum Christus in Cana Galilææ nuptiis interfuit Joan. 2. Reselluntur Novatorum argutia.*

- §. III. An quodlibet Matrimonium in statu Legis Evang. contractum sit verum Sacramentum? 643  
*Sententia certæ. Sententia controversæ.*

DISSERTATIO II. De materia, forma, Ministro & subiecto Sacramenti Matrimonii. - - - 650

- §. I. Quæ sit Sacram. Matrimonii materia & forma? - - - - - ibid.

*Opiniones de Ministro, materia item, & forma hujus Sacramenti. ASSERTIO. Verisimilius est materiam Sacram. Matrimonii esse legitimum contrahentium consensum internum: formam vero verba, vel alia signa hunc consensum exprimentia. Corollarium I. de requisitis ad consensum, qui sit contrahens Matrimonii legitimus. Corollarium II. de conditionibus vel patlis, quæ consensui adjecta Matrimonio non efficiunt: aut ex adverso illud reddunt irritum.*

- §. II. Quis sit Minister Sacramenti Matrimonii? - 663  
*ASSERTIO. Verisimilius est Ministros Sacramenti Matrimonii esse ipsos contrahentes: non autem Parochum. Respondetur adversæ sententiæ Patronis.*

- §. III. Quod sit subiectum capax Sacram. Matrimonii? - - - - - 680  
*De subiecti capacitate generatim. De subiecti capacitate ad valide suscipiendum Matrimonii Sacramentum.*

tum. De subjecti capacitate ad licitam simul ejusdem Sacramenti susceptionem.

DISSERTATIO III. De effectibus & proprietatibus  
Sacram. Matrimonii. - - - - - 684

- §. I. Qui sint effectus Sacram. Matrimonii? - - - ibid.  
§. II. Quæ sint ejusdem Sacramenti proprietates? 685  
*De Matrimonii unitate, eique opposita Polygamia.*  
*De indissolubilitate Matrimonii. De obligatione*  
*Conjugum.*

DISSERTATIO IV. De ritibus ad Matrimonii Sacramentum pertinentibus. - - - - - 695

- §. I. Quæ dispositionis instar ex ritu Ecclesiæ præmittantur Sacramento Matrimonii? - - - ibid.  
*De natura & fine sponsalium. De ritu sponsalium.*  
*De publica sponsalium denuntiatione, seu Bannis.*  
§. II. Qui ritus in solemnitate ministrantur Sacram. Matrimonii juxta Ecclesiæ disciplinam sint aliquando observati, aut nunc observandi?  
*De loco & tempore Matrimonii solemniter celebrandi. De manuum conjunctione, annulo, & benedictione nuptiali. De flammeis & fertis. De nuptiorum Communione: panis item, poculi, & thalami nuptialis benedictione.*



# Errata

# Corrige.

Pag.	Lin.	29. Sess. 14.	Sess. 13.
17.	24.	At quod hic.	At quot hic.
25.	6.	N. 6. relato	N. 15. relato
43.	25.	An. 2531.	An. 1531.
45.	28.	per se Ambrosio	pro se Ambrosio
55.	9.	Origenis	Origenis.
Ibid.	ult.	Joan. II.	Joan. 15.
64.	29.	id tot numerosis	in tot numerosis
79.	2.	pecio	specie.
84.	9.	Certe Forerus	Certe Forerus
109.	27.	azyma	fermentata
Ibid.	29.	in fermentato	in azymo
162.	5.	a culpis	a culpis venialibus.
163.	23.	jejunium regulariter	jejunium naturale
176.	12.	Can. 25.	Can. 25.
190.	18.	Lev. 6.	Lev. 16.
214.	25.	Quest. 5.	Quest. 4.
215.	3.	Land. S. P.	laud. S. P.
255.	3.	facturos.	facturos satis.
333.	23.	dest. 2.	Sest. 2.
Ibid.	24.	si discriminis	id discriminis
338.	12.	que opus est	opus est
348.	20.	pæconis instari	pæconis instar
Ibid.	ibid.	pœnitent.	pœnitenti.
362.	26.	distant legant leges	distant leges
363.	22.	per literas concessam	per literas conceptam
374.	14.	Menardus in Saram.	Menardus in Sacramentum.
378.	25.	adjicendi	adjicendi
386.	ult.	unt loca	sunt loca
395.	2.	perseverentia	perseverantia
413.	12.	Orientium	Orientalium
Ibid.	26.	statu possit	statui possit.
422.	13.	Alerum	Alerum
426.	5.	Ac id genus	At id genus
458.	3.	quæ deinde	quo deinde
492.	12.	ut eadem	ut in eadem
494.	30.	Sec. III.	Sec. XIII.
552.	13.	Item,	Idem,
576.	29.	pronuntiat eum	pronuntiat in eum
583.	25.	noluerint	noluerit
586.	25.	id quod negat	id quod Concilium negat
589.	14.	promovendo	promovendus
590.	13.	agebat Basilius	agebat Basilius
605.	10.	tonso capillo Deo,	tonso capillo, Deo dedicatur
646.	5.	legitimum initum	legitime initum















